

Anten



no Unico

A. 1/2 - 1/2

XIV 6151

5.20

Allegato

da Napoli

CA
CA

Me
1

vsus Fratribus Justinis as.
Mexico

Sancta Maria

De Victoria

Margherite de Bouffler





A LA
SERENISSIME PRINCESSE
MADAME
ISABELLE
CLAIRE EVGENIE
INFANTE D'ESPAIGNE, &c.



MADAME,
Quoy que l'affection naturelle, des parents envers leurs enfans, n'ayt iamaï faite d'honneste excuse, pour en faueur d'eux se flatter, & s'en faire croire, si n'eust cela

EPISTRE.

pourtant tant gaigné sur moy, pour
 m'estre si proche celle, que Dieu a
 voulu estre l'Autheur de ce liure,
 que de m'auoir esté donnée pour fil-
 le, pour m'induire à le publier,
 voire de l'offrir à V. A. Sci^{me} si
 aultre n'en eust esté le motif, que
 de ce qui est de la nature. Et ne fust
 pour le premier, que comme elle ap-
 partient à Dieu d'un tiltre trop,
 meilleur qu'à moy, comme celuy, du-
 quel le plus grand honneur, que
 nous ayons, est d'estre nommés les en-
 fans, & de luy pouuoir dire, No-
 stre Pere qui es és cieux, si ie n'ay
 peu ni deu contre sa volonté, entre-
 prendre de disposer de l'arbre, qu'il
 luy a pleu de prendre à soy, dès sa
 plus tendre ieunesse, tant moins en
 pouuoy- ie disposer des fruiçts qui
 sont

EPISTRE.

sont siens, & qu'il luy a pleu produire en elle, pour les supprimer & cacher. Et cela encore d'autant plus, que comme profonds sont les iugemens, de celuy qui esleue le pauvre du fumier, qui appelle les choses qui ne sont point, comme si elles fussent: sa bonté ayant esté telle, enuers ceste sienne pauvre creature, qu'en ceste infirmité tant de sexe, que de corps, il luy ait faict esclorre ceste piece; par laquelle elle ne se feinct d'attaquer le monde en son fort, iusqu'à tascher, si elle peut, en le vainquant le porter au ciel: n'y ayant eu faute de gens entendus en ceste matiere, qui quelque grossier qu'en soit le style, l'ont iugé estre de quelque poids, iusqu'à en demander l'edition: voire contre l'in-

EPISTRE.

rention tant d'icelle (qui en tout cas
 ne l'eust permis de son vivant, comme
 iusqu'à present elle y a contredit)
 que de moy-mesme, qui autrement
 faisous estat, tant pour euter les
 murmures, que pour l'instruction
 particuliere, & consolation de moy
 & des miens, le tenir clos & ser-
 ré chez moy, attendant ce qu'il eust
 plu à Dieu, autrement en ordon-
 ner: à fin, disoient-ils, de ne
 fouyr plus long-temps le talent de
 Dieu en terre, quand il se peut
 multiplier, & ne differer de met-
 tre la chandelle sur la table, quand
 elle peut esclairer ceux qui sont en
 la maison: voire pour n'estouffer
 l'esprit, qui a esté donné expres,
 à fin d'en viuisier d'autres: ioinct
 l'instance de plusieurs, grands, pe-
 tits,

EPISTRE.

tits, & mediocres, qui en auoient
 ony parler; & qui l'ont requis dès
 il y a quatre ans ou plus: aussi
 que, comme aucuns ont bien sçeu
 dire, il ne viendrait mal à pro-
 pos, tant pour aduancer un plus
 grand œuvre, à quoy l'esprit de Dieu
 semble l'appeller: que pour obuiuer
 aux discours & iugemens finistres,
 qu'aucuns se seroient ingerez, ou
 pourroient ingerer de faire, tant
 de l'œuvre, que de l'Autheur, con-
 damnant auant que veoir, ce qui les
 deüst edifier (de mesme que iadis
 les escrits de Sophocle poëte tragi-
 que, seruirent pour le purger de la
 calomnie de ses enfans propres, qui
 l'accusoient d'auoir perdu l'esprit)
 tout cela considéré, quoy que non
 sans nouuelle mortification, de celle

EPISTRE.

qui se captive en cest endroict, pour
 suiure le courant de l'eauë, preste &
 resignee qu'elle estoit, comme vn
 Abraham son Isaac, de sacrifier &
 mettre au feu ce liure, si l'obeissance
 deue l'eust requis, comme l'obeissance
 le luy auoit faict escrire, & comme
 (peut-estre mal à propos) elle auoit ja
 faict d'vn sien autre escrit, à la pre-
 miere semonce que luy en feit, vn qui
 tenoit lieu de pere spirituel: i'ay
 pensé faire en cela mieux, de me
 mortifier de mesme, pour suiure le
 iugement d'autrui, que de m'arre-
 ster au mien propre. Ce que puis
 qu'il a esté trouué bon ainsi, ne se
 pouuant dire, à qui plus dignement
 se pourroit offrir, ni le fruiet né en
 ce pais, qu'à celle qui avec sa royalle
 grandeur en tient les resnes & le gou-
 uernail:

EPISTRE.

uernail : ni ce qui vient d'une fille,
 qu'à celle qui en ce sexe surpasse
 la vertu des hommes : ni ce qui est
 spirituel, qu'à celle de qui les allées
 & venues; les actions & depor-
 temens, la lecture, les deus, & par-
 mi tout, le riche & deuot oratoire,
 estoffé de tant de reliques & thresors
 celestes; où elle passe si sainctement
 la meilleure partie de ses bonnes
 heures, ne respirent que Pieté: &
 partant sous la protection de qui, il
 peust plus seurement subsister, &
 veoir le iour, si autre pour toutes
 ces raisons n'a peu estre le debuoir de
 ma tres-humble seruitude, que de
 le ietter sous cest espoir, aux pieds
 de V. Sc^{me} A. c'est ce que ie la
 supplie receuoir avec autant de beni-
 gnité & faueur, que luy desire &
 souhaite

E P I S T R E.

*souhaitte de prosperité & grandeur
eternelle & temporelle, celui qui
demeure à iamais,*

MADAME,

De V. A. Ser^m

Tres-humble, tres-deuot,
& tres-obeissant seruiteur
& subiect.

M. D. C.

AV



AV DEVOT LECTEUR.



E te puis dire, qui que tu
sois, Lecteur Chrestien
& deuot, qu'en quelque
sens que tu le prènes, soit
pour l'Autheur, soit pour
le style, soit pour le sujet
du discours; ce liure est
simple & de bonne foy: & auquel tu te
peux fier, pour te conduire où il dira. Si
toutefois, avec le courage, tu as bon pied &
bon œil, voire des aîles pour le suivre. Car
bien simple, pour l'Autheur, puis qu'e-
stant d'une simple fille, halenée de cest es-
prit simple, iadis apparu en colombe,
qui aime la simplicité; qui appelle à soy les
simples, & deuise avec les simples; comme
il refuit les feincts & les doubles, reuele
aux petits enfans, ce qu'il tient caché aux
sages, ne peut aussi qu'il ne retienne l'air
de la

Mat. 3.

Mat. 11.

Ioh. 1.

1 Par. 29.

Pro. 9.

Pro. 25.

Sap. 1.

Mat. 12.

A V L E C T E U R.

de la source d'où il vient, & qui luy est originaire, pour marcher en simplicité, & comme on dit, en bonne foy. Et ce d'autant plus, qu'après diuers pouffemens, qu'icelle en a eu plusieurs années, & qu'elle tenoit secrets & cachez, refuyant par humilité, comme il est aduenü à d'autres, de rien faire pour cest esgard, ni dire legèrement: contraincte en fin comme Ieremie, par le feu interieur qui la brusloit, & forçoit de rompre le silence, pour en auoir l'aduis de ses Peres, & superieurs ordinaires: comme elle fait, le communiquant au feu Reuerendissime Euesque de Tournay, Messire Michel d'Esne premierement, qui dès lors m'en donna la charge, & d'en faire l'examen, & à sa Reuerente Abbesse, D. Marguerite de Boufflers: sous l'adueu desquels deux, elle escriuit les trois premiers liures: comme sous l'autorité, voire commandement, du Reuerendissime moderne, Messire Maximilien de Gand, elle a faiet le quatriesme, le tout a esté avec telle promptitude, sans hesiter, ni tarder: se seruant d'elle cest esprit, comme de la plume d'un escriuain qui va viste, luy representant en un moment, ce que la plume ne pouuoit suivre, quelque habille qu'elle fust, plus

l'ope-

A V L E C T E U R.

L'operation du saint Esprit, pour marque de simplicité, se monstre en celle, dont le resort des actions, n'est qu'une pure obeissance.

Et plus encore, de ce qu'estant ceste ame affinée, au fourneau d'affliction, comme vn Psal. 11 argent espuré sept fois, par les combats de plusieurs ans, qui en ont exercé la patience, tant au dehors, par les alarmes, que luy ont liuré le diable & le monde, & notamment és derniers temps: qu'au dedans, par l'alternatiue, des delaissemens & ariditez, apres les onctions & caresses, & subtraction de secours sensible, dont Dieu exerce ses amis, & que Iesus-Christ mesme ayant gousté en la croix, trop plus amere que ne fut la Mat. 27. myrrhe, que luy presenterent les Iuifs, Mat. 25. luy en a donné si bonne part: & en vn mot, par la pratique, de tout ce que tu veras icy escrit, où sans y penser, elle semble s'estre peincte comme en vn tableau: Dieu ayant daigné grauer en ceste creature, par le butin d'experience, tout ce qu'elle deuoit dire & enseigner aux autres, tant plus l'aloy en est receuable, & hors de suspicion, d'aucun meslange de malice.

Il n'en ditay moins du style, pour la simplicité qui y est. Si toutesfois simple se doit

dire,

A V L E C T E V R.

dire, ce qui s'esleue si haut quelquefois, qu'à peine qu'on ne le perd de veüe. Mais tel neantmoins, que si bien, il n'est si releué, comme peut estre tu voudrois; estant par fois autant bas, redondât & coulant sable & limon: comme en d'autres il est haut, pressé, clair, & accompli, s'esleuant par dessus les nuës, & parlant langage d'Anges: marque que cela est de l'enthousiasme, qui animant ceste plume, en hastoit tellement le cours, qu'à peine acheuoit-elle les mots, qu'elle laissoit imparfaits, dont l'autographe tesmoignera: tant s'en faut, qu'elle eust le loisir d'arondir les periodes, de les limer & polir, & mesurer à la cadence; voire quelque fois d'en bien agencer la suite: luy aduenant en cela le mesme, que saint Paul ne se feind de dire de soy, qu'estant *idiot au langage*, il ne l'estoit *quant à la science*: cela te devant estre encore, vn autre argument de bonne foy, fera à toy de ne t'offenser, ni mal faire ton profit, de ce qui plustost te doit edifier.

1. Cor. 11.

Mais sur tout, pour le subiect, comme l'intention n'en est autre, sinon t'appellant à ce grand conuiue, conuiue gras & mouelleux, & de vin espurgé de sa lie, des nopces de l'agneau, où le Dieu des Dieux est veu

Isa. 25.

Apoc. 19

Psal. 83.

AV LECTEUR.

en Sion : pain qu'il est dont les Anges sont Tob. 12.
 repus, & dont elle auoit gousté les saveurs :
 pratiquant en cela, le *Qui audit, dicat uenit*, Apoc. 22.
 de l'Apocalypse : pour n'estre pire que ces
 ladres de Samarie, qui s'estans repus des
 viandes, & enrichis des despoüilles des Sy-
 riens qui s'en estoient fuis : disoient entre
 eux, *cé iour cy est iour de bonnes nouvelles*, si
 nous nous taisons & ne l'annonçons à la ville,
 nous serons conuaincus de crime. Et pour n'ac-
 cueillir dessus soy le *va mihi qui tacui*, du 4. Reg. 7.
 Prophete. Et le malheur à moy, si ie n'euan-
 gelize de saint Paul : comme si elle fust, 1a. 6.
 l'une des seruantes de ceste Sapience, qui
 crie *es carrefours*, *aupres des portes*, *deuant la* 1. Col. 9.
ché ; *ô vous hommes ie vous appelle &c.* Et qui
 ayant immolé ses victimes, tiré son vin, & mis Pio. 1.
 la table (du sacrifice de son corps & sang, Pio. 9.
 comme aussi de contemplation celeste &
 refection spirituelle) enuoye ses damoiselles,
 pour t'appeller au donjon de perfection, &
 pour estre sur les murailles de la cité, pour
 t'esleuer en merite, & par consequent en
 gloire, par dessus ceux-là mesme, qui par
 leur doctrine, seruent de murs à l'Eglise (tant
 grand est le merite de l'amour, à quiconque
 s'en rend capable) t'appellant, di-ie, à ce
 conuiuie ; comme son intention n'est autre,

Sion

AV LECTEUR.

Mat. 22.

Sap. 1.

Psal. 30.

Psal. 90.

finon t'en dire aussi le chemin, & quel habit il t'y faut porter, qui est celui de simplicité, & ancantissement de soy-mesme (seule vraye robbe nuptiale, suiuant ce que dit le saint Esprit, *enquerez vous de Dieu en bonté, & le cherchez en simplicité de cœur*) le tout à l'exemple d'elle qui parle, autant éloignée qu'elle est (comme vestuë de ce mesme habit) de la vanité de ce siecle, & de l'amour propre, qu'elle combat, comme guericaussi de la pœur des mesdisances, qu'elle mesprise, qu'ablorbée de ce saint amour, elle tient ferme entre ceux, qui *mussez au secret de la face de Dieu, contre le troublement des hommes*: voire cachez dans son cabinet, contre la contradiction des langues, comme dans vne cité munie, sont mis au dessus du vent, & atteincte de la blesseure, tant des louanges, que des blasmes, dont ils pourroient estre assiegez: suiuant ce que dit le Prophete. *Tu as mis le tres-haut pour ton refuge, le mal ne t'accueillera point, & le fleau n'approchera point de ta demeure*: Tout cela considéré, rien de plus simple, ni de meilleure foy ne se peut dire, que ce qui recommande tant simplement, la simplicité nécessaire, pour paruenir au degré souuerain de ce bien qu'elle t'annonce, comme fait ce liure.

Pour

AV LECTEUR.

Pour dequoy faire ton profit, n'y ayant autre moyen, sinon de le lire auant iuger: practiquant pour cét esgard, le *vent & vide*, de l'Ange à saint Jean en l'Apocalypse, le *scrutamine* de l'Euangile, & le *goustez & voyez* du Psalmiste: pour en vser comme feist Moysc au buisson ardent, *iray*, dit-il, & *verray cete grande vision*: & comme la Roynede Saba à Salomon, qu'elle voulut veoir & ouir en personne: & comme ceux de Samarie, oyant par eux-mesmes Iesus-Christ; dont vne simple femme leur auoit dit *des nouvelles*. Et non comme ceux, qui mesurant les œuures de Dieu à l'infirmité des outils, pour desdaigner ce qui est d'une fille; s'arrestant plus à la creature qu'à l'esprit, qui *souffle ou il vent*, & deuant lequel il *n'y a masse ni femelle*: comme si fussent choses de neant, ce qu'ont escript ces admirables Sainctes, les Brigides, les Hildegardes, les Gertrudes, les Mechtildes, les Angelines de Folligni, les Catherines de Siene & de Genes, & n'aguere les Tereses, & tant qu'il y en a eu de ce sexe, qui ont mis la main *ad fortia*: s'engagent à ceste estrange alternatiue, ou de condamner tout ce que le saint Esprit auroit operé par elles, ou de dite que sa main est racourcie, pour ne

Apoc. 6.
Ioh. 5.
Psal. 33.

Exod. 3.
1. Reg 10r

Ioh. 4.

Ioh. 3.
Gal. 3.

Pro. 31.

A V LECTEUR.

pouuoir encore le semblable : ou qui seroit encore pis, d'en vser comme ceux, qui sans ouürir le sac, & sans veoir les pieces, iugeant le procez sur l'etiquette, font comme des charbons des thresors, ainsi des thresors des charbons : pourquoy ne suivre cet expedient, pour ne negliger les dons de Dieu, & faire que la grace n'en soit vaine?

1. Cor. 13.

Psal. 63.

Ce qu'à fin que nul ne s'ingere d'imputer apres Dieu à autre ouurier, comme si ce fult vn part supposé, ou emprunté d'ailleurs : comme l'esprit de ialousie auroit faict dire à quelques vns, de qui les profondes inuentions, & curieuses subtilitez ; pour comme dit le Prophete, *musser des laes, & dire qui les verra?* voire le nez plus que de Rhinoceros, des espies employez pour sonder quand elle escriuoit, si elle s'aidoit d'aucuns memoires, ou transcriuoit quelque liure, y ont en fin perdu le North, confus par leurs propres yeux, (si toutesfois ils croyent leurs yeux) si bien ie t'auouë estre de moy, que vient ce mot d'ANTEROLOGIE pour luy auoir donné ce nom, comme font parrins & marrines, aux enfans de leurs amis: si pourtant il te prend humeur, de dire que r'y aye quelque part, comme il au-

roit

A V LECTEUR.

roit fait à quelques vns, qui pourroient à vn besoing prendre les arbres pour les hommes; comme cét aueugle de l'Euangile, qui n'estant encore illuminé qu'à demy, disoit qu'il voyoit des hommes, comme des arbres qui Mat. 8. ~~marchoient~~, ou comme ceux qui prendroient des pieux de bois arrangez, pour vne armée marchant en bataille: sera à toy de prendre garde, que faisant des parrins les peres, tu ne t'y engages, comme les autres; si aucuns tu en as nommez. Ou qui seroit plus absurde encore, de dire Adam createur de tant qu'il y a d'animaux sur terre, pour en Genes. 2. auoir donné le nom à tous; Dieu les luy ayant amenez, à fin qu'il veist comme il les appelleroit. Que diray-ie plus? De dire l'Ange estre le pere de Iesus-Christ, pour estre vn Ange qu'il l'a nommé, dès auant qu'il Luc. 2. fust conçu au ventre. Brief, comme n'importe à qui va de nuit, parmi les halliers & precipices, comme s'appelle le flambeau, qu'il rencontre en son chemin, ni qui en est le porteur, ni de quel vestement, sexe, ou hauteur; pourueu qu'il te soit fidele, & te mene droit où il faut: si tel entre plusieurs flambeaux ardans, & luisans ensemble, que Dieu enuoye tous les iours, pour conduire les hommes à soy, ie te puis dire estre ce

AY LECTEUR.

liure, & qui te dira des aduis, que peut estre ne trouueras ailleurs, reste que te gardant de dire mal, de ce qui te veut tant de bien: & d'esteindre l'esprit où il est, tu ne te feignes de le suivre au pas. Tant que paruenu au lieu qu'il designe, le bon-heur t'en soit à iamais, & la louange à celuy, à qui appartient, & auquel ie te somme & coniuire; de donner sur ce sujet, comme par tout aussi ailleurs avec moy, ce que toy & moy luy debuons, qui est tout honneur, vertu & gloire.

J. BOUCHER *Docteur en Theol.*
& *Archidiacre de Tournay.*

A

A
D. I. D. C.

SVR L'EDITION

DE SES TRAICTEZ

DE LA RVINE

DE L'AMOUR PROPRE,

ET DV BASTIMENT

DE L'AMOUR DIVIN.

STANCES.

DEpuis un trop long temps les plumes indiscrettes
Des hommes insenssez, discourent de l'amour:
Tant de iours ont passé ! que chacun à son tour
A chanié ses douleurs, & ses peines souffertes.

*Qui chante les beautez qu'en ce monde il a veuës:
Qui chante son bon heur, sa ioye, & son plaisir:
Qui chante en souffpirant son tardif repentir:
Qui chante les faueurs d'une dame receuës.*

*Qui se contente en soy, oublieux de ses peines;
Qui discourt de l'amour, & ne dit rien de bon;
Qui monstre par escrit qu'il n'a point de raison:
Qui nourrit son malheur en des attentes vaines.*

Ce sont les leurs tesmoings d'un siel trop peu sage:
Maintenant il nous fait apprendre autre leçon,
Il nous faut en boucher un meilleur hameçon,
Et ancrer nostre nef en un autre riuage.

*Vne fille esleuée autant que peut vne ame,
Qui n'a point d'autre obiet que l'amour de son Dieu,
Ruinant un amour, en met vn en son lieu,
Pour eschauffer nos cœurs d'une plus sainte flamme.*

LIVRE I.

*Elle nous monstre au doigt le meurtre & le carnage
Que fait l'amour de soy, & nous fait respirer,
Elle ouvre le chemin, à fin de nous tirer
De la terre d'Egypte, & d'un cruel seruage.*

*Elle nous sçait conduire à cet amour supresme
De Dieu le Createur, & du bien souverain:
Elle nous aduertit de n'aimer point en vain:
Et parlant de n'aimer le monde ni soy-mesme.*

I I.

*Elle pare la chambre où l'espouse repose,
Espouse qui s'unit à Iesus son espoux:
Elle appelle avec soy le moindre d'entre nous,
Qui la crainte de Dieu a dans son ame enclose.*

I I I.

*Elle raconte aussi du secret purgatoire
Les gracieux brandons, où cet amour diuin
Consomme nos delicts, & nous meine au chemin
(Par la subtraction) de l'eternelle gloire.*

I V.

*En fin, elle nous dit, de quelle façon l'ame
Separee qu'elle est d'actuel sentiment,
Se peut unir à Dieu familièrement,
Et sans se consumer se nourrir en sa flamme.*

*Adioustant les moyens, par lesquels peut un homme
S'acheminer au point de la perfection:
Comme il peut paruenir à la sainte union
Qui nous rend bien-heureux, & tous nos biens consume.*

*Si vn moy-n'esprit dit, qu'il ne peut comprendre
Des discours esleuez sur sa capacité,*

Qu'il confesse humblement son imbecillité,

33 *Tel p.ut bien admirer ce qu'il ne peut entendre.*

*Si c'est vn mesdisant, fils de la calomnie,
Il le faut laisser dire. Ainsi souuent vn chien
Abbaye apres la lune, où il ne gagne rien.*

33 *L'enuie de vertu toujours est l'ennemie.*

Ce sont boutons cueillis es vives Elizées,
Après auoir sorty du vaisseau de Caron,
Après auoir franchy à force d'aïron,
Du lac à neuf replis les ondes irritées.

Non, ce sont fruits cueillis en la terre Idumée,
Quand le lourdain passé tirés de haute main,
Elle a peu respirer dans un air plus humain,
De l'effroy d'Hyrcanie au besoing respirée.


Belle ame pren courage. Ainsi l'ame fidelle
Après auoir monstré du salut le chemin,
Après auoir seruy à Dieu & au prochain,
Se guinde dans la ciel à la gloire eternelle.

Ainsi puisses tu veoir & l'enuie & la haine
Creuer deffous tes pieds, mordant la terre aux dents,
Et comba par honneur contre les impudens,
» L'honneur n'est plus honneur s'il est acquis sans peine.

Le loyer est certain que tu en doibs attendre,
De Dieu iuste & benin. Car ce saint sacré feu
Esleuera ton ame au Royaume de Dieu.
Le naturel du feu est monter à son centre.

P. R. S. DV PLESSIS.

SVR



V E R S
SVR L'ANTEROLOGIE
O V
TRAICTE' DE LA RVINE
DE L'AMOUR PROPRE,
E T
D V B A S T I M E N T
D E L'AMOUR DIVIN.
S O N N E T S.

I.

TOut est plein de perils en ces destroits
du monde,
Qu'il aime, ne fait, las! qu'aimer les vanitez,
Il ne faict que tomber en mille aduersitez,
Ainsi que le Pilote agité dessus l'onde.
Nostre vie ne sert (si au vray on la sonde)
Que d'aspirer sans cesse aux hautes dignitez;
Puis elle se cherit en ses prosperitez,
Ne voyant pas assez d'où son heur luy
abonde.

De

De là se prend l'amour qu'elle conçoit de
foy

Qui la fait transgresser impunement la loy,
Comme estant par dessus le ioug de son seruage.

Si que le ciel luy est quelquefois à desdain
Pour n'auoir ses desirs parfaits allez soudain,
Et sur luy chaudement se descharge sa rage.

II.

Cest Ange qui iadis estoit si glorieux
Se voyant couronné & d'honneur & de grace,
S'est tant outrecuidé qu'il prit bien ceste
audace (cieux.

Que de vouloir marcher sans pair dedans les
Nos deux premiers parens mis en l'Eden
heureux,

Iaçoit que Dieu leur fit vne expresse menace
De ne goustier du fruit du milieu de la place
N'obeyrent pourtant de ses biens oubliex.

O mortel qu'es tu vain à t'aimer tant toy-
mesme,

Et d'ainsi mespriser ceste bonté supresme
Qui te semble vouloir traicter à son esgal.

Quoy? n'est-tu pas content créé à son
image (homage?

De ne vouloir manquer de luy faire humble
Peus-tu de son amour auoir plus grand
signal?

III.

III.

Considerons au vray nostre fresse nature,
 Prenons l'humilité & les vertus à cœur,
 Ceste vierge deuote en donne la faueur
 Par ses discours fôdez en la sainte Esriture.

Elle nous monstre au mieux qu'elle est
 nostre facture, (heur
 Que nous ne receuons de nous aucun bon-
 S'il ne nous vient de Dieu par la grace &
 faueur, (ture.

Sans qui nous defaillons de toute nourri-
 Que pouuons nous trouuer à nos sens de
 plus beau,

Que ne leur est depeint en ce riche tableau
 Où de ses passions la raison fait la Dame?

Qui ne s'y voit bien grand, ensemble
 bien petit,

Grand s'il iette de soy son mondain appetit,
 Petit si la grandeur domine sur son ame.

IV.

O que le S. Esprit secourt heureusement
 Le Chrestien qui le sert de fideles offices,
 Qui combien qu'il soit veuf par fois de ses
 delices,

Si persiste il au but de viure sainctement!

Il se sent ia ravi iusques au firmament,
 Et que d'hymnes il chante en ses prompts
 exercices?

Ha cōment il combat accortemēt les vices,
 Et establit en Dieu vn ferme fondement.

Il souffre mille maux pour son amour ce-
leste, (leste,
Il ne cesse en tous poincts de luy en faire
Il en sçait surmonter ce qui luy est facheux.
Il sçait bien que le Ciel ne s'obtient qu'à
oultrance, (tience,
Et que cestuy qui prend beaucoup de pa-
Y tient à l'aduenant son rang plus radieux.

Solus faciat Deus.

IASPAS D'ENNETIERES,
Seigneur de Beaumé.

VERS

V E R S
SVR L'ANTEROLOGIE,
OV TRAICTE' DE LA RVINE
del'Amour propre, & du basti-
ment de l'amour diuin.

*Composé par D. I. De C. Religieuse de l'ordre
de saint Augustin.*

P Ar le doux charme d'un bien dire
L'un vient acquerr de l'honneur,
L'autre pour sçauoir bien escrire
Des ans se voit estre vainqueur:
Pour sçauoir passer l'ordinaire,
Il faut & bien dire & bien faire.
Ceste sœur d'une ardeur bien sainte,
Et d'une admirable façon;
Par une insensible contraincte
Nous force d'ouyr la leçon,
Un saint amour qui la consume
Gouuerne sa vie & sa plume.
Si d'une vertueuse enuie
Tu ne prens, apprendre à mespris,
Voy tous ses escrits en sa vie,
Et sa vie dans ses escrits:
L'un & l'autre comme ie pose,
N'est icy qu'une mesme chose.

I. D'ENNETIERES, Si. du Meisnil.

V E R S

VERS
SVR L'ANTEROLOGIE
O V
TRAICTE' DE LA RVINE
DE L'AMOUR PROPRE,
ET
DV BASTIMENT
DE L'AMOUR DIVIN.


*Composé par D. I. D. C. Religieuse de
l'ordre de saint Augustin.*

LA bouche de Moyse a serui autre fois
Au grand Dieu d'instrument pour prononcer ses loix,
Et du Prophete Roy par la voix haut-sonante
L'Eternel aux pecheurs a donné l'espouuanté:
Depuis des saints decrets les quatre truchemens
D'un saint ton le vouloir de Dieu nous annonçans,
Ont frayé le sentier, qui charitable meine
Les fourvoyans humains au celeste domaine,
Des saints Peres depuis les volumes diuers
Ont d'un diuin nectar abreuvé l'univers,
Et de nos temples saints la grand' voute relonne
Les preceptes que Dieu tous les iours y entonne,
Par l'organe choisi de maint' homme sçauant.
Mais las ! ce mesme Dieu tout clement, tout puissant,
Voyant que de nos coeurs l'enclume retournée
Tant plus se bat, & plus se rend dure & pressée,
Se porte fauorable, à des moyens nouueaux
Pour emplumer de neuf nos paresseux cerceaux,
Qui du limon glueux des voluptez humaines
S'attachent lâchement à ces terrestres plaines;

Et qui iamais ne vont d'un dessein glorieux
S'effaçans sainctement d'une volée aux cieux,
Il quitte de parler sa forme accoustumée,
Et des hommes voyant la parolle semée
Tantes & tantes de fois, ne pouuoir dans nos cœurs
Allumer de ses feux les diuines ardeurs,
Ny teulement bannir de nos ames souillées
Le soin continuel des plus vaines pensées.
Il prend vn autre style & choisit ceste fois
(O secret merueilleux) d'une fille la voix.
Fille dont les discours n'ont pas plus d'energie
Que ses actes d'honneur, & de vertu sa vie.
Sus sus donc, ô Chrestiens, pour nous rendre parfaits
Meditans ses eserits, imitons ses effaits.

Par C. B. S. Sr du Baillet.

SONNET




S O N N E T,

Sur les quatre liures suiuians de D. I. D. C.
Religieuse de l'ordre de S. Augustin.

E Sprit chaudement saint dont la flamme espurée
Escelle ia desia les esclaves des cieux,
Tu nous apprens au vif ce que c'est, d'aimer mieux
La diuine chaleur, que l'humaine fumée, (blée
Puis rauissant nostre ame, elle à soy-mesme em-
Meurt pour reuiure au sein d'un espoux glorieux:
Puis apres l'entourant d'un brasier amoureux
Tu la rens dans ses feux saintement consumée,
Et puis n'estant qu'une flamme à qui s'ouure le ciel
Tu l'unis à son Dieu d'un mastice eternal.
Bref, pour dire l'effect de ta douce manie,
Tu traces un chemin pour guider deormais
D'un vol droit dans le ciel les cœurs, qui mieux par-
S'enthousiasmeront de ta sainte ambrosie. (fais,

Par C. D. S. Seigneur
du Baillet.

QVA.



Q V A T T R A I N

*Sur ce que celle qui a fait cest œuvre n'y a
veulu mettre son nom.*

DI moy, sublime esprit, pourquoy ré-
fule tu
Au Lecteur vn repos, vn los à ta memoire,
En supprimant ton nom ? Cela tourne à ta
gloire
La vanité se tait ou parle la vertu.

*Par C. D. S. Seigneur
du BAILLET.*

TABLE




TABLE
DES CHAPITRES
CONTENVS EN CE
PRESENT LIVRE.

Combien l'ame, qui veut paruenir à un pur
amour de Dieu, est empeschée par l'amour
propre, tant es choses exterieures, qu'interieures.
Chapitre premier. fueillet 1

Ce que c'est de l'amour propre, & comment il est
souuent caché sous l'ombre de veru. Ch. ij. 10

Comment on peut cognoistre l'amour propre, en-
uers les creatures irraisonnables & insensibles.
Chap. iij. 16

Comment on peut cognoistre l'amour propre enuers
les creatures raisonnables Chap. iij. 24

Comment on peut cognoistre l'amour propre vers
ses amis. Chap. v. 28

Comment l'amour propre ou sensuel est caché sous
l'ombre de l'amour spirituel. Chap. vij. 33

Comment on peut cognoistre l'amour propre vers
ses ennemis. Chap. viij. 39

Comment nous deuons plaire à Dieu seul, & non
aux creatures, où il y a chose contre la gloire de
Dieu. Chap. viij. 44

T A B L E.

*Que l'amour propre peut estre quelquefois au de-
sir de la frequentation des saints Sacrements.*
Chap. ix. 51

*Que nous deuons desirer la frequentation des saints
Sacremens avec un pur amour. Chap. x. 57*

*Que nostre oraison dou estre avec droicte inten-
tion, & quelle chose nous deuons demander.*
Chap. xi. 62

*De diuerses sortes de tentations, que le diable nous
met en auant sous ombre de spiritualité. Chap.*
xi. 69

*Que sous ombre de plus grande perfection, le diable
nous tente contre la vocation. Chap. xii. 80*

*Que par une haine indiscrete du peché, on vient à
auoir une haine des créatures. Chap. xiii. 87*

*Quelle est la vraye contrition, & que sous ombre
de contrition le diable tasche de nous troubler.*
Chap. xiv. 92

*Quelle difference il y a entre la vraye tristesse, & la
fausse tristesse. Chap. xv. 102*

*De la contrition que les pecheurs conçoient, laquel-
le est encore imparfaite. Chap. xvi. 107*

*De la contrition de ceux qui sont conuertis & pro-
ficient en la vertu. Chap. xvii. 111*

*De la contrition des parfaits laquelle est en choses,
où le plus souuent n'y a point de peché. Chap.*
xix. 116

*Comment l'amour propre, nous fait souuent laisser
le bien pour les respects humains. Chap. xx. 121*
La

TABLE.

<i>La maniere de prier Dieu avec plus d'efficace pour soy, & pour son prochain. Chap. xxj.</i>	123
<i>Comment une ame se doit comporter receuant quelque illustration de Dieu, ou lumiere interieure. Chap. xxii.</i>	132
<i>Que sous ombre d'humilité on ne doit suivre son propre aduis en chose douteuse, & que l'humble submission fait cheminer en assurance deuant Dieu. Chap. xxij.</i>	140
<i>A quelle fin nous deuons chercher les vrayes vertus, & comme elles doiuent estre pures. Chap. xxiv.</i>	146
<i>Comment on peut cognoistre l'amour propre en la meditation. Chap. xxv.</i>	151
<i>Quel est l'amour propre qui se trouue en la contemplation. Chap. xxvj.</i>	160
<i>Comment on peut aimer toutes creatures raisonnables d'un pur amour. Chap. xxvij.</i>	168
<i>De l'humilité. Chap. xxvij.</i>	171
<i>De la Foy nue. Chap. xxix.</i>	176
<i>De l'Esperance. Chap. xxx.</i>	179
<i>De la Charité, quant au principal acte d'icelle, qui est l'amour de Dieu. Chap. xxxj.</i>	182
<i>Remedes pour aucunes ames pusillanimes, lesquelles pour quelque necessité que ce soit, n'osent changer d'exercice, hors de leurs temps. Chap. xxxij.</i>	190

TABLE
DES CHAPITRES
DV SECOND LIVRE.

Excellence, bonté, & sagesse de Dieu, object & cause efficiente de la conuersion du pecheur.

Chapure premier. 197

Moyens diuers de la conuersion des pecheurs.

Chap. ij. 201

Comment se retrouuent mystiquement en l'homme qui est un petit monde, toutes les qualitez de ce grand vniuers. Chap. iij. 208

De la douceur interieure que l'ame commence à goustier apres sa conuersion, & des ferueurs procedantes de l'amour, mais encore imparfaites.

Chap. iiii. 213

Le grand retardement qu'apporte à la vie spirituelle, de n'auoir un directeur qui donne cognoissance, comment on se doit mortifier, soit es choses exterieures, ou interieures, des trois puissances de l'ame. Chap. v. 219

En quelle maniere d'oraison l'ame s'exerce en cest estat, qui est apres la conuersion. Chapitre vj.

227

Du desir & amour que l'ame doit porter à la vertu.

Et à

TABLE.

- & à la mortification pour se surmonter soy-mes-
 me. Chap. viij. 233
 De la resolution absoluë que l'ame faict, d'embrasser
 la parfaicte mortification, pour acquérir les ver-
 tus, par la pratique d'icelles, & par le moyen de
 l'oraison. Chap. viij. 235
 Du premier degré de perfection qui suit la mortifi-
 cation, de ses passions, & affections desordonnées;
 où l'espouse commence à goustier des diuines con-
 solations de son époux Iesus, qui est le second
 estat. Chap. ix. 238
 Cantique des Cantiques de Salomon, Cha-
 pitre premier. Qu'il me baise du baiser de
 sa bouche. Car tes mammelles sont meillen-
 res que le vin. Odoriferantes, plus que les tres-
 bons onguents. Quels sont ces baisers, que l'e-
 pouse, l'ame fidelle a Iesus-Christ desire.
 Chap. x. 241
 Du Chapitre premier des Cantiques. Ne
 me veuillez point considérer, parce que ie suis
 bruncette, car le soleil m'a decoulourée. L'ame
 fidelle se plaint pour ses infirmités naturel-
 les, & prie que l'on n'y veuille prendre esgard.
 Chap. xj. 247
 Du Chapitre deuxiesme des Cantiques. Il
 m'a mene au cellier a vin, il a ordonné cha-
 rité en moy. Appuyez moy de fleurs, enui-
 ronnez moy de pommes, car ie languis d'a-
 mour. On il est traité de l'nyurement spiri-

T A B L E.

tuel de l'espouse, par l'abondance des consolations Chap. xij 252

Du mesme Chapitre deuxiesme des Cantiques. O filles de Ierusalem, ie vous adiuere par les cheureaux & cerfs des champs, que vous n'esueillez, & ne faictes esueiller ma bien-aimée, iusques à ce qu'elle le veuille. Du repos de la contemplation, & comment nostre Dieu espoux des ames, commande aux puissances inferieures de l'ame, de ne la retirer de la contemplation. Chap. xij. 257

Du mesme Chapitre deuxiesme des Cantiques. Leue toy, haste toy ma bien-aimée, ma colombe, ma belle & vien, car des-jà l'huyet est passé. L'espoux des ames fideles Iesus-Christ, invite à la iouissance du divin amour sa bien-aimée, luy monstrant que l'huyet de ses passions est passé & aneanti. Chap. xiv. 260

D'un secret aneantissement de l'ame, par un esleuement que Dieu opere. Ce qui est demonstré au deuxiesme Chapitre du Cantique des Cantiques, par ces mois Chap. xv. 263

Du mesme Chapitre deuxiesme des Cantiques. Prenez-nous les petits regnards qui gastent les vignes, car nostre vigne est florie. Icy est monstré combien l'aimée en cest estat de perfection se doit garder de la vaine gloire. pour ce que le diable faict ses efforts de la seduire.

duire. Chap. xvj.

268

Du Chapitre troisieme du Cantique des Cantiques. *J'ay cerché de nuict en mon lit, celui que mon cœur aime. Je l'ay cerché, & ne l'ay pas trouvé, &c. L'esponse ayant goûté les doux embrassemens de son espoux le- sus, n'y pouvant demeurer pour estre encore en ce corps mortel, cherche son espoux par une langueur qui luy cause un martyre. Chapitre xvii.*

272

Poursuite du Chapitre troisieme des Cantiques. *Les guetteurs qui gardent la cité m'ont trouvé. N'avez-vous point vu celui que mon ame aime? Quand ie les eu un petit passé, ie trouuay celui que mon ame aime. L'esponse par l'aneantissement de soy-mesme, surmonte toutes choses créées, & retourne au repos de la contemplation & union avec son Dieu. Chap. xviii.*

279

Dudit Chapitre troisieme des Cantiques.

Je l'ay prins, & ne le laisseray point aller. L'ame fidelle estant transportee par sus soy par l'extase & ravissement, voudroit ne retourner à son corps. Chap. xix.

287

Du mesme Chapitre troisieme des Cantiques. *Je vous adresse filles de Ierusalem, que vous n'esneülez l'amie tant qu'elle le veuille. Icy est traité de l'union beatifique de l'ame avec son Dieu, & des grands fruits qu'elle en*

rapporte. Chap. xx.

290

Dudiect Chapitre troisieme des Cantiques. *Qui est celle qui monte du desert, comme une colonne de fumée, faicte de parfums, de myrrhe, & d'encens, & de toutes poudres aromatiques? L'esponse estant par la vie presente separée de son espoux, monte neantmoins en esprit, de ce desert à son bien aimé, par une oraison continuelle. Chapitre xxj.*

293

Du repos que nostre Dieu tient au cœur de l'ame fidelle, & du soing qu'il en a, pour la preserver de ses ennemis. Chap. xxij.

296

Chapitre quatrieme du Cantique des Cantiques. *Combien tu es belle la mienne amu! ô combien tu es belle! Icy l'espoux despeint toute la beauté de son esponse, qui sont les vraies vertus, par lesquelles elle est rendue agreable à Dieu. Chap. xxij.*

300

Des visions & revelations que Dieu envoie quelque fois aux ames parvenues à ceste pureté de vie. Et comment on peut cognoître les vraies visions, au regard des faulx & trompeuses. Chap. xxiv.

307

TABLE DES CHAPITRES DV TROISIESME LIVRE.

L' Ame étant paruenüe au troiesiesme estat de perfection représenté par l'esté, lors les tonnerres & orage suruiennent, qui sont les grandes afflictions que l'ame endure en cest estat.

Chapitre premier. 313

D'un secret aneantissement de l'ame fidelle, laquelle sans perdre un seul point de ce pur amour diuin, demeure neantmoins en un delaisement & priuation totale de son bien, & du secours que nostre Dieu luy souldoit donner. Chapitre ij.

317

Que ce delaisement de Dieu quant aux sentiments sert a l'ame de purgatoire, pour ce que le feu diuin dont elle est assiegee, la va consumant d'une façon tres subtile. Chap. iij.

321

Des secretes imperfections dont l'ame n'auoit connoissance, lesquelles seront purifiées dans un secret feu d'amour diuin. Chap. iij.

326

L'ame en ce delaisement demeure en ses propres operations, lesquelles Dieu auparavant operoit en elle. Chap. v.

329

De la priuation de Dieu quant aux trois puissances de

de

T A B L E.

de l'ame, & premier de l'entendement. Chap. vj.	332
De la priuation de Dieu quant à la memoire. Chap. vij.	335
De la subtraction de Dieu quant à la volonté. Chap. viij.	339
De la subtraction & delaissement de Dieu enuers l'ame raisonnable. Chap. ix.	346
Comment le pur esprit ou la supreme partie de l'ame est prinée de l'vion, & contemplation de son Dieu. Chap. x.	348
Des lumieres infuses que Dieu enuoye à ceste ame, mais peu, & comment elle s'y doit comporter. Chap. xj.	350
De la tristesse intollerable que ceste creature endure. Chap. xij.	354
Des grandes ariditez & seicheresses que l'on a en l'oraison. Chap. xij.	352
Des viues passions qui seruent d'un feu pour puri- fier ceste ame. Chap. xiv.	363
Des grandes persecutions des creatures, moyen tres- necessaire en ce troisieme estat, pour aneantir l'ame de toutes parts. Chap. xv.	369
Les esprits infernaux se renolient aussi contre ceste ame; mais par la grace de Dieu elle vainquera tout. Chap. xvj.	376
D'un excez de douleur que ceste esponse endure, pour l'amour de son Dieu. Chap. xvij.	381
D'un secret moyen, dont Dieu se sert pour aneantir ceste	

TABLE.

<i>ceste ame. Qui est que les plus vertueux person- nages sont rendus auengles pour l'affliger. Chap. xviij.</i>	384
<i>Comment l'ame se doit comporter lors que son con- fesseur ignore son estat où Dieu l'attire. Chap. xix.</i>	389
<i>De la griesue punition que Dieu enuoye à ceux qui persecuent les ames, qu'il tient en sa protection. Chap. xx.</i>	391
<i>Du secours que ceste ame cherche aux creatures, & comme elle s'y doit comporter. Chap. xxj.</i>	394
<i>Comment Dieu donne des forces plus que naturel- les, & au corps, & à l'ame, & mesmes aux facultez de l'ame, pour supporter des peines surnaturelles. Chap. xxij.</i>	401
<i>Des cheutes que ces ames font quelque fois, & com- ment ces cheutes leur seruent, pour de tant plus les aneantir. Chap. xxij.</i>	402
<i>Le grand bien qu'apporte la religion aux ames que Dieu attire à ceste voye. Chap. xxiv.</i>	405
<i>De la grande confiance que l'ame a en son Dieu, durant toutes ces afflictions. Et du sacrifice qu'- elle fuit de tout soy-mesme à son Dieu. Chap. xxv.</i>	407
<i>Des moyens dont Dieu se sert pour commencer à esleuer ces ames a un estat plus parfaict, & les remettre au repos de la contemplation. Chap. xxvj.</i>	409

TABLE

TABLE DES CHAPITRES DV QUATRIESME LIVRE.

DE la noblesse & fin de l'homme. Et comment
se doit entendre l'estat dernier de la perfe-
ction d'iceluy en ceste vie. Chap. j. 413

Comment nostre Dieu ayant esté separé de l'ame,
quant aux sentimens actuels de l'amour diuin.
dont elle iouissoit estant unie à Dieu, com-
mence à luy redonner ceste iouissance vniue;
mais tout en autre maniere. Chap. ij. 417

Comment en ce quatriesme chemin de perfection,
l'ame commence à iouir du repos de ses labours.
Chap. iij. 422

Du parfaict repos de l'ame avec Dieu, où elle est se-
cretement abyssmée dans le tres-pur amour.
Chap. iiii. 426

Que ce repos cause vne union beatifique de l'ame,
& quelle est ceste union. Chap. v. 429

De la fruition secrette & transformation de ceste
esposée au plus secret de la diuinité. Chap. vi. 438

Que ce repos n'est pas oisueté. Chap. vii. 450

Comment ces operations de Dieu en l'ame sont si se-
crettes & incognües aux hommes, qu'on ne peut

TABLE.

reconnoistre ces creatures differentes des autres.

Chap. viij. 452

De l'union des operations secretes de l'ame avec Dieu, qui consiste en un secret aneantissement, par lequel elle reçoit en soy l'impression des graces diuines. Chap. ix. 464

Des extases & rauissemens d'esprit, qui suruiennent en ce quatriesme chemin de perfection. Chap. x. 466

De l'eleuation de l'ame fidelle par dessus les anges, & de l'union des corps glorieux apres la resurrection. Chap. xj. 469

Des reuelations que Dieu donne en ce dernier chemin de perfection, conforme au premier estat de ceste perfection. Chap. xij. 473

Du parfait oubly de soy-mesme en toutes necessitez corporelles, mesmes quant aux biens spirituels, & de la felicité eternelle, n'ayant memoire de soy, que pour recevoir les reproches, & la confusion. Chap. xij. 480

Des exercices de ceux qui sont en ce degré, qui est de prier pour tous pecheurs, & de la contrition qu'ils conçoient pour leur amendement. Chap. xiv. 484

Du zele de la charité & union du prochain, & comme on le doit mortifier, par ce qu'on ne peut contenter le monde, puis que le Fils de Dieu mesme ne l'a peu faire. Chap. xv. 486

Que la plus grande croix de ces ames en ce dernier chemin

T A B L E.

<i>chemin de perfection, est, de n'avoir pas d'affliction. Chap. xvj.</i>	488
<i>Du zele dont ces ames sont embrasées, & de sir que Dieu soit aime & glorifié, & de la douleur qu'elles ressentent quant Dieu est offensé. Chap. xvij.</i>	489
<i>De la charité que ces ames ont mesmes vers les damnez, conforme à la volonté de Dieu. Chap. xvij.</i>	492
<i>De l'union de leur volonté à la volonté eternelle de Dieu. Chap. xix.</i>	494
<i>Poursuite de la mesme conformité de sa volonté à la volonté eternelle de Dieu. Chap. xx.</i>	496
<i>Quele effect produict l'union de ces deux volontez de la creature au Createur. Chap. xxj.</i>	506

F I N.

Extrait

Extraict du Priuilege.

PAR grace & priuilege du Roy, il est permis à Adrien Quinqué, Libraire & Imprimeur en la ville & cité de Tournay, d'imprimer, vendre & distribuer, ce liure intitulé *Anterologie, ou Traicté de la Ruine de l'Amour Propre, & du Bastiment de l'amour diuin*. Composé par D. I. D. C. Religieuse de l'ordre de saint Augustin, denommé pour ce faire par M. D. C. ayant obtenu le priuilege à ce seruant, defendant bien expressement à tous Imprimeurs, Libraires, ou autres, quels qu'ils soient, d'imprimer, ou contrefaire ledit liure, ny ailleurs imprimé, ou contrefaict, l'apporter vendre, ou distribuer esdicts pays de pardeça, durant le terme de six ans; sans l'adueu & consentement dudit Quinqué, à peine de confiscation de tout ce qu'en auroit esté imprimé, ou vendu; & en oultre de six florins d'amende pour chascun exemplaire, applicables, la moitié au prouffit de sa Majesté, & l'autre moitié au profit de l'Imprimeur. Comme plus au long appert par lettres données au Conseil de sadieste Majesté, à Bruxelles le quinziesme iour de Februrier, mil six cens vingt & trois.

Signé

Le COMTE.

APPRO-

APPROBATION.

CE liure intitulé *Anterologie ou Traicté de la Ruine de l'Amour Propre, & du Bastiment de l'amour diuin*; compilé par vne Dame religieuse de l'ordre de saint Augustin, qui est vne vraye pratique de perfection spirituelle : ne contenant rien qui ne soit conforme à la foy & doctrine de l'Eglise Catholique Apostolique & Romaine, à la sainte escriture, & aux bonnes mœurs; & plein de bonne edification spirituelle, peut estre leu seurement & avec fruct spirituel. Fait à Tournay ce troisieme de Feburier, 1623.

*I. BOUCHER Docteur en sainte
Theologie, Chanoine, & Archi-
diacre de Tournay.*

*CHARLES VERON Docteur en
sainte Theologie, & Prieur de
S. Augustin en Tournay.*

ANTEROLOGIE,
OV
TRAICTE' DE LA RVINE
DE L'AMOUR PROPRE,
ET
DV BASTIMENT DE
L'AMOUR DIVIN.
Diuisé en quatre Liures.

LIVRE PREMIER.

De la nature de l'amour propre, decouuer-
te de ses tromperies, & desthresors
de l'amour diuin.

*Combien l'ame , qui veut paruenir à un pur
amour de Dieu, est empeschée par l'amour
propre, tant és choses exterieures,
qu'interieures.*

CHAPITRE PREMIER.



DIEU de toute eternité se
contemplant soy mesme
(car nul n'est digne, ni
capable de contempler
Dieu tel qu'il est, sinon
luy mesme) en ceste sienne
Diuinité, a déterminé aussi de toute eterni-
té, de creer quelque creature; à laquelle il

A donne-

donneroit influence de ses graces ; pour la rendre capable de le louer, l'aimer, & iouyr de luy, par vne diuine contemplation. Et ce non pour ce, que Dieu ait affaire de quelque autre louange que de soy, ains pour ce que son grand amour l'a porté, à se communiquer à sa creature. A laquelle faisant part de sa Sapience ; il fait en sorte, qu'elle se cognoist pour son principe & createur, & souuerain bien : & de ceste cognoissance vient à l'aimer : l'aimant, entre en vne sublimie contemplation & iouissance de sa Diuinité, & louange admirable. Toutes ces graces ont esté aux Anges, dès l'instant de leur creation, sans leur peine ni trauail quelconque. Or d'autant qu'en ce petit traicté, l'on pretend donner à cognoistre combien l'amour propre empesche de paruenir au saint amour, qui est le pur amour de Dieu ; comme celuy qui se fourre par tout, tant en l'interieur, qu'en l'exterieur : tant en l'ame comme au corps ; tant és actions les plus spirituelles, comme est l'oraison, & autres actions vertueuses, qu'és actions les plus communes & externes ; pour n'y auoir action si sainte & heroïque, en laquelle l'amour propre ne se glisse (tant ce venin est subtil, penetrant, & cauteleux) ce qu'il faut croire & supposer en premier lieu, est qu'il y a deux
sortes

sortes d'amour : l'un saint, iuste, droict, simple, & vrayement diuin, qui est aimer Dieu pour luy mesme, & toutes choses en Dieu & pour Dieu. Ce que nous disons *par amour de Dieu*. L'autre, meschant, iniuste, trompeur, & vrayement diabolique : qui est aimer soy mesme, ou quelque creature hors de Dieu. Ce que nous disons *amour propre*. Pour ce que ne se rapportant à Dieu, (qui est le seul & vnique object, general & commun d'amour, auquel tous doiuent viser, comme il est commandé à tous, par celuy qui dit non à vn, mais à tous en general, *Tu aimeras ton Dieu de tout ton cœur, & de toute ton ame.*) il tend & vise au bien & satisfaction de soy mesme, par vne adhesion à la creature ; pour y chercher son contentement, plustost qu'en Dieu, & en la gloire de Dieu : & par ainsi s'aimant plus que Dieu : c'est pourquoy il est dit *amour propre*.

Ces deux amours ne peuent estre ensemble : pour en estre en nous, comme dit le Prophete, *le logement trop anguste, & la* Isa. 28. *conche trop estroite ; de sorte que l'un faict tomber l'autre.* Voire tellement apoinctés contraires, que plus on est lié à l'amour propre, moins necessairement, on aime Dieu : & plus on a en haine soy mesme, plus on est vny à Dieu par amour. Et partant de là se

voit combien l'amour propre, empesché & destourne les hommes, de pàrvenir à vn pur amour de Dieu. Quelle sancteté y a-il plus grande, (horsmis la glorieuse Vierge Mere) ou quel esprit a esté doué d vne lumiere plus celeste ou quelle cōtemplation plus diuine, que n'ont eu les Anges, auant que tomber du ciel? Neantmoins au mesme instant, qu'ils estoient abysmez en vne tant diuine cōtemplation, voyans Dieu en la hautesse de sa diuinité, par vne cognōissance admirable de sa puillance & beauté, & de toutes les perfections diuines, là s'est retrouvée en ces esprits vn amour propre, estant comme vn larrecin spirituel, par lequel ils ont voulu attribuer à foy, ce qui estoit simplement à Dieu, & par orgueil s'esleuer iusqu'à vouloir estre semblables à Dieu. Se rendant par ce moyen propriétaires des dons, graces, & beautez, que Dieu leur auoit departy. Tellement que d'Anges, ils sont deuenus diables, & du plus haut du ciel sont tombez au plus profond d'ēfer. Et celuy qui estoit la plus belle creature du ciel, est deuenu la plus laide & detestable, que Dieu ait iamais créé. Voilà le fruit de l'amour propre. Que si au plus haut du ciel, Dieu a mōstré, sans delay, la rigueur de sa iustice, pour en chasser l'amour propre, combien plus deuons nous mettre la main à nostre

stre conscience, veu que n'y tombons vne fois ou deux, mais par millions de fois. Car si sur les Anges mesmes, qui estoient des esprits purs, doiez de tant de dons, & de graces, neantmoins l'amour propre, (qui est la racine d'orgueil) a tant gaigné, que de les auoir priué à toute eternité de la vision de Dieu: combien plus doit-il donner d'empeschement à l'homme, qui est enuironné de chair, & de qui la nature corrompuë, est de soy encline à tout mal?

L'amour propre est mesmes és consolations spirituelles, voire en sorte, que tant plus ces ressentimens sembleront esleuez, tant plus sont ils dangereux. L'ame s'arreste au contentement propre en ces douceurs, & par ce moyen est priuée de l'vion & heureuse iouyssance de la vraye verité, qui est Dieu pur, dont sera parlé en autre lieu mieux à propos. Estant iusqu'à icy suffisamment donné à entendre, l'empeschement de l'amour propre, pour iouyr de Dieu, voire és lieux plus saincts, & és esprits les plus nobles, auant la creation de l'homme.

Voyons és choses exterieures, ausquelles n'y a exception de ce peril. Les Anges estans tombez du ciel, Dieu veut reestabli leurs sieges: ayant créé ce grand vniuers, il crée l'homme: luy donne vne ame raisonnable

A 3 dans

dans vn corps beau & parfait : le met au milieu du paradis terrestre : luy donne puissance absoluë sur toutes autres creatures : luy deffendant seulement de nè manger du fruiët, de l'arbre de science, de bien & de mal : à fin qu'il recognoisse qu'il y a vn Dieu, à qui il est subject, & luy doit obeyssance. Dieu ne se contente de cela : ains par sa bonté encor, il luy donne vne compaignie : il crée Eue, & tous deux quant au corps, d'une beauté parfaite, sans que rien leur peult nuire, ni incommoder leur santé ; pour n'estre subjects à maladie, n'y à autre inconuenient, qui peult donner tant soit peu de fatigue à la nature. Ils iouyssoient quant aux sentimens extérieurs de toutes delices, sans aucun empeschement. Quant à l'ame Dieu les auoit créés à l'estat d'innocence, capables de iouyr de Dieu continuellement, par vne sublime contemplation, & vnion beatifique, sans qu'aucune chose créée leur peult donner empeschement ou distraction. Les puissances de l'ame estoient vnies à la raison : sans que iamais aucune rebellion s'esleuast contre la volonté ; & les puissances inférieures de l'ame, ioinctes avec la volonté ; & le plus supérieur de l'ame estoit vny à la volonté de Dieu, avec vne lumiere telle, qu'à tout moment ils voioient & cognoissoient

ce que Dieu vouloit d'eux. La fin où tend ce discours, est, par ce qu'on ne cognoist jamais la felicité, qu'on n'ait au preallable expérimenté la grandeur du mal. Nul ne peut cognoistre le bien de sa santé, qu'il n'ait esprouvé que c'est de la maladie. Aussi pour cognoistre le mal qu'apporte l'amour propre, il faut cognoistre le grand bien dont il nous priue. Neantmoins tout ce qui se peut dire, escrire, ou imaginer, soit de la gloire des Anges auant leur cheute, soit de la felicité de l'homme estant en l'estat d'innocence, n'est que comme vne petite ombre; au regard de ce qui est en verité. A l'opposite tout ce qui se peut dire de l'amour propre, & le mal qu'il cause, n'est rien, si par la lumiere interieure que Dieu donne; on ne vient à le cognoistre: laquelle lumiere interieure ne peut estre, sinon par la mortification de cest amour propre.

Venons donc au principe de nostre intention. Voila Adam & Eue creez en l'estat d'innocence, où toute sa posterité eust iouy de ceste mesme felicité. Voicy cest ennemy mortel, l'amour propre. Dieu deffend à Adam de ne manger de la pomme, chose si petite: Adam l'a regardé; mais non tant la beauté de la pomme, ni la bonté du fruiet luy cause le desir de la gouster, que l'amour

de soy mesme, ia conceu dans sa volonté, pour ne contrister la compagne, en laquelle l'amour propre auoit ia gaigné & pris place, par vn secret orgueil, comme dit saint Augustin. *Orgueil est le commencement de tout péché.* Et qu'est-ce orgueil, sinon vn appetit d'une peruerse grandeur: laisser le principe, auquel l'ame se doit tenir & adherer, & estre faicte aucunement le principe à soy mesme? Cecy se faict, quand on se plaist par trop: & l'homme se plaist par trop en soy mesme, quand il laisse & abandonne ce bien immuable, qui luy deuoit plus plaire, que luy mesme à soy mesme. Cecy est la viue source d'où procede l'amour propre. Or (dit S. Augustin) le diable n'eust pas gaigné l'homme par vn péché si euident & manifeste, que celui où a esté faict ce que Dieu auoit prohibé: s'il n'eust des-jà commencé à plaire à soy mesme, pour ne desplaire à celle, à qui le serpent dit, *Vous serez comme Dieux.* Adam ayant ia conceu dans sa volonté, non sans quelque orgueil, ceste complaisance d'amour propre, perd la lumiere de l'ame, & demeure en tenebres, obeit à la fausse persuasion du serpent, mange de la pomme, rompt le commandement de Dieu. Il voit, mais à sa malheure: le voila chassé du paradis terrestre. Le voila rendu esclau à soy mesme:

mesme: subiect en l'ame & au corps à toutes infirmitéz. Quant à l'ame, ses passions se reuoltent contre la raison, l'esprit n'ayant plus la liberté de s'vnir à son Dieu par l'estat d'innocence. Perd la naïfue beauté de son ame créée à l'image de Dieu, l'ayant gaste & souillée par le peché mortel, qui fait perdre la grace de Dieu. Il estoit seigneur sur toutes creatures, il est maintenant esclaué à soy mesme, voire esclaué du peché: ne pouuant operer vne seule bonne action que par trauail. Quant au corps, Dieu dit, *tu mangeras ton pain à la sueur de ton visage*. En quoy sont compris tous les trauaux, qui se retrouuent sur la terre. La femme enfante avec douleur: la terre apres estre cultivée, produit des espines: les elements se rebellent, causent des tempestes & autres incommoditez: bref, il n'y a si petit animal, qui ne liure la guerre à l'homme. Quelque grand Monarque qu'il fust, il est subiect à souffrir ceste misere. En fin, il n'y a chose au monde, qui ne nous donne occasion de douleur. Ce sont les effets de l'amour propre. Lesquels, & les grands empeschemens qu'il cause, tant és contemplations les plus releuées, qu'és actions externes, & les plus basses, se peuvent aisément recognoistre, par ce que dit est, autant que requiert ce petit traicté.

*Ce que c'est de l'amour propre, & comment il est
souuent caché sous l'ombre de vertu.*

CHAPITRE II.

L'AMOUR propre est vne certaine adhesion secrette à soy mesme hors de Dieu. Qu'est-ce adherer à soy mesme? C'est lors que le superieur de l'ame se separe de Dieu, pour se tenir à soy mesme, attirant & servant en soy toutes les autres parties inferieures de l'ame; tellement que les puissances & facultez de l'ame ne peuuent operer aucune action, soit interne ou externe, qu'elles ne soient referées à ceste supreme partie de l'ame, comme à soy mesme, par vne arrogance presumptueuse.

Ceste adhesion separe l'ame de la charité de Dieu & du prochain, par vn amour propre, qui ne se peut estendre à autre, qu'à soy mesme.

Amour est vne volonté vnitive à la chose aimée, & encor que la chose soit absente, l'aimant en ioüit affectueusement en sa volonté. Doncques l'ame demeurant en soy mesme, s'aime soy mesme; & aussi long tēps qu'elle demeure ou adhere à soy mesme, ne
desire

desire aimer autre chose que soy mesme.

Si l'ame ne sortoit iamais de soy mesme, elle ne voudroit iouyr d'aucun bien qui soit au monde, que pour soy mesme: ni de la gloire des bien-heureux, voire de la vision de Dieu, que pour soy mesme: voila pourquoy tel amour est appellé propre. Amour desire tout bien à la chose aimée, & pour ceste cause l'ame s'aimant proprietièrement soy mesme, desire que tout bien luy soit attribué; non seulement par iouissance; mais aussi par complaisance. Tellement qu'elle voudroit seule estre aimée de tous, sans qu'elle aimast autre que soy mesme; elle voudroit que toute gloire luy fut attribuée, & voudroit iouyr proprietièrement de la gloire qui est deuë à Dieu. L'amour propre est vn abyfme de tout mal. Il semble que l'issuë d'une misere, soit le commencement d'une autre: tellement que l'amour propre est vne abyfme de tout pechez. Ostez moy l'amour propre, il n'y aura plus de peché. Ostez moy l'amour propre, il n'y aura plus d'enfer. L'amour propre est donc pire que l'enfer. Si l'ame, par la grace diuine, ne sortoit hors de soy mesme, pour puis apres rentrer en son neant, & veoir la verité de son rien, en la verité de celuy qui est tout, elle ne pourroit iamais operer aucun bien parfaitement:

faictement. L'ame propriétaire, ou bien l'amour propre en la nature est si detestable, que si il estoit cognu absolument, on le chasseroit de soy sans le retenir vn moment. Pource il se cache d'un masque sous ombre de vertu ; il se faict paroistre beau : & le faict si subtilement, que souuent il est impossible de recognoistre la vraye vertu, d'arriere la vertu apparente : tant cest amour propre est subtil : & ne se sert de ce second moyen, que lors qu'ayant vne ame surmonté l'amour propre aux vanitez du monde, elle se dedie au seruice de Dieu, voyant la verité de ce que dit le Sage, *Vanité des vanitez & toutes choses sont vanitez* : ne pouuant estre plus seduite par des choses dont les vanitez sont si apparentes. Parquoy il se sert de la seconde maniere, qui sont les vertus. Pour exemple, si l'ame infectée de ce faux amour, prend l'humilité pour se voiler à l'exterieur, elle fera tous les actes d'humilité, voire les plus abiects, se montrera vile, basse en ses portemens ; & neantmoins le tout par amour propre, se complaisant en soy-mesme, estimant en estre louée & estimée. Il ne faut pource laisser de mettre en pratique tous les actes, qui appartiennent & sont necessaires pour obtenir la vraye humilité. Ce seroit vne autre finesse du Diable.

Que

Que l'ame fidelle à Iesus-Christ, die, quand elle sent quelque petit mouuement de vaine complaisance, l'ay commencé pour vous mon Dieu ceste action, ie la feray pour vous, & non pour moy, ie ne merite que l'enter.

Que personne ne se flatte soy-mesme, de penser que ses actions sont si bien dressées, que l'amour propre n'en puisse glisser. Croyez, que Dieu examine autant de plus prez vos actions, qu'elles sont heroïques, & de grande entreprise : & si en verité vous entreprenez quelque action pour Dieu, regardez la fin : si vous pouuez accomplir vne œuvre vertueuse, sans y auoir, ni au commencement, ni au milieu, ni à la fin recogneu quelque peu d'amour propre, louez Dieu, & dictes que c'est Dieu, qui a operé en vostre action : ou bien craignez que soyez aueugle, cause que ne le cognoissiez. Que vostre crainte neantmoins ne soit pusilanime ; mais avec confiance & vn courage magnanime. Si vous le recognoissez, chassez-le vistement par la haine de vous-mesme, pour rentrer en Dieu : & que toutes vos œuvres soient faictes en Dieu & pour Dieu : en quoy il faut aussi veiller, pource que cest amour propre est vne beste farouche qui deuore tout.

Il prendra encor le masque de charité,
soit

soit enuers Dieu, soit enuers le prochain. Si enuers le prochain, se monstrera doux, benin, & ellargissant toutes les facultez pour subuenir au prochain, & le tout pour soy mesme, soit qu'il pretend de paruenir à quelque desleing & autorité, ou d'estre cheri aimé & carressé, ou tenu pour vertueux. Et cecy est si subtil, qu'on ne le cognoist le plus souuent: pource que la nature se flatte, sous ombre de quelque necessité, ou honneste pretexte, & par ainsi demeure en tenebres. En quoy on le pourra cognoistre, quand telle charité n'est ferme & constante: car par ce qu'elle est contrefaictte, elle est subiecte à changement, variable & inconstante.

D'auantage telle charité feincte, n'est esgale ou indifferente à tous: ains seulement où elle pretend quelque vtilité pour soy, ou pour qui elle se laisse emporter par flatterie, & respect d'amitié particuliere: & par ainsi la pauvre ame trauaillé en vain, sans en tirer autre profit que l'enfer, ou vne grosse peine en purgatoire. Ne fust que la misericorde de Dieu l'en retire, par bonnes inspirations, & autres moyens; dont sa diuine bonté vse enuers les pauvres pecheurs.

L'amour propre se masque aussi de Dieu: se montrant feruent & zelateur, mais parce que

que ce zele est, pour repaistre son mesme amour propre, & la complaisance de soy mesme, tels esprits sont pleins de iugemens temeraires du prochain, subiects à troubles, & plein d'inquietudes, sans paix interieure. Ce sont les fruiets de l'amour propre, qui se veut masquer de l'amour de Dieu. En quoy, espouses de Iesus-Christ, pouuez reconnoistre la tromperie de nostre ennemy domestique, qui nous separe de Dieu, & de l'vnion & familiarité que deuous auoir avec nostre Dieu. Car il a dit luy mesme, *Que c'est tout son plaisir, que d'estre avec les fils des hommes.* Nous contristons le saint Esprit, lors que venant à la porte de nostre cœur, pour luy eslargir ses graces diuines, il l'a trouué serrée par l'amour propre, qui est vn obstacle, qui empesche ou entierement toute la grace de Dieu, ou la meilleure partie & affluence d'icelle. 110.2.

Si vne ame cognoissoit ce que c'est de la grace de Dieu, & le mal qu'elle merite par l'empeschement qu'elle y met, donnant lieu à cest amour desordonné; elle ne donneroît repos à ses yeux, tant qu'elle l'auroit du tout mortifié, & aneanti soy mesme totalement, sous la main puissante de nostre Dieu. De tant plus qu'elle bannira de soy le mensonge, de tant plus iouïra elle de la verité.

rité. Et qu'est-ce que mensonge? C'est tout ce qui vient de la creature, qui n'est que l'amour propre. Qu'est-ce verité? C'est Dieu. *Je suis*, dit-il, *la verité & la vie*, quiconque chemine en verité, est en Dieu. Ayant esté montré ce que c'est de l'amour propre, & comment il se cache sous ombre de vertu, faut voir plus particulièrement en quoy il se retrouve, & comment on le peut cognoistre, pour l'anneantir & mortifier.

*Comment on peut cognoistre l'amour propre,
envers les creatures irraisonnables
& insensibles.*

CHAPITRE III.

DIEU ayant créé toutes choses pour estre subiectes à l'homme, & luy servir en sa nécessité: tellement qu'il a domination par dessus toute creature, soit insensible ou irraisonnable; a voulu aussi que ce fust en sorte, qu'il n'en abuse. La sapiëce diuine, ayant disposé toutes choses en sa verité, hors laquelle n'est licite se separer, sans transgresser la volonté diuine. Doncques l'homme se seruant des creatures, que Dieu luy a donné pour en vser à sa louange, & à
ce

ce qu'il soit glorifié en ses œuvres, le faisant au contraire pour faire la guerre à Dieu (car se servant des creatures, pour offenser Dieu en ses proprieté, c'est se bander contre Dieu: attendu que le peché est ennemi de Dieu) il faict cela par amour propre, & hors du susdit desseing de nostre Dieu, abusant des choses à luy données.

Le sage Salomon, que Dieu auoit doüé d'une sapience sur tout homme, iettant sa veüe interieure sur toute la terre, dit. *Vanité des vanitez & toutes choses sont vanitez.* Mais comment se peut il entendre? veu que Dieu a créé toutes choses bonnes, & n'y a si petite creature, iusques à vn petit grain de sable, voire mesme petite poudre, qui vole en l'air, ni si petite bestiole, tant soit elle difforme, que l'on foule aux pieds, que la puissante main de ce grād Dieu, n'ait de toute eternité predestiné, de créer à bonne fin, & à quelque vtilité; le tout pour l'homme? Comment, di-ie, se peut-il entendre, que toutes choses sont vanitez, puis qu'il n'y a si petite chose, qui de soy ne soit bonne, suiuant ce que Dieu l'a faicte & créée? C'est pource qu'elle est renduë vaine, entant que l'homme ne s'en sert, à la fin pourquoy Dieu l'a créée: ains en vse à sa propre volonté en choses illicites. Et l'homme mesme est de-

B. uenu

venu vanité, quand vainement il abuse de toutes creatures, à sa propre volōté, hors de l'ordonnance de Dieu. Pourtant à iuste cause le Sage s'escrie, *que toutes choses sont vanitez.* De tout ce qu'il y a sur la terre, l'homme en abuse en cinq manieres, suivant les cinq sens de nature. Par la veüe, l'ouye, le flairer, goustier, & toucher. Premièrement, quant à la veüe, quand de tout ce qu'il y a de beau sur la terre, en quoy l'homme doit recognoistre son principe, & la beauté premiere qui les a faict, en louer & aimer le createur: au contraire il s'en delecte proprietairément, aimant tout ce qu'il voit d'aggreable à sa veüe, plus pour contenter sa concupiscence, & vaine recreation, que pour le seruice qu'il doit à son Dieu.

C'est vne chose desplorable, que la creature raisonnable s'aime tant en soy mesme, qu'elle perd vne infinité de graces, & degrez de gloire, qu'elle auroit au ciel, si elle se seruoit des creatures, à la fin que Dieu les a faict. Mesmes elle commenceroit dès ceste vie, à goustier les biens, que Dieu departit à ceux, qui ne cherchent que sa gloire, en toutes ses creatures. Comme le faisoit tres-bien le Prophete royal Dauid, quand il contemplot les œuvres de Dieu. Car fust qu'il leuast les yeux au ciel, regardant le Soleil, & tous
ces

ces astres lumineux : fust qu'il les abbaissast sur la terre, voyant la beauté de tout ce qui y est, à chacune fois il tomboit ravi en admiration, remarquant en la creature la beauté du Createur, & luy en rendant loüanges. C'est en ceste sorte que l'homme se doit servir des creatures.

L'ouyr est aussi l'instrument, par lequel le cœur vient à aimer, ce qu'il entend de plaisant à son goust propre : ce qui le retarde & empesche de paruenir au pur amour, qu'il doit à son Dieu. Sainct Augustin confesse auoir offensé escoutant le chant de l'Eglise: *Quand il aduient, dit-il, que le chant a plus de force sur moy pour esmonnoir mon cœur, que la chose mesme qui est recitée & chantée, ie confesse que ie peche, & merite d'estre puny.* Si escoutant ce qui est dédié à l'honneur de Dieu, & son saint seruice, la nature se delecte proprement, plus que la raison ne permet, qui doit estre la regle de toutes nos actions, esquelles la chair a plus de force, & se rend maistresse par dessus l'esprit, combien sans comparaison, sera le peché plus grand, lors que nous aimerons plus ardamment la voix & le son des instruments, qui ne seruent qu'à vaine recreation, tiennent la pauvre ame enfermée en sa propre nature, ouurent les oreilles au peché, & les tiennent serrées

pour receuoir les diuines inspirations? Voila comment on aime quant à l'ouyr, les creatures avec amour propre.

Le gouster n'est pas plus exempt de peché. Combien de creatures y a il sur la terre, qui ne soient subiectes à perdre la vie, pour saouler le goust de l'homme, en gourmandise & sans necessité?

C'est vn amour si subtil, que S. Augustin dit, n'auoir iamais sçeu cognoistre la mesure qu'il faut tenir, pour prendre sa refection, autant comme la necessité requiert; à fin de n'exceder en peu ou en trop. Si les fideles seruiteurs de Dieu, qui ne veulent autre chose sinon que la volonté de Dieu soit faicte & accomplie en leur ame, ne cerchants que la mortification, secrettement sont souilleez de l'amour propre, sous ombre de necessité, ou de quelque autre pretexte, en quoy la nature se flatte, par vn soing trop grand de conseruer la santé: que sera-ce de ceux, qui ne prennent garde à eux de si pres? L'ame fidele ne se donne garde, de ceste petite imperfection, qui neantmoins luy donne de grands empeschemens, pour paruenir au pur amour qu'elle doit à son Dieu, & la retarde beaucoup de sa perfection: au moins quand telles imperfections, sont causées par negligence, de ne rechercher

cher la pure verité en toutes ses actions.

Le plus court moyen, pour se servir des creatures, sans amour propre, est la haine de soy mesme. Si en verité nous nous haïssons nous mesmes, tout l'amour propre y sera consommé. Tout ce que la personne prendra pour conseruer la vie, luy sera vn martyre, soit en manger, vestir, ou autre necessité. La raison seule dominante, par laquelle elle sera illuminée de Dieu. Car Dieu ne denie sa grace, à celuy qui se laisse soy mesme pour son amour. Tellement qu'on ne laissera de donner la necessité au corps: mais le fera, comme quelque Seigneur, qui tient vn esclaue en sa maison, en a pitié, le nourrit & entretient; ou bien comme vn pauvre, à qui l'on fait au smone. Et c'est ainsi que celuy qui vrayement se haït soy mesme, pour chercher le pur amour de Dieu, doit nourrir & entretenir son corps: à fin qu'il ne donne empeschement à l'ame, de seruir à son Dieu. Quant à ceux auxquels il ne leur souuient de Dieu, ains font leur Dieu de leur corps: se laissent emporter à toutes leurs sensualitez; qui continuellement se seruent des creatures par amour desordonné, & n'ont presque de remors de conscience: & qui pis est, quand ce desordre ne se retrouve seulement entre les seculiers, mais és religions:

B 3 lors

lors qu'on murmure de la portion commune, donnant fascherie à ceux, qui travaillent iour & nuict pour leur seruice; Dieu qui voit tout, ne laissera impunis tels desordres & proprietiez. Et le peché est d'autant plus grand, que l'obligation est plus grande en vn chacun, de tendre à la perfection selon son estat.

L'on se sert des creatures par amour propre quant à l'odrat, lors que vainement on se delecte à flairer des odeurs ou parfums. Dieu les a creez pour l'homme, à fin qu'il s'en serue à sa necessité: mais outre la necessité, il ne s'en doit seruir, que pour le seruice de Dieu: à l'exemple de la Magdeleine; quand apres auoir donné son ame & son corps, à nostre Seigneur Iesus Christ, luy presenta vne boëtte, pleine d'onguent aromatique, & l'espendit dessus son chef. Car ce que la Magdeleine a faict au corps sacré de Iesus-Christ, naturel & viuant en terre, doit estre faict à son corps qui est en l'Eglise. C'est à dire, qu'és Eglises où repose reellement le sacré corps de Iesus-Christ, au tres-sainct Sacrement de l'autel, là se peut & doit on seruir des odeurs, encens, & autres; & en tout ce qui sert aux ornemens du seruice diuin.

L'on n'offence pas moins par le toucher.

Qui

Qui est celuy qui se peut exempter en ce regard d'amour propre ? & qui, pour ne toucher les autres excez, donne telle reigle en ses habits, qu'il ne s'accoustre plus curieusement, que la necessité ne porte ? Il semble que les bestes sauvages nous veulent donner exemple. Le paon se glorifie en ses plumes : mais si tost qu'il apperçoit, la laideur de ses pieds, il abbaisse son orgueil de sa queue. Et la créature raisonnable se glorifie en tant de diuers accoustrements : or, argent, pierres precieuses, sans s'humilier en regardant ses pieds, qui sont les affections terrestres, tant laides & difformes deuant les yeux de Dieu qui voit tout ! La fille dira, que c'est pour obeyr à son pere & mere, & suiure ses semblables. La femme, que c'est pour complaire à son mary. Mais la personne religieuse que dira elle ? ou quelle excuse aura elle ? veu qu'elle n'a autre à complaire qu'à Iesus-Christ ? Cependant on la verra aucunes fois plus curieuse en ses habits, que ne seroient les seculiers mesmes : & celle qui doit estre le temple du saint Esprit, se rendre esclau de ses amours propres. Et autant de soing superflu qu'elle a, & qui distrait son esprit de Dieu, pour curieusement attifester son corps ; autant perd elle de graces diuines, qui pourroient abonder en elle.

Les cinq sentiments, dont a esté parlé, sont comme les fenestres, par lesquelles la mort entre en l'ame. De là vient que les trois puissances de l'ame, qui est l'image de la sainte Trinité (par lesquelles sans cesse elle est capable de contempler Dieu) l'entendement, la memoire, & la volonté, se separent de son Dieu, pour adherer à la creature, contre leur propre naturel. Car il est plus facile, à l'ame aidée de la grace, de s'vnir à son Dieu par l'operation de sesdictes trois puissances : que de s'arrester aux creatures, au moins si elle suiuoit la grace, qui iamais ne luy est deniée.

Comment on peut cognoistre l'amour propre enuers les creatures raisonnables.

CHAPITRE IV.

C E n'est de merueille, si la creature raisonnable aime son semblable : veu mesmes que Dieu le commande, quand il a dict, *Tu aymeras ton Dieu sur toutes choses, & ton prochain comme toy mesme.* Mais l'homme vient à transgresser ce commandement, & la loy de nature ; lors qu'il aime son prochain, hors de la charité de Dieu ; non pour
le

bien qu'il desire à son prochain, ou afin
 ue Dieu soit loué, mais pour son propre
 bien. En quoy on pourra aussi cognoistre,
 parlant en general de tout, parce qu'il en
 sera parlé en particulier en aultre endroit) si
 nous aimons la creature pour quelque bien,
 que nous trouuons en elle, sans referer ce
 bien à Dieu, qui est la source de tout bien, &
 lors de qui n'y a nul bien. Car s'il aduient,
 que pour les dons de nature, que Dieu a
 donné à l'homme, & qui le rendent agrea-
 ble, nous venons à l'aimer, pour satis-
 faction nostre, ou propre delectation qu'y
 trouuons, soit pour les perfections corpo-
 relles ou spirituelles: corporelles, comme
 beauté, gaillardise & aultres: & spirituelles
 quant à l'ame, lors que les vertus, qui sont
 les guides de toutes leurs actions, rendent la
 personne aimable; iacoit que cest amour
 n'est pour les vertus, si il n'est en Dieu, ou
 pour Dieu, c'est tout amour propre. Il n'y a
 à la creature chose plus aimable que la
 vertu, ni en quoy nostre nature, s'arreste
 plus, que au createur.

Qu'est ce qu'aimer son prochain com-
 me soy-mesme? C'est luy vouloir autant de
 bien, soit au corps, soit à l'ame, comme
 soy-mesme. Donc aimer son prochain
 pour quelque bien ou contentement qu'on
 en

en reçoit, & que si tel accident finissoit, l'amitié seroit perdue, ce n'est point aimer son prochain. C'est s'aimer soy-mesme en son prochain: puis qu'aimer hors de Dieu & non pour Dieu, est amour propre. Il faut sçauoir comment il faut aimer en Dieu & pour Dieu, afin de pouuoir oster de nous l'amour desordonné, pour paruenir à nostre fin, pour laquelle Dieu nous a créé.

Aimer en Dieu est, que premierement se face vne entiere abnegation de soy-mesme, par vn delaissement de tous les propres desirs; & que ce soit en verité & de fait. Puis par vne entiere conuersion en Dieu, se remettre du tout en luy, auquel (si vne ame auoit ceste generosité) au mesme instant, qu'elle auroit fait cete conuersion, avec vne vraye & entiere contrition, quitant toute creature, pour n'y plus iamais retourner, embrassant de fait toutes les vertus courageusement, se iettant du tout en Dieu, ne voulant plus iamais ni en elle, ni en toute autre creature, que la pure volonté de Dieu, & que Dieu seul fust glorifié en elle, & en toute creature: ie di qu'au mesme instant qu'elle auroit fait ceste entiere conuersion de soy-mesme en Dieu, elle auroit en ce moment atteint le souverain degré de perfection. Pour ce qu'en tel delaissement
de

de soy mesme, pour s'vnir toute à Dieu par amour ardent, toutes les mauvaises inclinations, seroient quant à la volonté, mortes à cét instant en elle, & seroit du tout changée par grace en Dieu, ainsi qu'une goutte d'eau iettée dans le vin est changée en vin. Ainsi l'ame fidelle, qui en ceste sorte se convertit à Dieu, ne vit plus en elle, mais en Dieu. Car toutes ses actions & opérations ne seront plus faictes en elle, mais en Dieu. Voilà comment elle aimera toutes creatures en Dieu: pour-ce qu'en Dieu elle voit toutes choses, ou elle cognoit, qu'elle doit aimer tout ce que Dieu aime, & ainsi qu'il veut qu'elle aime.

Il y en a fort peu qui font telle conversion: ou s'ils la font, ils n'y perseverent pas: voilà pourquoy si peu se rendent capables de recevoir les graces divines. Aimer en Dieu, est une charité beatifique: mais aimer pour Dieu, est plus actuel & plus facile à acquérir, & moins parfait: nul ne s'en peut excuser. Aimer son prochain pour Dieu, c'est une action de la volonté, procedante par la grace de Dieu, de nostre franc arbitre: laquelle nonobstant toutes les rebellions de nature, qui n'est encor mortifiée, veut aimer toute creature, aussi bien ses ennemis, comme ses amis, & faire & desirer le bien de

de toutes, pour ce que Dieu le veut, sans auoir esgard aux actions, bonnes ou mauuaises procedantes de la creature: Mais pour ce que Dieu les a faict & créées à son image. N'admettant en nous aucune adhesion, ni simple memoire de soy mesme, pour s'attribuer hors de Dieu tant soit peu de repos, en quelque desir, tant soit il bon, procedant de l'affection que portons au prochain, ni du bien que luy desirons: ains que le tout soit pour la seule gloire de Dieu.

*Comment on peut cognoistre l'amour propre
vers ses amis.*

CHAPITRE V.

EN T R E les hommes l'on tient pour vn bon-heur, d'auoir trouué quelque amy fidele, qui se peut dire vn aultre soy mesme: pour la communication mutuelle, qui se fait entre ces deux amis. Quand telle rencontre se fait selon Dieu, elle n'est à reietter: veu mesme que Iesus-Christ montra plus grande confiance, vers S. Iean l'Euangeliste, que non pas aux aultres disciples, lors qu'il reposoit sur sa saincte poitrine. Quelle familiarité se peut il trouuer plus grande?

Lors

Lors il eut intelligence des secrets de la diuinité. Les amis ont de coustume, à la mort laisser les vns aux aultres leurs plus chers thresors. Nostre Dieu n'a il pas fait de mesme? Il n'y auoit chose au monde qu'il aimast plus que sa bien-aimée mere. C'est à saint Iean, comme à son plus intime amy, qu'il la baille en garde, la luy donnant pour sa mere, quand il dict: *Femme voy-la ton fils*, & au Disciple, *voy-la ta mere*. Il s'est aussi trouué plusieurs saints personnages desquels l'vnion estoit telle, que mesmes ils ont obtenu de Dieu, de sortir de ceste vie à vn mesme iour. Sainte Catharine de Sienne, demandoit vne fois à nostre Seigneur, de deux personnes qui se sont aimées particulièrement en ceste vie, si elles n'auroient au ciel vne particuliere charité en Dieu? A quoy nostre Dieu respondit, que deux, qui en ceste vie auroient aimé l'un l'autre particulièrement, estans causes du bien l'un de l'autre, & ayans induit l'un l'autre à la vertu, auront au ciel vne gloire particuliere l'un de l'autre. Et surtout telle amitié est bonne & meritoire. Il se faut garder, que l'amour propre ne vienne à corrompre la vraye charité, par vne faulx & proprietaire amitié. Comment peut on cognoistre la vraye charité, contre la charité feinte & simulée?

simulée? La charité est si forte, que l'amy donne sa vie pour son amy, & Dieu mesme a donné sa vie pour le grand amour qu'il nous portoit; & s'il estoit de besoing, pour vne seule ame il l'a donneroit derechef, comme il l'a fait pour tous. Mais il ne la fait, ni ne le feroit seulement pour ses amis, ains aussi pour ses ennemis. De mesme en cecy cognoit on, si nostre charité ou amour est fondée en Dieu. S'il aduient que celuy que nous aimons se change, & d'amy deuienne ennemy, que lors nous ne laissons de l'aimer, & luy vouloir ou chercher toutes les occasions de luy faire du bien, autant que lors qu'il nous estoit amy: encor que pour tous les biens que luy faisons, nous n'en recepuons que du mal; nous deuons perseuerer. Car c'est chose facile de faire bien, & aimer celuy qui nous aime plus que soy mesme, & qui souuent se quitte soy mesme pour nous, & n'aimer que pour ce subiect, c'est aimer bestialement; car les bestes sauuages s'appriuoisent, & aiment ceux qui les nourrissent & leur font du bien. Et toutefois entre les hommes ne se trouue souuent qu'il y ait autre amitié, & non seulement entre les seculiers: mais aussi entre les Ecclesiastiques & Religieux. Chose deplorable, de n'aimer que pour quelque vtilité sienne.

De

De ceste sorte d'amour naissent les divisions, noises, & riottes, qui causent vne infinité de pechez, & retardement de la perfection, à laquelle doiuent rendre les Religieux & Religieuses par obligation. Lors que telle amitié deffaut par quelque accident, l'on voit tels amis deuenir les plus grands ennemis, & ce qu'auparauant ils s'estoient communiqué secrètement, le reuelent & en font venin, causant des grands troubles, ce sont les fruits de l'amour propre.

Vne autre maniere de cognoistre nostre propriété, est que lors que nostre amy, par la permission diuine, sera affligé de toutes parts des creatures, vilipendé & mesprisé, Dieu le permettant ainsi pour esprouuer sa vertu, comme il a fait à Job, & au Prophete Royal, lesquels estoient ses fideles amis, & comme Dieu exerce tous ceux qui sont predestinez à grande perfection, l'amy ignorant tel secret, voyant celuy ou celle qui auparavant estoit en credit & autorité, mesprisé, chargé de calomnie, abandonné des creatures, quoy qu'en son cœur il l'aime, & est marry de la fortune de son amy; ce neantmoins le quitte, & pour crainte de recevoir quelque notte en sa renommée, s'il conuersoit avec celuy, qui est en tel mespris, cache

cache son affection, & se ioinct avec les ad-
uersaires d'iceluy, comme faisoit S. Pierre,
quand il renia nostre Seigneur, disant: ie ne
le cognois point, luy qui auparauant s'estoit
vanté, que si tous les autres abandonnoient
nostre Seigneur, iamais luy ne l'abandon-
neroit. Aduenant tous les iours, és serui-
teurs de Iesus-Christ qui ensuiuent sa vie,
ce qui est arriué en sa personne. C'est là en-
core, que se voit & remarque vn effect de
l'amour propre en ceux qui n'ont pas de
vraye charité. Doncques, voulez vous ai-
mer vostre prochain sans amour propre?
Imitez la Vierge, qui a perseueré à suiure
nostre Seigneur iusques à la mort, sans
crainte de quelque dommage, qui luy
eust peu arriuer, ni en sa vie, ni en sa re-
nommée. Voyez la Magdeleine, qui cher-
chant nostre Seigneur si courageusement,
sans crainte des Iuifs, plus forte que les
Apostres, dict à Iesus-Christ mesme, pen-
sant que ce fut vn iardinier: *si vous aux-
esté mon Seigneur, dites moy où il est, & ie l'em-
porteray!* O heureuse & fidelle amour, qui ne
se cherche en rien soy mesme! Quelqu'un
pourra dire que c'estoit Dieu. Mais notez,
que nous auons Dieu present, & que Dieu
a dit, *ce que vous ferez au moindre de mes freres,
vous le faites à moy.* La Magdeleine cherchant
& ap-

& approchant de nostre Seigneur, apres qu'elle fut conuertie, les Pharisiens s'en scandalisoient, disants: *si cestuy estoit Prophete, il scauroit bien que ceste cy est pecheresse.* Nostre Dieu qui scauoit leur murmure, laissa-il la Magdeleine? nenny. Et toy petit vermiseau de terre, tu seras honteux de ton frere, ou de ta sœur affligée, qui deuant Dieu sera plus grande que toy? Quittes donc ton amour propre, & sois autant fidelle & prest de faire la charité à ton prochain, tant en aduersité, comme en prosperité, comme tu doibs à l'imitation de Iesus-Christ.

*Comment l'amour propre ou sensuel, est caché
sous ombre de l'amour spirituel.*

CHAPITRE VI.

C'Est vne tromperietres-subtile de Satan; quand ne pouuant tromper les seruiteurs de Dieu par vne affection grossiere (car c'est de nostre amour, que vient ou tout bien, ou tout mal, comme disoit le glorieux Pere S. Augustin, *mon amour*, dict-il, *c'est mon poids*, aussi Dieu ne demande de nous que nostre cœur, disant *mon enfant, donne moy ton cœur*) il les trompe sous
C ombre

ombre de l'amour spirituel. Escoutezames deuotes, espouses de Iesus-Christ, qui vous estes consacrées au Dieu viuant: si pour vous vnir par vn pur & ardent amour à iceluy vostre espoux Iesus, vous auez par le tranchant couteau de la mortification, osté de vous l'amour propre, & quicté tous vos sentiments & contentemens extérieurs, mesme és puiffances de l'ame, quant aux creatures: gardez vous d'vne plus subtile tromperie, qui est en l'amour spirituel. Qu'importe à vn aigle, qui de sa nature volle tres-haut, s'il est tenu captif, par vn petit filet à vn ongle, ou bien s'il est lié par tout le corps? Que luy importe-il, di-ie, puis qu'il ne peut faire son cours, & voller vers le ciel? De mesme est-il de l'ame raisonnable, à qui de sa nature il est plus facile de voller au ciel, & de tendre à son Dieu, par vn continuel amour, & diuine contemplation, que n'est à l'aigle de voller, ou à la pierre, qui contre sa nature est iettée en hault, de tomber impetueusemēt en bas, si vn petit filet la tient attachée à la terre, qui l'empesche de paruenir à sa perfection, & de iouir des doux propos, & familiarité que Dieu comunique à l'ame, qui s'y dispose. Mais quel est ce filet? L'amour sensuel de quelque creature: lequel tant soit il saint, donne empeschement de paruenir au pur amour

amour de Dieu. Mais comment cognoistre l'amour propre és affections spirituelles, veu que la fin de tel amour est bonne, & que l'intention est pour Dieu, & mesmes pour s'avancer à la vertu, par l'ayde de quelque seconde personne, ou bien par la conuerſation de plusieurs? Cela se peut cognoistre en plusieurs manieres. La premiere, si l'absence de telle personne, nous cause tristesse, trouble ou chagrin. La deuxiesme, si en nostre memoire auons souuēt la representation de telle personne hors de Dieu. La troisieme, si la memoire de telle personne, nous cause alteration ou à ioye ou à tristesse. La quatrieme, si nous sentons quelque inquietude, quand telle personne aime plus d'autres que nous. La cinquiesme, si telle persōne est cause, que perdons l'indifference en toute nos actions, soit d'accepter ou laisser, tout ce qui aduient par l'ordonnāce diuine. Quant à la premiere, si l'absence nous cause tristesse ou trouble, c'est vne chose certaine, que toute tristesse, qui est avec trouble procede d'imperfectiō. Doncques si l'affection quelque sainte qu'elle soit, cause ce dēreiglement en l'ame, cest amour sensuel. Pour la deuxiesme, c'est auoir la representation hors de Dieu, quād la memoire de telle personne nous fait oublier Dieu, ou que son image a plus de

36 DE LA RVINE DE
puissance en nostre intellect, que Dieu mes-
me. En quoy nous conceuons telle estima-
tion de telle personne, que nous y mettons
tout nostre appuy, & samble que toute
nostre perfection depende d'elle, plus que
de Dieu mesme. Cecy donne grand empes-
chement de paruenir à la perfection. Mais
auoir la memoire de quelque personne en
Dieu, c'est ce qui la fait aimer d'auantage,
Pour ce que celuy qui aime ainsi, a Dieu
pour son premier obiect, auquel son ame &
les puissances sont du tout trāsformées. Où
il voit en Dieu toutes creatures, sans que les
parties inferieures puissent donner aucun
empeschement à la memoire, de pouuoir
operer ses fonctions naturelles. Ayant tout
ensemble vne cōtinuelle memoire de Dieu
& de la creature, non pas referée à soy mes-
me, ains autant que Dieu en soit glorifié.
Que s'il semble chose ridicule, de pouuoir
en mesme temps se souuenir de Dieu, & de
quelque personne, on le peut entendre, en
ce que, comme les bienheureux sans cesse,
gousteront la ioye les vns des autres, par
l'vnion de la charité en Dieu, de qui les puis-
sances de l'ame iouyront chascune selon
leur operation: de mesmes, à proportion
les personnes estans vnies en Dieu en ceste
vie, sont aussi vnies avec leur prochain. La
troi-

troisieme est, si la memoire cause alteration ou a ioye ou a tristesse. La ioye souvent est causée par le desir de la presence de la chose aimée: lequel desir estant trop excessif, oste la tranquillité de l'ame. De mesme la tristesse est causée par l'absence, ou ne receuant telle satisfaction que l'on voudroit de la personne aimée, telle tristesse causée par ces alterations empesche l'ame en toute bonne operation vertueuse. Quatriesme, voyez qu'elle est l'inquietude qu'on ressent, quand la personne aymée, ayme plus d'autres que nous, & combien on se fouruoie de la charité: Car la vraye charité n'a acception des personnes; mais s'extent à toutes. Cinquiesme, si nous perdons l'indifference en toutes nos actions, soit d'accepter ou laisser tout ce que Dieu veut en nous, c'est se separer de la volonté & charité de Dieu, sans laquelle, la charité ou amitié du prochain, est vaine & inutile. Il y a encor vne autre espece d'amitié spirituelle, fort pernicieuse en quelque communauté. C'est que sous ombre de vertus, quelqu'un se tiendra attaché à quelque, ou plusieurs personnes, d'une affection aveuglée & proprietaire: en sorte que toutes les actions de telle personne, tant soient elles imparfaites, luy semblent vertus; & au contraire tout ce

qu'elle voira aux autres, à qui elle ne portera ~~elle~~ affection, tant soient elles vertueuses, tout luy sera à degoust, iugeant toutes leurs actions imperfections: & souuent causera quelque debat, pour pouuoir conseruer celles qu'il aime, & deprimer d'autres, d'auec lesquelles il est diuisé par ceste alienation, procedante de ceste affection particuliere & proprietaire. C'est vn venin trop pestifere en religion; qui lors qu'il s'y glisse, cause vne infinité de diuisions, où ne doibt estre qu'une ame & vn cœur en Dieu. Et de tant plus pernicieux, qu'il est caché sous vne apparence de vertu, & d'un zeile de vouloir corriger ou amender celles, desquelles on fera peut estre, vne infinité de iugemens temeraires. Ceste affection prouient aussi souuent de quelque orgueil caché, aspirant à quelque dignité, quand on voudroit gouuerner les consciences, & faire des suffisans ou suffisantes. Et si telles personnes sont corrigées, ne sont honteuses de dire, que c'est pour leur conscience, qu'elles parlent à telles & telles, qu'elles les enseignent: & souuent on leur pourroit bien dire, Medecin, guery toy, toy mesme. Car sous ceste couleur, celles qui ne se laisseront conduire, & dependre en tout de leurs aduis, n'en faisant cas, les reietteront, & les mespriseront,

priseront, n'estimans nulle perfection, que ce qui vient de leur propre sens. Ce n'est pas à dire, que l'on ne doive aider l'un l'autre, corporellement & spirituellement, quand on voit sa sœur, ou son frere en danger. Et Dieu mesme parlera quelque fois par la bouche des plus simples, pour consoler quelque affligé. Mais que ceste charité soit egale à tous ou toutes, sans acception de personnes, ni pretention d'aucune gloire, mais d'une pure charité en Dieu. Car par ceste affection singuliere, les maisons de religion deuiendroient maisons de seculiers, plustost que de religion, pour les enuies & ialousies qui s'engendrēt par ces proprietéz.

*Comment on peut cognoistre l'amour propre
vers ses ennemis.*

CHAPITRE VII.

C'EST vne chose contraire à la nature, d'aimer celuy qui nous faict tort. Et neantmoins la nature est si corrompue, que l'amour propre se met encore en cest endroit. S'il aduient que quelque personne porte inimitié à quelqu'un, & que ce sien aduersaire ait quelque autorité, en quoy elle

peut esperer quelque brigue, pour satisfaire à son desir ou ambition, elle l'aimera pour ce seul respect, quoy qu'en son cœur elle ne luy voudroit aucun bien: & pour satisfaire à quelque passion se iointra ensemble, comme faisoient Pilate & Herode, contre la personne de Iesus-Christ. Amour trop pernicieux, qui ne se trouue seulement entre les seculiers: mais quelque fois encor entre gens de religion, quand ils aspirent à office & dignité, ayans quicté le monde, & le cherissans en religion. Delà peuuent naistre plusieurs flateries, dissimulations & duplicitez, & des secrettes detractions & diffamations du prochain. Vne aultre espee d'amour propre vers ses ennemis, fort subtile & cachée, aussi sous pretexte de vertu. Il aduient qu'aucuns desirent tant leur propre repos, & fuient la croix, qu'aduenant que quelqu'un leur porte inimitié, ils feront tous les actes de vertu en apparence vers telle personne, pour l'induire à amitié, & de fait l'aimeront. Mais cest amour, & cest acte de vertu procede d'une reflection à soy mesme, pour trouuer son propre repos, & par crainte d'endurer quelque chose pour Dieu. Ce sont vertus morales, qui ne sont fondées en charité. Les Payens & Heretiques ont souuent ceste vertu, & de fait s'y estu-

estudient, & entre eux sont plus vnis en telle amitié, que ne sont les Chrestiens & Catholiques, voirez mesmes les religieux. Mais en la fin, quelle recompense en ont ils, sinon l'enfer? Ame deuote, que telle amitié ne se retrouve en vous, car hors de Dieu n'y a vraye charité, comme dict saint Paul, si ie donnois mon corps au martyre, & que ie fusse brulé & rosty pour le nom de Iesus-Christ, & si i'auois l'esprit de prophetie, & toutes les sciences diuines & humaines, & le pouuoir de transporter les montaignes d'un lieu à l'autre, si ie n'ay la charité, ce n'est rien. Ces personnes traueillent, & ne rapportent aucun fruit. Penseront estre parfaicts pour tel acte de vertu, qui en la fin se trouueront trompez, ne trouuant point autre fruit, que de l'amour propre. Doncques faut aymer ses ennemis, par ce que ce sont creatures créées à l'image de Dieu, & pour ce que Dieu le veut & les aime: & aymer les persecutions, sans regarder qu'elles viennent des creatures, mais comme de Dieu, pour nous donner occasion de meriter. Dieu aime tant la creature, que quand il voit vne ame capable d'endurer, voyant que les afflictions nous sont necessaires, s'il ne trouuoit des hommes pour nous faire endurer, il enuoiroit plustost vn Ange.

Ange. On doit chercher toutes les occasions de se pacifier avec ses ennemis, voire mesme ayant receu quelque affront, le soleil ne se doit coucher, que n'ayons fait quelque bien, à celuy qui nous fait mal, à fin de le gagner, comme dict nostre Seigneur. Si ne trouuons des occasions pour le faire corporellement, faisons le spirituellement, à l'exemple de Iesus en croix, quand il dict: Mon pere, pardonnés leur, car ils ne scauent ce qu'ils font. Ainsi prioit il pour ceux qui le crucifioient: de mesme deuons nous aimer nos ennemis d'un pur amour en Dieu. A l'opposite ils s'en trouue, qui faisant maniere de ne donner occasion à leur aduersaire, de se troubler d'auantage, ne voudront faire aucun acte de charité ou d'humilité, pour induire leur prochain à paix & vnion, disants ie veux fuir les occasions & ne se trouuer en sa presence, pource que ma parolle luy augmentera sa fureur: ou bien, ie l'aime, ie ne laisseray de prier pour luy, encor que ie ne parle à luy. Cecy ne suffit pour acquerir la vraye charité. C'est vne tromperie de nostre amour propre, qui se flatte soy mesme, donnant lieu à son orgueil caché, qui craint de s'humilier. Voulez vous aymer vos ennemis en Dieu? Surmontez leur malice par patience, & en leur

leur montrant toute douceur & bienfaits, non vne fois, mais autant de fois que serez assailly d'iniures, & autres persecutions, autant de fois, montrez leur bienueuillance & amitié, comme s'il vous auoient faict quelque grand bien. Par ce moyen seront contraincts de cognoistre en leur conscience, leur volonté peruerse. Et s'ils continuent iusques à la mort vous persecuter, continuez aussi iusques à la mort de leur môstrer toute amitié possible, c'est en cecy que consiste la vraye perfection, où si peu de personnes paruiennent; pource qu'en verité ils ne practiquent telles actions purement en Dieu. A ce propos dict fort bien S. François, *Je n'espere non plus, que ie prens plaisir a endurer.* C'est donc en cecy que nous cognoissons, si nous aymons Dieu en verité: ce n'est en la douceur & consolation, ni au sentiment interieur, que consiste le pur amour que deuons porter à Dieu. Car en cecy il est facile d'aimer, veu que souuent nostre nature s'y transporte, & se met avec l'esprit, dont sera parlé en aultre lieu plus à propos. On veut seulement pour le present monstrier, que la pierre de touche, pour cognoistre le parfaictement aimer Dieu, c'est d'aymer d'un pur amour ses ennemis, sans nulle recherche de soy mesme. Ceux qui sont par-

uenus

44 DE LA RVINE DE
uenus à ce degré, les iours de consolation
leur font peine: & les iours de tribulation
leur seruent de consolation. S'ils sont quel-
ques iours sans endurer, il leur semble que
Dieu les a mis en oubly, tant ils aiment la
croix, disants, *patir ou mourir.*

*Comment nous deuons plaire à Dieu seul, & non
aux creatures, où il y a chose contre la
gloire de Dieu.*

CHAPITRE VIII.

C'EST vne chose tres-veritable, que si
nous voulons paruenir au sommet de
la perfection, par vn amour vnitif à Dieu
seul, il faut necessairement quicter toute
complaisance humaine, car nous ne pou-
uons complaire à deux maistres, à Dieu &
au monde. Lequel des deux voulons nous
choisir, pour le commencement & la fin de
tous nos desirs & affections? ou le createur,
ou la creature? Il n'y a celuy qui ne dira,
qu'il veut Dieu par sus tout. Et toutefois
c'est ne le vouloir, quand pour complaire à
la creature, nous obmettons ce qui est de
la gloire de Dieu. Comment pouuons-nous
complaire à Dieu? Premièrement, en vou-
lant

lant ce que Dieu veut. 2. faisant tout ce que Dieu demande de nous. 3. aimant tout ce que Dieu aime. 4. n'admettant iamais en nostre volonté, chose qui deplaist à Dieu. 5. que nostre ame & ses puissances soient tellement vnies avec Dieu, que iamais plus n'en soient séparées. Si l'ame en verité ne cherchoit autre que Dieu, la terre luy seroit ciel, & commenceroit dès ceste vie, à goûter le repos qu'on trouue en Dieu là sus au ciel. Autant de difference qu'il y a de Dieu à la creature, autant de difference y a-il des effects qui prouiennent, de la complaisance que voulons auoir à Dieu, ou à la creature. Cecy ne se faict que par vn estroict lien d'amour. Celuy qui aime n'a repos, tant qu'il ait trouué tout ce qu'il peut imaginer, pour complaire à son bien-aimé. Entre tout ce qui captiue l'amour de son bien-aimé, est la beauté. Qu'elle beauté nostre Dieu veut-il que nous ayons pour gaigner son amour? La beauté du corps? Non, mais la beauté de nostre ame. Voulons nous plaire à Dieu? Cherchons nostre beauté perduë par le peché. Nostre beauté perdüe est l'estat d'innocence. Plus, nous garderons vne pureté en nostre ame, n'offensant Dieu tant que nous pouuons & tant soit peu, & chassant toute imperfection, par vn continuel regard interieur

ricur de la présence de nostre bien-aimé Iesus-Christ, d'autant plus aussi approcherons nous de nostre estat d'innocence. C'est par ceste beauté que serons agreables à Dieu. Pource disoit l'Espouse au Cantique, chapitre premier, *N'ayez esgard a moy, parce que ie suis brunette, car le Soleil m'a regardé.* C'est l'ame fidelle qui parle à son espoux Iesus-Christ, cognoissant bien que le peché, nous a osté la naïfue beauté & blancheur de nostre ame. Encor que nous n'ayons de peché actuel, nous retenons en nous la concupiscence par le peché originel de nostre propre pere Adam; de laquelle nous ne pouuonsestre deliurés, mesme par le Baptisme. *Ne prenez point garde à ce que ie suis brunette, ie suis noire, mais ie suis belle.* Voulant dire, encor que par le peché premier ie retiens en moy la cōcupiscence; neantmoins ie suis belle par la penitence, & par la mortification. Voila comment l'ame se veut rendre agreable à son Dieu, & ne complaire à autre qu'à luy seul, pour iouyr de ses doux embrassements: comme la mesme espouse dit au Cantique; *Qu'il me baise d'un baiser de sa bouche.* Quels sont ces baisers? C'est lors que l'ame ayant surmonté toute complaisance humaine, n'ayant plus que Dieu seul, en qui toutes ses operations, soit de l'ame, soit du corps, sont telle-

tellement transformez; qu'elle iouyt continuellement de la presence de son Dieu. Le tient en serré dans son cœur par vn estroict lien d'amour. Au moyen duquel elle contemple sa beauté, & reçoit en soy les influences de ses diuines graces, & celestes consolations, dont elle est enflammée comme vn Seraphin. C'est chose à deplorer que l'ame se retire de ce bien, ou ne se dispose pour le receuoir par delaisser la complaisance des creatures; laquelle nous auugle, nous faict laisser le bien supreme & infini, pour vn bien perissable & transitoire. Ce qui est causé par vne multiplicité de respects humains, ou bien transports de vaine affection, ou crainte. Si c'est d'vne vaine affection dont nous sommes attachez à la creature, se presentant quelque occasion, où il est question de maintenir la gloire de Dieu, & que la personne aimée ne s'y veut ranger, souvent nostre affection se transporte de laisser plustost ce qui est de la gloire de Dieu, & commettre quelque peché, plustost, di-ie, que de desplaire à celuy ou celle que nous aimons. Ou bien si c'est vne crainte humaine, & que l'on sente en sa conscience des remords, si ie fay telle & telle chose, ie blesse ma conscience, & offence mon Dieu, neantmoins la crainte seruile a tant de forces

ces en nostre couïardise que foulât aux pieds nostre bonne conscience; nous perdons vne infinité de graces de Dieu & sa bienueïllance, plustost que de contredire à vne creature mortelle. Cecy se faict encor en autre maniere, à sçauoir quand on aime les flatteries, & que prestant l'oreille aux flatteurs, on se laisse emporter à leurs fardées paroles, qui souuent sont mensongeres, & nostre nature s'arrestant à telle vanité; pour complaire à telle personne, laissera Dieu. D'autres se laisseront emporter par corruption, receuant dons & presens: puis se presentant quelque occasion où il y va de la gloire de Dieu, ou du bien de la religion, ou du prochain, à quoy telle corruption les voudroit induire, ainsi se sentans obligez n'ozéront luy desplaire. Iamais vn vray Chrestien, & moins vn Religieux ou Religieuse, ne doit donner lieu à telles vanitez: mais magnanimement surmonter toutes creatures: & desirer plustost desplaire à tout le monde, que de desplaire à Dieu, en quelle petite chose que ce soit; plustost mourir que de laisser Dieu pour la creature. Ce n'est pas à dire, qu'on ne doie supporter son prochain en quelque infirmité: mais de commettre quelque peché à ceste cause, il n'est nullement licite, & toutefois cecy est
si com-

Si commun & souuent on ne s'en donne garde, meſmes és Religions ſoubs ombre de quelque bien. Comme pour exemple, ſi quelque ſuperieur vouloit faire quelque choſe, qui porteroit preiudice à la communauté, ſ'il demande les aduis ou voix de ſes Religieux ou Religieuſes, iceux voyans la volonté de leur ſuperieur, quoy qu'ils ſça- cherent que ce ſoit contre la gloire de Dieu, ou au preiudice de la paix & vnion commune, donneront leurs voix contre leur conſcience, ſuiuant la volonté de leur ſuperieur, diſans qu'ils ſont obeyſſants, veu que c'eſt ſa volonté, ou bien craindant de luy déplaire, & de n'eſtre les premiers carreſſez, cecy ne ſeroit petite faute deuant Dieu. Car on n'eſt pas obligé de ſuiure l'aduis des ſuperieurs en choſe qui peut bleſſer la conſcience, par quelque péché. On doit porter honneur & reſpect à ſes ſuperieurs, leur obeir en toute humilité & ſimplicité: mais où il y va de la gloire de Dieu, en quoy la conſcience peut eſtre intereſſée, & que cela eſt cogneu ſuffiſamment ſans en douter, ſa n'aduienne qu'on ſe laiſſe emporter au reſpect humain, pour complaire aux creatures. Le meſme aduient quelquefois des ſuperieurs vers les inferieurs. Ils ſe laiſſeront emporter par flatterie, ou autre reſpect humain,

50. DE LA RVINE DE
souuent contre leur conscience. Donneront à leurs subiects des licences, contre leurs reigles ou statuts, qu'ils ne peuuent donner. Se chargeront la conscience craignant de leur desplaire. Et qui plus est admettront quelquefois des gens en la Religion, qui seront incapables & du corps & de l'ame. Du corps par infirmité, ou maladies, qui insuffisans, les rendent pour s'acquitter de leurs reigles & statuts. De l'ame, estans inhabiles à la mortification, & à rien propres, qu'à apporter du trouble, & de la charge à la communauté. Receuront, di-ie, telles gens aux despens & dam de leur troupeau. Et ce pour complaire à quelques seculiers, qui se diront amis, & pour personnes notables, auxquelles on n'ozera contredire. Les superieurs doiuent estre en ce particulier constants & magnanimes, regardant la volonté de Dieu, & quelles sortes d'ames sont appellées de Dieu à la Religion : & aduifer que pour quelque faueur ou respect humain que ce soit, ils ne chargent leur conscience, au preiudice du bien de la Religion.

Que

*Que l'amour propre peut estre quelquesfois au desir
de la frequentation des saints Sacrements.*

CHAPITRE IX.

EN TRE tous les actes de pieté, l'un des plus nobles, plus dignes & meritoires qu'on scauroit dire, est la frequentation du saint Sacrement de l'Eucharistie. Nostre Seigneur ne nous a peu laisser vn gage plus precieux, que son propre corps sous ces especes: où sont cachez tous les thresors des graces diuines. C'est nostre vie, & tout nostre bien. Si on tient pour vn grand benefice, que Dieu auoit fait à Adam, d'auoir planté au paradis terrestre l'arbre de vie, quel plus grand benefice nous a-il fait, puis que nonobstant la malediction qu'auons encouruë par le peché (par lequel, nous auons esté priuez de ce premier benefice, & chassé dudit paradis terrestre) nostre Dieu nous a en eschange donné la vie mesme? Car tant de fois que sommes morts spirituellement par le peché, nous disposants par deuë cōfession & deuotieuse compunction, pour dignement receuoir ce tres-saint & digne Sacrement, nous receuons la vie de nostre

ame. Oeuvre de grande admiration, de recevoir en nous, celuy que le ciel & la terre ne peuuent comprendre, & deuant la presence duquel les Anges tremblent. Se rendant neantmoins, si doux, qu'il veut pour l'amour qu'il nous porte, que nous le recevions. C'est pourquoy nostre Seigneur dit, *Qui mange ce pain vivra eternellement, & si vous ne mangez la chair du fils de l'homme, vous n'aurez point la vie en vous.* Si nous le recevons dignement, c'est tout nostre soulagement : il console les affligez, amollit & flechit les cœurs endurcis, sous la volonté de Dieu. Si on est tiede & degouté aux choses spirituelles, on y trouue la deuotion, la ferueur, la contrition, le desir de la vertu. En fin, l'on y rencontre tous les biens qu'on scauroit souhaitter. Si la manne au desert, figure de ce saint Sacrement, auoit ceste propriété, de rassasier & contenter toutes sortes de personnes differentes en goust, à combien plus forte raison deura auoir ce saint Sacrement en soy ceste vertu, de rassasier spirituellement, voire corporellement, tous ceux qui dignement le recoiuent? Car ce n'est plus la figure, mais la chose figurée; non plus la manne, mais Dieu mesme. Il s'est trouué des personnes, qui ne receuoient iamais ce saint Sacrement avec
dili-

diligente preparation, qu'ils ne sentissent tels effects issir de la vertu du saint Sacrement. Que si elles n'eussent creu par la foy que Dieu est vrayement en iceluy, les effects, di-ie, si grands, qu'elles receucient en leurs ames, les eussent assez faict croire, qu'autre chose que Dieu ne pouuoit causer iceux effects. Cause pourquoy, elles craindroient, que ceste grace ne leur feist perdre ou diminuer le merite de la foy. Crainte, laquelle procedant d'humilité n'est pas mauuaise: car Dieu n'ostera pour ce les merites de la foy. Il departit ses graces, à qui & quand il luy plaist. Les bien-heureux, ne iouyront plus par la foy, mais verront Dieu clairement. Pour ce ne se faut esmerveiller, si en ceste vie Dieu donne quelque-fois à vne ame, qui s'est de long temps mortifiée, & qui aime Dieu filialement, & en verité, quelque grace non accoustumée. Je sçay de la bouche mesme de celuy, à qui telle grace a esté donnée, qu'elle luy caufoit toute sa vie vn grand rabaissement de soy-mesme, & amour en Dieu. Et à la verité les merites procedants de la frequentation de ce saint Sacrement, font que nous le deuons desirer de tout nostre cœur. Mais que tel desir soit pur. Car souuent il y peut auoir de l'amour propre, dont aucuns se

pourront esmerveiller. Mais il est vray, & n'y a action si sainte, tant que sommes en ceste vie, qu'elle ne puisse estre avec l'amour propre. C'est pourquoy il nous faut tousjours veiller. L'écriture ne le dit elle pas? & que les bonnes œuvres seront examinées? On peut cognoistre cest amour propre, aux diuerses qualitez des personnes. Si ce desir de la frequentation des SS. Sacraments est en quelque personne seculiere, & que ce desir de communier soit extraordinaire & plus frequent, que n'ont accoustumés les gens spirituels, suiuant leur bonne deuotion: si c'est quelque personne bien viuante, qu'elle communique tel desir à vn confesseur expérimenté. Et puis si le confesseur luy refuse, soit qu'il le face pour l'esprouer, soit qu'il ne le trouue bon pour quelque sujet, si la personne requerante est bien resignée, & sans se troubler obeit humblement, quelque peine qu'elle endure en son interieur, pour la priuation d'un si grand bien, auquel elle aspire continuellement, si, di-ie, nonobstant le refus du superieur ou confesseur, auquel elle se soubmet, elle se resigne d'endurer plustost la mort, que luy pourroit causer la vehemence de tel desir, se cognoissant indigne, quoy que l'amour luy cause telle confiance, on peut vrayement dire que tel desir vient

vient de Dieu, & qu'il n'y a nul amour propre; & luy peut-on librement permettre la frequente reception dudiect S. Sacrement de l'Eucharistie. Mais si au contraire on voit, encore que ce desir soit ardent, qu'en luy refusant de communier, si souuent qu'elle demande, pour quelque subiect qu'on trouuera expedient, elle s'en trouble & murmure, sera remplie de chagrin, ne voudra parler à celuy qui ne luy veut permettre, si on trouue tel desordre comme il s'en est trouué en aucunes, & qu'il sembloit que leur vie estoit sainte, tenant neantmoins à tel desordre, quand on ne leur accorderoit leur volonté: en ce cas, on peut croire que tel desir est vn vray amour propre, & presumption cachée. Et à telles gens ne se doit rien accorder, mais les bien mortifier. Discrettement toutesfois, à fin de reigler & ne point destourner leurs bons desirs. Si c'est en quelque communauté, il y aura quelquefois plusieurs, qui auront cete deuotion, de communier plus souuent qu'on n'est accoustumé. Ce desir est tresbon, mais faut regarder s'il n'est conduit de l'amour propre. On le verra en ce que, si tel desir est propriétaire, comme s'il l'induit à chercher des moyens contre l'obedience, de communier en cachette, par des rusées finesses,

comme il s'est veu plusieurs fois, c'est vne propriété spirituelle, procedant de l'amour propre. Vne autre maniere de descouurir ceste tromperie est, qu'on ne voudra par quelque craincte humaine chercher tels moyens, mais induiront plusieurs à poursuiure & importuner leur supérieur, nonobstant qu'elles voyent le peril qui en peut venir par aucunes, qui pourront commettre de grandes fautes. Car il y en a qui par vne craincte procedante de quelque infirmité, ou par vne grande reuerence interieure qu'elle porteront à ce mystere sacré, n'oseront par humilité s'en approcher si souuent. Comme mesme on voit que saint François n'a voulu estre prestre, pour s'estimer trop indigne. Ce que procedât d vne grande humilité: ne serot les personnes, qui auront ceste sainte craincte à blasmer; combien que les autres descrites cy dessus, les blasmeront, & seront mescōtentes contre elles, si que pour ceste cause elles sont empeschées de paruenir à leur desir. Quoy qu'en soy ce desir soit saint, neantmoins il est desordonné, estant conduict par l'amour propre, en ce que l'on mesprise son prochain, qui peut estre, deuant Dieu sera plus agreable par ceste humilité, que l'autre par ces desirs mal reiglez. l'entends quand c'est en des Reli-
gions

ons bien reformées, où ordinairement on
 equente souuent, plus que leurs ordon-
 nances ne portent, les saincts Sacrements: &
 u'outre telle bonne coustume, on n'est
 content sans en auoir encore de plus parti-
 culieres, comme i'ay dit: sans se voulolr ac-
 commodier ou soubmettre aux inconue-
 nients qu'il en peut venir. Car mieux vau-
 le priuer d'un bien en quoy il n'y a pas de
 peché de s'en abstenir, qu'autrement estre
 cause de quelque peché,

*Que nous devons desirer la frequentation des
 saincts Sacrements avec un pur amour.*

CHAPITRE X.

D'AVTANT que tous desirs, qui de soy
 sont tresbons, sont rendus desagrea-
 bles à Dieu, pour ce qu'ils ne sont purs,
 c'est à dire, que nostre nature y apporte tant
 d'action ou d'intentions vicieuses, causées
 par l'amour de nous mesmes, qu'elle faict
 perdre & corrompre tout ce que pouuons
 faire de bon & vertueux deuant Dieu: c'est
 pourquoy il faut purifier ces bós desirs, ainsi
 que l'or en la fournaise, purifier, di-ie, les de-
 sirs procedants, d'une grande affection que
 portons

portons à Dieu, qui cause en nous ceste alteration, de ne trouuer aucun bien, si ce n'est en luy, pour nous rassasier, ni autre chose qui puisse contenter nostre amour, que la iouyssance de nostre bien aimé. Ne se pouuant trouuer familiarité plus grande, que le receuant en soy au venerable S. Sacrement. Pourquoy ce n'est de merueille, si vne ame vrayment enamourée de son Dieu, voudroit tant qu'elle pourroit le recevoir Sacramentellement, comme on trouue de plusieurs Saints, qui viuoient sans manger, seulement se refectionnant de ce celeste pain. Telle estoit la serafique sainte Catherine de Sienne, laquelle aucune refection ne pouuoit contenter, que la reception de son Createur, & mesme la viande corporelle la rendoit malade, ses desirs neantmoins estoient si purs, que lors que son Confesseur luy deffendoit, elle obeysoit & se contétoit, encore qu'elle scauoit ne pouuoir viure, estant priuée de celuy, auquel elle estoit toute transformée par amour. Son Confesseur ayant esprouué par sa resignation, que tels desirs estoient de Dieu, luy accordoit la reception plus frequente. Sainte Catherine de Genne, disoit, qu'elle eust bien reconnu, si on luy eust donné vne hostie non consacrée, à l'encontre d'une sacrée,

, tant sentoit elle en son ame, les effets de la grace de Dieu en ceste reception. Ceste grace luy estoit donnée pour sa grande pureté de vie, & amour pur, hors de toute propriété corporelle & spirituelle. On pourroit icy demander, comment on peut connoistre & acquérir ceste pureté d'amour. C'est à mon petit iugement, lors que tous nos desirs, affections & volontés, tant bien que mal, ne sont hors de la volonté de Dieu. Mais comment peut on connoître la volonté de Dieu ? C'est que si Dieu veut que tel privilege nous soit donné, il disposera que toutes causes contraires seront changées à c'est effect, & que rien ne nous pourra donner empeschement. C'est en cecy que consiste le vray & pur amour, qu'à tout moment iusques à la fin de nostre vie, nous ne voulions ni ne desirions autre chose nous aduenir, que ce que Dieu nous enuoye à tout moment. C'est en la conformité de ceste volonté que consiste le vray & pur amour. Ayant doncques tels desirs procedants de l'amour, lequel toutefois de nous mesme nous ne pouuons auoir, ni vn seul bon desir, & craindant de resister à la grace de Dieu, nous pouuons & deuons de nostre part les descouurir à nostre confesseur ou superieur. Mais avec telle indifference,

ference, que s'il nous est accordé ou refusé, nous l'accepterons de si bon cœur, comme venât tout de la main de Dieu. Dieu ne laisse pour ce de nous laisser ce desir, à fin que puissions meriter en deux manieres. L'une est qu'ayant le desir & en estat priuées sans nostre faute, nous auons le merite comme si le pouuions mettre en effect. L'autre est que nous auons le merite de l'obedience, en soumettant nostre volonté, contre tous nos desirs, laquelle submission humble, est tant agreable à Dieu, que souuent nous luy serons plus agreables par ceste humiliation, & delaisement de nostre volonté, quoy que tresbonne, qu'en l'action mesmes. Il y en a aucunes qui ont ce desir, & leur vie ne montre rien moins, que de correspondant à tels desirs, par ce que la mortification, leur est ennemie. Se garderôt bien de grand peché, mais de chercher la perfection de vie, & la mortification, il n'en faut point parler. D'où procede donc tel desir sans effect, si ce n'est, que la personne chrestienne, voit qu'elle doit satisfaire à Dieu, & s'aimât trop soy mesme, fuit le trauail de la mortification, luy semblant que par la frequentation des saints Sacremens tout luy sera satisfait. Il est bon de mettre toute nostre esperance, aux merites de nostre Dieu. Mais ne faut presumer trop de

sa bonté. Pour ce que telle fréquentation, comme de iour à autre ou tous les iours, requiert vne grande pureté de vie, c'est là préparation la plus necessaire. Aussi que ceux qui sont conduits de l'esprit de Dieu, & qui de leur part ont tellemēt purifié leur desirs, par le vray & pur amour, conformé à la volonté de Dieu, que la lumiere interieure qu'ils recoiuent en ceste reception, leur fait veoir, qu'une si petite imperfection est vn grand empeschement à la grace de Dieu: par ceste lumiere en recoiuent telle horreur, qu'ils ne peuvent plus rien laisser en leur ame, qui soit desagréable à Dieu. Tels sont souuent les fruiçs des vrays & purs desirs, ou du pur amour, & comme on ne peut estre en ceste vie sans quelque imperfection (au moins naturelle) Dieu est si bon, que quelque fois il la leur cache. Par ce que si elles cognoissoient en elles telle imperfection, laquelle il n'est en leur puissance de mortifier, ce leur seroit vne peine insupportable, d'approcher du saint Sacrement, avec icelle imperfection, pour la pureté qu'elles voyent en Dieu. En cecy est vne grande bonté de Dieu, qui par son amour supporte sa creature. Pource qu'à l'ame qui n'aspire à autre chose qu'à son Dieu, ce seroit vne peine trop grande, si elle ne pouuoit iouyr de son Dieu,

Dieu, que par la communion sacramentelle. La communion spirituelle luy peut servir de nourriture continuellement, parce qu'à chasque moment, elle peut communier spirituellement. Cecy se peut faire en deux manières, l'une par les actes & préparations ordinaires, que l'on faict en la communion sacramentelle. L'autre par l'union continue, qu'elle a avec Dieu, non seulement de l'union de la volonté, mais encor de l'union appelée par aucuns beatifique. De laquelle nous parlerons en la dernière partie de cest œuvre, où sera traicté du quatriesme estat, auquel Dieu attire l'ame en ceste vie. Grace laquelle est surnaturelle, & neantmoins telle, que l'homme s'y peut disposer, pour la recevoir, quand Dieu nous y attire.

*Que nostre oraison doit estre avec droite intention,
& quelle chose nous devons demander.*

CHAPITRE XI.

SI nous voulons faire oraison agréable à Dieu, il convient que sur toute chose, nostre intention soit droite, & dressée à la gloire de Dieu. Toutes nos actions seront jugées, non pas selon les œuvres, mais selon

NOS

nos intentions. Lesquelles si elles sont mauvaises, les œuvres, tant soient ils de soy bons, seront iugés mauvais, & pervers. Au contraire, si nostre œuvre est indifférent, ou quelquefois en apparence mauvais, nostre intention étant droite & bonne, l'œuvre en sera aussi bon & méritoire. En fin, l'intention est le chemin pour aller à Dieu : ou bien le chemin que nous préparons, par lequel Dieu vient à nous. S. Jean Baptiste étant au desert preschant la pénitence, dict, *Disposez & dressez les voyes du Seigneur.* Que veut dire cecy ? sinon la droite intention, par laquelle tous vices sont retranchez, & tous nos œuvres sont faicts en iustice. Faire que tous nos œuvres soient iustes, procede de la droite intention, parlant moralement. Si on veut faire quelque loingtain voyage, on cherche le plus court chemin, lequel se trouve en la plus droite voye : car si on va chercher des sentiers egarez hors du chemin, c'est se fourvoyer & se perdre. De mesme parlant mystiquement, toute nostre vie n'est qu'un pèlerinage, nous sommes créés pour aller à Dieu, où est nostre patrie celeste. A iuste raison s'escrioit le Prophete royal, disant. *Psalme cxix. Vers. 5. Heu mihi quia incolatus meus prolongatus est,* Helas combien trop long

long est le terme de ma vie, & ce mien pelerinage de trop longue durée. Nostre vie doncques est vn chemin pour aller à Dieu. La droicte intention se peut entendre, en deux manieres, la premiere est que tous nos œuures soient faicts avec telle intention de ne vouloir offenser Dieu, & plustost mourir : l'autre est, qu'en toutes nos œuures, nous cerchions la plus courte perfection, c'est à dire, nous cerchions tous les moiens plus courts, pour paruenir à la perfection. Or entre tous nos œuures, l'oraison est celle qui conduit toutes les autres, car sans oraison, nous ne pouuons faire chose meritoire. C'est donc l'œuure, qui sur tout doit estre faict, avec la plus droicte intention. Toute nostre oraison est generalmente comprise en cecy, que toutes nos actions, comme lecture des liures spirituels, meditation des choses celestes, les aspirations interieures à Dieu, les actes de contrition, les deuises interieures & familiarité avec Dieu, contemplation, les actes d'amour enuers Dieu, &c. tout cecy est tenu pour oraison, comme ayant continuellement la presence de Dieu, qui est vne continuelle oraison. Mais l'autre maniere plus particuliere, est vne demande que nous faisons à Dieu, l'vne en chose spirituelle, l'autre en chose corporelle;

relle. Quant à la premiere maniere d'oraison, en laquelle sont comprinses toutes les actions que i'ay dict cy dessus, nostre intention doit estre si droicte, que ne deuons rien faire pour quelque respect que ce soit, tant soit il bon, ni pour craincte de l'enfer, ni pour craincte desiugemens de Dieu, ni mesme pour auoir paradis. Je ne denie pas que faire ces actes ou pour craincte de l'enfer, ou pour craincte des iugemens de Dieu, ou pour auoir paradis, soit quelque chose: & mieux vault se sauuer & faire lesdictes œures, en l'vne de ces façons, que ne le faire: mais elles sont si imparfaites, & est vn chemin fort long pour aller à Dieu, & hors de la pure & droicte intention, & est de fort peu de merite. Mais la realle, pure & droicte intention, en laquelle Dieu se plaist, est que toutes ces actions soient faiçtes seulement pour l'amour de Dieu, par ce que Dieu le merite, & à ce que Dieu seul en soit glorifié eternellemēt, & tout cela d'vn cœur amoureux & enflābé en Dieu. L'autre est la double demande que faisons à Dieu, l'vne és choses spirituelles, l'autre és choses corporelles. Quant aux corporelles, cōme santé, ou pour soy, ou pour son prochain, ou pour quelque necessité de choses exterieures, il faut que nostre intention soit pour la seule

E gloire

gloire de Dieu, & que nostre intention, soit si indifferente, quoy qu'ayons le desir, que si Dieu ne nous la donne, nous soyons contents, disant de tout nostre cœur, *Fiat voluntas tua.* Quant aux choses spirituelles, comme sont les graces de Dieu, les vertus & autres choses necessaires pour nostre salut, quoy qu'il semble, que tout cecy soit necessaire, si est-ce qu'il y faut autant estre indifferant & resigné, qu'aux corporelles. Si Dieu ne nous les donnoit, en estre content, & en louer autant Dieu, commes'il nous les donnoit. Et mesme faut que nostre intention soit, que si Dieu nous mettoit en enfer, & qu'en cela Dieu fust glorifié, nous soyons plus contents, en ce que Dieu soit glorifié en nostre punition, qu'en nostre bien, exclus neantmoins le peché. Par ainsi en toutes choses n'y a que ceste seule intention, qui est la plus grande gloire de Dieu, qui est cause que mesme en ceste vie, ne devons desirer les vertus, ni en l'autre le paradis, si ce n'est pour la gloire de Dieu. Veut-on sçauoir quelles choses on doit demander à Dieu ? Tous les biens spirituels, que nous voyons estre necessaires pour nostre salut, ou pour nostre perfection, nous les pouuons librement demander, en la maniere que i'ay dict cy dessus. Mais il n'est pas necessaire

cessaire de demander toutes choses corporelles pour servir au corps, car elles seroient nuisibles. Me souvenant à ce propos de la mere des enfans de Zebedée, laquelle s'adressant à nostre Seigneur pour ses deux fils, pensant que le royaume de Iesus-Christ fust vn royaume temporel, luy demanda que l'vn fust à sa dextre, & l'autre à la senestre. Iesus luy respondit, *Vous ne sçavez ce que vous demandez ?* Puis il demanda aux enfans, s'ils pouuoient bien boire avec luy le calice de tribulation. Ils respondirent que ouy, & leur repliqua, *C'est bien dict : vous le boirez, mais ce n'est pas à moy de vous donner ce que vous demandez ; mais à mon pere.* Les autres dix oyant ces deuiles les trouuerent estranges. En cecy est donné à entendre, que ne deuons demander à Dieu des dignitez, & choses qui tournent en vanitez, n'appertenans qu'à ce siecle terrestre. Pour ce quetous les honneurs de ce monde, sont les moyens pour brusler eternellement aux enfers. Iesus dict à ses disciples, les princes terriens prennent plaisir à commander aux autres. *Mais il n'en seras pas ainsi de vous. Et celuy d'entre vous qui veut estre le plus grand, soit vostre seruiteur. Tout ainsi que le fils de l'homme n'est point venu pour estre serui, ains pour servir, & liurer sa vie pour plusieurs.* Demã-

dons donc seulement les choses temporelles, nécessaires pour nostre vie. Car demander les honneurs & grades, seulement pour regner & commander, sans qu'il y ait quelque nécessité, c'est comme si nous demandions à Dieu quelque part aux enfers. Et iajoit qu'il y ait quelque bonne fin, c'est chose trop petite pour demander. Si on faisoit requeste à vn Roy de la terre, pour obtenir vn denier, il se sentiroit offensé de telle requeste. De mesme demander à Dieu des biens terrestres, ce n'est point la valeur d'un denier, au regard des choses celestes, auxquelles nous deuons aspirer sans cesse. Demandons donc ce qui est agreable à nostre Dieu, & avec la plus grande perfection & droite intention que pouuons, à fin que Dieu ne nous esconduise. Si quelquefois il semble que la nécessité nous deffaille, il ne faut perdre courage, ni ne nous defier de la bonté de Dieu. C'est pour esprouuer nostre patience. Car luy qui a soin des petits oyseaux qui sont en l'air, n'aura-il point plus grand soing de sa creature raisonnable? C'est vne chose infailible, que Dieu ne peut oublier l'œuvre de ses mains. Car luy mesme l'a dit, *que s'il aduenoit qu'une mere oubliast son enfant, iamaïs ne nous oublieroit. S'il faict tant pour le corps; que fera-il pour l'ame,*
qui

L'AMOUR PROPRE. LIV. I. 69
qui est sans nulle comparaison, beaucoup
plus digne que le corps?

*De diuerses sortes de tentations, que le diable
nous met en auant sous ombre
de spiritualité.*

CHAPITRE XII.

L'AMOUR propre, qui est nostre ennemy domestique; nous liure continuellement la guerre. Les ennemis inuisibles sans cesse circuiuent autour de nous pour nous deuorer, par toutes sortes de tentations. Mais s'ils rencontrent vne ame, qui ait quelque lumiere interieure, par laquelle elle descouure leur finesse, ils ne viendront plus à la descouuerte, ains cachez sous ombre de spiritualité: soit pour corrompre les actions corporelles & du corps, soit les spirituelles & de l'ame. Quant, est des actions corporelles, l'ennemy induira aucuns à faire des grandes abstinences & austeritez, porter la haire, plus que la santé ne le permet, sous ombre d'imiter les Saints, qui ont aussi faict telles austeritez. Ou bien par vne ferueur indiscrete, procedant de la nature, ou bien par scrupule, leur faisant sembler qu'elles sont

obligées de suiure telles inspiratiōs, croyant qu'elles sont de Dieu, se font propriétaires de leur propre iugement. Et quoy que leur directeur leur prohibe telle rigueur, ne lairront de poursuiure, & puis deuientront debiles. C'est en quoy le diable pretend de les tromper, à fin que la santé estant perduë, ne puissent plus faire mesme ce, à quoy elles sont obligées, ni mesme ieusner les ieusnes commandez. Voila les ruses de cest ennemy infernal, à quoy on peut remedier. Quand telle ferueur nous vient, faut regarder à quelle fin, si elle apporte les vertus en l'ame. Car toutes ces penitences ne sont pas vertus. Ce sont bien des moyens pour paruenir à la vertu : mais il faut regarder quand tels moyens doiuent estre observez, suiuant la necessité ou vtilité de la personne. Doncques pour veoir si ces desirs d'austerité apportent l'humilité en l'ame, on le cognoistra, quand l'ayant descouuert à son supérieur ou directeur, on quitte son propre iugement, obeyssant simplement. Car l'obedience simple, est le renuers de Satan. Tout ainsi que la premiere desobeissance nous a apporté tout malheur: de mesme l'obeyssance nous apporte toutes benedictions. Et si mesme tel desir vient de Dieu, en obeyssant on ne peut estre trompé. Ceste
obeis-

obeissance sera plus agreable à Dieu, que les penitences. Encore vn moyen pour decouurer ceste tromperie, est qu'il faut s'examiner, si tel desir n'apporte en l'ame vne estimation de soy mesme, qui est vne secrette presumption, pensant estre tresparfaicte par telle penitence. Le moyen pour cognoistre si telle ferueur vient de Dieu est, quand on leur commande quelque penitence, qui ne prouient de leur cerueau, on verra qu'elles ne le sçauront faire, & prieront d'en estre portez. Cecy se void souuentefois, si en son cœur on mesprise ceux ou celles, qui ne ferōt telle penitence: ou bien si on a desir d'estre cognu, & de le monstrier à l'exterieur. Tout cecy est vne pure tentation, sous ombre de vertus. Où cognoissant ces effects, & les tromperies de Satan, il faut se submittre & suiure l'obedience de son directeur. Par ce moyen nous serons affranchis, contre nostre ennemy. Au contraire, si le diable voit qu'on ait inclination à paresse, aimant vn peu trop son corps; il donnera en l'ame des beaux pretextes, à fin de ne faire aucune mortification à leur corps, & ne faire aucune penitence. Il persuadera que si on faict quelque penitence, estant delicat on deuiendra inutile, ne pouuant accomplir ce à quoy on est obligé. Si c'est en Religion, on

penſera, ie ne pourray ſuiure l'ordre. Il vaut mieux que ie ſniue l'ordre ſeulement, comme aller au chœur, à l'ouuroir, reſectoir, que faire des penitences, comme diſciplines & autres. Si ie veille pour faire oraïſon, i'auray mal à la teſte, il vaut mieux que ie ne face tant d'oraïſons mentales, ſeulement que ie die mes heures canonialles. Et cependant on ne fera bien ni l'un ni l'autre. Puis on ſe perſuadera, qu'on abbrege la vie, & qu'on eſt obligé de la conſeruer, & que mieux vaut ſeruir à Dieu dix ans que cinq. Eſtant en ſanté ie pourray faire du fruit, & eſtre vtile aux autres, là où eſtant malade, ie ne pourray faire choſe bonne. Toutes ces tromperies ſ'apparoïſſent ſoubs ombre de vertu, & on n'apperçoit la pareſſe & ſpirituelle & corporelle, où le diable nous veut tenir enſerrez. Car ſouuent il fera cauſer quelque infirmité corporelle, comme mal de teſte ou autre: Dieu le permettant quand il voit qu'on ſe laiſſe emporter à telle pareſſe. Puis au premier coup on quitte toute penitence, & la ſenſualité ne voudroit auoir plus beau ſubiect, pour ſuiure ſes plaiſirs. Mais pour remedier à tel mal, l'ame genereuſe ne quittera ſa bonne entrepriſe, ſuiuant ſon obediſſance pour telles menutez. Ainſi elle examinera bien la cauſe de telle infir-

infirmité, pour veoir si peut estre nostre ennemy ne la suggeré, à fin de nous empescher de fidelement seruir à Dieu. Ou bien si ce n'est nostre paresse, qui se flatte par trop. Lors que le diable se voit descouvert, il se iuge vaincu, & se retire, & puis on ne sentira aucun mal. Cecy aduient souuēt. Mais d'autant qu'on n'a la lumiere interieure, pour tousiours cognoistre les tromperies du diable, on se laisse emporter à la tentatiō, sous ombre de necessité. Quelquefois il nous viendra des pesanteurs au seruice diuin, si grandes qu'il est comme impossible d'y resister: à grand peine sçait-on prononcer vn mot de son office, & le diable fera cecy souuent à ceux qu'il verra seruents. Que faut-il faire lors? Apres auoir eu recours à Dieu, & gardé sa presence, tant qu'il nous est possible; si la tentation ne se passe, il faut l'a decouurir à son confesseur. Il s'en est souuent trouué, qui ayans eu telle tentation vn mois durant, si tost qu'elles auoient proposé seulement de le dire au Confesseur avec humilité, à l'instant la tentation estoit passée. Le diable faict comme vn larron: si le larron voit que faisant son effort d'entrer dans quelque maison, s'il n'est apperceu; il entrera dedans & desrobera: mais si tost qu'il est apperceu, c'est de fuir. Ainsi faict nostre aduer-

aduerfaire, il n'a rien en plus grand horreur, que sa finesse & ruse soit descouuerte. Vous voyez donc, que la ruse de Satan est de nous reduire, ou à vne extremité ou à l'autre. Et nostre chemin asseuré, est de prendre le milieu. C'est le chemin royal, n'estre trop paresseux à chastier son corps, ni aussi estre seuer sans discretion. Ne soit qu'on ait quelque assurance, suiuant les aduis qu'on nous donne, que Dieu nous attire par telle voye: comme tant de Saints ont esté conduicts, par tant d'austeritez extraordinaires. Mais telles vies sont plus à admirer, qu'à imiter. Quant est des actions interieures, il y a vne abyfme de tentations, desquelles le diable se fert, pour empescher les ames deuotes de paruenir à la perfection. Tantost par scrupules tantost par ferueur indiscrete à l'oraison, & autres incroyables subtilitez. Si des scrupules, vne personne qui donne lieu à ceste tentation, demeure tousiours attachée à la terre, pour ce qu'elle est incapable de la parfaite mortification, sans laquelle elle ne peut acquerir la perfection des vertus, ni l'union avec son Dieu, pour ce qu'elle a toutes les puissances de l'ame detenuës par ces vaines crainctes, tout sous ombre de n'offenser Dieu. Fera cas & sera troublée de choses où il n'y a point de peché, & souuent

uent où il y a du grand peché, & des grandes imperfections, n'en fera nul cas. Quant à ce que j'ay dit que telles ames sont incapables de la parfaite mortification, ie le monstrey. Quoy que tels gens ayent le desir de la mortification & perfection. Si on leur enseigne la mortification, elles la veulent ensuiure & pratiquer: mais d'autant, que toutes leurs puissances interieures sont tousiours ocupées à la recherche des pechez, confusion & sans ordre: delà vient, qu'elles tombent en des tenebres interieures, & apprehensions sans subiect, iugeants toutes choses selon leur imagination troublée. Puis perdent toute leur force interieure: deuenant pusillanimes, lors qu'elles voient qu'elles ne peuuent produire aucune action, de ce qu'on leur a enseigné. Ces apprehensions redoublent, & quelquefois le troublent le cerueau; de maniere qu'on est contrainct les mener la plus large voye, pour leur esueiller l'esprit, & les deliurer de ces abysses de scrupules. Et le plus est, quand elles ne veulent croire que ce sont scrupules, il leur semble qu'elles font bien, & lors il n'y a nul moyen de les aider. Voila vne tentation la plus rusée de nostre ennemy, de laquelle il y a peu de personnes, s'adonnants à la vie spirituelle, qui n'en ait quelque

que part, au moins au commencement. Il faut auoir pour euiter ce danger, vn courage genereux, & fuiure en toutes choses la raison. Iuger peché ce qui est peché, iuger vertu ce qui est vertu, sans donner lieu aux erreurs, ni fuiure son propre iugement, en tant de fauses imaginatiōs. Car le diable sçait bien, que tant qu'il nous tiendra attachez à ceste illusion, vaine fantasie, & turbulente, nous perdrons le vray repos de conscience, que pouuons acquerir par la vraye mortification, vnion, & familiarité avec nostre Dieu. Autres donneront lieu à des grandes ferueurs interieures, qui se peuuent nommer plustost furies que ferueurs; pour ce qu'elles sont sans aucune discretion, pouffées d'un desir indiscret de la vertu. Estant en l'oraison font des crieries, & exclamations si grandes, qu'on les oit de bien loing; & semble qu'ils n'ont bien prié, s'ils n'ont fait ainsi, comme si Dieu estoit sourd. Incitent la nature, & se font violence, pour auoir ces sentimens, qui semblent estre ferueur, n'estant que nature. Dont quelquefois on acquiert telle douleur de teste, qui dure toute la vie. Tellement que tousiours on sera inhabile à pouuoir faire oraison, pour la debilité de cerueau, qu'on aura acquis par ces indiscretions. Ce sont toutes tromperies de Satan,

des;

desquelles il nous faut garder, par vne maturité de l'ame & du corps, pour chercher Dieu en verité, & en l'ame, & non pas par nature. Autres font, qui voudront garder la presence de Dieu continuellement, c'est tres-bien faict. Mais il s'y trouue encore des tentations. C'est que pensant conseruer la presence de Dieu, ils en demeurent plus distraits & tiedes, parce qu'ils tiendront l'esprit si bandé à continuelle oraison, qu'ils n'oseront tant soit peu prendre de relasche, ni pour l'esprit, ni pour le corps. Tellement qu'ils deviendront tout tiedes, & se feront encore plus de violence pour y perseuerer, pensants par ce moyen surmonter le corps. En quoy ils donnent lieu à vne secrette tentation. Ils veulent estre plus sages que les Saints, qui ont passé la mesme vie. On lit en la vie des saints Peres, que saint Antoine estant fort experimenté en la vie interieure, cognoissoit fort bien ceste necessité qu'auons, que pour donner liberté à l'ame, de faire ses fonctions, au service de Dieu, il faut qu'elle soit aidée par le corps. Or nostre corps estant subiect à infirmité, il faut necessairement contre nostre desir, que nous luy donnions quelque relasche, à fin de supporter vn plus grand faix. Et comme ledict S. Antoine menoit quelquefois
ses

ses Religieux aux champs, pour leur donner quelque recreation, vn payant les voyant, s'en scandalisoit pensant en soy-mesme; est-ce là ce saint personnage, que l'on estime tant, qui prend ainsi des recreations? Saint Antoine cognoissant par inspiration diuine, les pensées de ce rustique: luy donna vn arc en sa main, & luy dit, tendez cest arc, ce que fit le payant, & l'ayant tendu de toutes ses forces; saint Antoine luy fit tendre encor plus fort, ce qu'il fit, puis luy rendant: saint Antoine luy dit de rechef, tendez encor plus fort. Voiré ce dit le paisant, si ie le tends si fort il rompera. Voyez vous? dict lors S. Antoine. De mesme est-il de mes Religieux, qui continuellement ont l'esprit tendu à la mortification & oraison; lesquels laissant ainsi bandez sans leur donner quelque support, ils viendroient à deffaillir. Lors entendant bien ce payant ce qu'il vouloit dire, & recognoissant sa faute, demanda pardon à saint Antoine. Il conuient donc garder ceste discretion, si on sent l'esprit trop lassé, par le trauail interieur. Il faut reprendre air & haleine, par quelque petite recreation. Quoy fait, on s'en retournera sans point de faute à l'oraison, plus feruens & enflambez en Dieu que deuant. Je ne di rien que
ie

ie n'aye veu souuentefois aduenir. Cause pourquoy ie suis contraincte, de le donner à cognoistre par le menu, pource que tant de personnes se laissent emporter à ceste tentation, ou par pusillanimité, ou par ignorance, & faute de lumiere interieure, laquelle nous deuons demander à Dieu, avec grande humilité. Vne autrefois le bon pere saint Antoine, eust vne vision, en laquelle il veit tout le monde, & l'air, remply de lacs & filets: il demanda à nostre Seigneur, qui seroit celuy qui pourroit là passer: qui nous represente toutes les tentations de ceste vie. Nostre Seigneur luy fit responce, que ce seroit la seule humilité. Et de vray, vn cœur vrayement humble, & enflambé en l'amour de Dieu, quoy que le diable ne cesse de luy ietter ses sagettes, si ne peut il l'interesser: car Dieu luy donne la lumiere, pour cognoistre toutes ses subtilitez & tentations. Psal. xc. V. 13. *Super aspidem & basiliscum ambulabis, & conculcabis leonem & draconem.* L'ame qui viuement s'est enflambée en l'amour de son Dieu, ne desire ni ne cherche autre chose que luy: foulera aux pieds sans aucune craincte, l'aspic, & le basilisque, le lyon & le dragon, & les embusches du diable le craindront. Car qui met son esperance en Dieu, & tout son appuy, sans doute il receura secours.

Que

Que sous ombre de plus grande perfection, le diable nous tente contre la vocation.

CHAPITRE XIII.

TOUTES personnes religieuses, qui par vœu solēnel se sont consacrées au Dieu viuant, n'ont pas fait peu. C'est pourquoy ils en doiuent faire grand cas. Ce n'est pas petit peché de faire banqueroute à sa religion : ce qui n'aduient qu'à des religieux ou religieuses debauchez. Car d'autres endureroient plustot la mort, que iamais vouloit rompre les vœux qu'ils ont fait à Dieu. Seront neantmoins quelquefois trompez, par des tentations subtiles, sous ombre de plus grande perfection. Comme si on voit quelque autre religion qui soit mieux reiglée, il leur viendra des desirs de sortir la leur, à fin qu'en ceste autre plus estroicte, ils ayent plus d'occasion de se perfectionner. Il est vray que Dieu le fait quelque fois, & quelque vn sortira de sa religion, avec permission du superieur, pour entrer en vne plus austere, en laquelle il profitera beaucoup plus en vertu. Mais c'est vne chose particuliere, & le plus souuent inconstance & tentation.

A fin

Afin de troubler & deceuoir l'ame & l'ame-
ner à beaucoup d'autres pechez ou imper-
fections, caulez par ceste premiere. Pour
laquelle bien cognoistre, faut regarder, d'où
elle procede, & qu'elle est sa source. Si ce
n'est point pour quelque melcontentemēt,
ou que l'on ne peut mettre en effect ses pro-
pres volonte, soit es choses corporelles ou
spirituelles. Es corporelles, comme n'ayant
ce qu'on desire pour ses commoditez. Au-
quel cas il n'y a qu'examiner. Car il est clair,
que ce sont tentations, lesquelles il faut
courageusement surmonter. Es spirituel-
les, conuient apercevoir, s'il ny a pas quel-
que couleur de vertu. Pour ce qu'il n'y a
chose, qui puisse donner empeschement à
vne ame vrayement resoluë de seruir Dieu,
& secondée de sa grace : fust elle au milieu
d'une maison publique. Comme il s'en est
souuent veu, qui faisoient leur profit de
toutes choses, voire malseantes, & qui au
milieu du monde sont deuenus saincts. Mais
il faut confesser, que ce sont grandes graces.
Et que non seulement ceux qui sont foibles
en la vie spirituelle, ains encore les plus fors,
voulants se dedier à Dieu, auant rien faire,
doient bien aduiser au choix d'une maison
plus reformée, où on garde ce que l'on pro-
met sans difficulté. Mais lors que les vœux

F

sont

sont ia faicts en vne maison, y ayant esté appelé de Dieu, il n'est pas conseillable, ni la plus part salutaire, de donner lieu aux desirs d'en sortir, pour entrer en vne autre. Comme si sous ombre qu'on n'a le temps de faire oraison, ou qu'on trouue de la difficulté d'observer les ordonnances: ou pour ce qu'il n'y aura telle concorde & vnion entre les freres ou sœurs, pour les riottes & noises qui souuēt s'y trouuent: ou qu'il semble, qu'il y ait plus de paix en vn autre monastere, & qu'à ceste cause on y pourroit mieux faire son salut: ce sont toutes fausses persuasions & tentations du Diable, pour nous troubler, & empescher nostre auancement spirituel. Si en commun il n'y a du temps ordonné tant qu'on desire, pour vacquer à oraison, il n'y a religion si mal reiglée, qu'on n'ait en icelle du temps particulier, pour ses petites necessitez, lequel on peut appliquer à oraison continuelle. Mesmes en besoignant à l'ouuroir ou autrement, rien ne nous peut donner empeschement d'eleuer nostre cœur & affection à Dieu. Mesme on peut estre cause, que les autres prendront exemple à vous, & que Dieu touchera leur cœur. Si c'est qu'il y a trop de liberté, & que trouuiez des difficultez à garder la reigle & statut, de vostre part sans nul

nul respect, gardez ce que vous pouuez. Si vous endurez des picques & brocards pour ce subiect, vous l'endurerez pour Dieu, & pour la iustice, & serez bien-heureux, selon la sentence de nostre Seigneur, qui a dict, *Bien heureux sont ceux qui endurent persecution pour la iustice, car le royaume des cieux est à eux.* Et ce sera vostre plus grande gloire au ciel. Vous ne pouuez estre blasmé, de garder ce que vous auez promis deuant Dieu. Si toutefois on vous le deffend, & ne le pouuez faire, vous ne laisserez d'en auoir le merite. Encore qu'actuellement ne le puissiez obseruer, gardez le tousiours au moins de volonté. Ce ne sera vous qui en rendra compte deuant Dieu : mais le supérieur, qui est obligé d'estre le premier, à garder & faire garder les reigles & statuts, & toute bonne coustume de religion, & auoir soing du salut de ses subiets. Pour ce que de chasque ame il en rendra compte deuant Dieu, pour les auoir eu en charge. Si d'auenture c'est qu'y trouuiez des noises, epiues & mescontentemens les vns contre les autres : ame fidelle à Iesus-Christ, cecy ne vous doit descourager, de perseuerer en vostre religion. Qu'on retourne la maison sans dessus dessous, & que le monde se renuerse, que vous importe-il? Soyez seule fidele à vostre

espoux Iesus, & ne vous souciez des autres, si ce n'est pour en auoir compassion: & priez Dieu pour leurs ames. De penser qu'en d'autres monasteres vous y trouuerez vne parfaite paix exterieure, c'est vn erreur, car il pourra estre, que vous y trouuerez pis, & plus à redire qu'au vostre. Il n'y a maison de religion si sainte, qu'il ne s'y trouue des esprits turbulents. S'en faut-il estonner? Veu qu'en la compagnie mesme de nostre Dieu, qui estoit tressainte, il y a eu vn Iudas? On entre en religion, mais on y porte & son corps & ses mauuaises inclinations, lesquelles on n'a toute sa vie trauaillé de dompter, & qu'il faut mortifier en religion: & si on les neglige, elles demeurent & souuent croissent. Si vous supportez patientement ces esprits, vous en serez tant plus agreables à Dieu. En fin, en religion il conuient estre auecugle, sourd & muet; i'entens spirituellement. Estre auecugle, vault autant à dire, que nostre ame ne soit distraicte à regarder tout ce qui se passe, & n'en iuger à nostre mode. Sourd, pour n'escouter mal parler de nos freres ou sœurs, ni choses qui ne nous touchent, quand nous n'y pouuons apporter aucun remede. Muet, pour ne dire des paroles vaines, mesleantes, offensiuës ni superflues, & ne nous entremettre es affaires,

fares, sans estre commandez & appelez. Ne se bander avec l'un ou l'autre, pour contredire & mespriser les actions d'aucuns, ou murmurer & detracter. Quelque faute qui s'y passe, si ce n'est en temps & lieu, où nous sommes obligez de parler, pour la descharge de nostre conscience, nous debuons tenir silence. Nous debuons viure en religion, comme si nous estions seuls avec Iesus Christ : à fin que tout ce qui s'y passe, ne nous donne aucun empeschement. Ne complaire qu'à Dieu seul, & faire tant qu'il nous est possible, la charité à l'endroit de nostre prochain. Quoy faisant, la religion sera vn Paradis : là où au contraire, c'est comme vn enfer. Ce n'est pas la religion qui nous blesse, ni la mauuaitié des confreres ou consœurs ; mais c'est nous mesmes & nos imperfections, lesquelles ayans vne fois toutes mortifiées, tout nous sera aisé & facile, & n'aurons aucun desir de changer de religion. Si peut estre il vous semble, qu'avez cause legitime, comme ayant des difficultez en la conscience, auxquelles vous n'avez telle ayde que voudriez bien : mettez vostre conscience en Dieu, & Dieu vous enuoyera plustost vn Ange, pour vous aider. Vous pouuez librement requerrir vos superieurs, sans respect humain, ou

pour craincte d'estre mal venu. Car où il va du salut de l'ame, on ne doit auoir esgard à chose qui soit : ains d'accomplir seulement & simplement, la volonté de nostre bon Dieu. Et ayant recours aux superieurs, pour auoir quelqu'un pour sa conscience, le superieur ne luy doit refuser, voyant la necessité. Car les superieurs renderoient compte des ames de leurs subiects, s'ils ne leur donnoient moyen de faire leur salut. Et quand tel cas arriueroit, qu'un Religieux ou Religieuse auroit des caules & raisons pregnantes & suffisantes, pour sortir de sa religion, & entrer en vne autre; & qu'apres auoir parfaictement examiné & consulté le tout, avec ceux qu'il appartient, la chose fust trouuee & iugée iuste & necessaire: soit pour fuir le peril du salut, & y pourueoir conuenablement: soit pour suiure la vocation diuine, suffisamment recognuë avec bon & meur conseil: sortir en ce cas & semblable, de sa premiere religion, & entrer en vne autre par les voyes, & moyens licites; ce ne pourroit estre chose blasmable. Ioinct la liberté commune à tous, de pouuoir entrer en religion plus estroicte, selon les ordonnances de l'Eglise.

Que

*Que par vne haine indiscrette du peché, on vient
à auoir vne haine des creatures.*

CHAPITRE XIV.

EN T R E les gens spirituels, il s'y trouue souuent des grands abus. Signamment entre ceux, qui ne sont encor bien fondez en la vie spirituelle, & ne sçauent encore par experience, que c'est de la vraye mortification, & de la vertu, si ce n'est par speculation. Celuy là, qui a vne vraye cognoissance de la verité, ne s'esmerueille des choses qui aduiennent au monde; ni mesmes des pechez que les hommes commettent: pour ce qu'il sçait bien, qu'il n'y a mal que l'homme ne puisse commettre, s'il n'estoit preserué de la grace de Dieu. Cause pourquoy celuy qui n'a vne telle cognoissance de la verité, s'il voit vne personne tombée en peché, ou en quelque imperfection, soudain il s'en scandalise, & mesme l'aura quelquefois en haine, sous ombre du zeile de la gloire de Dieu, & qu'il ne peut souffrir que Dieu soit offensé. Il est vray que nous deuons tellement estre ialoux de la gloire de Dieu, qu'au monde nous n'ayons

plus grand desir que de la conseruer, partous
moyens possibles: & trauailler à ce que Dieu
soit aimé & glorifié, & qu'il ne soit offensé.
Mais Dieu ne veut que nous ayons en hai-
ne nostre prochain. Voicy, comme il se faut
comporter vers les pecheurs. Nous deuons
auoir en haine le peché, pour ce qu'il est
ennemy de Dieu, & pour l'iniure qu'il fait à
Dieu. Mais non pas la creature qui le com-
met, de laquelle nous deuons auoir pitié,
& prier pour elle, à fin que Dieu luy donne
cognoissance de son peché. Car haïr la crea-
ture, & l'auoir en horreur pour son peché,
est vne pernicieuse tromperie, procedante
d'une presumption de soy-mesme, encore
que ce soit pour le peché. Si nous estions
humbles, nous penserions à nous mesmes
premier: croyants que si Dieu par sa bonté
ne nous preseruoit, nous ferions mille fois
pis. Avec ceste consideration, nous aurons
pitié des autres, comme nous voudrions
qu'on eust compassion de nous mesmes.
Paraduenture que celuy que nous aurons
en horreur, sera quelque iour plus grand
deuant Dieu que nous. Car tel peut estre
au matin Saul, qui au soir sera Paul. Les iu-
gements de Dieu sont secrets. Laissons tout
à Dieu, sans iuger des faicts de nostre pro-
chain. Peut estre que ses tentations sont si
grandes,

grandes, & les occasions si violentes, que la fragilité le faict plustost tomber, que la malice. En quoy il ne sera si desaggreable à Dieu & s'amendera, plustost que nous, par quelque petite legereté, faicte malicieusement. Voila pourquoy nous ne devons rien iuger. *Ne iugez pas*, dit nostre Seigneur, & *vous ne serez pas iugz*. Quant aux actions qui de loy sont indifferentes, & peuuent estre bonnes ou mauuaises, ou n'y aura, ni mal ni bien; comme boire, manger, se vestir, & ce qui sert à la necessité du corps: en tels cas, il arriue souuent qu'on iugera, suiuant les choses représentées, que telle personne mangera ou aura mangé par gloutonnie, ou aura faict quelque autre chose par sensualité: & souuent il pourra estre, qu'il l'aura faict par mortification, contre son appetit ou affection. Ou bien le fera pour en receuoir quelque mespris, dequoy il en aura grande recompence deuant Dieu. Voyez comment on se peut tromper en ses iugemens. Les secrets des consciences sont cachez. Pour ce nous devons estimer toutes choses en bien; à fin que ne tombions nous mesmes en peché. On offence en autre maniere quelquefois, comme auoir en haine ou mespris quelque ordre de religion, pour quelque desordre qui s'y sera passé.

passé. C'est tref-mal faict, pour ce que nous devons seulement auoir en horreur les pechez qui se sont commis, & non pas la religion. D'autant que toutes maisons de religion sont ordonnées de Dieu, & sont tref-bonnes. S'il s'y commet quelque faute, ce n'est pas la religion: & s'il y en a des mauuais, il y a aussi des bons par tout. Il ne faut aussi mespriser les religions, desquelles les institutions ne sont des plus seueres. Je veux que les plus seueres & austeres, soient en foy de plus grand merite. Mais toutes personnes, ne sont pas capables de telles austeritez. C'est pourquoy Dieu voulant sauuer vn chaqu'vn, en a estably des mediocres & moins austeres, pour ceux qui ne sont si forts de corps, & qui sont moins capables d'acquérir si grãde perfection que les autres. Tout sera mesuré au pied de l'amour, qu'aurons porté à Dieu en nostre religion: lequel amour peut estre aussi grand en vne religion qu'en l'autre. Dieu est par tout. Il se trouue aussi des personnes de religion si presumptueuses, qu'ils ont en horreur & mesprisent l'estat de mariage, tenants les mariez comme pour reprouuez, & iamais n'en parleront que par mespris. Il est vray que la virginité est plus agreable à Dieu, & n'y aura que les vierges qui suiueront
l'agneau.

l'agneau. Mais l'estat de mariage, n'est pour ce à mespriser: veu qu'il est institué de Dieu, & qu'il s'y trouue des saincts & grands personnages, qui ont surpassé plusieurs vierges. Comme aussi n'est-il repugnant, que suivant ce que dit quelque ancien, l'humble mariage ne soit à preferer, à la virginité superbe. On tient que la glorieuse Vierge Marie a esté plus agreable à Dieu pour son humilité, que pour sa virginité. On peut bien entrer au ciel sans virginité, mais on n'y peut pas entrer sans humilité. Gardez vous, ô Vierges, que vostre presumption ne vous face perdre le merite de vostre virginité. Si Dieu vous a donné ceste grace, gardez la bien par la mesme humilité, & le mespris de vous-mesmes: vous tenant les moindres de tout le monde. Par ce moyen vostre estat avec ceste humilité & parfaict amour de Dieu, surpassera les autres deuant Dieu. Car sans doute, quand ces trois vertueuses qualitez sont ioinctes ensemble, elles sont plus agreables à Dieu que separées. Gardez d'en estre ingrates, & rendez en la gloire à Dieu.

Quelle

Quelle est la vraye contrition, & que sous ombre de contrition le Diable tasche de nous troubler.

CHAPITRE XV.

L'VNE des actions les plus necessaires, pour nous insinuer en la grace de Dieu, est la contrition quād nous l'auons offensé. Si nous n'auons la contrition d'auoir perdu la grace de Dieu, par le peché mortel, ou bien de nous en estre esloignés par le veniel, qui est iournalier, (car nous sommes tous pecheurs, & qui diroit ne l'estre point, seroit menteur) nous ne pouons acquerir pardon, ni nous remettre en la grace de nostre Dieu. Pour donc satisfaire à nostre dette, pour l'offense commise vers vn Dieu si bon, il faut auoir vne vraye & parfaicte contrition : telle que le larron a eu en la croix, telle que la Magdeleine a eu estant prosternée aux pieds de Iesus-Christ. Le larron, qui toute sa vie n'auoit fait qu'offenser Dieu, par grands & enormes pechez, en ce peu de temps qu'il a esté en croix, a eu vne contrition si parfaicte, qu'il a merité que nostre Dieu luy ait dit, Aujourd'uy tu seras en paradis *avec*

avec moy : & à la Magdeleine pour la meſme
 cauſe , *Femme tes pechez te ſont pardonnez.*
 Heureuſe contrition, par laquelle on merite
 de recevoir vne ſi douce ſentence. Ceſte
 vraye contrition eſt tant agreable à Dieu,
 qu'il pourroit eſtre, ſi nous pouuions la bien
 conceuoir , que par icelle en vn moment
 nous pourrions ſatisfaire , pour pluſieurs
 années, que nous ſerions en purgatoire. Je
 di plus, que au moyen de telle contrition,
 laquelle nous pouuons acquerir avec la gra-
 ce de Dieu , nous pouuons ſatisfaire plus en
 vn moment, qu'en toutes les diſciplines &
 auſteritez, & toutes les afflictions, que nous
 pourrions endurer toute noſtre vie, ſans cete
 contrition. Cependant peu la conçoient,
 & ſi d'auenture aucun y paruient , c'eſt peu
 ſouuent. D'où vient la cauſe , que ſi peu de
 gens paruiennent à ceſte contrition ? De la
 faute d'amour. Car ceſte vraye contrition
 procede de l'amour : & la contrition qui a ſa
 ſource de la crainte , eſt petite & de peu de
 merite. Toutes fois bien-heureux eſt celuy
 qui l'a pour le moins en ceſte ſorte. Car com-
 bien y a il de pecheurs , qui ne ſçauent con-
 ceuoir de contrition , ni par crainte , ni
 par amour ? Si on ne ſçait arriuer à ceſte
 contrition, tachons d'auoir l'attrition. Et ſi
 encore nous ſommes ſi durs , que ne la ſça-
 chions

chions auoir, desirons de l'auoir, & demandons la à Dieu. Et si ne sçauõs la desirer, demandõs & prions pour auoir le desir. Quant est de la parfaicte contrition, procedante de l'amour, comme i'ay dict, elle se trouue mesme selon sa maniere en la nature. Voyez deux personnes qui s'entraiment fidellement. S'il aduient par quelque accident, que l'un offense l'autre, il en aura telle douleur, à cause du grand amour qu'il luy porte, qu'il ne se peut contenter soy-mesme. Si entre les creatures se trouuent ces effects, causez par vn amour de creature à creature que sera-ce d'un cœur qui est viuement touché de l'amour du Dieu viuant? Car autant plus, qu'un cœur est embrasé de cest amour diuin, tant plus le glaive de ceste poignante contrition luy perce le cœur de douleur. Je sçay à qui est arriuée ceste contrition pour chose tres-petite, mesme pour vn moindre peché veniel. Ceste contrition luy estoit si grande, que son cœur se pasmoit, & quelque fois luy sembloit rendre l'esprit. Et de cecy peut arriuer, la contrition estant ioincte avec ceste viue flamme d'amour, qu'on en pouroit mourir soudain. Heureuse mort! De ma part ie croy pieusement, suivant ce que i'en puis comprendre, que si on mouroit en ceste sorte, on trouueroit le ciel ouuert.

ouuert. Car la vie de telle personne est si pure, qu'à grand peine trouueroit elle des pechez pour se confesser, pour ce que les pechez des vrayémēt iustes sont en soy si petite chose, qu'à grāde peine les scauent ils cognoistre. Ils ont neantmoins vne contrition, non seulement des pechez commis : mais aussi des pechez que iamais n'auront faict & ne feront iamais. Et cecy prouient de la claire lumiere interieure qu'ils ont, que si Dieu ne les gardoit ils les pourroient commettre : & se sentants subiects à tout mal, par nostre maligne nature, ils ont la contrition, comme les ayant faicts. Telles ames seront quelque fois inspirées de la part de Dieu, de prier pour quelque personne particuliere : pour les pechez de laquelle elles auront telle contrition, comme si elles mesmes les auoient commis, pour ce que tous pechez sont contre Dieu leur bien aymé. Dont la contrition sera telle, qu'elle sera cause de la conuersion de telle personne. Qui plus est Dieu représentera quelque fois à telles ames tous les pechez du monde. Elles verront deuant soy, comme en vn petit poinct, tous ces pechez si enormes, qu'elles en endurent vne peine incroyable. Et voyant de leurs yeux spirituels, Dieu tant offensé, elles en ont telle

telle contrition, qu'en vertu d'icelle Dieu fera misericorde à tout le monde. C'est par le merite de tels amis de Dieu, que sont soustenus les pecheurs : mais croyez que telles ames sont rares. Ceste contrition se peut encore appliquer aux ames de purgatoire. Tellement que si on prioit avec ceste contrition pour vne ame desfuncte, conceuant ceste cōtrition pour les pechez, dont elle est detenuë dans ce feu, elle en pourra estre deliurée. On raconte d'un ieunne enfant, qui aymoît fort son pere, lequel estant decedé & detenu en purgatoire, l'enfant ne cessoit de pleurer les pechez de son dit pere, au moyen de quoy il fut en peu de temps deliuré du feu de purgatoire. Quelle est ceste contrition, ne se peut bien dire, pour ce qu'elle est interieure : neantmoins nous en dirons quelque chose, comme il se peut donner à entendre. La propre essence de ceste contrition, c'est l'amour : son obiet est Dieu. Or d'autant que son obiet est infiny, & quant à son estre, & quant à sa perfection : l'ame aussi, soudain qu'elle est naurée d'un parfait amour, elle voit à ce moment son obiet à qui elle a offensé. Qui est Dieu, eternal & infini & duquel l'amour qu'il nous porte, est aussi infini, & quant à son estre & quant à la grandeur. Dont elle
infer,

infere, que meritions vne peine infinie, & quant à l'eternité, & quant à la grandeur de la peine. Aussi voit elle, que Dieu merite d'estre aimé infiniment, & quant à l'eternité, & quant à la grandeur de l'amour, que luy debuons porter si nous pouuons. Et à cest instant, elle est si viuement enflammée de l'amour diuin, que de cest amour procede en la volonté, vn amour eternal & infini, quant à la grandeur, & estendue. Et cela quant à la volonté & desir, & non pas quant à l'effect. Car ce seroit presumption. Pour ce qu'il n'y a que Dieu mesme, qui se peut aimer soy mesme infiniment. Et de cest amour naist la contrition, qui est vne douleur si grande, que quant à la volonté & desir elle est infinie. Comme aussi quant à la grandeur, & à l'eternité. C'est à dire, qu'elle vouldroit si elle pouuoit, pour satisfaire à celuy qu'elle aime, que sa douleur fut infinie, & quant à la duration d'icelle, & quant à la grandeur, sauf de n'estre priuée de l'amour de Dieu. Voilà comme elle satisfait en peu de temps, à vne peine qu'elle merite de plusieurs années, soit par tribulations en ceste vie, soit par le feu de purgatoire en l'autre. Voilà ce que se peut dire de ceste contrition. Je crains que ceux, qui ne l'auront point esprouué, n'enten-

dront pas bien ce peu que i'en ay deduit. Mon ignorance, que ie confesse, en est cause. Ne scachant trouuer des termes conuenables, pour le bien faire entendre. Et encore moins quels en sont les effects: que ie diray neantmoins selon mon mieux, affin que chascun en tire ce qu'il pourra de profit. Le premier est, que ceste contrition rend la personne forte, magnanime & perseuerante au bien, sans plus retourner au mal. Le second, qu'elle la rend humble, mansuete & debonnaire. Le troisieme, qu'elle la rend pleine d'une confiance filiale en Dieu, avec une sainte haine de soy mesme. Le quatrieme, qu'elle faict mourir en l'ame toutes ses passions, & mauuaises inclinations. Le cinquiesme, qu'elle rend la personne pacifique en Dieu & avec son prochain, & produit en l'ame une ioye au S. Esprit. Ceste contrition n'est point vn ressentiment procedant de nature: ni une tristesse, qui cause plustost une tenebrosité en l'ame. Mais elle procede de la grace diuine, cooperante avec nostre francq arbitre. C'est une douleur qui engendre quelquefois des pleurs, lesquels (comme la rousée qui tombe, purifie l'air; le rend serain & lumineux) rendent aussi en l'ame une grande serenité, la purifiant & rendant pleine de lumiere interieure.

re. Les pleurs neantmoins ne sont point nécessaires, car on peut auoir ceste contrition sans pleurer. Les pleurs ne sont qu'un effect d'icelle. On trouue que saint Pierre a tant pleuré pour le peché, qu'il auoit commis, qu'il en auoit ses ioües comme cauées. Les pleurs doncques sont bons, & n'est pas aussi mauvais d'auoir ceste contrition sans pleurer, quoy que le plus souuent elle est accompagnée de pleurs. La contrition est au fond de l'ame, mais la nature corporelle en estant esmeuë, produit cest effect, pour satisfaire, & comme participer à la douleur de l'ame, le tout referé à Dieu. Qui est ce que ie scay dire de la parfaicte contrition, de laquelle tant de gens se trouuent esloignez. Il est vray que la contrition, encore que procedante d'un cœur froid en l'amour de son Dieu, & plustost par crainte de l'enfer, ayant regret d'auoir offensé son Dieu, & considerant ses iugements, sert pour la remission de la coulpe. Mais la peine nous en est reseruée. Outre ce que souz ombre de contrition, souuent l'ennemy de nos ames, fait ses efforts de decepuoir les penitens, par vne faulx cōtrition. Qui est vne tristesse desordonnée, à laquelle on donnera lieu, pensant que ce soit contrition; pour ce qu'elle procede de la memoire ou conside-

ration de ses pechez. Gardez vous ames fideles à Iesus-Christ, de n'admettre en vous ceste sorte de contrition, pour ce qu'elle apporte vne infinité de retardement, de pouuoir aller à Dieu. Comment la peut on cognoistre? Par ses effets. Sçauiez vous quels? Lors que l'ame touchée de Dieu, voyant ses pechez, a vn regret d'auoir offensé Dieu, elle commence par vne vraye contrition. Et puis le diable enuieux, luy suggere en l'esprit des troubles & tenebres interieures. Puis l'ame conçoit des deffiances de la bonté de Dieu, des crainctes de n'auoir pardon, & ce souz ombre d'vne faulse humilité, que elle merite telle ou telle punition. Et lors s'esleuant les passions, deuient triste, chagrineuse, & impatiente à la moindre occasion: pour ce que par ce trouble, & ces tenebres interieures, elle n'a aucune force de resister. Doncques pour surmonter nostre ennemy, dès le commencement de la tentation, il faut regarder si ceste contrition n'est point vne pure tristesse, & si elle cause ce que dessus. Et aussi tost la faut combattre & surmonter, se remettant du tout à la misericorde de Dieu, & se plongeant dans la fontaine de son sang precieux, qu'il a espandu pour nous en l'arbre de la Croix: & croire qu'vne seule goutte d'iceluy, est suffis-

suffisante pour nous deliurer de tous pechez, sans toutefois laisser de nostre part, de traualier tant que pouuons. Il se trouue encore vne autre espee de contrition, que l'on croit souuent estre vne grande contrition, qui n'est toutefois qu'une tendreté de nature. Quand au moindre petit regret d'auoir offensé & peché, on iette des grands ruisseaux de larmes procedantes d'une douceur naturelle: & quelquefois en l'ame on n'a que bien peu de contrition: semblant à l'exterieur, qu'on doive fôdre de douleur, & abondance de larmes. Il est vray qu'elle n'est pas mauuaise, pour ce qu'elle procede de quelque regret d'auoir offensé Dieu. Mais elle est de fort peu de merite, pour ce que c'est plus la nature qui opere, que la volonté. Elle est, di-ie, de petit merite, pour ce que l'ame demeure avec quelque contentemēt, procedant de ces pleurs. Et par ainsi, demeurant tiede, ne chemine plus auant en la vertu. Je prie que l'on ne s'esmerueille, si ie parle si particulierement. I'ay veu tant de ruses du Satan, qui s'efforce par tous moyens, de retarder les ames d'aller à Dieu, dont on ne se donne garde: que ie suis contraincte le mettre icy par le menu, à fin qu'on s'en garde. Au moins, si vne seule ame en faisoit profit, i'estimerois auoir biē employé ma peine. Du

*Quelle difference il y a entre la vraye tristesse,
& la fausse tristesse.*

CHAPITRE XVI.

IL se trouue deux sortes de tristesses ; l'une bonne & loüable , qui rend l'ame conforme au Fils de Dieu Iesus-Christ : l'autre tres-pernicieuse , & qui cause la ruine de l'ame & du corps. Iesus-Christ en sa passion , lors qu'il alla au iardin de Gethsemani pour faire oraison : commença à se contrister, craindre, & à estre ennuyé ; disant *mon ame est triste iusques à la mort.* Il faut donc conclure que ceste tristesse est bonne, & meritoire, & loüable : laquelle tous vrayes seruiteurs & imitateurs de la vie de Iesus-Christ peuuent auoir. Mais à fin que sous couleur de ceste vraye tristesse, nous ne tombions en la fausse tristesse : nous monstrerons comme on la peut discerner l'une de l'autre. Il faut donc regarder, premierement d'où elle procede. Secondement, quelle est sa cause. Tiercement, quelle est sa fin. Si elle procede de quelque passion vitieuse ou desreglée, elle est sans doute faulse. Car la vraye tristesse ne procede de
.. nullo

nulle passion vitieuse : quoy que la tristesse est vne passion de l'ame. Nostre Seigneur l'a bien monstré : *mon ame est triste iusques à la mort.* Pour mōstrer que ce n'estoit quelque passion vitieuse : mais que l'ame enduroit ceste tristesse sans aucune perturbatiō, prouenant de passion vitieuse, car c'eust esté imperfection. Or aucune imperfection ne pouuoit estre en nostre Seigneur. Par cōsequent la tristesse ne pouuoit proceder d'aucune passion vitieuse. Nostre Seigneur pouuoit endurer toutes les douleurs, qui peuuent arriuer & à l'ame, & au corps, en tant que homme. Mais l'ame de Iesus-Christ, ne pouuoit endurer la peine du peché, ni aussi la peine de quelque imperfection ; sinon celle du peché d'autrui. Car cela n'appartient qu'au pecheur. Mais apres cecy n'y a chose qui puisse affliger l'ame que la tristesse. Cause pourquoy il a prins la tristesse si grande, qu'elle estoit suffisante pour luy causer la mort. Ioinct que la nature estant vnies avec l'ame, souffroit en soy la douleur de l'ame : mais avec telle sympathie, qu'il n'y auoit aucune passion vitieuse, qui peust ou augmenter ou diminuer ceste tristesse. Mais la seule ordonnance de Dieu, qui de toute eternité a preu enuoyer telle affliction, laquelle l'ame accepte, se

conformant à la volonté de Dieu. Voila (selon que ie le sçauroy dire) d'où procede la vraye tristesse , laquelle tous vrayz seruiteurs de Dieu peuuent endurer à l'exéple de Iesus-Christ. Secondement, il faut regarder quelle en est la cause. Il n'y a que deux choses, qui nous la peuuent causer. Dieu nous a cōmandé de l'aimer sur toute chose, & nostre prochain comme nous mesmes. Cecy seul nous doit causer ceste tristesse, sçauoir, que Dieu est offensé, & si peu aimé d'une part : & la perte des ames de l'autre. Ce qui se refere aussi à Dieu: pour ce que Dieu dit, *qu'il ne veut la mort du pecheur: mais sa cōversion & sa vie.* Et voyant que c'est la volonté de Dieu de nous sauuer tous : & que l'homme de sa propre volonté se separe de Dieu, & ne luy rend l'amour qu'il luy doit, pour ce deuous nous, nous contrister. La fin de la vraye tristesse, est en ce que Dieu veut que le louions & aimions eternellement. Et ce non pour ce qu'il a affaire d'estre aimé ou loüé de nous : mais pour l'amour qu'il nous porte. Il nous veut donner ce bien eternellement, à fin que nous soyons vn en luy, & luy en nous, iouissans de son amour, & de sa gloire; par laquelle vnion, il nous veut rendre deusiez, & nous faire iouyr par participation eternellement de
l'vnion

l'union de la diuinité. Voila la fin de la vraye tristesse, laquelle est tres-meritoire & agreable à Dieu. Mais la fausse tristesse est (comme i'ay dit, tres-pernicieuse, s'engendrant de mesme sorte que la vraye. Mais sa source est tout autre, par ce qu'elle procede des passions rebelles & vitieuses. Quelle est la cause? Tout ce qui arriue contre nostre amour propre. Quelle est la fin? Vne disposition à la ruine de nostre ame, & descente aux enfers, où n'y a qu'une continuelle tristesse. Quant au premier, qui est d'où elle procede, elle vient des passions vitieuses, qui troublent l'esprit, mettent l'ame en tenebres, affoiblissent la volonté, pour empescher qu'elle ne puisse operer, ce que vrayémēt elle peut, par le franc arbitre; soit à quitter le peché, soit à pratiquer les vertus. Pour le deuxiesme, quelle est la cause de ceste vitieuse tristesse? C'est tout ce qui arriue contre le propre amour de soy-mesme. Par ce que les passions de l'ame qui ne sont mortifiées, se rebellent contre l'esprit, lors qu'il luy arriue quelque chose; soit de la part de Dieu, soit de la part des creatures, soit de soy-mesme: en quoy elle peut estre aneantie & humiliée, en quelque maniere que ce soit. Ce que l'amour propre ne pouuant souffrir, toutes les passions

fions s'eleuent, comme l'impatience, l'orgueil, la conuoitise: bref toutes tiennent le dessus, & la pauvre ame demeure esclaué d'icelles, ne sçachant à quoy auoir recours, qu'à la tristesse. N'a point mesme la force d'aller à Dieu, tant elle est serue de ses passions; & bien souuent elle tombe en desespoir. Pour le troisiéme, quelle est sa fin? Non autre, que toutes sortes de pechez. C'est à quoy le diable la veut attirer, si Dieu ne la preserue par sa bonté. Car il n'y a malheur, qui ne traine apres soy ceste tristesse, & sur tout le desespoir spirituel. Quant au corps, elle le desseiche iusques aux os, & souuent cause la mort. Ames fidesles, chassez ceste ennemie, & ne permettez tant que vous pouuez, qu'elle ait pied sur vous. Il se trouue aussi vne autre tristesse, qui procede de quelque infirmité corporelle, comme de quelque humeur peccante; cependant on ignore d'où elle vient. Ceste-cy n'est en soy ni bonne ni mauuaise: mais elle peut s'incliner ou à bien ou à mal, & la faut conduire par la raison. Estant neantmoins meilleur de la reietter, & reprendre la ioye au saint Esprit. L'on pourroit discourir beaucoup plus sur ceste matiere, pour y auoir beaucoup de subiect. Mais si on espluche bien ce qui en est dit, on y trouuera presque

que tout compris. Quant à la tristesse, procedante de la subtraction que Dieu faict, pour attirer vne ame à la perfection, il en sera parlé, lors que nous traicterons des quatre voyes, que Dieu tient pour attirer vne ame à soy, & la conduire à vne perfection sublime, & vnion deifique.

*De la contrition que les pecheurs connoient,
laquelle est en core imparfaite.*

CHAPITRE XVII.

POUR entrer au Royaume du ciel, il faut que tous pechez soient purgez, ou par la contrition, ou par le feu en purgatoire, ou bien en ceste vie par les tribulations, & les bonnes œuvres. Mais les pecheurs qui sont continuellement en tenebres interieures (pour ce que le peché mortel separe l'ame de la grace de Dieu, par laquelle elle est illuminée) ne cognoissent la difformité de leur peché, & combien il desplaist à Dieu. Car si vn pecheur pouuoit veoir la laideur & difformité de son ame, lors quelle est en peché mortel, il desespereroit, ou plustost entreroit mille fois dans vn feu ardant, & s'y laisseroit plustost consumer

fumer que d'en commettre vn seul. Tant est son ame difforme & detestable, estant en cest estat, qu'il ne se pourroit supporter. Et au contraire si vne ame voyoit sa beauté, lors qu'elle est en la grace de Dieu, estant encore en ceste vie fragile, elle tomberoit en orgueil. Pource ce n'est pas sans cause, que la Sapience diuine a ordonné, que tout nous soit caché, en ceste vie mortelle. Estant toutefois la bonté de Dieu si grande, qu'il departit la lumiere de sa grace, aux vns plus, aux autres moins; suiuant qu'on s'y dispose, ou que sa bonté le permet. Aux grands pecheurs, qui ne font pas des pechez mortels; Dieu leur enuoye des poignants remords de conscience, par lesquels ils sont contraincts de recognoistre en eux, la iustice de Dieu qui les menace. Tellement que la crainte des peines eternelles, les fait retourner à Dieu par penitence, & conceuoir douleur de leurs pechez. Mais d'autant que ceste contrition est seulement par crainte, & non par amour; pour ce ne reçoient ils la lumiere interieure procedante de la grace: pourquoy ils retombent tousiours en leur peché.

Il y a aussi le ver de conscience qui ne meurt iamais: prouenant de ce que tout leur amour demeure attaché à la terre. Ce
qui

qui aduient de ce que ignorant, comme ils font, mais d'ignorance coupable, la présence de Dieu par tout, & spécialement en nous (présence di-ic, qui est telle que ne pouuons auoir vne seule pensée, ni bouger vn de nos doigts: mesme ne peut tomber vn seul cheueu de nos testes, que Dieu n'y soit présent, par l'ordonnance duquel toutes choses se passent en nous, tant petites & basses soient elles. Voire que comme Dieu est plus vni en nous, & plus intime tant à nostre corps qu'à nostre ame, que nostre ame n'est à nous mesmes, de sorte que s'il se retiroit vn seul moment de nous, nous tomberions à neant, comme si iamais nous n'auions esté, pour ce qu'en luy est tout nostre estre) ceste ignorance ne venant d'ailleurs, que des tenebres du peché, qui empeschent de voir Dieu là où il est; c'est à dire, en nous mesmes: leur auenant pour cest esgard ce que saint Iean Baptiste disoit aux Iuifs, *Il y en a vn au milieu de vous, que vous ne cognoissez*; & par consequent empeschent de l'aimer, puis que pour aimer il faut cognoistre (aussi que reciproquement l'amour est ce qui faict cognoistre Dieu, suivant ce que dit l'Apostre saint Iean, *Qui-conque aime cognoist Dieu, & qui n'aime point ne cognoist point Dieu, car Dieu est charité*)
 autant

autant que le peché separe de l'amour, autant oste t'il, & faict perdre le ressentiment de l'offence faicte à Dieu, où est la *vraye* contrition, qui ne peut estre que par l'amour: si bien cela faict que les pecheurs se comportent en leur ignorance, comme si Dieu fust bien loin d'eux, iusqu'à en estouffer quelquefois volontairement la memoire; & dire à Dieu, *Retire toy de nous, nous ne voulons point la voye de tes commandemens*: si ne laisse toutefois de demeurer par prouidence speciale de Dieu, voire aux plus perdus, ce ressentiment naturel des principes operatifs, qu'on appelle synderese, qui est ce ver de conscience, qui ne meurt iamais, recogneu mesme par les Payens, qui les contrainct, veuillent non veuillent, de se souuenir des iugements de Dieu, & des peines des reprouuez. Voire iusqu'à en estre tentez & troublez de desespoir. Contrition bien autre que la *vraye*, puis qu'elle ne vient que de crainte & amour propre, & non d'amour qu'ils portent à Dieu. Et de laquelle, se peut dire souuent avec le Prophete, *que contrition & malheur, est en leurs voyes, pour n'auoir cognu la voye de la paix*, qui n'est autre que l'amour. Et neantmoins en cecy se voit la grande bonté, & misericorde de nostre Dieu, &

combien

combien il desire de sauuer les ames. En ce qu'il reçoit tels pecheurs à penitence, & leur pardonne encore qu'ils ayent vne contrition si imparfaicte. Car mieux vaut se conuertir à Dieu par craincte, que demeurer du tout en son peché. Et de ceste craincte & contrition imparfaicte Dieu l'attire par sa bonté souuent à vne plus parfaicte. Personne ne se doit desesperer pour quelque peché qu'il ait commis, puis que la bonté de Dieu est si grande vers les pecheurs.

De la contrition de ceux qui sont conuertis & profitent en la vertu.

CHAPITRE XVIII.

I'A Y monsté succinctement que les pecheurs n'ont qu'une contrition imparfaicte, laquelle est de peu de merite. Mais les prouffitants en la vertu, qui par vne volonté absolue, ont quicté les pechez, qui caufoient en leur ame les tenebres interieures, sortant d'icelles entrent en la lumiere de la grace diuine: par laquelle ils cognoissent leur deformité, & puis viennent à auoir vne haine d'eux mesmes ou de leur

leur amour propre, & de leur sensualité : & de ceste haine, commencent à entrer au secret cabinet de l'amour diuin. Mais d'autant qu'ils n'ont encore purgé les pechez passez, ni acquis le souuerain degré des vertus, lequel ne se peut acquerir, que par vne parfaicte mortification, ce qui ne se faict pour l'ordinaire, faute de magnanime courage, qui s'acquiert par longue espace de temps: à ceste cause, ils ne goustent encore parfaictement ce que c'est de Dieu, & ne recoiuent la lumiere de la grace diuine, que comme petits rayons, d'ont ils viennent à cognoistre la vertu, la cognoissant la desirent, pour se rendre agreables à Dieu, à quoy ils trauaillent tant qu'ils peuuent. Et pour ce que leur amour est encore imparfaict, & qu'ils n'ont faict progrez en la vertu, leur contrition est aussi imparfaicte. Sçauiez vous de quels pechez ils ont contrition? (car ils ont quicté les pechez mortels, & se gardent des veniels, quoy que personne ne s'en puisse du tout exempter) outre les pechez dont ils ne se peuuent garder, pour la fragilité de la nature, ils ont contrition du bien obmis, de n'auoir pratiqué telle mortification vers eux mesmes, de n'auoir trauaillé à la vertu, & que par leur negligence ils tombent souuent en quelques imper-

imperfections. Si comme de ne suinte les inspirations diuines, de n'auoir accompli les commandemens avec telle perfection, que le requiert le parfaict amour de Dieu & celui du prochain. Si c'est vn Religieux, de n'auoir accompli saregle & statuts, avec telle perfection, comme il eust peu. Cecy est general. A fin de donner mieux à entendre, si c'est vn seculier, pour exemple s'il auoit faict vn mensonge legerement, ou iugé temerairement, ainsi de toute autre chose où il y a peché, s'il a desia proufité en la vertu, & commencé à aimer vrayement Dieu, tels pechez luy causeront vne grande cōtrition, & plus beaucoup qu'à vn autre pecheur des grands pechez mortels. Pour ce qu'il a quelque peu gousté l'amour de Dieu, par lequel estât illuminé, il cognoist la deformité d'un petit peché veniel, & combien il deplaist à Dieu. Et partāt qui le retarde de se pouoir vnir à luy par vn parfaict amour. Ce qui luy cause vne douleur insupportable, pour se veoir par tel peché éloigné d'un si grād bien, que de se veoir priué de ceste grace de Dieu. I'enten de la grace parfaicte, qui le cōduict à la perfection, laquelle vn vray Chrestie peut acquerir: & non pas de la grace, de laquelle sont priuez ceux qui sont en peché mortel. Car ils iouissent ia de cete grace, pour auoir

H

quitté

quitté de faict & de volonté les pechez mortels. Si c'est vn Religieux comme s'il a rompu le silence volontairement, sans quelque necessité : ou bien s'il a parlé non avec si grande humilité à son prochain. Tels pechez luy sont vne peine, qui luy causent vn purgatoire, telle estant la contrition qu'il en reçoit en son ame. Et si quelqu'un s'estime bien parvenu à la vertu, & qui ne faict cas de tels pechez, on peut bien dire que sa perfection est legere, & que c'est plustot vne apparence de perfection, pour ce qu'il n'y a si petit peché, qui ne soit fort grand deuant Dieu. Que cecy soit toutesfois sans scrupule. Car la vraye contrition est pure, & n'engendre d'autre imperfection, comme est le scrupule, qui cause grand trouble en l'ame. Ceste contrition n'est point forcée: mais au mesme instant qu'on s'apperçoit estre tombé en quelque petit peché, l'amour que l'ame porte à Dieu, luy cause au mesme instant la douleur de l'auoir offensé, & n'a repos iusques à tant qu'elle en aura faict satisfaction, ou par la contrition suffisante, ou par la confession. Et lors qu'elle a satisfait, sans toutefois croire auoir faict chose suffisante de satisfaction, Dieu operant en cecy, elle rentre aussi tost en la familiarité avec son Dieu, ne luy sou-

uenant

uenant plus d'elle mesme, ni des ses pechez
 en particulier, mais bien en general. Et se
 tient en son neant, Dieu operant en elle &
 elle en Dieu : par ce que Dieu a dict, lors
 que le pecheur aura douleur de son peché,
 ie n'en veux plus auoir souuenance. De
 mesme faiët il vers sa creature, lors qu'elle a
 eu vraye contrition. Elle demeure en vne
 paix en Dieu, comme si elle n'auoit offensé.
 Poursuit sa pratique des vertus, sans toute-
 fois perdre la souuenance de son neant, &
 combien elle est redevable à Dieu. Mais ses
 actions operent en des œuures plus par-
 faites, cōme est de chercher la parfaite charité,
 soit vers Dieu, soit vers le prochain. Encore
 que la contrition soit tres-necessaire & tres-
 bonne, & que l'on la doibue demander à
 Dieu, si est-ce que lors qu'il semble qu'on
 s'est acquitté selon son petit pouuoir deuant
 Dieu, il n'est besoing de s'arrester tousiours
 à soy mesme. Mais il faut operer des actions
 plus releuées, comme est en grande gene-
 rosité, la pratique de la vraye vertu, mor-
 tifiant en soy, tout ce qui empesche la par-
 faite vnion avec Dieu, laissant tout ce qui
 est de la terre, pour suiure ce qui est dict.
Si vous demandez, demandez, Cherchez ce qui Isa. 21.
est d'en hault, & non ce qui est sur la terre.

H a

De

De la contrition des parfaicts laquelle est en choses, où le plus souvent n'y a point de péché.

CHAPITRE XIX.

DE tant plus que quelqu'un chemine en lumiere, tant plus voit il en soy ce qu'il y a de difforme. Celuy qui chemine en tenebres, ne voit sur ses habits des grandes & laides taches. Mais celuy qui s'approche des brillans rayons du soleil, voit aussi tost les plus petites taches : voire iusqu'à la moindre ordure ou poussiere, qui soit sur ses habits, qu'il secoüe incontinent. De mesme, (parlant mystiquement) celuy qui chemine es tenebres des pechez mortels, ne voit en son ame sa deformité, ni combien ces taches sont laides deuant Dieu (comme nous auõs dit) & pour n'auoir ceste cognoissance, sa contrition est imparfaicte. Quant est des proufitans, il a esté dict quelle doit estre leur contrition. Pour ce qu'ils commencent à iouir de la lumiere de la grace diuine, qui fait que lors ils voyent plus parfaictemēt les taches des petits pechez veniels. Mais quant aux parfaicts, à cause qu'ils sont continuellement, comme absconsez, dans la claire lumiere

miere de la diuinité, & par vn estroict lien de charité & familiarité vnies avec Dieu, qui est vne vnion en Dieu, non seulement des puissances de l'ame (laquelle vnion toutes-fois, est encor loing de la parfaicte vnion, comme sera monstré aux liures suiuians, esquels se traictera du quatriesme estat de l'ame, qui est comme le dernier & plus parfait, quel'ame peut auoir en ceste vie, iacqoit qu'elle puisse tousiours proufiter en grace & perfection) telles ames doncques ont si claire cognoissance, non seulement des pechez, mais de la moindre & plus petite imperfection qu'il y a en elles, que se voyans elles mesmes en Dieu, & leur volonté & amour n'estant plus qu'un avec Dieu, elles ont en horreur tout ce qui deplaist à Dieu. Et voyant en soy quelque imperfection, qui deplaist à Dieu, de ce en ont elles vne contrition si grande, qu'à chasque imperfection en laquelle elles tombent, & es pechez si legers, qu'à grand peine scauent elles cognoistre s'il y a du peché, la contrition qui sort lors du fond de leurs cœurs, comme d'une fornaiſe ardante de l'amour de Dieu, les purge comme le feu de purgatoire. Ceci est pour leur action particuliere. Car en general, j'ay dict que les parfaicts ont contrition des pechez, qu'ils n'ont iamais com-

mis, mais qu'ils pourroient commettre si Dieu ne les gardoit. I'ay aussi dict qu'ils ont contrition pour les pechez de tout le monde, dont par leur moyen Dieu souuent soustient les pecheurs. Mais quant à ceste contrition particuliere, c'est pour le grand desir qu'ils ont de garder leurs ames en pureté deuant Dieu. Quelles sont donc les fautes qu'ils ont en telle horreur? Sera d'auoir esté distraits quelque peu de la preséce de Dieu, non seulement en l'oraison (car en icelle ils en ont si peu, que en huit iours & plus, ils comteroiert bien leurs distractions; si peu sont ils distraicts) mais ie di que conuersant, & aux entremises d'affaires, s'ils se sont tant soit peu distraicts, de la presence de Dieu. Car leur oraison est cōtinuelle, estant au milieu des affaires domestiques, & mesmes aux recreations; leur ame opere tousiours en Dieu. Et s'ils se sont par fragilité arresté à quelque chose créée, perdant la presence de Dieu, cela leur cause ceste contrition. On trouue que Sainte Catherine de Sienne, vn iour parlant à quelque personnage, son frere y passant, elle s'arresta interieurement pour le regarder, pourquoy elle fut distraicte de la presence de Dieu: & de ce nostre Seigneur la corrigea si viuement, qu'elle en eut vne contrition telle, qu'elle

qu'elle en pleura bien long temps. Ne pensez pas, ames deuotes, que cecy arriue seulement aux Saints(car lors elle estoit encore en terre, en vn corps fragile) mais à toutes personnes qui cheminent au chemin de la vraye perfection, & du parfaict amour de Dieu. Si en leurs œuures ils ont failly en quelque chose, contre la plus grande perfection, iacoit qu'à autres ce seroit perfection, ils le tiennent pour vne grande faute, au regard de la perfection, en laquelle ils cheminent. Quant est à l'endroit de leur prochain, s'ils ont failly en quelque œuvre de charité, ou corporelle ou spirituelle, l'occasion se presentant, ou bien s'ils ont esté negligents de prier pour les pecheurs, les tenans comme leurs propres freres, ou bien s'ils sont tombez en quelque chose contre l'humilité parfaicte, soit enuers Dieu, soit enuers le prochain, soit en eux-mesmes, quoy que les autres, ne le cognoistront, pour estre la faute si petite que rien plus: de tout ce que dessus & semblables, ils en ont vne contrition & regret, pour ce que Dieu est si pur: & toutes ces petites fautes, sont comme vn ombrage entre Dieu & leur ame, qui leur empesche quelque peu l'union & familiarité avec Dieu. Mais aussi tost, la contrition suruenant, la confiance

en Dieu, & la deffiance de soy-mesme, dissipet ceste nuée ou ombrage, qui empeschoit leur ame, de se ietter du tout en Dieu. Comme dit l'Espouse au Cantique, *Mon bien-aimé est à moy, & moy à luy*. C'est Dieu qui parle à l'ame, & l'ame à Dieu. Telles personnes se retrouuent entre les autres, sans qu'on les apperçoive dissemblables. Mesmes on verra en eux des imperfections naturelles, en quoy neantmoins il n'y a pas de peché, & ne laisseront cependant d'en estre desestimées. Dieu le permettant ainsi, à fin que par ce moyen, ils se tiennent en humilité, & qu'ils ne tombent en quelque estimation de soy mesme, pour leur grande pureté de vie. Et quelquefois il aduient, que Dieu leur cache telle imperfection, dont nostre nature ne se peut garder. En quoy on voit la grande bonté de Dieu, comme il se comporte vers ses amis. Car si telle ame cognoissoit toutes les imperfections, elle seroit insupportable à soy-mesme, pour la haine qu'elle a de sa propre nature, & pour le grand amour de Dieu. Que nul ne se desourage, pour ne veoir en soy tels effects, & de n'estre encore là parvenu. Mais qu'avec generosité il traueille aux autres, cy dessus mentionnées, pour acquerir ceste dernière perfection.

Comment

*Comment l'amour propre, nous fait souvent
laisser le bien pour les respects humains.*

CHAPITRE XX.

EN T R E tous les empeschemens, qui suruiennent à l'ame, qui n'aspire à autre chose, que de pouuoir paruenir à sa fin, qui est l'vñion à son Dieu : à laquelle elle ne peut arriuer, si ce n'est par vn parfait amour, apres auoir mortifié & purifié ses pechez par la penitence & contrition, & la vie austere, montant de vertu en vertu : les respects humains luy donnent encore empeschement. Et souvent vne ame aura surmonté, avec grande generosité, les pechez, aura sur foy acquis de grandes vertus, ne restera plus que bien peu, pour se veoir entrer au sacré cabinet de son espoux Iesus-Christ: sera neantmoins encore retenuë par ceste imperfection, qui luy donnera plus de peine à les surmonter, que toutes les inclinations vitieuses. Ames fidelles, que si peu de choses ne vous espouuante. Il faut necessairement, si vous desirez paruenir au pur amour de Dieu, que vous surmontiez ceste petite defectuosité, qui est toutefois

vn

vn grand empeschemēt. Il y a deux sortes de respects humains, à sçauoir és actions corporelles & exterieures, & és spirituelles & interieures. Les exterieures, sont cōtre le prochain, les interieures, cōtre Dieu. S'il se presente quelque occasion, de secourir le prochain, en quelque necessité que ce soit, corporelle ou spirituelle, & que pour ce on en pourroit faire quelque soupçon : encore qu'en nostre action il n'y ait que du bien, & nul indice de mal, on laisse son prochain en danger, pour craincte qu'on ne die ou pense, cecy ou cela. Crainctes qui à la verité donnent vn grand empeschement, pour paruenir au pur amour de Dieu. Les interieures, sont comme de resister aux inspirations du S. Esprit, & differer de mettre à execution quelque acte vertueux. Pensant, si ie fay cecy ou cela, on pensera que ie le fay pour estre tenu & dit vertueux, ou pour quelque autre respect humain : comme craindant de desplaire à quelque personne. Si on s'examine bien, on trouuera, que beaucoup de bonnes actions sont corrompues, par ces respects humains. C'est comme vn ver, qui ronge toutes nos bonnes œuvres. Le remede est, si tost que nous voyons quelque obiect se presenter, soit de Dieu, soit des creatures, en quoy Dieu peut estre glorifié.

glorifié : soit en soy , soit en sa creature , & que ceste action soit en la charité de Dieu, ou du prochain : alors nous ne devons retourner à nous-mesmes : mais rentrer en Dieu, & que le simple regard de nostre ame soit arresté à la seule volonté de Dieu. Ainsi accomplir toutes nos actions , sans iamais regarder à la creature ; à fin que nostre volonté estant vnüe avec la volonté de Dieu, nous operions tout en Dieu. C'est le vray moyë pour paruenir au pur amour de Dieu.

*La maniere de prier Dieu avec plus d'efficace
pour soy, & pour son prochain.*

CHAPITRE XXI.

TANT plus on veut entreprendre vn affaire de grande importance , tant plus les preparations doiuent estre grandes. Si c'est pour s'adresser à quelque grand seigneur, voire mesmes vers le Roy, il n'y a temps que l'on ni employe, ni industrie dont on ne s'aduise, pour amener à chef son entreprise, à fin de se rendre agreable. Soit en parler, & bien deduire le discours de son ambassade: soit autrement, pour mieux & plus facilement obtenir ce qu'on pretend.

tend. Si pour choses terrestres & caduques, on apporte tant de soing ; que doit on faire pour les choses celestes & eternelles ? Si pour s'adresser à vn Roy terrien & mortel, qui ne donne rien de ce qui est sien (car tout est à Dieu) l'on se traouaille d'inuenter diuers moyens, quelle diligence doit-on apporter, pour s'adresser au Roy du ciel & de la terre ? A vn Dieu immortel, pour obtenir de luy, non des biens terrestres & perissables, mais celestes & eternels ? Et de tât plus, que s'adresser à Dieu, est d'autât plus grande importance, qu'il y a de difference, entre le Createur & la creature ? Et neantmoins le mal est, qu'on n'y fait que bien petite preparation. Non que ie vueille dire, qu'on y doie apporter vne multiplicité d'actions. Non. Mais vne grande humilité & reuerence, par vn profond aneantissement de soy-mesme, avec vne foy parfaicte & grand amour. A faute de quoy, si peu obtiennent ce qu'ils demandent de Dieu en leur oraison. Dieu dit, *demandez & vous l'aurez.* Mais comment faut-il demander ? Au nom de Iesus. *Tout ce que vous demanderez à mon Pere en mon nom, il vous sera accordé,* dit nostre Sauueur Iesus. En tout ce que j'ay dit, il y a deux poincts necessaires, pour bien faire oraison. L'vn est le delaisement de soy-mesme

mesme par humilité: l'autre est la confiance en la vertu de Dieu, laquelle est entendue en ce que nous demandons au nom de nostre Sauueur Iesus. Je ne veux icy discourir de la methode, qu'il faut tenir, pour faire oraison; pour ce qu'il en est traicté assez ailleurs. Mais seulement ie veux monstrier, quelque empeschement plus proche, duquel on ne se donne garde. Il aduiuent souvent, qu'allant faire oraison, apres la preparation, suiuant la methode ordinaire, on ira avec grand desir au premier coup, s'adressant à Dieu avec grande affection & ferueur, oubliant l'aneantissement de soy-mesme. Il semble que suiuant les desirs, on doine voller au plus haut des cieux. Et ordinairement telle oraison finit en tiedeur: l'ame demeure en tenebres, sans remporter aucun fruit. Et perseuerera en ceste sorte, sans sçauoir la cause, pourquoy en la fin de l'oraison, on sent ceste tepidité & refroidement interieur, attendu que le Prophete Royal disoit, *en meditant le feu s'allumera en mon cœur*. Il arriue doncques, que se trouuant enflammé au commencement de l'oraison, on finit avec tiedeur, & pour ce que la ferueur sans l'humilité, demonstre vne secrette presumption, cela arriue, Dieu le permettant, afin de nous humilier, & nous

nous faire cognoistre ce que nous sommes, nous rabaissant sans pouuoir remporter aucun fruit. Si doncques vous voulez faire vne vraye oraison & agreable à Dieu : apres la preparation briefue: rentrez au plus profond de vostre neant, vous arrestant par vn simple regard à vostre pauvreté, de laquelle sortira vne filialle compunctiō & affection en Dieu. Suiuant quoy Dieu vous esleuera souuent, de cest aneantissement, au plus haut degré de l'oraison. Mais il se faut aussi garder de faire ceste humiliation, seulement par acte, & à fin que Dieu nous esleue: car ce seroit encore vne tromperie. Que ceste humiliation soit en verité. Comme il est dit en l'Euangile de la Cananée, lors qu'elle prioit nostre Seigneur pour sa fille. Nostre Seigneur luy dit, *que la viande des enfans ne deuoit estre iettée aux chiens*. Elle repliqua, *que les petits chiens mangeoient les miettes, qui tomboient de la table de leur maistre*. Quoy que nostre Seigneur l'appelle chienne, la reiettant, elle neantmoins par vne grande humilité, foy, & affection ardante, perseuere, s'estimant pire qu'un chien. Et nostre Sauueur meu de sa grande humilité, luy dit : *O femme que ta foy est grande. Il soit fait comme tu le veux*. Le fondement de la vraye oraison, soit vocale, soit mentale, quelque haute

haute puisse elle estre, doit estre vn aneantissement de soy-mesme, & profonde humilité. Voulons nous impetrer de Dieu pardon de nos pechez? Soyons humbles. Voulons nous aduancer en la vertu? Rentrons en nostre neant par humilité, & puis faisons nostre demande à Dieu. Voulons nous estre vnis à Dieu, & estre familiers de luy; comme de nostre pere, nostre espoux, nostre tout? Voulons nous iouyr de ses embrassements, & n'auoir en nous autre contentement qu'en sa familiarité, & que sa presence ne nous soit iamais soubstraicte? Soyons humbles, & demandons-le à Dieu, par ceste humilité, & ardante charité. Il ne faut autre Theologie. C'est en cecy que gist la vraye science. C'est en quoy se plaist nostre bon Dieu. Car luy mesme l'a dit, *que tout son plaisir est, d'estre avec les fils des hommes.* C'est au milieu d'un cœur humble, que Dieu faict sa demeure: comme nous tesmoigne l'Isaie. *Il se repose, dit-il, & faict sa demeure avec les humbles.* Et le Psalmiste, *qu'il exauce les prieres des humbles, & contemple les choses humbles, soit au ciel, soit en la terre.* C'est ce que ie veux dire, que nous ne deuons iamais presumer, pour quelque ferueur que ce soit, ou sentiment interieur en nous, faisant oraison. Et conuient bien entendre pour ce que

ie di, qu'il n'est tousiours necessaire de sentir par acte l'humiliation, pourueu qu'essentiellement elle soit au fond de nostre ame. Je di lors que c'est vrayement Dieu, qui nous attire à vne action plus releuée, comme est la contemplation & vnion avec luy. Mais notez, qu'il n'y a contemplation si haute, que l'ame ne voye clairement son neant. Car tant plus elle voit Dieu, tant plus elle voit son rien. Et en ceste veüe, n'y a nulle operation actiue. Veüe toutefois, qui n'appartient à toutes personnes, ains seulement à ceux, à qui Dieu fait la grace de les attirer. Au surplus, il appartient à vn chacun, au commencement de l'oraison, de tascher de tout son possible, de rentrer en son neant; & du plus profond de son cœur, s'humilier au dessoubs de Dieu, & de toutes creatures. Et puis avec vne grande confiance en Dieu, dire avec le Patriarche Abraham, *Mon Dieu encore que ie sois poudre & cendre, si ne laisseray-ie de m'adresser à vous.* Et en ceste filiale confiance & humilité, Dieu est si bon qu'il ne scauroit nous esconduire. Au moins s'il ne nous donne ce que nous demandons, n'estant possible encore necessaire, cognoissant mieux ce qu'il nous faut, que nous mesmes, il nous donnera autre chose plus necessaire, ou bien ce
que

que demandons en temps opportun. L'on pourroit icy monſtrer vne maniere de prier pour noſtre prochain, ſoit en general pour tout le monde, ſoit en particulier pour quelque ame; laquelle priere ſera hors de tout amour propre, ſans nature, ni eſtre induitte par la nature; mais qui vient de la vraye charité. On a de couſtume, lors que la charité nous pouſſe de faire oraiſon, pour le prochain qui eſt en neceſſité; faiſant la requête à Dieu, de ſe repreſenter en la volonté, voireſ meſmes en l'imagination, la perſonne pour laquelle on fait prier à Dieu. Ceſte forme eſt plus pour le corps, que pour l'ame. Ne voulant dire neantmoins, que ceſte maniere de prier ſoit mauuaïſe: mais qu'elle eſt imparfaite. Pour ce que c'eſt plus l'affection naturelle, qui nous induit, par vne compaſſion naturelle, procedant plus de la nature, que de vraye charité, laquelle Dieu deſire de nous. Pour faire doncques oraiſon pour noſtre prochain, en vraye & ardante charité, purifiée de toute nature, eſt que nous eſtans en la preſence de Dieu, deuons laiſſer toute forme & image corporelle de la perſonne, pour qui nous prions. ni meſme reſeruer en noſtre imagination ou me-moire, la diuerſité des perſonnes; comme de pere, mere, frere, couſin, &c. Au moins

en tant qu'ils nous seroient representez par quelque image, ou cause procedante de nature. Pour ce que nous ne deuons suiure la chair, ni le sang; mais la parenté spirituelle. Suiuant ce que dit nostre Seigneur: *Ceux-là qui font la volonté de mon pere qui est au ciel, sont ma mere, mon frere, & ma sœur.* Il fit ceste response lors, que faisant sa predication, on luy dit que sa mere estoit à la porte, pour monstrier qu'il tenoit plus sa mere pour l'esprit, que pour le corps. Non que ne deuons recognoistre l'obligatiō particuliere à pere, mere, parens, amis, & bien-faïcteurs, (car nous sommes plus obligez de les aimer, & prier Dieu pour eux, que non pas pour autres.) Mais que ceste recognoissance soit spiritualisée, & du tout selon l'ame, comme i'ay dit. Pour exemple, quittant toute forme & image, nous représenterons à Dieu avec grande charité, l'ame de telle & telle personne; priant Dieu de tout nostre cœur nous donner ce que luy demandons, & qui luy est necessaire, soit pour le corps, soit pour l'ame, soit pour la deliurer de quelque affliction corporelle ou spirituelle. Et le tout en Dieu. C'est à dire, que demandant à Dieu, nous soyons en Dieu, regardant en Dieu la dignité de l'ame, pour laquelle nous prions. Tant plus nous regarderons

derons en Dieu la dignité de ceste ame, & combien elle merite d'estre aidée de la grace de Dieu, pour paruenir à la fin pourquoy Dieu l'a creée, tant plus nostre oraison sera feruente & perseuerante, & la charité augmentera, tant que ne cesserons, que Dieu en fin n'encline son oreille à misericorde vers telle ame. Si c'est pour quelque pecheur, voyant en Dieu la perte de telle ame, par quelque deffaut corporel, & combien il importe qu'une ame ne soit separée de la grace de Dieu : ou si c'est pour quelque ame aduancée à la perfection, & que pour quelque deffaut elle est retardée, voyant en Dieu tel desir: toutes ces considerations enflambent tellement l'ame en charité, & en rendent les prieres si ardantes, que Dieu est contrainct de luy accorder, ou sa demande, ou chose plus grande. On peut en vn moment prier avec telle efficace pour tout le monde, ne receuant en soy aucune impression, pour la multiplicité des personnes; mais comme estants tous en Dieu. Ceste maniere de prier est fort exquise & necessaire, à toute personne amie de la spirituelle pureté, & desireuse de iouyr de la presence & vnion diuine.

*Comment vne ame se doit comporter rece-
uant quelque illustration de Dieu,
ou lumiere interieure.*

CHAPITRE XXII.

VN E ame qui chemine en verité de-
uant Dieu, ne cherchant en toutes ses
actions, soit interieures ou exterieures, que
l'abnegation de soy-mesme, & l'aneantisse-
ment de sa propre volonté: ne veut, ni ne
cherche, que la pure volonté de Dieu, & l'ac-
complissement d'icelle en elle, & par elle.
Avec vn desir enflambé, que Dieu soit loué,
cognu, & aimé, non seulement en elle, mais
de tout le monde. De sorte, que telle ame
pratique en verité toutes les vertus, non
telles quelles: ains les plus heroïques & re-
leuées, toutes cachées aux yeux des hom-
mes. Car la vertu secrette & incognüe sera
la plus reluisante deuant Dieu. Telle ame
cheminant ainsi en verité; ignore ce qu'elle
faict, non d'une ignorance insensible, mais
d'une ignorance abyssale, procedante de la
verité. Cognoissant que d'elle mesme elle
ne peut operer vne seule bonne action. Mais
que Dieu le faict en elle, & par elle. Je di
donc-

doncques que telle ame, soit qu'elle soit martelée, comme sur vne enclume, par toutes sortes d'afflictions; que quant à l'interieur elle n'ait vne seule minute de repos: & quant à l'exterieur, toutes les creatures se bandent contre elle, par mille menfonges, & mesdisances, la tenant pour tres-imparfaicte; que les diables se souleuent, & les puissances infernales se bandent à sa ruine: nonobstant tout cela, plus elle est abbaislée, plus elle s'eleue en esperance en Dieu, embrasse la croix, & se tient tellement serrée avec son Dieu, bien qu'il luy semble quelquefois qu'il l'ait abandonnée pour ses pechez, qu'elle luy dit: encore que i'aye merité l'enfer, si vous m'y iettez, ie vous aime tant, que là ie vous embrasseray; au moins ie n'y seray sans vous, si vnie est son esperance en Dieu. Tant plus elle est foulée aux pieds, tant plus elle rend son odeur deuant Dieu; mais incognuë deuant les hommes. Dieu tres-bon, voyant la constance de sa bien-aimée; luy ouure le thresor de sa sapience: l'illumine interieurement de ses graces: luy parle familièrement par son saint Esprit, & plus familièrement que ne font deux amans: luy enseigne sa volonté, la corrige en ses deffauts, bien que petits. Elle l'escoute luy ouurant la porte

de son cœur. Dieu luy enuoyant quelque lumiere infuse, où l'ame voit au fond de son esprit, la pure verité de l'obiet que Dieu luy montre, comme elle se trouue deuant Dieu. De la presence duquel elle ne se separe d'un seul moment, par vne basse estime de soy mesme. S'aneantit deuant Dieu, comme vn rien. Et en cest aneantissement, Dieu luy enuoye ceste lumiere infuse, où elle voit la verité de son neant, en la verité de celuy qui est tout, nostre bñ Dieu. En quoy l'ame reçoit vn cōtatement nō pareil, de veoir qu'elle n'est rien, qu'elle ne peut rien, & que en ce rien celuy qui est tout, est glorifié. S'il estoit possible, que l'ame peust demeurer toute sa vie, en la lumiere de ceste verité, il luy seroit impossible de pouuoir offenser Dieu. Mais Dieu ne le permet, par ce qu'il nous veut laisser en nostre franc arbitre. Car si l'ame iouyssoit tousiours de ceste verité, elle perdrait le merite du trauail qu'elle opere, pour obtenir les vertus, qui sont les moyens pour paruenir à la verité & lumiere, en laquelle se trouuant abysmée, ne luy seroit plus besoing des moyens pour y paruenir. Tant que nous sommes en ceste vie, nous sommes obligez de nous perfectionner, & de moment en moment, monter de vertu en vertu, iusques à la mort. Mais de
iouyr

iouyr de l'essence de la vertu, n'appartient en ceste vie, ains en l'autre bien-heureuse & eternelle. Si doncques Dieu tout bon, donne quelquefois à l'ame, quelque petit eschantillon en ceste vie, de la iouyssance du bien, que reçoient les bien heureux en l'autre; il ne faut penser de nous y arrester, comme vouloit faire saint Pierre, estant en la montagne de Thabor, ayant veu la clarté de nostre Dieu en sa transfiguration, Disant : *Seigneur, il fait bon de demeurer icy, faisons y trois tabernacles.* Mais tout soudain nostre Seigneur luy parla de sa passion; pour monstrier qu'en ceste vie n'est le lieu de repos. Saint Pierre ignoroit encore ceste doctrine. De mesme, si l'ame reçoit quelque lumiere infuse, ou intellectuelle, ou mesme visible ne doit s'y arrester, pour y penser demeurer en ceste vie, comme plusieurs font à leur grand preiudice. Mais faut scauoir comment on se doit comporter en cecy. Car l'ame qui veut seruir à Dieu en verité, & aimer Dieu purement, ne doit iamais desirer telle lumiere ou vision. Et au regard de la vision ou lumiere, qui apparoit à la veüe corporelle, elle est tres dangereuse: pour ce que l'ange des tenebres, s'apparoist souuent en ange de lumiere, pour tromper les seruiteurs de Dieu. Si donc-

ques telle lumiere s'apparoist, soit en forme d'Ange, ou de quelque Sainct, si tost que l'ame rentre en son neant, s'humiliant en verité, dit. Non, mon Dieu, ce n'est à moy qu'appartient telle lumiere; ie ne veux autre que vous seul, ie vous veux seruir en la croix. Et ainsi s'aneantit au dessoubs de la moindre creature. Si ceste lumiere vient de Dieu, tant plus elle s'humiliera, & tant plus elle luy sera agreable. Si du diable, il s'en retournera honteux, & n'y reuiendra plus. Quant aux visions, ou lumieres intellectuelles, ou imaginaires, elles sont aussi visibles. Et quoy qu'on ait les yeux ferrez, on ne laisse de veoir la representation, plus naïfvement, que des yeux corporels. Encore qu'on s'en voudroit destourner, si n'y peut-on mettre empeschement. On pourra cognoistre si telle lumiere vient de Dieu, par les effects d'icelle. Venant du diable, l'ame sent en soy des eleuements d'orgueil, ou vaine complaisance de soy-mesme, procedant d'amour propre; sans luy souuenir de sa yilité, ni de son neant. Elle pense soudain, sous couleur de recognoissance des graces de Dieu, estre vne petite sainte. Croyant que Dieu luy faict ceste grace, pour ses merites, & pour son travail. Et voudroit estre desia cognue, & tenuë pour vertueuse. Le
tout

tout sous ombre de bien, pensant que Dieu doit estre glorifié en telle grace. Mais elle n'apperçoit cependant, que c'est plustost pour repaistre son amour propre, qui secrettement s'attribuë ceste louange, plustost que la rendre à Dieu. Car si soudain elle referoit le tout à Dieu, se contenant en vne nudité & pauvreté interieure, n'appropriant à soy chose qui soit, ne voulant que Dieu mesme, quoy qu'elle seroit trompée, pensant que ces lumieres viennent de Dieu, le trompeur seroit trompé, & retourneroit avec sa courte honte. Mais si l'ame preste son consentement, elle sera deceuë & trompée. Il faut aussi veoir, si on ne recerche ou desirer telle lumiere. Car ce desir procede de presumption. Et souuent Dieu permet pour telle presumption, que l'ame soit trompée. Le diable voyant bien, que facilement il fera troubler, & tomber telle ame en quelque faute. Au contraire, si telle vision vient de Dieu (car il ne laisse quelquefois, de visiter ses fideles seruiteurs, par quelque grace extraordinaire) si tost que telle grace, soit lumiere, ou vision, s'apparoist, si mesme la personne est en péché mortel, ayant le cœur endurcy, il vient à se rompre sous la puissante main de Dieu, par vne entiere conuersion, comme il a fait à S. Paul, à la Magdelaine,

deleine, & tant d'autres saints. Si c'est à vne personne ia entrée en la voye de perfection, elle la rend de tant plus forte, pour s'acheminer au sommet d'icelle, par vn aneantissement de soy au dessus de toute creature. Mais en verité, avec vne sainte crainte, & vn desir fondé en vne vraye charité en Dieu. Elle voudroit que Dieu fust aimé & loué de toutes creatures, sans que iamais vn moment de temps se passast, que Dieu ne fust loué d'icelles toutes. Et mesme voudroit s'aneantir iusques au plus profond des abysmes, à fin qu'en son aneantissement Dieu soit glorifié. Elle reçoit vne charité vers son prochain, se croyant estre la moindre de toutes. Et se voudroit laisser soy-mesme, pour le bien de son prochain. Voire mesmes pour ses ennemis, tant elle est embrasée en charité. Voudroit estre incognuë de toutes creatures, quant aux graces receuës de Dieu. Mais quant à ce qu'il y a de vil en nous, elle voudroit en estre vilipendée de tous. Ce sont les effects des vrayes visitations de Dieu. La troisieme sorte de lumiere se faict au fond de l'ame, & ceste-cy est la moins dangereuse & la plus profitable, elle est incognuë à celuy qui la reçoit. Vne ame aura eu ceste lumiere long temps, non continuelle (car elle
dure

dure fort peu) sans auoir eu cognoissance
 que ce soit lumiere. Elle l'ignore : mais,
 comme j'ay dit, d'une ignorance abyssale,
 procedante d'une nudité intellectuelle. Co-
 gnoissant bien neantmoins, que c'est quel-
 que grand bien. Mesmes que ce soit vn su-
 preme degré de la vertu, où il luy semble
 qu'elle doit par pratique & trauail parue-
 nir, se fondant en la grace de Dieu. Et com-
 me elle croit, que telle lumiere est le souue-
 rain degré de la vertu, lors que ceste lumie-
 re se retire, elle trauaille continuellement,
 soit par mortification, soit par autre prati-
 que des vertus, à fin de paruenir à ce seul
 degré de perfection, qu'elle croit estre le
 centre des vertus, où elle est obligée (ce luy
 semble) de tendre, & apporter de sa part
 tous deuoirs pour y paruenir. Et lors qu'elle
 voit, que pour tous ces deuoirs, elle ne la
 peut retenir, quelquesfois l'espace d'un mo-
 ment (ie di ceste lumiere infuse, qu'elle
 croit estre le supreme degré de la vertu) elle
 s'en contriste, cōme si par sa faute elle n'ar-
 riuoit à telle perfection. Et quand cela arri-
 ue, il se faut descouurir à son confesseur (le-
 quel doit estre fort illuminé en la vie spiri-
 tuelle) luy dōnant à cognoistre clairement,
 ce qui s'est passé en sa conscience. Et lors
 suiure avec grande submission, ce que son
 con-

confesseur aura conseillé. Et croyez qu'en obeyssant, iamaïs on ne peut estre trompé. Quand mesme le confesseur, n'y cognoistroit rien, pour n'estre si fondé ou expérimenté en la vie spirituelle, & luy donneroit des aduis contraires. Elle de sa part ayant faict son deuoir, n'ayant autre moyen pour tirer esclarcissement de son doute: Dieu luy enuoyera en son temps, par quelque moyen que ce soit, la cognoissance de la verité, si auant qu'elle se submette, par vne vraye humilité, & se contienne en son neant, avec foy, & resignation en Dieu.

Que sous ombre d'humilité on ne doit suivre son propre aduis en chose douteuse, & que l'humble submission faict cheminer en assurance deuant Dieu.

CHAPITRE XXIII.

S'il aduient que l'ame ayant esté illuminée de Dieu, se trouue en doute, pour ne pouoir cognoistre la cause, de ce bien dont elle iouit: ou bien l'ayant perdu, se traueille pour le recouurer: c'est vne grande imperfection, de faire ceste recherche, ne fust que la basse estime qu'elle a de soy mesme,

me, luy faict ignorer la verité. Il est necessaire qu'elle ne tienne rien caché à son directeur, pour quelque respect que ce soit, ains qu'elle se surmôte soy mesme, par vne ignorance volōtaire, & nudité des puissances de l'ame, n'admettant à soy aucun bien, & se desappropriant de tout ce en quoy elle pourroit trouuer satisfaction en soy mesme. Par ce moyen elle surmōtera, tout ce qui la faict retarder de donner à cognoistre son interieur. Car souuent il aduient, que si on se delcouure pour en receuoir aduis, il semblera que ce sera pour estre reputée vertueuse. Ce sont tous respects procedans d'amour propre, par vne reflection à nous mesmes, laquelle il nous faut mortifier, tant que n'ayons plus memoire de nous mesmes, si ce n'est en la verité de nostre neant. Que l'ame donc espouse de Iesus-Christ embrasse la nuë simplicité, & se remettant en Dieu, donne à cognoistre ses doutes. Si le pere spirituel voit que ce soient graces de Dieu, & que telle lumiere soit incognuë, à la personne à qui Dieu l'enuoye: s'il est prudent & bien experimenté, il ne luy doit donner à cognoistre en la glossant: & ne la doit aussi laisser sans luy donner à cognoistre, à fin qu'elle n'abuse de telle grace par ignorance. Il luy doit doneques dire, que
telles

telles choses ne sont point vertus, ains lumieres enuoyées de Dieu: lesquelles on ne doit chercher, ni desirer, ains s'humilier referant le tout à Dieu. Car si le confesseur par trop de prudence, a crainte de luy donner à cognoistre, que ce sont lumieres enuoyées de Dieu, & s'en taist: la personne en demeure en grand danger & perplexité. D'une part Dieu ne laisse d'operer, voyant la nuë simplicité de ceste ame, & l'abnegation de sa propre cognoissance, & luy continuë ses graces. D'autre part l'ame fidelle ne veut en rien contreuenir à la volonté de Dieu; & n'ignore pas que Dieu l'attire, pour la mettre à vn plus haut degré de perfection. Et sçachant qu'il donne les graces à tous ceux qui s'y disposent, elle y apporte tout son possible. Mais elle traueille en vain quand elle aspire à ce, à quoy elle ne peut paruenir en ceste vie. Pourtant se contriste, luy semblât qu'elle ne faiët ce qu'elle peut: quoy qu'on ne doive iamais penser, qu'on face quelque chose de bon. Ainsi ces vaines recherches causent toutes ces imperfections, pour l'opinion erronée qu'elle a, que ces illustrations sont vraies vertus. Et quand elle s'en trouue priuée, ne les pouuât conseruer, par quelque traueil que ce soit, il luy semble impossible de paruenir à la vertu.

tu;

tu. Et si elle cognoissoit que ce seroient lumieres seulement, elle est si conformée à la volonté de Dieu, qu'elle n'admettroit jamais ces imperfections, de se contrister pour les auoir perdu. Voila le peril, quand le pere spirituel est craintif, à le luy donner à cognoistre, & comment elle s'y doit comporter. Je di, si le confesseur cognoist que ce sont vrayes illustrations venant de Dieu, luy ayant suffisamment donné à cognoistre, pour l'oster de sa doute; comme j'ay dit, il ne luy en doit faire glose, ni exaggeration: mais la tenir en humilité, l'admonestant neantmoins qu'elle n'en doit estre ingrate. Que Dieu ne les luy enuoye pour ses merites; mais de sa bonté pure. A quoy elle doit cooperer de sa part, & tendre de toutes ses forces à la vertu & perfection où Dieu l'attire. Et qu'elle se garde de rechercher mesme en la memoire telle lumiere, comme si Dieu luy auoit faict veoir en soy-mesme la verité de son neant. Car l'ame se trouuant deuant Dieu, voit clairement ce qu'elle est en verité, sans toutefois sortir hors de soy par imagination. Mais au fond de son ame ou Dieu est plus present qu'elle n'est à soy-mesme. Et lors en vn instant l'ame voit en Dieu la verité de celuy qui est tout; & en ceste verité voit la verité de son rien, se re-
 icuyf.

iouyssant de ce qu'elle n'est rien : & qu'en ce rien, celuy qui est tout est glorifié. Encore que l'ame pour estre créée à l'image de Dieu, est noble, & doüée de grande beauté, n'y ayant apres Dieu rien de plus beau que sa ressemblance : elle voit neantmoins que tout est à Dieu, & ne s'en approprie pas une seule minute quant à soy-mesme ; ains demeure nue & simple, quant à l'ame & ses puissances. Si ie pouuois trouuer des termes propres, pour me mieux expliquer, ie m'efforcerois de rendre ce discours plus clair & intelligible. Mais mon ignorance ne le permet. Et avec ce, tels secrets ne se peuuent entendre parfaictement, par ce qui se peut dire de bouche, ou de la plume. Seulement ceux & celles qui en auront quelque experience, pourront veoir en peu de mots, & aduouëront, ie m'assure, ce que ie di, m'excusant si ie n'en puis donner autre explication. Tant y a, que ceste veüe cause à l'ame vn tres grand bien. Si on pouuoit tousiours auoir deuant soy ceste lumiere, ou pour mieux dire, se trouuer en ses propres tenebres, absconsé dans ceste lumiere, qui est Dieu: si, di-je, estant en ceste vie, on pouuoit n'estre separé de ceste verité ; il seroit impossible que l'ame offenseroit Dieu actuellement (encore qu'en ce l'homme puisse

se

se de soy pecher, si long temps qu'il vit en ce bas monde.) Mais Dieu ne permet ceste continuation de lumiere interne; pour nostre plus grand bien. D'autant que telles graces sont dons gratuits, & Dieu veut que trauaillons de nostre part, par le franc arbitre; à fin que cooperant à la premiere grace, il nous donne les secondes, & le tout pour nostre plus grande gloire. Apres doncques, que ceste veüe est ostée à l'ame, ignorant que ce soit lumiere (par ce que immédiatement, elle consiste en la cognoissance de soy-mesme, le tout en Dieu) elle croit que ce soit l'effect de l'humilité. Et pour ce qu'elle sçait ne pouuoir plaire à Dieu sans humilité, trauaille sans cesse pour recouurer ce qu'elle a perdu. Et voyant que pour quelque acte d'humilité qu'elle puisse faire, elle ne sçait retomber à ce qu'elle a veu, elle se contriste, doutant qu'elle ne paruiendra iamais à ceste vertu, sans laquelle on ne peut estre agreable à Dieu. Mais lors qu'elle l'a recouuerte, ou que Dieu luy mesme, luy en donne la cognoissance; elle laisse ceste curieuse recerche, & poursuit sa pratique ordinaire aux vertus, n'ayant plus en soy-mesme souuenance de ce qu'elle a veu, si ce n'est en Dieu, auquel elle refere tout.

K

A quelle

A quelle fin nous devons chercher les vraies vertus, & comme elles doivent estre pures.

CHAPITRE XXIV.

DIEU dit par son Prophete. *Je meneray l'ame en la solitude, & la ie parleray à son cœur.* Quelle est ceste solitude, si ce n'est au desert retiré du monde? Encore que le desert que nostre Dieu dit, auquel il veut attirer sa bien-aimée, pour parler à son cœur; soit les lieux retirez du monde, comme les hermitages, & maisons de religion, où Dieu va visiter les ames, qui pour son amour ont quitté toutes les commoditez corporelles: si est-ce que le vray desert est plus spirituel. Qui est l'ame; l'interieur de laquelle est vn desert. Ce qui se faict lors, que ses puissances sont tellement reiglées, qu'il n'y a plus aucun bruiet turbulent de ses passions & affections dereiglées, & à qui l'amour propre, est du tout aneanty. Il y a lors en l'ame vn silence continuel. Et quel ce silence interieur? C'est quand l'ame n'est plus occupée à chose créée, ni hors de soy-mesme, ni en soy mesme: se servant neantmoins de toutes creatures, sans aucune operation propre.

propre. C'est vn silence interieur, pour ce que l'ame ayant surmonté toutes ses inclinations vicieuses & inferieures, n'est occupée qu'à faire la seule volonté de Dieu, l'aimer, le louer, de toutes ses facultez. C'est véritablement à ce desert, que Dieu la veut conduire, pour parler à son cœur, par ses divines inspirations. Car la trouvant seule occupée à son Dieu, il luy ouvre les thresors de ses celestes communications, & lumieres interieures. Je la meneray en vn desert. Mais quel le chemin, par lequel Dieu nous veut cōduire au desert: Sont les vertus, esquelles l'ame s'exerce continuellement. Lesquelles doiuent estre pures, soit en la pratique d'icelles, soit en la fin pourquoy nous les desirons. La fin de toutes nos œuvres, de tous nos desirs doit estre Dieu. Toutes ces vertus donc, tāt soient elles heroïques, ne sont pas la fin, puis qu'elles ne sont pas Dieu, ains le chemin pour aller à Dieu. Pour ce nous ne deuõs pas arrester à la vertu seule, ains passer plus outre. Celuy qui a proposé de faire vn loingtain voyage, ne s'arreste point aux chemins, pour beaux qu'ils soient: d'autant que ce où il pretend arriuer, est encore plus à son desir. De mesme, celuy qui aspire au ciel, pour illecques iouyr de Dieu, ne doit reposer tant soit peu, si ce n'est en Dieu.

Comme si ayant surmonté de grandes difficultez par patience, on trouue quelque repos, soit en la patience & mansuetude vers le prochain, humilité, force, temperance (car toutes ces vertus, causent vn repos en l'ame) il ne faut là subsister, ains se garder d'arrester à ce repos, qui procede seulement des vertus. Quant aux trois vertus Theologiques, qui sont, Foy, Esperance, & Charité: pour ce que les trois premieres vertus regardent Dieu, & que leur operation se termine en Dieu, il est plus difficile de cognoistre l'amour propre en ce repos. D'autant que leur operation estant terminée en Dieu, il ne peut estre qu'elle ne trouue aussi en Dieu le vray repos. Et ce repos est tres-necessaire & tres-bon. Duquel saint Augustin parlant dit, *qu'il a cerché en toutes choses, & n'a trouué le vray repos, si ce n'est en Dieu seul.* D'où on peut veoir que le repos, qui se peut trouuer en quelque creature, tant soit elle noble, ni mesme es vertus, n'est que faux repos, procedant d'amour propre. Celuy qui goust le vray repos en Dieu, cognoist bien la tromperie du repos, qui n'est pas purement en Dieu. Mais celuy qui ne l'a encore gousté, & ce que c'est de Dieu, est facilement abusé. Car ayant mortifié les passions, & cheminant en la vertu, sans
- passer

passer plus outre, il s'arreste à ce bien sans regarder sa fin, qui est Dieu, & le seul bien parfait. On pourra doncques cognoistre ceste tromperie, en ce que l'ame mettant tous ses efforts és actions internes, soit de toutes vertus, y met toute sa perfection, comme faisoit sainte Marthe, qui estoit plus soigneuse à servir nostre Seigneur corporellement, que spirituellement; oubliant la vie contemplative. Aussi nostre Seigneur luy dit, *Marthe, Marthe; tu es pleine de soucy,* & par apres, *Marie a choisi la meilleure partie.* D'où on peut cognoistre, que les travaux & œuvres de Marthe envers nostre Seigneur estoient bons, & luy estoient agreables: mais non tant que ceux de la Magdeleine. Pour ce qu'ils n'estoient si purs, estant actifs. Ces deux vies en ces deux sœurs Marthe & Magdeleine, nous representent toutes sortes d'ames, s'addonnant au service de Dieu. Car on trouve des personnes, qui mettent leur perfection seulement aux vertus actives, & ne parviennent gueres à la vie contemplative. Je di doncques, que pour parvenir à la pureté des parfaites vertus, il ne faut jamais quitter la mortification, ni la practique des vertus. Mais il faut que ces actions procedent de la volonté, sans operation active de l'intellect:

à fin que la superieure partie de l'ame, ne reçoive empeschement, pour operer les fonctions de la contemplation, & vnion avec Dieu. Dont elle demeure incapable, & ne les peut operer, si auant que ses puissances inferieures, qui sont la memoire & l'entendement, sont occupées és actions actiues, qui sont les vertus. Mais lors que la volonté produict les actions des vrayes vertus, & ensemble celles de vouloir operer au parfait amour de Dieu, encore que la volonté soit inferieure à la supreme partie de l'ame: comme n'estant que l'une de ses puissances, si est-ce que l'ame ne pouuât operer en Dieu ses fonctions, sans l'operation de la volonté, d'où procede le franc arbitre: & parainfi la volonté operant par le franc arbitre, és actions actiues de la mortification & autres vertus: & ensemble operant aux parties superieures de l'ame, auxquelles elle s'arreste comme à la fin pour lequel elle est créée, qui est de pouuoir contempler la diuine maiesté, & ne chercher autre repos qu'en ceste vnion de Dieu, laissant ses parties inferieures occupées és actions inferieures, lors il aduiendra que ce seront ensemble la vie de Marthe, & celle de Magdeleine: à sçauoir, l'actiue, & la contemplatiue: & l'une ne donnera empeschement à l'autre. C'est par

ce

ce moyen qu'on trouuera la pureté des vertus. Ceux & celles qui n'y sont encore paruenus, ne doiuent entrer en scrupule ou défiance de la grace de Dieu ; mais travailler avec humilité, & en demander la grace à Dieu. Car ce chemin est encore imparfait en elgard au plus parfait : combien qu'il semble difficile à ceux qui ne sont là arriuez.

Comment on peut cognoistre l'amour propre en la meditation.

CHAPITRE XXV.

EN l'ancien testament il est fait recit, que Iepthe se trouuant en peine en la guerre, fit vœu à Dieu, que s'il gaignoit la victoire, il luy sacrifieroit la premiere chose de sa maison, qu'il rencontreroit à son retour. En fin la victoire gaignée, retournant tout ioyeux de la guerre, ce qu'il rencontra premier, fut sa fille qui luy alloit au deuant, avec aubois, & autres instrumens de musique, accompagnée de diuerses troupes de filles, bien apprises à chanter, pour le congratuler de la victoire. Ce que voyant Iepthe, saisi de grande douleur, dict à sa fille, hélas ma fille tu m'as trompé, & toy-mesme aussi, &

suivant cela il la sacrifia. Nous devons faire le mesme. Car ce Capitaine Iepthe, est l'esprit, qui fait tousiours la guerre au monde. Et come il a le dessus de ses ennemis, qui est lors qu'il est paruenue au repos, de la presence continuelle de Dieu, par la meditation & contemplation, esquelles l'esprit s'esioiuit en Dieu: la chair d'où procede l'amour propre, tout sautelant luy va au deuant, parce qu'elle voudroit estre tousiours en ioye & liesse, quoy qu'elle soit plustost appellée de Dieu à douleurs & pleurs. Comme doncques la chair se veut mesler, parmy la ioye des victoires spirituelles, il luy faut dire, he-las tu m'as trompé, mais tu t'es trompée toy mesme. Tu m'as voulu tromper, me faisant trebuscher au peché: tu seras trompée, par la peine & trauail, que ie te donneray, car i'ay promis de te sacrifier à Dieu. Sara femme d'Abraham, ayant rencontré son fils legitime Isaac, iouïant avec Ismael fils de sa seruante, s'en indigna grandement, & dict à son matry, chassez moy ceste seruante & son fils, il ne fait pas beau veoir iouer ces deux enfans ensemble. Dieu le createur nostre vray Abraham, pere de toutes nations, a deux enfans, l'un est la chair, l'autre est l'esprit. Il aduient bien souuent, que la chair & les sens, representez par Ismael fils de la cham-

cham-

chambriere; se veullent meller parmy les ioyes spirituelles. Dont fort indignée la diuine prouidence, dict au Chrestien, & spécialement à la personne deuote, & retirée de tous plaisirs, prouenans des creatures. Chassez arriere ceste chair, par veilles, ieunes & mortifications. Car il ne fait pas beau veoir; que ta chair se iouie ou face treues avec ton esprit. Voire il est impossible, si tu me veulx seruir, & partticiper à mes graces & prerogatiues, que ton ame iouisse des fruiets de la diuine contemplation, si tu ne separe les sens corporels, d'avec les spirituels. Mais d'autant que ie n'ay deliberé de traicter icy de tous les empeschemens, qui suruiennent, soit en la meditation, soit en la contemplation, ains seulement des plus notables, comme est l'amour propre; ie ne veux aussi icy toucher la methode de mediter ou contempler. Quant aux moindres imperfections, elles n'ont icy lieu, d'autant qu'à vne vie ou degré de perfection si releuée, les imperfections sont (& faut ainsi dire) perfections à l'egard d'un degré moindre & inferieure. Ainsi il faut traicter des imperfections suiuant l'ordte & le degré, auquel l'ame est arriuée. Quoy doncques, que la meditation soit vne action parfaicte, & la contemplation plus parfaicte, & mes-

me

me celeste, si est-ce qu'il y a en icelles diuers degrez. Suiuant ceux ou de la grace que nous pouuons acquerir, cooperant aux graces de Dieu par le francq arbitre, dont on acquiert là sus au ciel la gloire bien-heureuse: ou bien ceux de la grace gratuite, que Dieu donne à qui sa sapience & bonté infinie a determiné de toute eternité, d'esleuer à tel degré de grace, telle ou telle ame. De mesme est-il au ciel, tous contemplent illec, & iouissent continuellement de la claire vision de Dieu. Mais tous n'ont en ceste contemplation & vision, si claire cognoissance de la grandeur de Dieu, & tous ne iouissent si parfaictement de la diuinité, & des secrets de la sapience increée. Sont neantmoins tous contens & rassasiez. Je veux doncques monstrier, qu'en ceste vie nous ne pouuons iouir si parfaictement de la contemplation diuine, pour les empeschemens que nous donne le corps, & les inclinations mauuaises & imparfaictes, procedantes de la nature corrompue. Quant est de la meditation; pour ce que c'est vne action plus basse, que la contemplation, l'amour propre s'y trouue en diuerses sortes. La meditation ou oraison mentale, qui se faict en l'interieur sans prononciation de parolles, procede de la volonté, puis se termine en l'entendement

par

par les discours, soit sur la vie & passion de Iesus, ou de la Vierge Marie, ou des Saints, ou des mysteres de la foy Catholique, ou sur quelque science née de la sainte escripture. Car proprement mediter, c'est discourir en l'entendement des choses saintes. Se servant de l'imagination, quand on se veut représenter les personnes & les lieux, cōme de la passion & de tous les mysteres, que nous voulons mediter. En quoy l'affection s'enflambe en l'amour de Dieu, & des vertus. Operant des actes de la volonté, pour tirer les affections, suivant les matieres, sur lesquelles l'entendement aura discouru, ou bien sur quoy Dieu aura operé par sa grace en la meditation. Faisant tousiours reflection sur nous mesmes, pour nous aneantir par la mortification, & ne cesser de nous mortifier, tant que pourrōs trouver en nous quelque imperfection, tant petite qu'elle soit, dont nous auons cognoissance par la meditation. C'est en cecy que consiste le fruit de la vraye meditatio. Et en quoy aussi se trouue l'amour propre, & où la chair se veut esioiir avec l'esprit, comme i'ay dict au commencement de ce chapitre. C'est vne chose tresdelectable, lors que la personne a ceste grace naturelle, de bien discourir en l'entendement. Il aduient pour ceste

grande

grande delectation, qu'elle s'y trouue tombée en raiſſement. Et tout cecy peut eſtre avec amour propre. Sans toutefois reietter la vraye & pure meditation, qui eſt de meſme auſſi avec raiſſement, mais les effets en ſont diuers. Lors que l'ame s'arreſte ſeulement à bien diſcourir, recherchant des curioſitez & hauts concepts, elle s'eſleue pluſtoſt en orgueil, qu'à ſe confondre ſoy meſme. Et tout cecy prouient de l'amour propre, y trouuant neantmoins l'eſprit vn grand contentement. C'eſt curioſité de vouloir cognoiſtre les choſes hautes, & profiler les ſecrets de la diuinité. On trouue que S. Auguſtin ſe promenant quelque iour au loing de la mer, meditoit ſerieuſement ſur le myſtere de la Sainte Trinite, ruminant en ſon eſprit des moyens pour comprendre ce haut myſtere, auquel la capacité de l'homme ne peut attein dre. Sur ceſte entrefaite ſ'apparut à luy vn petit enfant, qui uiſoit l'eau de la mer avec vne culier, là mettant dedans vne petite foſſe, S. Auguſtin le voyant, luy demanda, petit enfant que fai ctes vous? Je veux (ce diſt-il) mettre toute l'eau de ceſte mer dedans ceſte petite foſſe. Sur ce S. Auguſtin diſt, il eſt impoſſible, que l'eau de la mer puiſſe entrer dans ceſte petite foſſe. Lors l'enfant qui eſtoit le petit Ieſus, ſ'apparoiffant

paroiſſant en telle viſion, luy replicqua, il eſt plus poſſible de mettre toute l'eau de ceſte grande mer dans la ſoſſelette, qu'il n'eſt poſſible que puiſſiez comprendre ce que vous recherchez. Ce dict, il ſ'eſuanouyt, & ſainct Auguſtin rentrant en ſoy meſme, cognut lors par ceſt enſeignement, que ne deuons chercher choſes curieuſes, ſurpaſſantes noſtre capacite. Pour ce que ceſte curioſite procede de noſtre amour propre, encore que ce ſoit vers choſes treſſainctes, & de Dieu meſme. Souuent par ce moyen les perſonnes reçoient des fauſſes illuſions. Dieu le permettant ainſi. Et le diable voyant noſtre inclination, ſ'en ſert pour nous tenter & tromper par ſes illuſions, ſe transfigurant en Ange de lumiere. Puis la nature ſe voulant ioindre avec l'eſprit, & ſeſiourner en ſes diſcours, ſ'y fourre ſans aucune pratique de la mortification. Et ſ'il aduient quelque petite occaſion, d'endurer quelque affliction, ou perſecution des creatures, venant de la part de Dieu, on ne la ſçait ſupporter. Voila les fruicts de telle meditation, lors que l'eſprit ſ'arreſte ſeulement aux diſcours, ſans en rechercher les fruicts pour ſoy meſme, qui ſont les actions vertueuſes, & aneantiſſement de ſoy meſme. Il ſe trouue encore d'autre amour propre, lors que en la meditation

tation on reçoit quelque tendreur. Peut estre procedante de nature : quelque fois venant de la grace de Dieu ; comme sont les larmes & autres tendretéz, & lemonces interieures, esquelles la nature se veut tousiours ioindre avec l'esprit, pour se repaistre sensuelement des graces diuines, fuyant le trauail de la mortification. Mais il luy faut dire, ce que Iepthe dict à sa fille, qui nous represente l'ame fidelle à Iesus Christ. Helas, ma fille, vous m'avez trompé : & toy mesme es trompée, car ie te sacrifiray au Dieu viuant, par la continuelle mortification de tes desirs desordonnez & amour propre, tant es choses spirituelles que corporelles. Car l'amour propre es choses spirituelles, est plus dangereuse, qu'es corporelles : parce qu'il est moins cognu, & est subiect à vaine gloire. Le remede doncques contre l'amour propre en la meditation, est que le fondement de nostre oraison, soit pour trois causes. La premiere, affin de cognoistre Dieu. La deuxiesme, affin de se cognoistre soy mesme. La troisieme, affin de pouoir aimer Dieu de toute nostre puissance, le chercher avec pureté d'intention. Ne faire oraison pour trouuer le goust & deuotion sensible : mais pour constamment se surmonter soy mesme, & par la cognissance de
Ioy.

soymesme, venir à la cognoissance de Dieu: Non par curiosité de concept; mais en vnité de volonté avec celle de Dieu, nous rendans conformes à sa sainte volonté. Et que tous les discours de la meditation sur quelque matiere que ce soit, ne soient à autre fin, que pour cognoistre nostre vilité, & nous tousiours aneantir, & recognoistre que tout bien vient de Dieu seul. En ceste cognoissance nostre volonté s'enflambe en son l'amour, pour ne chercher que la gloire en toutes creatures. Mais si Dieu nous esleue, & nous donne luy mesme nostre nourriture spirituelle, comme il faict quelques fois aux humbles, & à ceux qui en simplicité coulombine, & en pure verité le cherchent: si ayant commencé nostre meditation Dieu retire nostre ame de la matiere premeditée, en quoy nous discourons, nous presentant quelque autre subiet, comme quelque sentence de la sainte escripture, ou soit que ce soit chose que Dieu voit nous estre necessaire, il ne le faut reietter: ains libremēt & sans scrupule laisser nostre premier subiect, & accepter celuy que Dieu nous inspire. Car on fera plus de fruct en telle meditation, que on ne feroit en vn an, en ce qui vient de nostre seul trauail. Et nous en deuons rendre graces à Dieu, & esconter le S. Esprit,

pour

pout entendant ce qu'il demande de nous,
cooperer à ses graces.

*Quel est l'amour propre qui se trouue en la
contemplation.*

CHAPITRE XXVI.

L'AME qui n'aura experimenté, ni en-
core passé plusieurs degrez de la vie spi-
rituelle, trouuera (peut estre) ridicule, qu'en
vne action si excellente & releuée que la
contemplation, s'y trouue l'amour propre.
La contemplation quant à soy mesme, pout
ce que c'est vne action, qui n'a aucune ope-
ration actiue, procedante des puissances in-
ferieures de l'ame, mais qui se commence,
se termine & finit en Dieu (Dieu estant son
seul obiet) pour ce, qu'à soy mesme, elle est
trespure & du tout celeste. Mais les accidés
qui y suruiennent, procedans de nature, soit
apres, ou bien à l'instant mesme, que l'esprit
est esueillé de ce celeste repos, ne sont à
exempts de ceste imperfection. Je di quant
à l'esprit qui anime l'ame raisonnable, sen-
situe & vegetatiue. Car quant à la supreme
partie de l'ame, qui est la vraye image de la
saincte Trinité, ceste seule partie qui domi-

ne

ne pardessus toutes les parties inferieures, l'entendement, la memoire & la volonte, qui autrement se peut nommer le fond de l'ame, qui agit tousiours & qui seul opere en Dieu, non point par quelque action active, ny passive. Mais par vne disposition deiforme à la disposition de Dieu, à laquelle Dieu la trouuant disposée, comme à recevoir ceste impression de la grace surnaturelle, à cest instant demeure transportée pardessus soy-mesme, & absorbée du tout en vne claire lumiere de la diuinité. Iouissant de sa douceur ineffable, contemple ceste beauté increée, qui la faiet deuenir bruslante & enflambée d'amour comme vn Seraphin. Et lors les puissances inferieures demeurent fixes, sans operer aucune action active, procedant de leurs fonctions naturelles. Cecy se fait, par ce que ce grand tout qui est Dieu, seul domine en toutes les facultez de ceste ame & de ses puissances, voire du corps. Cecy ne se peut fort bien donner à entendre, si ce n'est à ceux qui en font l'espreuve. Je me serviray d'une similitude. Lors que le soleil reluit, sans aucun corps ou empeschement opposé à ses rayons, toutes lumieres deuiennent obscures en celle du soleil: en sorte que l'on n'apperoit, ni lune, ni estoilles, ni autres lumieres estans sur la

L

terre.

terre. Non que tous ces corps lumineux ayent perdu leur naturelle lumiere: mais par ce que le soleil qui eslargit sa lumiere par toute la terre, a sa lueur si grande qu'il obfusque la lumiere des autres corps; quoy qu'ils ne laissent cependant, de faire leurs operations selon leur nature creée. De mesme est il lors que l'ame sans aucun entredeux, enuifaisge face à face, la beauté du vray Soleil de iustice, demeurant absorbée en la iouissance de ce grand tout. Car alors les puissances inferieures, quoy qu'elles soiēt nobles en leur nature, comme l'entendement, par ce qu'il comprend ce que c'est de Dieu: la memoire, par ce que telle en est la viuacité, qu'elle encloist en soy en vn moment le ciel, & la terre: & la volonté, par ce qu'elle peut tout ce qu'elle veut (vrayement puissances tres-nobles, puisque quant à leur substance & nature, elles sont cōme lumieres, par dessus toutes autres creatures) estant ceste partie plus superieure, occupée à contempler les perfections diuines, de ceste lumiere increée qui est Dieu, qui reuerbere de sa lueur par dessus toutes lesdites puissances de l'ame: elles demeurent à cest instant, comme du tout aneanties. Non qu'elles perdent leur operation naturelle quant à leur estre. Mais elles demeurent fixes & arrestées, par vn consente-

sentement vniuersel : laissant seul operer en l'ame, celuy qui est tout. Desappropriant à soy, tout ce qui n'est sien, pour seruir du tout à son tout. Cecy se faict seulement, lors que l'extase ensuit la contemplation. Si on pouuoit veoir l'ame en cest estat, on ne veiroit que Dieu reluire en toutes ses facultez. Où toute sa beauré naturelle n'apparoit, en la presence de ceste grande lumiere de la diuinité, y estant toute absconsée, tellement qu'elle est comme desliée. Et en ceste contemplation, l'ame en rapporte tres-grand fruct spirituel. Et pour ce qu'elle est pure, il s'y trouue peu souuent de l'amour propre. Mais toutefois, pour ce que nous sommes encore en ceste nature corrompue, il faut estre tousiours sur ses gardes, comme i'ay dict, pour les accidens qui y suruiennent. Car l'ame ne peut tousiours estre en cest estat, & retournant de ceste conuersation avec Dieu, entre les creatures, tout luy semble si vil & abiect au monde, & luy apportent tant de degoustement, que la veüe de toutes ces choses créées luy est vn continuel martyre, pour ce pur amour qu'elle a acquis en ces thresors celestes. Mais bien cōuient d'estre, comme i'ay encore dit, sur ses gardes, afin que l'amour propre ne vienne à corrompre ce pur amour. Ce qui

aduindroit, si contre l'ordonnance de Dieu, elle desiroit retourner à ceste vnion & contemplation, sans y estre attirée de Dieu. L'ame doit operer tousiours conformemēt à la volonté de son tout, aussi bien estant hors de ceste vnion, comme y estant absorbée. Et si Dieu l'attire pour quelque temps à la vie plus actiue, il faut que son amour propre soit tellement ancanti, qu'elle ne sente en soy aucun desir, de vouloir ou non vouloir, si non seulement ce que Dieu veut en elle, & en toutes creatures, tant au ciel qu'en la terre. Il y a diuers degrez de contemplation plus bas, esquels l'ame demeure arrestée sans aucun discours, & ceste maniere de contempler Dieu, ensuit souuent le discours. Pour exemple, en discourant mentalement sur quelque matiere, soit sur l'humanité de nostre Seigneur Iesus-Christ, ou sur quelque consideration de la diuinité, on s'emflambe tellement en l'amour de Dieu, qu'on en tōbe en admiration. Et lors le discours finit, & la personne demeure fixe, en la contēplation des choses celestes. Mais d'autant que ceste contemplation, quoy que tresbonne & loüable, arrive immediatement apres le discours, n'y estant aussi l'ame supernaturellement esleuée de Dieu, quoy que Dieu y opere aussi (mais non en
celle

telle transformation, de la creature au Createur: ains seulement par vne simple conuersion de toutes ses facultez en Dieu, qui neantmoins est aussi tres-aggreable à Dieu) ceste contemplation est plus subiecte à vn amour propre. Lequel toutesfois peult estre euité, se tenant tousiours en humilité. Donc à fin que nostre esprit, puisse librement vacquer, à la contemplation des choses celestes, sans aucun doubte des empeschemens de l'amour propre, il fault remarquer quel est l'amour propre en ceste action. Ne parlant icy des autres empeschemens, comme sont les images & autres semblables, dont sera traicté en autre lieu. Mais seulement de l'amour propre, qui suruient ayant desja exercé la contemplation, laquelle comme dict est, ensuit souuent la meditation. Comme lors que l'ame medite ou considere profondement quelque matiere, en laquelle son affection s'enflambe aux desirs de pouoir mettre en effect en son temps, le fruit qu'elle tire de ces considerations ou meditations. Puis s'esleuant plus haut, l'affection s'arreste sur le premier obiect de sa meditation, qui est Dieu. Où elle demeure transportée par dessus toutes ces actions actiues, aussi long-temps, que Dieu opere en elle. Quelque fois ceste transportation,

se fait, sitost qu'elle aura proposé en son esprit le premier subiect de sa meditation. Suiuant ce que Dieu opere sans aucun discours, Seulement par vn seul desir enflammé, voyant son obiect, qui est Dieu, celuy qu'elle aime, elle demeure à cest instant fixe en la contemplation, en laquelle elle iouit d'un contentement indicible. Voions maintenant, comment subtilement se glisse l'amour propre, en ceste simple contemplation. Les sentimens naturels, ne sont point priuez de leurs fonctions, tellement que la nature, qui ne desire que le repos propre, prend vne complaisance en soy. mesme du repos, que les sentimens ressentent, par participation du repos, que l'ame trouue en Dieu. En sorte qu'elle approprie à sa nature, ce qui n'est sien. Non que ie veuille contredire, ce que dit le Prophete royal, Psalme 83. *Mon cœur & mon corps sont esioüis en Dieu vivant.* Car ceste ioye de la chair avec l'esprit, dont parle Dauid, n'est pas avec propriété, mais en Dieu purement. Quels sont les effects, par lesquels on peult cognoistre ce faux repos de la nature, d'avec le vray repos? C'est que s'il aduient, qu'on retire l'ame de ce repos, pour vacquer à quelque autre exercice, pour la charité du prochain: si c'est en religion, l'obedience
le

le permettant, elle en sort avec chagrin, se trouue inquiète, faict des petits murmures en soy mesme, pour ce qu'on la retire de ce repos, sous couleur de bien. Luy semble qu'elle est plus parfaite en ceste action, que la quittant pour faire l'obedience, ou la charité au prochain. Tellement qu'elle faict estime de ses actions. Ce qui est contre le vray anéantissement & humilité. Et telle personne, vient secrettement à mespriser les autres, qui ne seront si adonnez à ce repos de contemplation. Vne infinité de secrettes amours propres que l'ame experimentera, si elle regarde de prez. Mais au contraire, l'ame qui aura surmonté l'amour propre, si mesme elle estoit en extase, où son ame iouyssoit à son aise des diuins embrassements de son celeste espoux, & qu'on la vienne esuciller, ou pour l'obedience, ou pour la charité du prochain, sort avec vn grand contentement, & desir enflambé de pouoir mettre en effect les fruiçts, qu'elle a apprins en ceste diuine escholle de Iesus-Christ. Car plus elle aime Dieu, plus elle aime son prochain, quittant Dieu pour Dieu, ne perdant pour ce la présence de son bien-aimé. Et telle ame tient grand cas de toutes personnes, comme estans toutes créées à l'image de Dieu. Si elle voit les autres n'estre

paruenus à ce degré, ne les méprise: mais considère la fragilité. Et fait peu de cas de soy mesme, attribuât le tout à la bonté de Dieu, & à luy seul en rend la gloire. C'est en ceste sorte, qu'il faut cheminer en vérité deuant Dieu, si nous voulons luy estre agreables.

Comment on peut aimer toutes creatures raisonnables d'un pur amour.

CHAPITRE XXVII.

COMME il n'y a rien qui plus captiue nostre affection, que ce qui est present à nostre veüe: ainsi il n'y a rien, qui nous donne plus d'empeschemens de paruenir au pur amour de Dieu, que l'object des creatures. Nous ne voyons pas Dieu visiblement, quoy que la veüe de l'ame soit plus viue, quand elle est fichée en Dieu qui est esprit, que non pas la veüe corporelle. Mais d'autant que nos inclinations attirent tousiours l'esprit à la nature, au moyen dequoy nous venons à aimer les creatures, de là vient que l'ame deuiet auetgle aux choses celestes. Combien que Dieu commande, d'aimer son prochain comme soy-mesme. Voyons doncques, comment on peut aimer toutes creatures en Dieu,

Dieu, & d'un pur amour. Toutes nos œuvres, toutes les vertus que nous pouvons acquérir, en fin tout ce que nous pouvons opérer de bon, la consommation de tout, c'est la charité de Dieu & du prochain. Et le seul objet de l'amour, que portons à notre prochain, ce doit estre Dieu. Or, ce qu'il y a en la creature raisonnable, qui nous doit esmouvoir à l'aimer, ce doit estre, ce qui est en elle à la semblance de Dieu, qui est l'ame créée à son image. Ne suivant en rien la nature. Par ce que si nous aimons la creature, pour quelque grace naturelle, nostre amour sera autant variable; quel objet sera inconstant. Si la personne vient à perdre le don de nature, qui la rend aimable, soit quelque vertu; de laquelle elle viendra à décliner, incontinent nous voila esbranlez; pensant trouver en la creature, ce qui ne peut estre trouvé qu'en Dieu seul, qui tousiours est bon. Il faut doncques regarder en la creature, des yeux de l'ame, l'image du Createur. Et pour ce que Dieu l'aime, comme estant son image; aussi nous l'aimions fidelement pour ce seul objet, qu'elle est créée à l'image de Dieu, & par ce que Dieu l'aime. Ainsi voyant la dignité, nous ne pouvons faire autrement que de l'aimer. Il nous faut doncques tous-
jours

jours regarder nostre prochain du costé de l'ame, car elle est ange ; & non pas du costé de la nature, car elle est homme. Et partant fragile, parlant en general, tant pour la fême que l'homme. Car en la sainte Esriture, & deuât Dieu, il n'y a aucune difference quant à l'ame, soit de l'homme ou de la femme. Il faut donc laisser tout ce qui vient de nature, & toute attente, tant soit elle bonne, procedante de nature. Et seulement ficher les yeux de nostre ame, à nostre premier object, qui est Dieu; en qui nous deuons aimer toutes choses. Et puis de la dependance de Dieu conformant nostre volonté à la sienne, & vnissant nostre amour à la siene, aimer fidellement tout ce que Dieu aime. Et que cest amour du prochain se termine & finisse en Dieu. Je di finisse, non que la vraye charité prenne fin. Mais finisse, il faut entendre, quant au second object qui est la creature; pour rentrer à son premier object qui est Dieu : & ainsi que ces deux amours soient tellement vnis, qu'ils ne soient qu'un en Dieu. Il n'y a amour sensuel tant soit-il passionné, que ses forces puissent esgaler à ce pur amour. Pour ce qu'aimer toutes les ames, comme estans l'image de Dieu, & ne regarder que Dieu en elle, cest amour est si fort, que l'ame donneroit mille fois sa vie, pour

pour l'amour de son prochain. Tant plus l'ame aime son prochain de ce pur amour, tant plus elle reçoit en soy même, vne alienatiō de tout ce qu'il y a au monde, qui ne se peut aimer en Dieu, c'est à dire, de tout ce qui est vanité. A vne ame qui aime Dieu & son prochain, de ce pur & diuin amour; la terre est vn paradis. Pour ce que si elle trouue des infirmités en la creature à supporter, elle n'en reçoit aucune peine. D'autant qu'elle voit cecy proceder de la nature, en laquelle elle ne s'arreste en rien; mais seulement à l'esprit, & à la beauté de l'ame.

De l'humilité.

CHAPITRE XXVIII.

HUMILITE' est, de l'aduis de saint Augustin descritte en ceste maniere par quelques Theologiens, pour le regard de la propre condition, & du vray createur. Vne volontaire inclination de l'ame, en ce qu'elle a de plus bas, pour estre accommodée & rangée à son Createur. S. Thomas nous declare l'essence del'humilité, en ceste sorte. *L'humilité, dict-il, consiste essentiellement en l'appetit & desir, au moyen de quoy nous ve-*

nons

jours regarder nostre prochain du costé de l'ame, car elle est ange : & non pas du costé de la nature, car elle est homme. Et partant fragile, parlant en general, tant pour la fême que l'homme. Car en la sainte Escriture, & deuant Dieu, il n'y a aucune difference quant à l'ame, soit de l'homme ou de la femme. Il faut donc laisser tout ce qui vient de nature, & toute attente, tant soit elle bonne, procedante de nature. Et seulement ficher les yeux de nostre ame, à nostre premier object, qui est Dieu; en qui nous deuous aimer toutes choses. Et puis de la dependance de Dieu conformant nostre volonté à la sienne, & vnissant nostre amour à la siene, aimer fidellement tout ce que Dieu aime. Et que cest amour du prochain se termine & finisse en Dieu. Je di finisse, non que la vraye charité prenne fin. Mais finisse, il faut entendre, quant au second object qui est la creature; pour rentrer à son premier object qui est Dieu : & ainsi que ces deux amours soient tellement vnis, qu'ils ne soient qu'un en Dieu. Il n'y a amour sensuel tant soit-il passionné, que ses forces puissent esgaler à ce pur amour. Pour ce qu'aimer toutes les ames, comme estans l'image de Dieu, & ne regarder que Dieu en elle, cest amour est si fort, que l'ame donneroit mille fois sa vie,
pour

pour l'amour de son prochain. Tant plus l'ame aime son prochain de ce pur amour, tant plus elle reçoit en soy même, vne alienatiõ de tout ce qu'il y a au monde, qui ne se peut aimer en Dieu, c'est à dire, de tout ce qui est vanité. A vne ame qui aime Dieu & son prochain, de ce pur & diuin amour; la terre est vn paradis. Pour ce que si elle trouue des infirmitéz en la creature à supporter, elle n'en reçoit aucune peine. D'autant qu'elle voit cecy proceder de la nature, en laquelle elle ne s'arreste en rien; mais seulement à l'esprit, & à la beauté de l'ame.

De l'humilité.

CHAPITRE XXVIII.

HUMILITE' est, de l'aduis de saint Augustin descritte en ceste maniere par quelques Theologiens, pour le regard de la propre condition, & du vray createur. Vne volontaire inclination de l'ame, en ce qu'elle a de plus bas, pour estre accommo-
dée & rangée à son Createur. S. Thomas nous declare l'essence de l'humilité, en ceste sorte. *L'humilité, dict-il, consiste essentiellement en l'appetit & desir, au moyen de quoy nous ve-*
nous

nous à reprimer l'effort & vehemence de nostre entendement, de craindre qu'il ne s'eschape en la conuoitise des choses grandes : ains consiste s'arri-
gle & mesure en la cognoissance, affin que per-
sonne ne vienne à plus penser de soy qu'il ne faut
& doit. La racine & commencement de l'un &
l'autre, se nomme reuerence que nous portons à
Dieu. Or de la disposition interieure d'humilité
sourdent & viennent en vne quelques certains
signes exterieurs, qui se remarquent és parolles &
actions & és gestes, pour l'usage desquels, ce qui
couue interieurement, se vient à esclorre & pa-
roistre au iour, comme il est de costume és autres
vertus. Dont nous deuons apprendre en
premier lieu, que la plus propre action d'hu-
milité, est l'obeissance & reuerence à l'en-
droict de la toute puissance de Dieu. L'hu-
milité est le fondement & la garde de tou-
tes les vertus. Laquelle nostre Seigneur Ie-
sus, qui en est l'essence & miroir, a specia-
lement exalté, pour surmonter l'orgueil, du
diable. Et comme d'un tresprecieux gage.
Il dit, *Apprenez de moy, que ie suis doux & hum-
ble de cœur.* L'apostre l'appelle vertu de Dieu,
disant, ie me glorifieray de bon cœur en mes
infirmitez, à fin que la vertu de Dieu de-
meure en moy. Doncques la vertu d'humili-
té essentiellement, tient son siege au fond
de l'ame. Ses branches paroissent és trois,
puis-

puissances d'icelle. Par l'entendement, elle est illuminée, d'où elle cognoit la pure vérité de son néant. Par la mémoire, elle ne perd iamais le desir de retourner à son néant, sans adhesion à chose créée, si ce n'est en Dieu. Par la volonté, d'un courage magnanime elle embrasse ioyeusement, tout ce qui luy survient pour l'aneantir, soit de la part de Dieu, soit de la part des hommes. Or ceste humilité se faict cognoistre par les œuvres, és actions interieures & exterieures. Es actions exterieures, lors que la personne cherche en toutes choses, soit au manger, accoustrer, conuerser, parler, bref, en tous ses comportemens, le plus vil & contemprible, pour en ce estre mesprisée & tenu pour un néant. Et ce non pour apparoitre humble : mais pour estre tenu en vérité ce que nous sommes. Le second acte d'humilité, est que nous receuions d'un bon cœur & ioyeusement, toutes les iniures, mesdisances, calomnies; bref, tous les tourmens qui nous peuvent arriuer des creatures. Et au mesme instant, leur monstrent toute amitié & recognoissance de leurs iniures. N'attribuant rien à la creature, mais à la bonté de Dieu, qui le permet ainsi, pour nous faire cognoistre la vérité de ce que nous sommes. Quant aux actions interieures, c'est un

acte

acte interieur, lors que la personne reçoit volontiers tout ce que Dieu luy enuoye. Soit tristesse, tétation, délaissement de tous sentimens interieurs, desolation, toutes sortes d'afflictions internes. Louant Dieu de tout, le remerciant, se cognoissant en verité auoir meritè tel délaissement, & que nous ne sommes dignes de receuoir, soit de la part de Dieu, soit de la part des creatures quelque bien : mais tout mespris, vitupere, & délaissement de soy, comme estant vn rien. Le second acte de ceste humilité interieure, est que l'ame s'estime indigne de receuoir de Dieu quelque consolation interieure, grace, illumination, ou autre don spirituel; & si Dieu luy faict telle grace, l'ame s'aneantit de tant plus, se recognoissant indigne de tel benefice. Le troisieme est, quand Dieu donne à la personne quelque grace interieure, soit de vertu, illustration, consolation, & autres dons supernaturels; elle les tient neantmoins cachés aux yeux des creatures, & ne se descouure, si ce n'est à celuy qui gouerne son ame. Auquel la mesme humilité permet, qu'on ne luy cache rien, à fin de receuoir aduis, comment on se doit comporter en telles graces. Et si le confesseur vse de quelque rigueur, pour nous humilier, on la doit accepter de bon cœur.

cœur. Nostre Dame nous a bien montré cest exemple d'humilité, lors que le fils de Dieu auoit prins chair humaine, dans son ventre virginal, lors qu'elle voyoit son cher espoux Ioseph tout contristé, la voyant enchainée, & n'en sçachant le mystere. L'humilité de la Vierge; ne pouuoit permettre de luy donner à cognoistre, iusques à ce quel' Ange luy reuelast la pureté de la Vierge, & qu'elle auoit conçu par l'operation du saint Esprit, sans preiudice de sa virginité. Le quatriesme acte est, qu'estant doié de toutes graces spirituelles, qui se peuuent departir à creature, la personne veut & desire, mesme se resiouit d'estre estimée & tenue pour fort imparfaicte, & grãde pecheresse, & estre tenue des hommes pour telle. Ne soit que Dieu l'attire à quelque autre fin, où il est necessaire pour la gloire de Dieu, que nostre reputation serue de lumiere aux autres. Mais en cecy il faut bien cognoistre la volonté de Dieu. Par ce que sa bonté faict tousiours cognoistre la verité de nostre innocence, lors qu'il le voit expedient. Le cinquiesme, est qu'en tout le bien que nous pouuons faire soit interieur ou exterieur, nous ayons vn tel aneantissement, que nous croyons en verité, que tout ce que faisons, n'est d'aucun merite deuant Dieu. En ce
s'humili-

s'humiliant du profond de nostre cœur ; le priant ardamment, qu'il luy plaise par sa bonté, accepter ce peu que nous luy offrons tant imparfaict. Mais en fin, quand nous aurions donné à cognoistre tous les actes d'humilité, & tout ce qui s'en peut dire, ce ne sera encore la vraye humilité. Car ceste vraye humilité est cachée au fond de l'ame, & ne se peut prononcer de bouche. Heureuse humilité ; car celuy qui la possède est le sanctuaire de Dieu, & le tabernacle du saint Esprit. C'est dans ce cœur humble que Dieu prend son plaisir, & que du plus haut du ciel il le regarde, pour luy eslargir les thresors celestes de ses saintes graces.

De la Foy nueë.

CHAPITRE XXIX.

LA Foy est la premiere des vertus theologales, lesquelles regardent Dieu. Et le propre office de la Foy, est d'illuminer l'entendement, & l'esleuer à la ferme croyance, de tout ce que Dieu nous reuele par le moyen de son Eglise. Encor que ce soit chose difficile, & surpassant la raison naturelle.

relle. La Foy s'appuye sur la verité infallible. Car tout ce que la Foy nous propose, ça esté Dieu qui la reuelé, & Dieu est la melme verité. Tellement qu'estant impossible, que ce que Dieu dict soit faux, reste que quant la Foy nous propose quelque chose cōtraire à la raison, force est de se resoudre, & dire que la raison humaine est foible, & se peut aisément tromper, mais Dieu ne se peut tromper. Partant reste aussi que la Foy consiste à croire, tout ce que l'Eglise nous enseigne; comme estāt l'oracle de Dieu. Sans en vouloir auoir aucun tesmoignage, ou miracle, ou reuelation particuliere. A ce propos frere Gille de l'ordre de S. François, comme nostre Seigneur luy eust faict ceste grace, de se monstrier à luy en vision, en forme de petit enfant au saint Sacrement de l'autel: quoy que ce bon saint aimast Dieu ardamment, si est-ce qu'il se contristoit, disant de soy, frere Gille n'a plus de Foy, frere Gille n'a plus de Foy. Ainsi se complaindoit-il. Je ne di pas que ceux à qui Dieu donne des vrayes visions, soient priuez du merite de la Foy. Car cela sont graces de Dieu. Mais qu'il ne les faut desirer, ains croire d'une viue Foy, sans nulle assurance visible. Par ce que la Foy consiste à croire ce que nous ne voyons. Or si nous voyons la verité, com-

M

me

me de veoir visiblement l'humanité du Fils de Dieu au Sainct Sacrement de l'Eucharistie, laquelle est cachée sous les especes de pain & de vin, ce ne seroit plus vne vraie Foy, & ainsi des autres mysteres. Lors que nous serons au ciel, iouyssans de la vision de Dieu, il n'y aura plus de Foy : par ce que nous verrons clairement la verité, de tout ce que la Foy nous faict croire, estans en ceste chair mortelle. Doneques il nous faut croire, ce que par nostre ignorance nous ne pouuons comprendre, & ce que ne pouuons veoir des yeux corporels. Quant à la Foy viue, elle ne consiste pas seulement à croire tout ce que dessus. Mais encore à croire avec grand amour, tout ce qu'il nous aduient. Que Dieu nous voit continuellement, qu'il nous regarde, par vn loing particulier, & ne cesse de nous vouloir du bien, & qu'il ne tombe pas vn cheueu de nostre teste, que Dieu ne l'ait preueu & predestiné de toute eternité. Si vne ame auoit vrayement ceste Foy viue, elle seroit heureuse dès ceste vie, par ce qu'il n'y auroit affliction, ni perte de biens, ou de santé, ou d'amis, ou chose qu'il luy pourroit arriuer, qui la peust esbranler. Pour ce qu'à tout moment elle verroit par ceste Foy viue, que Dieu est present, qu'il ordonne tout par sa puissance

L'AMOUR PROPRE. LIV. I. 179
puissance diuine, à sa plus grande gloire, &
pour le bien de ses creatures : car il ne veut
la mort des pecheurs, ains qu'ils se conuer-
tissent & qu'ils vivent.

De l'Esperance.

CHAPITRE XXX.

L'ESPERANCE est la seconde vertu
Theologale, laquelle regarde Dieu.
Ainsi que nous croyons en Dieu par la Foy,
nous esperons en Dieu par l'Esperance. Et
d'autant qu'il n'y a vice plus detestable que
le desespoit : aussi la vertu contraire, qui est
l'Esperance, est tres-aggreable à Dieu. C'est
vne vertu diuine, procedante de la Foy.
Nous esperons en Dieu, par ce que nous
croyons qu'il est bon, & misericordieux.
Or l'Esperance consiste en deux choses, ou
de la vie eternelle, ou de quelque necessité
qui nous presse en ceste vie, soit corporelle
ou spirituelle. Quant aux necessitez corpo-
relles, qui est celuy qui ne doit auoir vne
ferme Esperance en Dieu ? Puis qu'il n'y a
si petite creature, iusques à vne petite four-
mis, que la prouidence diuine ne pouruoye
à sa necessité, & qu'il n'en ait soing parti-
culier.

culier. Ne seroit point vne confusion à la creature raisonnable : lors que se voyant en quelque necessité corporelle , elle murmure contre Dieu , oublie la totale Esperance de sa bonté , & semble qu'il doit perir , comme si Dieu l'auoit mis en oubly , ou ne la vouloit aider ? Quant aux biens spirituels , & sur tout de nostre salut , qu'y a il que ne debuions esperer , puisque le Fils de Dieu mesme est descendu du ciel , pour par sa mort nous donner la vie , laquelle au prix de son sang il nous a acquis , & deliuré de mort eternelle ? Ou comment craindre , que ceste bonté soit changée , veu que s'il estoit necessaire , il seroit prest (comme il dict vne fois , au S. Euesque Carpus) pour racheter vne seule ame , de mourir vne autre fois ? Et comme telle est ceste bonté , & tell'espoir qu'y deuons auoir , que le danger n'y peut estre , que de la part de ceux , qui en abusent , se fondant sur la misericorde , pour pecher plus librement , sous couleur que Dieu est bon , sans apprehender sa iustice (ce qui lors ne seroit esperance , mais presumption temeraire) commēt estre si miserables , que ce qui est benediction , le tourner en malediction ? Et de ce qui est le salut de tous , en tirer sa perte & ruine ? L'Esperance que nous auons en Dieu , faiēt paroistre en
nous

nous la creance, qu'auons de ses perfections diuines. Car esperât qu'il nous sauuera, nous protestons de sa bonté, veu que ne l'auons merité. Nous protestons de sa puissance, car c'est sans plus luy qui le peut, & qui faict des tenebres la lumiere. Aussi faisons nous de sa sapience, qui rehaulse ainsi les choses basses. Et plus de sa misericorde, qui par ce moyen se bastit au ciel. Et non moins de sa iustice, qui rend à vn chacun selon ses ceuures. Sa verité aussi y est aduoüée: car c'est l'accomplissement des ses promesses. Comme au contraire par le desespoir, on priue Dieu de tous ces beaux tiltres. Et partant peché sur tous damnable, comme il est fondement des blasphemes, qui abondent és damnez. Qui sera d'oc celuy qui pourra, parfaitement conceuoir, vne viue esperance en Dieu, & vne parfaicte confiance? Celuy qui garde sa conscience nette de tous pechez, selon ce qu'escriit saint Iean, *si nostre cœur ne nous reprend pas* (il veut dire si nous ne sommes volontairement tombez en pechez, desquels nostre conscience nous puisse à bon droict accuser) nous auons grande confiance en Dieu. Quelque chose que nous luy demãderons, il le nous octroyera. Ceste confiance croist aussi par le moyen des bonnes ceuures, suivant la doctrine de S. Paul.

Ceux qui seruent bien, & s'acquittent deuëment de leurs charges & offices, montent en plus haut degré en l'Eglise de Dieu, & s'acquierent vne grande confiance, en la foy de Iesus-Christ. Celuy là acquiert vne grande confiance, qui aime son Dieu de tout son cœur, par dessus toutes créatures. Et qui n'aime chose qui soit de ceste vie miserable, qui n'a autre desir, que de se yeoir vni à Dieu par amour; c'est celuy là qui iouyt d'une si ferme confiance, que mesme pour l'amour ardante qu'il porte à son Dieu, il ne peut receuoir en son ame quelque doute, qui le puisse affliger, de ce qu'il demande à Dieu. Tāt est ferme & solide ceste cōfiance, pour l'amour mutuel qu'il ressent en son ame de la part de son bien aimé.

*De la Charité quant au principal acte d'icelle,
qui est l'amour de Dieu.*

CHAPITRE XXXI.

LA charité est la troisieme vertu Theologale, c'est à dire, qui regarde Dieu, parce qu'avec icelle nostre ame est portée à aimer Dieu sur toutes choses, non seulement comme createur, & autheur de nos biens naturels, mais aussi comme celuy
qui

qui donne la grace & la gloire, qui sont biens surnaturels. La charité est vne vertu infuse & du tout surnaturelle : comme celle dont l'acte propre qui est aimer Dieu, est donné, & croist en l'ame, selon la mesure de la cooperation d'icelle, à la grace qui luy est surnaturellement departie. De sorte que cōme icelle cooperant avec la grace premiere ou preuenante, qui est donnée à tous, par *ceste vraye lumiere, qui illumine tout homme venant en ce monde*: Dieu, qui est ceste lumiere, luy donne les secondes, & cooperāt aux secondes, il luy donne les subsequentes: croissant icelle autant en amour, cōme elle croist en lumiere, & cognoissance de Dieu: de là aduient le parfaict don & souuerain degré de charité, autant iustement infus aux vns, que iustement denié aux autres, qui pour n'auoir profité de ce premier degré de grace, sont priuez d'iceluy mesme. Suyuant ce qui est dit, *qu'à celuy qui a, sera donné. Et à celuy qui n'a point, ce qu'il a, luy sera esté*. La charité est la plus grande de toutes les vertus. Et est vn si grand bien, que qui l'a, ne peut perdre son salut, si auparauant il ne perd la charité: & qui ne la point, ne se peut nullement sauuer, encore qu'il ait toutes les autres vertus & dons de Dieu. La charité est premierement en Dieu, puis s'extend

à tous les hommes, & à toutes les choses que Dieu a fait. Mais avec ceste difference, que l'on doit aimer Dieu à cause de luy-mesme, estant vn bien infini, & toutes autres choses pour l'amour de Dieu. Et particulièrement on doit aimer le prochain, pour estre fait à l'image de Dieu comme nous. De sorte que par le prochain, on ne doit pas seulement entendre les parens ou amis, ains tout homme, quoy qu'il nous veuille estre ennemy. A cause que tout homme est l'image de Dieu, & comme tel il doit estre aimé. Mais quels sont les actes, par lesquels on peut acquerir ceste charité? Le premier, qui est preparatoire, est de quitter tous pechez, & sur tout le peché mortel, car iceluy nous prue du tout de la charité. Le second, le peché veniel quelque petit il soit, parce que celuy qui neglige les pechez veniels, se dispose aux mortels. Le troisieme, vne entiere mortification de nos passions & affections desordonnées. Le quatrieme, vne grande haine de nous-mesmes. Le cinquiesme, la pratique des vertus, tant enuers Dieu que enuers le prochain. Mais la charité y estant ja introduitte, quand l'amour de Dieu a captiué nostre cœur & nostre volonté, lors les actes sont plus releuez. Comme de
s'offrir

s'offrir à Dieu en sacrifice de corps & d'ame, & par des desirs ardants nous laisser du tout en la disposition diuine, faisant vn holocauste de toutes nos facultez, de toute nostre ame & ses puissances. Bref, de toutes nos actions internes & externes, par vn renoncement total, & indifférence de ce qu'il nous arrive, nous laissant du tout conduire par la disposition & volonté de Dieu. Les actes de Charité vers le prochain, estans referez à Dieu, & pour Dieu: est que d'un cœur ardent de l'amour diuin, nous soyons tout disposez de laisser nos propres biens, honneurs, commoditez; voire nostre propre vie s'il estoit besoin, pour le secourir en sa nécessité. Voires mesmes, deussions nous nous priver, de ce que nous aimons le plus, qui est de iouir de Dieu (comme quitter le repos de la contemplation & familiarité avec Dieu) pour subuenir aux nécessitez & besoin de nostre prochain. Cecy sont des actes heroïques de la vraye charité, & Dieu se plaît en telles actions. Or en la charité, en laquelle consiste la perfection Chrestienne, il faut considérer l'habitude infuse, & l'action produitte de l'esprit, par la mesme habitude. Par ce que comme enseigne saint Thomas, *il est meilleur de bien faire, que de penser*

nostr.

noir bien faire. Ioinct que l'action est la fin de l'habitude. Parquoy la beatitude *eternelle*, qui est la dernière perfection de l'homme, consiste en action. D'autant plus doncques que fervente est l'action de charité, d'autant plus est grande la perfection de l'homme. Or doncques il reste deux tres-grands aides & secours, pour paruenir à la perfection de la Charité, & qui sont le plus à cest effect: qui sont l'oraison à Dieu, & la contemplation des choses celestes, qui rendent ceste perfection accomplie de tous poincts. Il faut doncques tenir pour certain, que la Charité est vn don de Dieu.

La Charité de Dieu, dit l'Apostre, *est espan due en nos cœurs, par l'œuvre du saint Esprit qui nous est donné.* Et puis saint Iean. *La Charité est de Dieu.* Saint Augustin. *L'esprit donnant vie est en grace.* D'où doncques penserez vous que vient la Charité de Dieu, & du prochain communiquée aux hommes, sinon de Dieu mesme? Celuy, dict saint Augustin, à qui la Charité de Dieu est donnée, & celle du prochain pour l'amour de Dieu, certes doit sans cesse faire oraison, à ce que ce present luy soit donné en telle suffisance, & abondance, que pour l'amour de luy, il vienne à mespriser, non seulement les autres amitiés, mais aussi à supporter toutes sortes de passions. Ce que le mes-

le mesme Pere tesmoigne auoir luy mesme
 fait, en plusieurs lieux de ses confessions.
*Qu'est-ce, dit-il, qui me fera tant de faueur, que
 ie puisse reposer en vous, & qui me causera ce
 bon heur, que vous daigniez leger en mon cœur;
 que vous l'enjuriez, que j'oublye tous mes maux
 du passé, & que ie vous embrasse & estraigne com-
 me mon seul & unique bien? Et puis en vn au-
 tre lieu. O mon Dieu que vous estes haut en vos
 conseils, & que vous estes sublime, quand il vous
 plaist de descendre es lieux profonds! Vous ne re-
 culez iamais. & neantmoins à peine retournons
 nous vers vous. Maintenant doncques mon Dieu,
 & monseigneur, excitez s'il vous plaist nostre pa-
 resse, esueillez nous, rompez nous, enflammez
 nous, bruslez nous addoucissez nous, faictes que
 dès maintenant nous vous aimions, & que nous
 courrions à vous. Et puis encore en vn autre
 lieu. Donnez vous à moy, vous qui estes mon
 Dieu, & faites que ie me rede à vous. Voiré que ie
 vous aime. Et si cest amour est trop froid: faictes
 que ie vous aime d'auantage. Je ne scay pas la
 mesure, pour pouuoir apprendre combien il me
 deffaut d'amour, pour paruenir iusques à tant que
 j'en aye assez, à ce que ma vie puisse arriuer a vos
 embrassemens, & qu'elle ne s'en retire iamais, tant
 qu'elle se mussse & face retraicte, à l'abry de vo-
 stre face. Seulement scay ie vne chose, que tout ce
 que j'ay, excepté vous, m'est mal. Non seulement*
 hors

hors de moy ; mais aussi dans moy. & toute abondance qui n'est point mon Dieu, n'est de moy reputé, que pour indigence & souffres. Or ne nous est pas seulement necessaire, de prier pour obtenir l'accroissement de charité, mais aussi pour impetier du secours & de l'ayde suffisamment, & autant qu'il nous est necessaire, pour practiquer tant & si grandes vertus, pour surmonter les tentations, mortifier les desordonnées affections & habitudes, nous auancer à la perfection, & pour perseuerer en vn saint propos & resolution. Le second secours comme nous disions, est la contemplation. Icy nous entendons vne soigneuse consideration des choses spirituelles, tant diuines qu'humaines. Car certes c'est merueille de veoir, quel auancement faict à la vertu, specialement à la charité, celuy qui vacque comme il doit à la contemplation. Dequoy parle Saint Basile, qui apres auoir discouru de la parfaicte renontiation de soy mesme, il continue de dire, *Quand nous auons faict ce que nous auons dict cy dessus, il faut diligement garder nostre cœur, & ne permettre que la memoire de ces merueilles s'escoule de nos entendemens, ou qu'elle soit contaminée par legeres & vaines cogitations. Au contraire, il nous faut porter en tous lieux vne pieuse sou-*
uenance

uenance d'iceluy gravée en nos ames, comme un signe ineffable, & marque de l'obligation que nous auons enuers luy. Car à la verité, cest la maniere, par laquelle on a de coustume, d'acquérir la charité enuers Dieu. Laquelle, comme ainsi soit qu'elle nous prouoque à l'obseruation des commandemēs de Dieu: l'obseruation des mesmes commandemens, la garderont reciproquemēt, ferme & stable à perpetuité. En apres, encore que la contemplatiō soit de nostre labeur & industrie, si est-ce pour tout, que cest vn don gratuit, de la diuine misericorde. Car c'est Dieu, dit Dauid, *qui illumine nos tenebres*, & selon l'Apostre, *qui reluit & esclaire en nos cœurs*. Aussi est il appellé nostre lumiere & illumination. Il faut donc entremesler l'oraison & la contemplation ensemble, & les tellement attremper, qu'il soit difficile de les recognoistre, & discerner l'vne de l'autre. A la maniere que nous auons leu quelque fois chez les Peres. *Vous m'avez esclairé*, dict S. Augustin, *& chassé mon aucuglement. Vous m'avez embrasé*, & i'ay commencé à respirer, & voyla que ie halette apres vous. *Je vous ay gousté*, & soudain ie suis affamé & alteré. *Vous ne m'avez fait que toucher*, & incontinent ie suis venu tout en feu, & au repos qui vient de vous. Et vn peu apres, ô mon Dieu, prenez

pitié

pitie de moy. Il y a donc vne extreme accoin-
tance, entre ces trois, oraison, contempla-
tion & amout. De sorte qu'à grand peine, se
peut il dire quelque chose de la contempla-
tion, qui ne conuienne de mesme à l'a-
mour & l'oraison.

*Remedes pour aucunes ames pusillanimes, les-
quelles pour quelque necessité que ce soit,
n'osent changer d'exercice, hors
de leurs temps.*

CHAPITRE XXXII.

C'EST vne tres-loüable chose de garder
le temps dédié à la loüange de Dieu,
& à la nourriture spirituelle de l'ame: puis
mesmes que pour le corps on ne s'oublie,
en rien de prouueoir à ses necessitez. Et
d'autant que l'ame est plus noble que le
corps, d'autant plus la diligence y est re-
quise, veü que le corps n'est fait que pour
seruir à l'ame. Outre aussi le soing & dili-
gence, que nous deuons porter à seruir fide-
lement à Dieu. Dont à cest effect on choisit
quelque temps tous les iours, pour l'orai-
son mentale, autre pour l'oraison vocale,
le residu pour l'œuvre manuel. Ainsi en fai-
soit

soit la glorieuse Vierge Marie, étant au temple avec les autres Vierges. Et de mesme font toutes celles, qui veulent imiter sa vie. Mais d'autant que nous sommes suiets à beaucoup d'infirmité, soit du corps, soit de l'ame, il faut observer de tenir tel ordre, que ne venions à gaster nostre esprit, voire mesme nostre santé, par trop grande violence. Quant à la mortification interieure, on ne s'y peut trop exercer. Mais quant à l'esprit, on ne le peut tousiours tenir bandé aux actions releuées, comme meditation continuelle ou autre. Et se faut quelque fois donner relasche, à fin que l'esprit en soit plus vigoureux par après.

Il se trouue quelques ames de bonne vie, mais si douteuses qu'elles n'oseroient pour chose qui soit, changer d'action d'un temps à autre. Comme en temps ordonné pour l'oraison mentale, si l'esprit est accablé de quelque pesanteur, ou autre accident, se sentât plus attiré à faire oraison vocale, elles ne s'osent retirer de l'autre, pour s'appliquer à celle cy, pour quelque vain scrupule. Et interesseront plustot leur santé mal à propos, que de changer d'action.

Ames deuotes, tenez ordre en ce qui est à la plus grande gloire de Dieu, en tout ce qui vous peut exciter à l'aimer plus par-

faicte

192 DELA RVINE DE L'AMOUR PROPRE.
faictement sans, limiter vostre esprit, sui-
uant les actions. Il est bon de mediter en
temps ordonné, & ne le laisser pour cause
legere. Mais s'il aduient (comme il arriue
(voire mesmes és ames les plus parfaites)
que l'esprit soit tellement abatu, que ne
puissiez, que par violence, faire oraison
mentale: si lors, di-ie, vous vous sentez
attirer à faire la vocale, & que cecy ou-
ure vostre esprit, & le rende plus propre
à s'esleuer à Dieu: faictes le hardiment.
Ou si la lecture de quelque liure spirituel
vous peut aider, lisez le hardiment. Et ainsi
passez vostre heure, referant le tout à Dieu.
Car l'oraison mentale & vocale, & la lectu-
re des bons liures, tout cela est prier. Dieu
ne regarde tant à l'action, qu'au bon cœur,
& à la bonne volonté & intention. Mais
lors que vous vous portez mieux, reprenez
vos premieres erres.

P R E-



PREFACE.



MES deuotes, qui auez desir de vous sacrifier, corps & ame en holocauste au Dieu viuant, par un entier renoncement & abnegation de vostre propre volunté, l'aneantissant de toutes parts, tant qu'en elle n'y ait plus aucun mouuement vital procedant de la nature corrompue; pour par ceste mort spirituelle de vostre amour propre, commencer apres à viure en Dieu, & faire un eschange de vostre amour terrestre; pour posseder en vostre ame un amour pur, celeste, & diuin, auquel ne pouuez atteindre, si au preallable n'est chassé de vostre ame cest amour propre: Sçachez, & comprenez, cheres ames, que la creature humaine n'a pas de plus grand ennemy que soy-mesme, & son propre amour. Pour ce n'y a-il guerre si cruelle, que d'oppugner soy-mesme, & de suppediter ce qui nous est si naturel. Cause pourquoy la premier liure a esté dressé, pour vous faire cognoistre en verité, ce que c'est de l'amour propre. Comment il nous prue de tant de biens, & nous cause de si grands maux. Il traite aussi des moyens pour le
N
cognoi-

cognoistre en toute nos actions, & comment on le peut mortifier. Mais le second livre sera divisé en trois parties. En la premiere, sera traité succinctement de l'estat des pecheurs, & de l'ame qui se convertit à Dieu, par une entiere mortification de ses passions & affections desordonnées, pour s'abysmer du tout au pur & divin amour de Dieu, par la pratique des vertus. Puis il y est dict, comment l'ame estant embrasée de c'est amour divin, iouyt à souhait des consolations divines, des extases, & ravissements. Il y est aussi discours des imperfections secretes, qui sont encor en cest estat, (qui est le deuxieme) lesquelles seront du tout ancanties au troisieme, qui sera la seconde partie de ce livre, où sera exposé l'estat de priuation. Et en la derniere partie sera traité de la vie supereminente, où l'ame ayant surmonté tout ce qui luy peut donner empeschement de servir à son Dieu, iouyt sans nul entredoux, des visitations divines, & tresserettes de son espoux Iesus, où elle est du tout transformée. Mais d'autant qu'en ce traité il se donnera à cognoistre plusieurs choses notables, qui se passent en la vie spiriuelle, & sur-tout es ames qui pratiquent vraiment la vie interieure : dont plusieurs, qui n'ont ni la cognoissance ni la pratique des choses spirituelles, & ne comprennent les secrets iugemens de Dieu, pourroient estre plustost scandalisez qu'edifiez, lisant ce livre & le regardant

clant à la lettre : pour ce à fin de ne s'en fier à leur ingement, qui ne s'estend plus avant, que l'experience ne leur ouvre les yeux : il sera bon, voire necessaire, qu'ils se submettent, pour cest égard, aux secrets ingemens de Dieu lequel seul est auteur de tout bien, & l'esprit duquel soufflé où il veut, là on tout ce qui vient de la creature, n'est de soy qu'un pur neant. Mais quant aux ames ia parvenues à quelqu'un des estats susdits ; elles en pourront tirer ce qui leur sera utile. Et faut noter, que tous ne parviennent au troisieme, ni au quatriesme estat, pour ce qu'ils ne perserverent toujours. Les uns demeurans au premier, autres parvenans au second, & les plus fideles ceux qui au troisieme, ou quatriesme, & plus outre. Il nous faut bien travailler de nostre part, & laisser le ingement à Dieu ; pourquoy tous ne parviennent au quatriesme. Car il est dict en l'Evangile, que celui qui reçoit deux talens, doit rendre compte de deux, & celui qui plus, rendra aussi compte de plus. Or l'intention de ce petit traicté, est que le Lecteur qui n'aura encore commencé à se donner à Dieu : voyant la deformité de l'amour propre, prenne le cœur au ventre, se quicte soy-mesme, & embrasse la vertu. Voyant & entendant les graces, & grands biens, que Dieu donne en cest estat de vie, appelée sureminente : outre ce que Dieu merite d'estre aimé. D'autre-part, ceux & celles, qui cheminant en ces chemins, n'en

ont la cognoissance, y pourront trouver beaucoup de contentement : pour les doutes suruenans en cest estat, pour y auoir des ames, qui par la grace de Dieu ont experimenté en elles, tout ce que contient ce second liure. Quant au premier, outre l'experience, que chacun en peut auoir, soit en soy, soit en autrui, il n'y a rien qui ne se puisse remarquer & trouver au secret des consciences, si en verité on se met en debvoir de bien, regarder à soy-mesme.

A Dieu en soit la gloire.

L E

197
LE SAINCT REPOS
DE L'AME FIDELLE
ESPOVSE DE IESVS-CHRIST.

O V
PAR VN AMOVR BEATIFIQUE
VERS SON ESPOUX,
son esprit estant transformé & vny
en Dieu, sa nature s'aneantie
par vn diuin martyre.

LIVRE DE V X I E S M E.

*Excellence, bonté, & sagesse de Dieu, objet &
cause efficiente de la conuersion du pecheur.*

CHAPITRE PREMIER.



RIEN est grand & admirable l'œuvre de ceste Sapi-
ence increée, quand el-
le a créé l'vniuers. Pour
n'estre ce grand monde
rien qu'un miracle, le-
quel Dieu par sa toute-
puissance tira de la nature du Rien mesme.
Miracle d'autant plus grand, que le monde

N 5

mes-

mesme, qu'il n'y a nulle proportion de son estre avec le rien. Et partant d'autant plus que tout autre miracle, que comme dict saint Augustin, *tout ce qui se fait d'admirable au monde, est moindre que tout ce monde, que le ciel, la terre, & autres creatures, que Dieu fit creant le monde.* Et quelque autre Docteur, sous le nom de saint Augustin, *Ce premier chef d'œuvre, est le fondement principal de tous les miracles, qui apres se sont faits, & feront au monde.* Qui sera donc la creature raisonnable, qui n'admirera les œuvres de ce grand Dieu; & par les œuvres ne viendra, à la cognoissance de ceste Sapience increée? Si ie regarde ceste grande masse de terre, placée au milieu de l'air, sans se transformer ni d'une part, ni d'autre; receuât neantmoins sur soy toutes les pesanteurs, demeurer fixe en son milieu, & plus encoré si ie regarde, cōme elle est embellie, de tant de variété de fleurs, de tant d'arbres recreatifs & plaisans à la veüe de l'homme, de tāt d'odeurs, & pierres precieuses; ie ne puis, que ie n'y trouue vn abyfme de merueilles. Et encore plus, voyant le ciel qui l'environne à l'entour, azuré & enrichy de ces beaux corps lumineux, le soleil, la lune, les estoiles, qui sans cesse nous ouurent les yeux de l'ame, pour mōter à la cognoissance du Createur, par la
beauté

beauté de ses ouvrages. N'y ayant si petite creature en iceluy, qui ne monstre en soy des merueilles, si l.s hommes auoient les yeux, pour les bien apperceuoir. Les saints personnages ont heureusement appris à l'eschole de ces merueilles, à chanter la gloire de Dieu, non la leur. Au nombre d'iceux, est l'humble Dauid, lequel fust qu'il leuast les yeux en haut vers le ciel, soit qu'il les iettast bas sur la terre, tousiours s'y trouuoit rauy; & rauy prenoit tousiours occasion, de chanter les œuures & loüanges du Createur. Considerant les cieux, leur arroy, leur enorme grandeur, leur excellente beauté, leurs branles mesurez, leur extreme vitesse, & la constante varieté de leur cours, enyuré sainctement d'admiration & d'amour, entonnoit ce beau motet.

*Les cieux racontent aux humains
De Dieu puissant la grande gloire,
Et le firmament faict noiroir
L'œuvre admirable de ses mains.*

Et contemplant la terre, tant en bloc, qu'en toutes ses parties, il chantoit aussi de meisme air.

*Seigneur Seigneur aimable,
Que ton nom glorieux
Est grand & admirable
Sur la terre, en tous lieux.*

Mais à quelle fin me sert de dire toutes ces particularitez, si ce n'est pour vous monstrier que Dieu a faict tout cecy pour l'homme, qui est vn petit monde; auquel tout ce qui est en celuy-là, se trouue trop plus parfaitement? Je passe cecy legerement, pour atteindre le but où ie tends; qui est de monstrier, que Dieu a mis au corps humain, vne ame si noble que d'estre créée à son image & semblance, l'œuvre en est si admirable, que l'homme mesme ne le peut comprendre. Qui est celuy-là, ie vous prie, qui peut dire ou cognoistre vrayement, ce que c'est de ceste ame, de cest esprit, & de ces trois puissances qui sont en nostre ame? Ces puissances venantes à se separer, qui peut dire, comment cela se faict; n'estant qu'une ame; chacune faisant son operation, tout se passant neantmoins à l'interieur, sans que nous nous en apperceuions chose qui soit? Mais ce grand Dieu qui seul la cognoit, comme telle qui est son ouvrage, la gouuerne & regit. Et pour estre tombée de sa premiere perfection par sa cheute au peché; ce bon Dieu ne la voulant perdre, ains la sauuer, par son amour, la veut remettre en sa premiere beauté & perfection, & la colloquer au sein de sa diuinité: comme il a déterminé de
toute

toute eternité. Se servant à cest effect de diuers moyens ; ores de grandes afflictions, persecutions , ou maladies , ores de consolations intérieures , ores de remords de conscience , ores de vives inspirations, visions , ou apparitions des choses de l'autre vie. Comme il aduint lors de la conuersion, de ce grand patriarche Bruno , par l'apparition qui se feit sur le tombeau de ce grand Docteur de Paris, que l'on tenoit pour saint personnage. Et qui se declara neantmoins publicquement estre damné, & adiugé aux peines eternelles. Et autres diuers moyens, dont Dieu se sert pour sauuer sa creature. Dont nous commencerons à parler au chapitre suiuant : mais briefuement, pour passer plus oultre ; & nous arrester au discours des estats ensuiuants celui du pecheur,

*Moyens diuers de la conuersion
des pecheurs.*

CHAPITRE II.

IL se trouue diuerses sortes de conuersions. Pour exemple, lors qu'une ame estât soudain naurée d'une fleche poignan-

te du diuin amour, à ce momēt que Dieu l'a frappe d'une viue inspiration, ou d'une voix interieure, de laquelle il penetre iusques au fond de ceste ame, qui estoit endormie & abyfmée au peché: ceste voix est si penetratiue, qu'elle feroit briser vn cœur de pierre. A ce moment se faict vne conformité de deux volontez, de l'ame pecheresse à son Dieu, & possède à cest instant dans son cœur le feu du diuin amour; mais encore imparfaitement, pour ce qu'elle est encore en l'estat de penitence. Telle a esté la conuersion d'un saint Paul: lors qu'estant absconsé dans les tenebres du peché, il persecutoit l'Eglise de Iesus-Christ, & les fideles Chrestiens. Soudain Dieu parlant à son cœur, dit, *Paul, Paul, pourquoy me persecutes tu?* O grand Dieu! que fortes sont vos paroles, & qu'heureuse est l'ame, qui est digne d'en estre touchée! Ce cœur qui estoit plus dur que le diamant, le voila fondu comme la cire, sous la puissante parole de ce grand Dieu. Cest homme qui estoit auparavant plus cruel que le tigre, le voila doux, comme un agneau. Que puissante est vostre vertu diuine. Et qu'admirables sont vos secrets iugements! Ceste creature tombant par terre, dit, *Seigneur, que voulez vous que ie face?* Va, dit nostre Seigneur,
a Ana-

à *Ananias* pour estre enseigné. Et comme vn
 enfant obeyssant, ayant quitté le peché se
 laissa instruire en la foy. De grand persecu-
 teur de l'Eglise, en devint protecteur &
 grand Apostre de Iesus-Christ. Telle aussi
 a esté la conuersion de la Magdeleine, qui
 estoit grande pecheresse, de laquelle il est dit
 que sept diables sont sortis d'elle. Enten-
 dât par ces sept diables, toutes sortes de pe-
 chés, tant estoit elle dissoluë. Car ayant ouy
 parler de Iesus-Christ, & entendu que
 c'estoit vn personnage du tout accompli en
 perfection, qui ne s'en pouuoit trouuer de
 semblable: & quant à la nature, qu'il ne
 s'en pouuoit trouuer de plus beau & gra-
 tieux; la vaine curiosité ou la conuoitise de
 sa beauté, luy fit desirer de le veoir; & de
 faict se trouuer en sa presence. Mais Dieu
 voyant ses desseings l'a regarda, non tant
 de la veüe corporelle, que de la veüe de l'a-
 me, penetrant son cœur de sa viue voix.
 Cœur engourdy de concupiscence. La voi-
 la enflambée des flambes du diuin amour, &
 comme toute yure de l'amour de son Dieu,
 court par tout, pour luy sacrifier son ame,
 par vne parfaicte contrition, son corps par
 vne austere penitence. Les pleurs amers
 luy decoullent des yeux, les biens se prodig-
 uent, espendant les boëttes d'onguent, sur
 le

le sacré chef de Iesus-Christ. Elle qui estoit nommée la pecheresse, la voila seruante de Iesus-Christ. Voila, ame deuote, les œures admirables de ce grand Dieu. Ce qui s'est faict vers ceste ame, & vne infinité d'autres saints; se faict encore continuellement es ames, dont la conuersion est secrète, & cachée à nos yeux. Autres sont, qui n'ont esté si addonnés au peché: mais ayans passé leur ieune aage aux vanitez, sans amour de Dieu, ou bien peu, demeurent tiedes. Ce qui deplaist fort à nostre Dieu, pourquoy il dit, *A la mienne volonté que vous fussiez, ou tout chauds, ou tout froids:* mais par ce que vous estes tiedes, ie vous vomiray. Et ces ames sont souuent aussi difficiles à conuertir, que des grands pecheurs. Neantmoins le grand amour que Dieu nous porte, faict qu'il ne cesse de sa part d'operer tous les moyens possibles, pour nous attirer à luy & retirer du peché. Voyez vous, cheres ames, les merueilles de ce grād Dieu: & combien ce petit monde, qui est l'homme, est plus noble que n'est tout ce grand vniuers? Veu que pour creer ce grand monde, Dieu n'a faict autre chose que commander; & par la seule parole il a esté créé? Mais pour creer & recreer l'homme mort par le peché, nostre Dieu n'est-il pas descendu du ciel en terre,

& a

& a enduré la mort, pour luy donner la vie? Et le feroit encore pour vne seule ame, s'il estoit necessaire? Dieu creant le monde n'y a trouué de la resistance. Mais voulant sauuer l'homme, il y en trouue beaucoup, par ce que l'homme par son franc arbitre ne peut estre sauué s'il ne le veut. Dieu luy ayant donné la liberté de faire le bien ou le mal. Non toutefois que Dieu par sa puissance absoluë, ne puisse sauuer l'homme contre sa peruerse volonté; car il le peut confirmer en grace, comme il a faict les Anges. Mais, il le veut laisser en sa franche volonté, & veut pour le sauuer auoir son consentement, pour augmenter sa gloire; qui est encore vn effect de la grande bonté de Dieu vers sa creature. Dieu donc par sa sapience voit iusques à la moindre pensée de nostre cœur, & le moment auquel l'ame se trouue disposée à receuoir en soy la grace diuine, & se donner du tout à Dieu. Car tout ainsi que lors qu'on veut imprimer le cachet dans la cire, si elle est dure & mal disposée, elle ne recevra en soy l'impression du cachet; mais si elle est molle, elle reçoit aisément toutes les impressions & semblances qu'on luy veut donher; de meisme est-il du pecheur, demeurant endurcy par le peché; quoy que Dieu frappe à la porte
de

de son cœur, par tant de saintes inspirations. Côme par la representation des peines d'enfer, par les desirs de la gloire des bien-heureux. Brief, par vne infinité d'autres moyens, dont il se sert pour attirer ceste pauvre ame. Demeurât icelle endurcie, elle ne peut receuoir en soy la grace de Dieu. Mais si tost que par la cognoissance de soy-mesme, elle ouure la porte de son cœur au saint Esprit, lors fondant comme la cire, sous la puissante main de Dieu; elle reçoit en soy l'impression de la grace diuine, & dès lors Dieu en prend vn soing absolu, se seruant de tous les moyens possibles, pour la conduire à sa perfection. Si comme donnant puissance au diable de l'affliger, comme il a faict à son amy Iob. Va dict nostre Seigneur, esprouue sa patience, ie te donne puissance tant en ses biens qu'en son corps, mais ne touche pas à sa vie, & tu voyras comme il sera constant, & combien il m'est fidele. Et de faict ce saint personnage pete tous ses biens, ses enfans, son corps se remplit de vermine & de pourriture, tellement qu'estant sur le fumier, on ne pouuoit discerner si c'estoit vn homme, ou le fumier mesme. N'ayant plus forme d'homme, tant il estoit difforme. En cest estat neantmoins il remercioit Dieu, & le louoit disant,

disant, *Dieu me les a donné, Dieu me les a ôté, le nom du Seigneur soit beny.* Mais après sa longue patience, & le voyant raffiné ainsi que l'or en la fournaise; Dieu luy renuoye toutes ses prosperitez. Cecy nous sert de lumiere ou miroir; & exemple pour toutes les ames qui se conuertissent à Dieu, pour se preparer à toutes sortes de tentations; & de toute esprenue que Dieu fera d'elles, pour leur plus grand bien. Il y en a d'autres qui toute leur vie cheminent en verité deuant Dieu, comme saincte Catherine. de Sienne, qui dès l'aage de trois ans, auoit des visions & extases. Autres dès qu'ils mangeoient encore la mammelle de leurs meres faisoient abstinences. Mais ce sont tous coups de la main de Dieu. Aucuns finissent leur vie en peché; car souuent celuy qui met Dieu en oubly en son viuant: Dieu le met en oubli à la mort. Non qu'il y ait chose que Dieu ne sçache, & ne voye. Mais, c'est à dire, que l'ame qui refuse la grace en son viuant, quand il en pouuoit iouyr, par faire bonnes œuvres, Dieu par sa iustice: la luy denie, lors que ses forces deffaillent, ne pouuant plus prendre ses vains plaisirs. Pour ce aduisez, cheres ames, de n'attendre iusques à la dernière heure, pour vostre conuersion. Mais lors que Dieu frappe à la

porte

porte de vostre cœur, ouurez la luy, & au saint Elprit. *Je vous di*, dit nostre Seigneur, *qu'il y aura ioye au ciel pour un pecheur se repentant, plus que pour quatre-vingt dix neuf iustes, qui n'ont que faire de penitence.* Car le fils de l'homme n'est venu du ciel en terre, pour appeller les iustes; mais les pecheurs à penitence. Personne donc ne doit desesperer, encore que toute sa vie auroit esté en péché; moyennant qu'en vraye contrition, ainsi que le bon larron en la croix, il demande pardon. Car Dieu est plus grand pardonneur, que nous ne sommes grands pecheurs. Mais le plus asseuré est de n'attendre iusques au dernier. Car qui sçait que lors on aura ceste contrition, & on ne sera preueni de quelque mort soudaine? Pour ce, ô ames qui estes créées à l'image de Dieu, ne vous gastez par le péché; donnez vous à Dieu, & il se donnera tout à vous.

Comment se retrouuent mystiquement en l'homme qui est vn petit monde, toutes les qualitez de ce grand vniuers.

CHAPITRE III.

EN TRE tous les miracles de nature, qui se retrouuent en ce grand & vaste vniuers,

uers; il n'y en a de plus grand & signalé, que l'homme. Car si nous regardons la composition du corps de l'homme, nous verrons comment il est composé, des quatre elemens. Premièrement, il est faict de terre, puis il a la respiration qui est l'air, puis il a la chaleur, qui est le feu elementaire, il a aussi l'humidité qui est l'eau. Mais si nous regardons les varietez de la nature, nous verrons, qu'au corps humain se retrouvent les varietez des saisons, comme l'hyuer, le printemps, l'esté, & l'automne. L'hyuer nous represente l'homme en son enfance, suieût à toutes sortes d'infirmitéz, pauvre debile, ne se pouuant ayder ayant besoin de l'assistance d'autrui, pour se pouoir alimenter. De mesme que l'hyuer est suieût à toutes sortes d'accidens, au froid, neiges, gellées, pluyes, bref remply de toutes sortes de calamitez. Par le printemps nous est representé l'estat d'adolescence: car en c'est estat l'homme commence à fleurir en toute gaillardise & beauté, il est en fin lors en sa pleine lieffe, rien ne le peut esbransler, & ne cherche que les plaisirs. Comme au printemps toutes choses commencent à entrer en leur vigueur, les arbres à fleurir, la terre à s'esmailler de diuersité de fleurs, les oyseaux, à entonner & degoi-

210 DE LA RVINE DE
ser leur ramage. C'est vn plaisir de confide-
rer & veoir la tetre en ceste saison, comme
aussi de veoir l'homme en son adolescence.
L'esté nous represente l'homme en l'aage
parfaict, estant lors en sa perfection natu-
relle, de sens rassis, temperé, capable de
regir & gouuerner, non pas seulement vne
famille, mais des villes, & royaumes. De
mesme si vous confiderez la saison en plain
esté, vous voirez que toutes choses sont en
leur perfection, les fruiçts de la terre sont
lors en leur pleine vigueur, pour sustenter
l'homme, le soleil donne lors sa pleine cha-
leur, en fin il n'y a chose que l'homme scau-
roit souhaiter, qui ne se trouue lors sur la
terre. Et finalement considerant ce petit
monde qui est l'homme, lors qu'il est en sa
vieillesse, toutes choses luy defaillent. La
chaleur naturelle, les forces: & souuent le
iugement diminue, accablé de maladies &
miseres. Mais voyons comme ceste aage
se rapporte à l'automne, qui est la qua-
triesme saison. Lors la terre deuient steri-
le, les arbres quictent & fruiçts & feuilles,
le soleil retire sa chaleur: bref ceste saison
se dispose à receuoir toutes les calamitez de
l'hyuer. Voyons aussi comme cest vniuers
est illuminé, par ces deux flambeaux lumi-
neux, le soleil, & la lune, le premier esclai-
rant

rant le iour, le second la nuit. De mesme en est de l'homme, n'a il pas, deux flambeaux, qui sont ses deux yeux par & au moyen desquels, il est illuminé, pour cheminer par tout le monde quand il veut. Ce sont lumieres à la verité, qui embellissent merueilleusement le corps de l'homme, & qui luy font cognoistre la beauté de toute chose; elles luy font veoir le ciel, & la terre de si longue estenduë. Mais si nous considérons l'ame qui anime ce petit monde, nous verrons qu'elle surpasse tout ce grand monde, & toutes creatures contenuës en iceluy. Car toutes autres creatures n'ont en soy que l'ame sensitue, & vegetatiue ensemble, ou la vegetatiue seule: mais l'homme a & la vegetatiue; la sensitue & la raisonnable, par laquelle il cognoist son Dieu, & admire ses œuvres. L'homme est donc la plus noble, & excellente de toutes les creatures. Je ne veux m'arrester d'auantage, à particulariser les qualitez de ce grand monde, qui se trouuent en ce petit monde. Et prie le Lecteur, de ne s'esmerveiller, si ie me suis tant arresté, à parler moralement de ce que dessus. Car ie l'ay fait, pour par ce moyen venir à la cognoissance de nostre Dieu, & pour entrer en vne plus parfaicte cognoissance de ses merueilles,

lors que nous monstrerons mystiquement, la verité de ce sujet. Voyons, cheres ames, la diuersité des estats, esquels l'ame se retrouve, auant que paruenir à sa perfection. Car icy sont encore représentées les quatre saisons de l'an. L'estat des pecheurs, nous represente l'hyuer. Car quelle froidure ou glace, se peut-il trouuer plus grande, qu'en l'ame pecheresse ; en laquelle ne se trouue tant soit peu de chaleur d'amour diuin ? Quelle secheresse ou endurcissement plus grand, se peut-il trouuer, qu'au cœur du pecheur endurcy, ou en l'ame qui se laisse emporter à bride aualee à toutes ses passions, & inclinations mauuaises ? Quelles tenebres plus espoisses, veu qu'il n'a cognoissance en rien des saintes & diuines inspirations, ni des vertus ? Si toutefois il est conuertý à Dieu, il demeure encore quelque temps en ses tenebres, & tant qu'il ait mortifié toutes ses passions & affections desordonnées. Mais si genereusement il se surmonte, mortifiant les passions, & inclinations peruerfes ; il commencera lors à iouyr du printemps, c'est à dire, de la presence de nostre Dieu, de ses diuines consolations, des fleurs odoriferantes des vertus, par lesquelles il se rendra agreable à son Dieu, pour en apres tant plus parfaitem-
ment

*De la douceur interieure que l'ame commence à
gouster apres sa conuersion, & des fer-
ueurs procedantes de l'amour, mais
encore imparfaictes.*

CHAPITRE IV.

L'AME estant conuertie à Dieu, apres
l'auoir quitté le peché avec ferme reso-
lution de n'y iamais plus retourner, estant
nourée de ceste flesche d'amour diuin, com-
mence à practiquer l'oraison, en laquelle el-
le trouue de la douceur interieure. Et Dieu
le permettant ainsi, luy enuoye ces petits
sentimens. Pour ce qu'estant encore peu
forte pour soustenir les combats interieurs,
il la conuient soulager. Et à ceste cause no-
stre Dieu comme vn bon pere, luy donne
dulaiet, la nourrit comme vn enfant. C'est
à dire, que ces petites consolations & dou-
ceurs ne sont encore qu'estincelles proce-
dantes de ce feu d'amour diuin. Cependant
cette ame ne sçait où elle se retrouve, pour
n'auoir iamais gousté que l'amertume des
plaisirs sensuels & terriens; luy semblant
des-ia estre dans vn petit paradis. Mais elle
O 3 ignore

lors que nous monstrerons mystiquement, la verité de ce sujet. Voyons, cheres ames, la diuersité des estats, esquels l'ame se retrouve, auant que paruenir à sa perfection. Car icy sont encore représentées les quatre saisons de l'an. L'estat des pecheurs, nous represente l'hyuer. Car quelle froidure ou glace, se peut-il trouuer plus grande, qu'en l'ame pecheresse; en laquelle ne se trouue tant soit peu de chaleur d'amour diuin? Quelle secheresse ou endurcissement plus grand, se peut-il trouuer, qu'au cœur du pecheur endurcy, ou en l'ame qui se laisse emporter à bride aualee à toutes ses passions, & inclinations mauuaises? Quelles tenebres plus espoisses, veu qu'il n'a cognoissance en rien des saintes & diuines inspirations, ni des vertus? Si toutefois il est conuertý à Dieu, il demeure encore quelque temps en ses tenebres, & tant qu'il ait mortifié toutes ses passions & affections desordonnées. Mais si genereusement il se surmonte, mortifiant ses passions, & inclinations peruerfes; il commencera lors à iouyr du printemps, c'est à dire, de la presence de nostre Dieu, de ses diuines consolations, des fleurs odoriferantes des vertus, par lesquelles il se rendra agreable à son Dieu, pour en apres tant plus parfaicte-
ment

*De la douceur interieure que l'ame commence à
gouster apres sa conuersion, & des fer-
ueurs procedantes de l'amour, mais
encore imparfaites.*

CHAPITRE IV.

L'AME estant conuertie à Dieu, apres
l'auoir quitté le peché avec ferme reso-
lution de n'y iamais plus retourner, estant
nourée de ceste flesche d'amour diuin, com-
mence à practiquer l'oraison, en laquelle el-
le trouue de la douceur interieure. Et Dieu
le permettant ainsi, luy enuoye ces petits
sentimens. Pour ce qu'estant encore peu
forte pour soustenir les combats interieurs,
il la conuient soulager. Et à ceste cause no-
stre Dieu comme vn bon pere, luy donne
du lait, la nourrit comme vn enfant. C'est
à dire, que ces petites consolations & dou-
ceurs ne sont encore qu'estincelles proce-
dantes de ce feu d'amour diuin. Cependant
cette ame ne sçait où elle se retrouve, pour
n'auoir iamais gousté que l'amertume des
plaisirs sensuels & terriens; luy semblant
des-ia estre dans vn petit paradis. Mais elle
O 3 ignore

ignore encore les vrayes & parfaites consolations, dont iouyt l'ame proufitante en ceste vie spirituelle. Conceuant neantmoins de tant plus de contrition pour ses pechez, voyant la grande bonté de Dieu : lors s'ensuiuent les pleurs continuels, les regrets de l'auoir tant offensé. Tellement qu'elle peut dire avec le Prophete royal David, *Mes larmes me deniendront pain iour & nuict*. Il luy semble que ses yeux ne sont suffisants de pleurer assez abondamment, pour effacer ses pechez, tant elle a de regret d'auoir offensé son Dieu. Comme il est dit de saint Pierre, qu'il auoit tant pleuré pour son peché, que ses iouës en demeurerent cauées. Ces pleurs neantmoins ne semblent que douceurs, & seruent de rafraichissement à l'ame. Puis les desirs, procedants de l'amour diuin de pouoir satisfaire pour ses pechez, luy en engendrent d'autres plus serueurs, de chastier son corps par veilles, austeritez, porter la haire, se donner les disciplines, ieusner, & faire autres abstinences. Mais lors que ces desirs viennent, l'ame doit choisir vn directeur, ou pere spirituel bien experimenté, & luy descouurir tous ses desirs, & serueurs, ne faisant de son propre mouuement aucune penitence exterieure, soit de ieusne, soit de veille, ou coucher sur la dure, soit porter haire,

haire, ou faire la discipline, ou autre penitence que ce soit, sans en auoir demandé obedience du confesseur, ou pere spirituel. Et lors si ledit confesseur le luy permet, qu'elle suiue en tout ses aduis, à fin que sous ombre de deuotion l'amour propre ne s'y fourre, ou le diable ne la trompe, pour luy faire faire des penitences indiscrettes: & par ce moyen la rendre inhabile à toute bonne œuvre. C'est la premiere tentation dont le diable se sert vers l'ame penitente; pour ce qu'il sçait bien, que s'il la tentoit de retourner à son peché, il y perdrait sa peine. Car ceste ame est liée à son Dieu, par vn desir embrasé d'amour diuin, qui ne luy donne repos, iusques à ce qu'elle aura satisfait par la penitence, à ses pechez. Pour ce l'ennemy iuré de nostre salut, voulant faire guerre à ce nouveau soldat de Iesus-Christ, se sert de plus subtiles tentations. Voyant les desirs tres-iustes, de vouloir satisfaire par la penitence, à la debte qu'il doit à Dieu, il prendra ce mesme subject pour s'en seruir, luy persuadant d'embrasser des austeritez, plus que ses forces ne peuuent porter. Et sur tout, luy faict entendre de ne rien descourir de ses desirs à son confesseur, sous ombre qu'il ne faut point reueler ses bien-faicts. Par ce moyen il deçoit les ames, lesquelles

quelles estants pleines de ferueur, viennent à tant macerer ce corps, qu'il ne peut plus seruir à l'ame, tant il est debilité. Cheres ames soyez aduisées à ce commencement, de choisir vn guide qui soit de bonne vie, & bien expérimenté en la vie spirituelle. Et lors mortifierez en vous tous les respects humains, avec resolution de vous submettre avec toute obediencce aux conseils de vostre pere spirituel, soit en choses temporelles, soit en spirituelles; luy descourant tous ces desirs de mortification: au moins en cè qu'on veut entreprendre, & luy en demander obediencce. Ce que faisant, si vous en faictes peu ou trop, ce sera la faute du directeur, & non la vostre. Et celuy qui obeyt ne peut perir. Aussi Dieu ne permettra que puissiez faillir: par ce que par ceste humble submission Dieu donnera lumiere au confesseur pour vous conduire. Et si Dieu ne l'illuminoit, ce seroit pour quelque plus grand bien vostre. Tousjours cheminerez vous en asseurance, contre les ruses de Satan. Toutefois, si vous y estes ia tombé par ignorance, si tost que vous en aurez la cognoissance, ne laissez lors de demander aduis: & par ceste mesme submission recouurez ce que vous aurez perdu. Et ne deuez pas seulement descour-
urir

urir ce qui touche la penitence : mais encore tous les secrets de vostre conscience, le tout avec grande confiance, humilité, respect, & prompte obeysance, laissant en tout vostre propre iugement. En sorte que si le directeur disoit, que ce qui est noir, fut blanc : vous devez tellement assujettir vostre iugement, que vous le croyez simplement, & ainsi suiure son aduis. I'ay dit ceste similitude, par ce qu'elle est propre & conuenable à la matiere. Car vne personne qui est subiecte à suiure son propre iugement, si son directeur luy dit quelque chose suiuant la verité ; ceste chose luy semblera autant differente à son iugement, que s'il luy disoit vne chose noire estre blanche. Il peut aussi aduenir, que le directeur luy dira quelque chose pour l'esprouuer, tout au contraire de la verité ; à fin que par ceste mortification, l'ame apprenne à acquerir vne vraye simplicité, laquelle luy profitera beaucoup en la vie spirituelle. Quelqu'un me dira, comment pourroy-ie croire, que ce que ie voy estre noir fust blanc ? Je vous di, qu'en la vie spirituelle, il y a des choses plus contraires à nostre iugement, & plus difficiles à croire. A quoy neantmoins il faut adiouster ferme foy, avec ceste deffiance de soy-mesme. Penser que nous sommes

aucu-

aveugles, & que nous n'en auons la vraye
cognoissance. Et cecy est si meritoire à la
personne, qui submet ainsi son iugement,
qu'elle en peut paruenir bien tost à grande
perfection, au moins si le confesseur est ex-
perimenté. Car il faut que de sa part, il soit
vrayement le soustien de ceste ame, & qu'il
l'exerce avec grande dexterité, cognoissant
toutes ses inclinations. Outre, s'il la voit
sans subiect crainctive, il luy doit donner
courage, & l'inciter à la confidence : & des-
courir toutes ses tentations, & tout ce qui
touche sa conscience, soit à fin de luy don-
ner aduis, ou de l'aider en la mortification.
Ceux-là qui tiennent des ames en charge,
n'en doiuent pas faire peu d'estime. Car
d'autant que l'ame est beaucoup plus no-
ble que le corps : ainsi doit-il en auoir plus
de soin, que le pere naturel de son propre
enfant. Mais il conuient par mesme raison,
que celuy qui s'est ainsi soumis, porte à son
directeur le respect, l'honneur, & l'obeyss-
sance tres-serieuse, & plus, s'il faut ainsi par-
ler, qu'à son propre pere. Le tout neant-
moins pour Dieu. D'autant que l'honneur
qu'on porte au vicaire de Iesus-Christ, est
faict à Dieu mesme.

Le

Le grand retardement qu'apporte à la vie spirituelle, de n'avoir un directeur qui donne connoissance, comment on se doit mortifier, soit es choses exterieures, ou interieures, des trois puissances de l'amo.

CHAPITRE V.

LE nouveau soldat de Jesus-Christ, qui ne desire que se rendre fidele à ce sien espoux Jesus, & de surmonter tout ce qui luy peut donner empeschement, à luy estre agreable, se trouvant d'une part en l'oraison, il trouve des ressentimens de douceur. D'autre part retournât aux actions, il se voit tomber en ses passions, & en plusieurs petits pechez, dont il s'afflige iusques à l'extreme. Pour ce qu'il sent sa volonté chercher la pureté de vie, plein de desirs d'amour divin. Pourquoi il propose mille fois, de ne plus offenser Dieu. Mais ceste resolution n'est pas si tost faicte, qu'il n'y retombe de nouveau. Puisayant recours à l'oraison, c'est de pleurer sa vie passée. Et ses pechez nouveaux luy semblent plus grieux que les precedens, par ce qu'il aime alors son Dieu, & auparavant il n'avoit ceste connoissance.

Ceste

Ceste ame sera ainsi agitée quelquefois plusieurs années, sans aduancer en la vie spirituelle. Par ce que ne cognoissant ce que c'est de l'interieur; elle chemine comme aueugle. Et ce par faute du confesseur qui la laisse ainsi, sans luy en donner lumiere, se contentant de l'entretenir en ces petites deuotions, sans commettre de grands pechez. Ce qui luy semble beaucoup estre fait. Et cependant ceste ame ne fait que desirer, sans sçauoir quoy; pour l'empeschement que luy donnent ses passions, n'ayant instruction pour les mortifier, & mesme ignore que c'est ce mot de mortification. S'il se trouue de telles ames, ce n'est de merueille, car le monde est vn ignorant. Pour ce celuy qui le suit, n'en peut apprendre qu'ignorance. Ceste ame donc ainsi agitée en ceste mer du monde, tantost elle trouue la serenité, lors que le temps est calme, quand les occasions ne se presentent aux passions, de se mouuoir & paroistre. Et lors pour les petites douceurs & sentimens interieurs, il luy semble que tout va bien en son interieur. Mais aux premieres occasions qui se presentent, voila les tempestes & les flots qui s'esleuent, c'est à dire, les passions indomptées. Le tout à faute de n'auoir vne guide asseurée, qui luy monstre le chemin
de

de la mortification. A la verité c'est vne pitié, que ces ames qui pourroient faire grand profit en la vie spirituelle, sont ainsi retardées faute de lumiere. Que doit faire ceste ame lors, se trouuant destituée d'humain secours ? Inuoquer l'ayde du saint Esprit. Et si elle ne peut trouuer vn directeur, qui luy sçache monstrier le chemin de mortification ; qu'elle se remette du tout en Dieu, le prenant pour directeur, pere, & appuy : le priant de luy donner la grace de la conduire, où sa diuine bonté la veut appeller. Et puis comme valeureux soldat de Iesus-Christ, elle combattera courageusement contre soy mesme. Mortifiant premiere-ment ses passions irascibles & concupiscibles ; & les tenant tellement subiectes à la raison, & par actes contraires les domptant en sorte, qu'elles soient toutes mortes. La verité est, qu'on ne les peut tellement mortifier, que quelque racine n'en demeure. Pour estre nostre nature corrompuë, par le peché de nostre premier pere Adam. Et si les ayant vne fois toutes mortifiées, on est negligent de maintenir l'autorité acquise sur icelles passions, elles retournent comme deuant. Combien qu'il soit aisé, les ayant surmonté, de les tenir subiectes à l'ame, & à la raison. Elle doit aussi mortifier tous ses senti-

sentiments extérieurs: comme la veüe, le flairer, gouter, toucher, & l'ouyr. Pour ce que ces sentimens extérieurs sont les fenestres, par lesquelles la mort entre en l'ame. La veüe, pour ne regarder choses lasciuës ou curieuses, ne regarder son prochain par quelque haine ou indignation. Le flairer, à fin qu'elle ne prenne trop grande delectation aux parfums, & senteurs aromaticques, & autres semblables, sans en tirer quel que bonne consideration des œuvres de nostre Dieu. L'ouyr, pour n'escouter mesdire du prochain, blasphemer, murmurer contre Dieu, parolles ou chansons malhonestes: ni se trop delecter à escouter des instrumens musicaux, quoy qu'en soy la musique est tresbonne, moiennant qu'on n'en abuse pour son propre appetit, sans le referer à Dieu. Le gouter, à fin de ne prendre trop grãde delectation au manger, & boire choses delicieuses, qui peuvent attirer nostre appetit à gloutonnie, & à excez en la quantité, qui est le pire. Car Esau n'a pas quicté sa primogeniture pour de la venaison, n'y autre manger delicieux: mais pour vne esculée de lentille. La gloutonnie, ne consistant point en la qualité des viandes: mais à l'appetit desordonné qui nous les faict prendre. Vn pauvre mendiant peut
aussy

aussi bien estre glouton en son esculée de potage, qu'un autre en des exquis mangera. Il faut tellement regler son appetit, que ce que nous prenons soit pour la pure necessité du corps, comme estans obligez de le nourrir & sustenter. Et si on trouue bon goust au manger & boire, on doit le tout referer à Dieu, qui a créé toutes ces choses, pour l'homme, & ainsi admirer les œuvres de Dieu, qui a tant fait pour le corps. Mais combien d'avantage fera-il pour l'ame, qui est incomparablement plus noble? Il faut aussi mortifier le toucher, à fin que jamais il ne nous aduienne, de commettre quelque chose, qui deplaise à nostre Dieu. Je passe ce cy legerement; pour ce qu'au traité de l'amour propre, il en est parlé assez en divers endroits: & comment toutes nos actions procedantes de l'amour propre doivent estre mortifiées. Au surplus, l'ame ayant mortifié tous ses sentimens extérieurs, il luy faut travailler à la mortification de toutes ses passions, qui sont quatre principales: à sçavoir, amour vain, tristesse vaine, crainte vaine, & espoir vain; lesquelles on doit soigneusement mortifier, quand elles se bandent contre l'esprit. En apres, on doit mortifier les trois puissances de l'ame: comme l'entendement, la memoire, & la volonté.

lonté. Et lors que tout ce que dessus est mortifié en nous, nous auons le chemin ouvert, pour arriuer au pur amour diuin. Mais quelqu'un se pourra esmeruiller, qu'à vne vie si imparfaicte, subiecte encore aux pechez, esquels l'ame estoit accoustumée de tomber, auant sa conuersion, estant encore embarassée & esclaué de ses passions indomptées, lors que neantmoins elle est en l'oraison, elle reçoit de Dieu des consolations interieures, & presque tousiours à ce commencement, elle a ces ressentimens de douceur en l'oraison. C'est en cecy que plusieurs s'abusent & se trompent, qui pour ces consolations & ressentimens s'estiment fort aduancez en la vie spirituelle; quoy qu'ils sentent encore leurs passions accoustumées. Pour ausquelles ne tomber, ils en euent les occasions, leur semblant que c'est assez, sans en oster les causes. Mais nous ne serons pour ce excusés deuant Dieu. Il faut donc oster les causes, qui sont nos passions desreglées, par vne vraye mortification, sans s'arrester & mettre leur fondement, sur ces douceurs interieures. Car les cherchant tant qu'on peut, c'est pour entrer en des presumptions, & penser estre des petits saints. C'est ce qui empesche d'aduancer en la vertu. Car tels personnages seront
souuent

souuent plus arrogants que des grands pecheurs. Mais ceux-là qui vrayément se sont conuertis, & ont en haine leur amour propre, ils ne mettent aucun appuy sur ces consolations; ains les reçoient de Dieu avec humilité, & s'en seruent comme de moyens pour se mortifier; croyant fermemēt qu'on ne peut estre agreable à Dieu, si on n'est purifié de tout peché, & des occasions du peché, qui sont nos mauuaises inclinations & passions desordonnées. Pourquoy l'ame genereuse examinant sa conscience, cherche tous les moyens possibles, pour dompter en soy ce qui la retarde de paruenir à sa fin desirée; qui est de se pouoir vnir du tout à Dieu par amour. Il faut noter, que les pechez qui se commettent en cest estat, quoy qu'ils semblent semblables à ceux de la vie passée, & auant leur conuersion, sont neantmoins bien differents. Par ce que les pechez esquels ils tomboient auant leur conuersion, estoient par malice, & volontaires. Mais ceux esquels ils tombent apres la conuersion, sont par fragilité, & contre leur volonté. Car absolument ils ne veulent offenser Dieu, tant qu'ils peuuent. Mais ceste volonté de ne point offenser Dieu, quoy que par le franc arbitre, elle puisse ce qu'elle veut, reste neantmoins tellement affoi-

P blie,

blie, & denuée de ses forces, par l'effort de ses passions inferieures, & affections desordonnées de toutes choses créées, que l'ame peut dire avec ce grand Apôstre saint Paul. *Je fay le mal que ie ne veux pas faire, & le bien que ie veux faire, ie ne le fay pas. Le sens,* dit-il, *une loy contraire a l'esprit.* En quoy nous pouuons veoir, combien les pechez passez, & l'habitude aux pechez nous empeschent de pouuoir tout librement vser de nostre franc arbitre; par ce que l'ame avec ses puissances est deuenue esclau de ses passions. Ne soit que par vne grâde generosité, l'ame ait surmonté par continuelle mortification, ses affections & passions desreglées; non quant à la volonté de n'y tomber (par ce que cecy est surmonté à la conuersion) mais quant à la rebellion de la nature corrompue contre l'esprit & la volonté. Donc on peut veoir en cecy, combien il y a de difference entre les pechez d'apres & auant la conuersion, encore qu'ils soient de mesme espee. C'est pourquoy nostre Dieu cognoissant que les pechez commis par l'ame conuertie, sont par pure fragilité, il la gouuerne doucement, ne la voulant priuier des petites consolations interieures. L'esleuant ainsi petit à petit, avec le lait de sa douceur, iusques à ce qu'elle soit plus forte, pour
sur-

L'AMOUR PROPRE. LIV. II. 227
surmonter ce qui donne empeschement à
la perfection, qui sont ces passions turbu-
lentes.

*En quelle maniere d'oraison l'ame s'exerce en cest
estat, qui est apres la conuersion.*

CHAPITRE VI.

L'AME nouvellement conuertie à Iesus-
Christ, estant encore en l'estat de pe-
nitence, auquel elle satisfait continuelle-
ment par la contrition (soit és actions exte-
rieures ou interieures) a ses operations en-
core fort actiues, pour ce qu'elle ne sçait
encore la methode de se conduire, auant
qu'elle soit enseignée à l'oraison, & en cel-
le quelle methode elle doit tenir & obser-
uer. Et ceste ignorance est cause, qu'elle
suit tout ce qui luy semble bon, induitte
par ce desir d'amour diuin. Ses oraisons
neantmoins sont fort feruentes; mais tou-
tes actiues, & l'intellest est tousiours arre-
sté aux images, dont l'ame conçoit tous ces
petits sentiments de douceur: & ses prieres
sont presque tousiours vocales, combien
que feruentes & brullantes, & de grande
efficace. Pour ce que ceste ame y procede

avec grande simplicité & droicte intention. Tellement que ses prieres sont si humbles & amoureuses, qu'elles profondent iusques au cœur de nostre Seigneur. Lequel voyant les bons desirs de ceste ame, la fauorise de sa grace : puis petit à petit il l'esleue comme vn enfant, supportant encore ses infirmités. Car encore qu'elle soit de bonne volonté, si est-ce qu'estant encore aucuglée des choses spirituelles, elle met tout son appuy és sentimens interieurs, aux deuotions sensibles, aux larmes, & pleurs; tellement qu'il luy semble que ses prieres ne sont d'efficace, si elle ne iette abondance de larmes. Et lors que par tous moyens possibles, elle les a procuré, soit par regret de ses pechez, soit par la meditation de la passion de Iesus-Christ (en laquelle par la representation imaginative de ses douleurs, elle conçoit vne compassion naturelle, dont elle en ressent douleur, de laquelle procedent ces douceurs, qui la font pleurer) lors qu'il luy semble auoir satisfait en aucune façon à ses pechez, par la contrition qu'elle en conçoit, cela luy apporte contentement. Pour ce qu'il luy semble que par ce moyen elle entre en la grace de Dieu; celuy qu'elle est résoluë de vouloir aimer par dessus tout. Mais quand s'y estant vn petit plus aduancée, elle
est

est enseignée à l'oraison mentale, soit par son directeur, soit par la lecture des bons liures, soit y estant attirée de Dieu : lors le plus souvent l'ame s'arreste à vne multiplicité de discours; & contrainct la partie imaginative, de se représenter tant plus vivement les images des mysteres de sa meditation. Le tout pour trouver ces gousts de douceurs interieures, esquels l'ame mesme met toute sa fin; dont elle tire vne esperance de la grace de Dieu. Ceste ame sera quelquefois plusieurs heures en oraison, avec de tres-grands contentemens, de desirs seruens, & repos interieur. Mais en fin sortant de l'oraison sans aucun fruct, se trouue aussi subiecte à ses passions que deuant : pour ce qu'en l'oraison elle ne tire aucune pratique, s'arrestant seulement aux douceurs & sentimens sensibles. Ceste ame se comporte tout ainsi qu'un petit enfant; & Dieu faict de mesme en son endroiect, comme la mere vers son enfant. Auquel si elle presente quelque viande solide & fort exquise, ou du lait, qui est sa nourriture accoustumée; il prendra le lait, laissant l'autre, combien que plus necessaire, peut estre, pour le fortifier; & pour estre le lait plus à son goust, aimant mieux son appetit, que ce qui luy est plus profitable. De mes-

me est-il de l'ame qui est encore petite, c'est à dire, peu aduancée au chemin de la vertu, lors qu'elle est en l'oraison, qui est la nourriture spirituelle de l'ame. Icy se presentent deux sortes de nourriture spirituelles. L'une est la douceur & ressentiment qu'on trouue aux discours, ou aux images, dont l'ame s'arreste à ce contentement; ce qui est representé par le laïc. L'autre est la pratique qu'on tire de la meditation; comme la mortification, la pratique de toutes vertus, à l'imitation de la vie & passion de Iesus-Christ, de la Vierge Marie, & des saints. Or la premiere consiste és actes de l'entendement, & imagination: puis la partie inferieure s'y repose. Mais la seconde prouient des actes de la volonté, que l'ame met en effect, l'occasion se presentant, qui est la mortification, & les vertus, vrayes & substantielles nourritures de l'ame. Et pour ce qu'en ce il y a du travail, elle le fuit, s'arrestant plustost à ce qui est plus à son goust, mais moins profitable. Et de là vient que l'ame demeure engourdie en ses passions, & affections desordonnées. Ce qui luy cause de grandes peines interieures, d'autant qu'elle en ignore la cause. Qui est, par ce qu'elle met tout son appuy aux sentimens qu'elle trouue en l'oraison, sans en tirer la pratique

pratique de la mortification. Que doit donc faire ceste ame en cest estat ? Il faut noter que toutes ces petites consolations ne sont à rejeter , notamment au commencement que l'ame est encore peu forte en la vie spirituelle. Et de faict , nostre Seigneur luy donne ceste grace , à fin que goûtant ce que c'est de la vie spirituelle , & combien il y a plus de contentement à servir Dieu , que le monde , par ce moyen l'ame vienne à se fortifier , à fin que les desirs des plaisirs du monde , n'entrent plus en sa volonté. Voicy le moyen , dont l'ame se doit servir en cest estat. A sçavoir d'accepter toutes ces douceurs , comme moyens pour aller à Dieu , & se fortifier en la mortification. Laquelle courageusement elle doit entreprendre ; sans mettre son appuy aux sentimens , comme estant la perfection. Car on n'est non plus parfaict , qu'on se surmonte soy-mesme. Et puis l'ame ne doit faire tant de violences pour recevoir les larmes. Car la contrition consiste en la volonté , & au regret d'avoir offensé Dieu ; & si les larmes en procedent , il n'est pas mauvais. Mais chercher plustost la contrition des yeux , que de la volonté , c'est fort peu de vertu. Il convient donc que l'ame ait ceste contrition de cœur & de volonté , sans re-

garder à ce qui procede de nature. De mesme est-il, si on medite la vie & passion de Iesus-Christ. On doit tirer l'imitation des vertus de Iesus-Christ, son humilité, sa patience, sa charité, & toutes autres vertus. On peut pour s'enflammer la volonté, s'imaginer de veoir nostre Seigneur aussi tout deplayé, comme en la flagellation, & autres mysteres. Mais on ne doit tant forcer la partie imaginatiue, ains doucement sans faire violence, s'imaginer present tel & tel mystere. Comme meditant nostre Seigneur portant sa croix, on se le doit imaginer present à nostre veuë, sans faire en imagination des longues estenduës de chemin, pour l'aller trouuer en Ierusalem, ou en la montagne. Ceste maniere de mediter est trop actiue & peu profitable, pour ce que les sens sont trop diuisez. Mais lors que rentrant en soy-mesme, on se represente deuant soy ces mysteres; les parties superieures & inferieures ont plus de puissance, pour operer des actions vertueuses, tant internes qu'externes. Et l'ame se peut comporter en telle sorte, iusques à ce qu'elle soit plus aduancée en la vie spirituelle: & Dieu mesme l'enseignera plus parfaictement que les creatures.

Du

*Du desir & amour que l'ame doit porter à la
vertu, & à la mortification pour se
surmonter soy-mesme.*

CHAPITRE VII.

AIMER Dieu est vne action du tout
celeste. Aussi faut-il que celuy qui
veut estre professeur de l'amour diuin, quit-
te tout ce qui est de la terre. Mais il faut
embrasser le milieu, & passer le chemin re-
quis pour y paruenir en verité, sans penser
tout à coup se pouuoir vnir aux vrayz, &
parfaicts embrassemens de son celeste es-
poux, par la parfaicte contemplation. Ne
pensez pas, cheres ames, paruenir au sacré
cabinet de vostre bien-aimé, ni iouyr des
fruiçts secrets que l'Espoux departit à sa
bien-aimée, si vous n'estes reuestuës de la
robbe nuptiale, qui est la pureté de vie: par
vne perte totale de tout ce qui est nostre,
& par vne acquisition, de tout ce qui est ag-
greable à Dieu. Ne pensez pas, di-ie, en-
uisager de l'œil de vostre entendement, &
esleuer vostre ame, pour regarder le vray
Soleil de iustice Dieu le createur; sans auoir
osté de vostre ame tous les nuages & em-
pêche-

peschements. Craignant qu'il ne vous ad-
uienne, comme à celuy qui veut regarder
le soleil avec la vœue debile, & mal saine.
Car iceluy deuiendroit plustost aueugle,
que d'en descourir la clarté. De mesme est-
il de l'ame vers le Soleil de iustice, qui est
Dieu. C'est folie de penser s'vnir à Dieu,
sans au preallable auoir mortifié & dissipé
les nuages de nos passions, tant internes,
qu'externes. Et pour mieux paruenir à ce-
ste diuine vnion del'ame à son Dieu, il faut
lier deux moyens ensemble. Vne entiere
mortification de tout nostre interieur,
aussi bien que l'exterieur, avec l'acqui-
sition des vertus : & l'oraison continuelle.
Et conuient que l'ame se resolute coura-
geusement à embrasser, nonobstant tou-
tes les rebellions de la nature peruerse :
tout ce qui est le plus contraire à icelle, &
aimer ceste mortification, comme le vray
& vnique moyen, pour paruenir à sa fin
desirée.

De la

De la resolution absolüe que l'ame faict, d'embrasser la parfaicte mortification, pour acquerir les vertus, par la praëlique d'icelles, & par le moyen de l'oraison.

CHAPITRE VIII.

CESTE ame se voyant sans cesse enflambée des desirs de pouuoir estre vnice avec son Dieu, & se sentant retardée par les passions & affections desordonnées, se resoult courageusement à ceste seconde conuersion. Qui est de surmonter tous les plus secrets empeschemens de son interieur, & embrasser toutes les vertus, quoy que difficiles, mettant tout son appuy aux graces & faueurs de nostre Dieu, avec defiance de soy-mesme. Laquelle on peut acquerir, par le moyen de l'oraison continuelle. Ceste seconde conuersion, ou delaissement de soy mesme, se faict en deux manieres. Il se trouue quelques personnes, qui prendront vne imperfection ou deux au coup pour mortifier, avec vne ou deux vertus : & lors qu'il leur semble auoir surmonté ces imperfections, en prendront vne autre. Ce chemin est bon, mais il est si long qu'il

qu'il faut plusieurs années, pour arriuer à quelque solide vertu. Car toutes nos passions & imperfections, sont liées ensemble comme vne chaisne; tellement que lors qu'on pense en auoir surmonté l'une, l'autre nous retire de rechef: tellement que la victoire en est tres-petite. Comme il est aussi des vertus, elles sont aussi ioinctes & liées ensemble: & si on pense traualler en vne, & negliger les autres; croyant les acquerir l'une apres l'autre, il arriuera qu'on n'aura ni l'une ni l'autre parfaictement. Vray est qu'on aura quelque chose, mais fort imparfaictement; & vaut mieux aux ames tiedes, & de petit courage, de practiquer ce chemin, que rien. Mais l'ame genereuse, avec des fiance de soy-mesme, & ferme confiance en son Dieu, doit traualler à desraciner toutes ses passions, & les suppediter toutes ensemble, autant qu'elle en cognoist, & s'en rendre maistresse & dame; & à mesure qu'elle viendra à les surmonter, elle sentira l'accroissement de ses forces. De mesme est il des vertus, il est ainsi facile de traualler à toutes; pour ce qu'elles sont liées ensemble: & si vrayement on traualle en l'une, les autres la suiuent. Si vne personne traualle en l'humilité, & est humble; elle sera patiente, debon-

ebonnaire, obeyssante à tout le monde, insi des autres ; qui manque à l'une, manque à toutes. L'ame donc fera vne parfaite resolution, de se conuertir par la seconde conuersion. Et comme la premiere conuersion estoit de quitter les pechez, & des vanitez du monde : ceste seconde sera de se quitter soy-mesme, par vne entiere mortification des plus secrets mouuemens de son ame, & de ses trois puissances. Puis des parties inferieures, avec vne diligente recherche de toutes les vertus en leur plus grande perfection, pour se pouuoir du tout abysmer en l'amour de son Dieu. Mais ne pensez pas, cheres ames, acquerir ceste parfaite mortification sans l'oraison. Ce sont les armes pour se vaincre soy mesme, l'oraison & la mortification. Et ne se peuvent separer l'une de l'autre : & on ne peut faire vraye oraison, sans la mortification, ni bonne mortification, sans oraison. Car nul ne se peut bien mortifier, sans la pratique de celle, par laquelle il reçoit la force, & acquiert la grace, que l'on sçait estre l'oraison.

Du premier degré de perfection qui suit la mortification, de ses passions, & affections desordonnées; où l'effouse commence à goûter des divines consolations de son esoux Iesus, qui est le second estat.

CHAPITRE IX.

NOUS auons montré au premier estat de l'ame, soit auant, soit apres sa conuersion, estant encore esclau de ses passions; qu'icelle est en vne froideur spirituelle, prinée de la parfaicte charité de Dieu. Ce que nous auons déclaré estre representé par l'hyuer, saison remplie de gelées, tenebres, & autres calamitez. Mais qu'iceluy passé, & le printemps venu, toute serenité, rien que beautez s'apparoist à nostre veüe. Le iour commençant à poindre, l'aurore esiouyt le cœur: non seulement des hommes, mais encore de toutes creatures qui ont vie. Les oyseaux degoisent leur ramage, les arbres fleurissent, les fleurs s'espanouissent, les campagnes se tapissent de belles verdures. Brief, il ne se voit en ceste saison, qu'allegresse & contentement. Mais parlant mystiquement, de
nostre

nostre petit monde , qui est l'homme. Voyons comment l'hyuer estant passé, c'est à dire , son endurcissement au peché , la grande froideur & les tenebres causées en son ame par les passions , l'esloignants de la vraye charité (ce qui apporte à l'ame toute calamité & malheur interieur) & son printemps venu , qui est l'estat de graces lors que ceste ame a genereusement surmonté la nature , & dompté les passions & affections desordonnées ; lors di-ie, s'apparoist la belle aurore, qui commence à illuminer ceste ame. C'est la grace de Dieu, laquelle en toutes ses actions la conduict, suivant sa sainte volonté. Et estant paruenue à ce premier degré de perfection , se laisse du tout soy-mesme, par vn consentement conforme à la volonté de son Dieu , seul obiect de tous ses desirs , pensées , & affections. Brief , Dieu seul est le commencement , le milieu , & la fin de toutes ses actions & operations, tant interieures qu'exterieures. Lors apparoissent les belles fleurs des vertus produictes de ceste ame , qui la rendent plus belle , que toutes lumieres créées. Lors le chant ramage des oyseaux se faict retentir , par louanges continuelles, accompagnées d'amour diuin , par desirs enflambez de pouuoir faire seruice à son

son Dieu, par esleuations d'esprit, & aspirations en Dieu, qu'il soit loüé de toutes creatures. C'est vn chant ramage qui ne contente pas seulement les hommes, mais encore les Anges, & Dieu mesme y prend tout son plaisir. Et de faict nostre Seigneur se familiarise en telle sorte avec ceste ame, qu'elle semble n'estre plus qu'un avec Dieu, par vne estroicte vnion, non seulement de la volonté, mais encore de toutes ses autres puissances, & du plus pur esprit d'icelle avec son Dieu. De laquelle vnion elle retire des consolations diuines si penetratiues, qu'il ne luy semble plus estre en terre. Ne luy souuenant presque de son estat naturel, si ce n'est en Dieu, où elle voit toutes choses. Amy Lecteur, si'on pouuoit comprendre les graces dont iouyt ceste ame, il n'y a celuy qui ne quitteroit mille mondes, pour en iouyr seulement vn iour.

Icy commence l'explication de plu-
sieurs poincts du Cantique
des Cantiques.

Cantique des Cantiques de Salomon,
Chapitre premier.

*Qu'il me baise du baiser de sa bouche. Car tes
mammelles sont meilleures que le vin.*

*Odoriferantes, plus que les tres-
bons onguents.*

*Quels sont ces baisers, que l'esponse, l'ame fidelle à
Iesus-Christ desire.*

CHAPITRE X.

L'ESPOUSE desire en ce second estat de
perfection, de son bien-aimé, son cher
espoux, auquel elle s'est du tout voüée, qu'il
luy donne des baisers de sa bouche. Mais
quels sont ces baisers, ô ame fidelle, que
tant vous desirez? Ce ne sont plus des plai-
sirs, qui se trouuent en ce monde, duquel
Salomon mesme dit. *Vanité des vanitez, &
toutes choses sont vanitez.* Ni mesme des plai-
sirs spirituels, qui sont les consolations di-
uines. Non pas mesme ceste sainte vnion,

Q qui

qui transforme l'ame du tout en Dieu, autant que la capacité le peut porter, estant reueſtue de ce corps mortel. Mais quels sont ces doux baisers, que desire ceste ame? Aucuns tiennent que c'est la sacrée manducation du corps & sang de Iesus-Christ. Autres, que c'est vne vnion de sa volonté à la volonté de Dieu. Autres, que ce sont les consolations spirituelles. Je veux que tout cecy soit tres-bon & veritable. Mais ce ne sera contre ces opinions, si ie di, suivant la cognoissance qu'en peut donner le saint Esprit, & l'experience que l'ame en faict en cest estat, & la lumiere qu'il luy en donne, que ce baiser dont l'ame s'escrie, *qu'il me baise du baiser de sa bouche*, est vne vnion beatifique qui se faict, non pas en ceste vie; mais là sus au ciel, où lors elle sera vnie & transformée en son Dieu, son tout, sans plus d'entredoux ou empeschement de la nature. Car en cest estat, & au troisieme & quatriesme, l'ame n'a en soy plus grande alteration, que de se veoir parfaitement vnie à son Dieu, & toutes ses operations & mouuemens ne tendent à autre fin. Et si elle en est retardée (dont elle se montre neantmoins contente) c'est par l'vnion de sa volonté à la volonté de son Dieu, qui la veut laisser encore en ceste vie, en laquelle

iaçoit

iaçoit qu'elle iouysse des vnions tres-estroi-
ctes & diuines, si est-ce qu'elle n'y peut
continuer quelquefois l'espace d'une heu-
re, pour ce que le cœur ne le scauroit sup-
porter. C'est pourquoy s'en voyant retirée
& retardée, par son propre corps, & ses in-
clinations naturelles; elle s'escrie toute en-
flambée de ce diuin amour, apres ces baisers
celestes, qui sera lors qu'elle sera deliurée
de son corps; pour se veoir du tout & par-
faictement vnée à son Dieu, le louer & ai-
mer incessamment. Il y a quatre sortes d'v-
nion qui se font en ceste vie. La premiere,
est celle des trois puissances de l'ame avec
son Dieu. La seconde, celle mesme de l'a-
me. La troisiésme, celle du plus pur esprit
avec Dieu. La quatriésme, vne vnion que
Dieu faict quelquefois avec le corps, qui
ne dure que bien peu. C'est lors qu'on voit
les personnes s'esleuer de terre, comme est
arriué à tant de saints personages, qui
ont esté veus esleués de terre bien haut.
Et ceste vnion se faict par le don d'agilité,
que Dieu opere en ceste vie, à l'endroit de
ses plus fidels amis, & ce pour monstrier sa
puissance & bonté. Mais toutes ces vnions
si admirables, ne peuuent encore contenter
l'ame alterée de l'amour diuin. Car plus el-
le gouste les fruiets de ces quatre vnions,

244. DE LA RVINE DE
plus elle se trouue alterée des desirs de la
derniere vnion là suis au ciel. Quant à l'v-
nion des trois puissances de l'ame, qui est
de l'entendement, memoire, & volonté
elle est tres necessaire. L'entendement est
vni à Dieu, lors qu'en toutes ses actions il
ne s'arreste qu'à Dieu seul, premier moteur
de toutes ses actions & fonctions; & que
tout ce qui se passe par l'entendement,
comme toutes occupations necessaires, co-
gitations & autres, se passe par necessité,
sans s'y arrester, à fin de ne donner destour-
bier à l'entendement de s'vnir & operer en
Dieu. L'vnion de la memoire, est lors que
la memoire, ne se ressouuiet plus que de
Dieu: c'est à dire, que toutes les pensées des
choses créées ne la retirent tant soit peu de
cette memoire vnitiue avec son Dieu. Mais
il faut noter qu'en cecy plusieurs se trom-
pent, pensans estre vnis à Dieu à la dernie-
re perfection; pour ce qu'ils sentent vne
continuelle memoire de la presence de
Dieu, qui n'est qu'une vnion de l'une des
puissances de l'ame, qui se peut faire par
vne facilité de nature, aidée de la grace aux
nouveaux conuertis. Mais quant aux par-
faits, ils ne doiuent pas auoir seulement
l'vnion de l'une des puissances, mais de tou-
tes. Et si bien en tels l'ame & le pur esprit est
toufiours

touſiours vni à Dieu, ſi n'ont ils touſiours les ſentimens de ceſte vnion. L'vnion de la volonté eſt lors, qu'elle ne ſe ſepare iamais de la volonté de Dieu, & que ſon premier mouuement & le dernier, demeurent tellement vnīs à la volonté de Dieu, que tout ce qui luy aduient, ſoit au corps, ſoit en l'ame, elle l'accepte de bonne part, le referant du tout à Dieu. Ne voulant, ni ne deſirant autre choſe, que ce que Dieu luy enuoye, & ce qu'il vent, & mettant tout ſon plaīſir, à faire la volonté de Dieu. Nous ne déclarons pas icy particulièrement l'vnion de l'ame, ni celle du pur eſprit, ni des fruit̃s de toutes ces vnions. Ce ſera en vn autre endroit. Eſtant beſoing auant tout de cognoiſtre, ce que ſignifie ce mot vnion. L'vnion eſt vne liaiſon telle de deux choſes ſeparées, qu'il ſemble que ne ſoit qu'un. Quoy que noſtre Dieu ſoit tout, & la creature raiſonnable ne ſoit de ſoy rien, ains la plus vile de toutes les creatures à cauſe du peché: toutefois par ſon amour diuin il s'vnit tellement avec ſa creature, qu'il ſemble que l'ame ne ſoit plus qu'un avec luy, & n'eſtre plus à ſoy-meſme, ains à Dieu; & comme deīſſée. Et ceſte vnion ſe faiēt non par nature, mais par grace. Voyez, ame deuote, l'eſſet de l'amour diuin. Pour ce l'Eſpoſe

Q₃

eſtant

estant embrasée des diuines flambes de cest amour, s'escrie, *qu'il me baise du baiser de sa bouche*, qui est la consommation de la parfaite vnion de laquelle elle espere, & aspire iouyr là sus au ciel. Et s'en voyant encore priuée, elle est en vne continuelle langueur & alteration spirituelle, qui luy cause vn martyre continuel, qui ne se peut accompagner à aucun martyre corporel. Mais ioyeux martyre neantmoins, pour ce que son object est Dieu, & ces flambes sont diuines, qui consumment le corps, & souuent s'y perd la vie. Que di-ie perd la vie? L'ame y trouue mesme la vie. Car mourant par la langueur & assiegement de cest amour diuin, ce n'est pas mort, ains plustost vn rauissement de l'ame hors du corps, & vn transportement iulques au ciel; demeurant le corps en ceste extase, iulques au iour du iugement, & derniere resurrection. Que lors le corps estant reuny avec son ame, sera aussi vni avec son Dieu. Amy Lecteur, ne soyez esmerueillé, si ie parle en ceste sorte de cest amour diuin; & si en ce liure il s'y en traite encore d'auantage. Car bien que ce que i'en di semble merueilleux, si est ce que ce n'est encore rien, au regard de ce qui en est. Par ce qu'il ne se peut prononcer, ni entendre, sinon de ceux & celles qui en sont embrasez.

Du

Du Chapitre premier des Cantiques.

*Ne me venille point considerer, par ce que je suis
brunette, car le soleil m'a decoulourée.*

*L'ame fidelle se complaint pour ses infirmités
naturelles, & prie que l'on n'y veuille
prendre esgard.*

CHAPITRE XI.

EN ce premier estat de perfection, qui
suit l'estat de la parfaite mortification,
& delaisement des ses passions, l'espouse
demeure en vn saint repos, par vnion cōme
ecartique, de son ame, & de ses puissances
uec son Dieu. D'une part elle sent l'opera-
tion de Dieu au plus pur de son esprit, qui
aneantit de toutes parts, par le feu du plus
pur & diuin amour, où les petites imperfe-
ctions, y sont du tout aneanties & consumées.
Mais d'autre part elle sent les infirmités na-
turelles du corps, qui ne peut supporter les
operations secretes de Dieu en son ame,
lesquelles causent des alteratiōs, en la partie
inferieure de l'ame, des langueurs & desirs
dans apres son Dieu, qui affoiblissent tel-
lement le pauvre corps, & luy causent des

excez tels, qu'il en demeure comme en continuel martyre. De ces secrettes operations procedent les rauissemens & extases, puis les enyuremens spirituels, le tout s'apparoissant à l'exterieur. Le corps en devient malade, sans maladie, c'est à dire, que les seules operations de l'vnion de Dieu à l'ame, penetrent en telle sorte, & par des abstractions si viues, que le corps en demeure comme tout brisé de douleur. Et les parties interieures plus nobles du corps, comme le cœur (qui suiuant sa nature, reçoit en soy les impressions de l'amour, à l'exclusion des autres parties du corps) en sont fort offensées. Et de faict si on pouuoit donner ouuerture au corps, on trouueroit le cœur ainsi blessé d'amour, comme on a veu en quelques personnes tombées mortes soudainement. Et entre autres il se trouue au liure intitulé la fleur des exemples, celuy d'une fille qui toute sa vie auoit fort aimé le petit Iesus, & en telle sorte que l'amour qu'elle luy portoit, la faisoit desirer de le veoir en forme humaine en son enfance, & à cest effect pria long-temps nostre Dame sa mere. En fin nostre bon Dieu voyant la pureté & fidel amour de sa seruante & espouse, luy accorda par l'intercession de la vierge, la requeste : & nostre Dame s'apparut à elle
auec

avec son petit fils Iesus entre ses bras, & le luy donna estant lors en oraison tres-fervente. Ladicte fille commença à embrasser ce que tant elle avoit désiré de tout son cœur. Et le petit Iesus luy demandant, combien elle l'aimoit, ie vous aime (dict elle lors) plus que mon cœur. Et derechef nostre Seigneur luy replicquant sa demande, elle luy fit responce d'un violent amour, ie vous aime plus que mon cœur, par ce que vous m'avez aimé, créé & racheté. Ce que dict, son cœur se brisa en pieces, par la violence de l'amour, & mourut à l'instant, les Anges avec grande melodie emportans son ame au ciel. Tellement que les Religieuses du Monastere accoururent, oyant la melodie du chant des Anges, & la trouuerent morte en ignorans la cause. On la fit ouvrir, & on trouua son cœur rompu en quatre parties, & au milieu escript, Ie vous aime plus que mon cœur, par ce que vous m'avez aimé, créé & racheté. Il est de mesme de ces ames, parvenues à cest estat de pur & diuin amour. Lors qu'une ame en cest estat voit les infirmités de son corps, ne pouuant soustenir les operations diuines, il faut, si elle veut laisser la vie au corps, que souuent elle se distraie de c'est amour violent. D'autre part, voyant que les hommes

mes s'en scandalisent, ne le comprenant pas, & qu'elle en reçoit grand mespris, pour estre à l'exterieur deffectueuse, par ces excez, & diuerses operations du feu d'amour diuin, qui semble estre contre la prudence & vertu morale, dont les creatures sont plus de cas, que des vertus couuertes & cachées: pour ce elle se complainct, *n'ayez esgard à moy, par ce que ie suis brunette, car le soleil m'a descolorée.* Voulant dire, que sa couleur brune luy est demeurée, par le peché de nostre premier pere Adam, dont la nature est demeurée subiecte à ceste infirmité corporelle. Mais quant à l'ame, elle est belle, *car le soleil m'a regardé*, dit elle. C'est son Dieu qui a enuysagé son ame, & orné de ses diuines graces, & par sa presence vnitive, dont l'ame est purifiée, & renduë agreable à Dieu. Mais brunette quant au dehors, pour ce que les creatures ne cognoissent la beauté cachée. Outre ce, telles ames ainsi embrasées du feu du diuin amour, reçoient vne peine insupportable, lors qu'elles se voient tomber en quelque petit peché ou imperfection, où il n'y a toutefois de peché, & desquels personne n'en peut estre exempt. Comme le declare mesme la sainte Escri-
ture, *que celuy est menteur, qui se dit estre sans peché.* Car le iuste peche sept fois le iour.

Vray

Vray est que ses fautes sont fort petites, & telles qu'à grand peine les sçait-on cognoistre. Ceste ame donc ainsi vnée à Dieu, reçoit vne si claire cognoissance de ses défauts, qu'elle les apperçoit iusques à la plus petite tache, en laquelle Dieu la laissera quelquefois; nonobstant toute la diligence qu'elle puisse faire de la mortifier, pour la tenir en humilité. Comme il fit à S. Paul, luy donnant l'esguillon de la chair, apres qu'il auoit esté raui iusques au troisième ciel, à fin que la grandeur des reuelations ne l'esleuast à quelque presumption. Notre Dieu donc laisse à l'ame ces petites infirmités, pour luy donner occasion de mériter, par les calomnies & mesdisances, faites & dictes par les hommes, en prenant subiect de ces petites occasions. C'est en quoy ceste fidelle espouse de Iesus-Christ s'aneantit, par vne abyssale humilité, prenant de bon cœur toutes ces iniures. Et la plus grande ioye qu'elle puisse auoir apres Dieu, c'est en ces mespris & delaissement des creatures, pour de tant plus estre vnée avec Dieu.

Du

Du Chapitre deuxiesme des Cantiques.

Il m'a mené au cellier à vin, il a ordonné charité en moy. Appuyez moy de fleurs, environnez moy de pommes, car ie languis d'amour.

Où il est traité de l'enyurement spirituel de l'Espouse, par l'abondance des consolations.

CHAPITRE XII.

L'AME fidelle espouse de Iesus-Christ, se trouuant en ce nouuel estat, & goustant à son desir, les diuins propos, & deuis familiers de son espoux Iesus : par le moyen de l'oraison continuelle, en laquelle Dieu se cōmunique si familièrement à l'ame, comme s'ils n'estoient qu'eux deux au monde, ou bien au ciel (car il ne luy semble plus estre en terre, lors qu'elle est absorbée en ceste plus intime vnion) nostre Dieu luy descouure les secrets de sa diuinité. Qui sont choses si grandes & admirables, qu'il est impossible à icelle, d'en pouuoir donner quelque intelligence aux humains. Pourquoy elle s'écrit : *il m'a mené au cellier à vin.* Par où est entendu la profondeur des perfections de la sainte Trinité, que Dieu faict cognoistre

cognoistre & gouster, à ceste ame sa bien-aimée, par le rauissement de l'entendement. Sortant hors de soy, par l'admiration des secrets mysteres de la sainte Trinité, & de l'humanité de Iesus-Christ, & des autres mysteres de nostre foy. Et lors en ce rauissement de l'entendement en Dieu, elle comprend autant que Dieu luy en donne la grace, à sçauoir de ces secrets celestes. L'ame & le pur esprit de l'ame, ne font autre œuvre, que iouyr, louer, aimer, & contempler Dieu, demeurant en extase, & ne sentant plus aucun mouuement du corps, non plus que si elle estoit hors d'iceluy. Mais d'autant qu'elle ne peut tousiours demeurer en cest estat, nostre Dieu se retirant, & l'ame retournant à soy, le corps s'esueille comme d'un profond sommeil, non pas corporel toutefois; mais d'un rauissement des sentimens. Sortant de ceste extase ou rauissement, les puissances de l'ame, & toutes les facultez; & mesme les sentimens du corps, se trouuent en diuerses operations ou actions, suiuant les influences des graces que Dieu a operé en ceste extase. Et Dieu laisse quelquefois vne impression si penetratiue en l'ame, par la cognoissance qu'elle a eu combien Dieu merite d'estre cognu, aimé, & loué de toutes creatures, qu'elle se trouue

en

en vn desir enflambé de pouuoir satisfaire à ceste impression. Tellement que les puissances de l'ame sont toutes embrasées ; & icelle comme toute yure courreroit volontiers (si Dieu ne la retenoit) par tout criant à tous les hommes, loüons Dieu, aimons Dieu. Et quoy qu'elle se sente retenir à l'interieur, il ne luy est neantmoins possible de s'abstenir, qu'elle ne prononce beaucoup de propos de l'amour diuin, sans reigle ni ordre ; par ce qu'elle est comme vne personne toute enyurée. De mesme que les Apostres, lors qu'ayans reçu le saint Esprit, ils parloient comme personnes yures : tellement qu'on disoit qu'ils auoient beu du moust. Tel est l'effect & l'effort de l'amour diuin, Et les hommes voyans ainsi ceste personne, ne cognoissant que c'est de la grace de Dieu, ni de ses secrets iugemens : & ne comprenant que cest enyurement procede de la nature peu forte, pour soustenir les graces que Dieu faict & departit à l'ame, estant encore dans son corps (graces à la verité ressemblantes à celles, desquelles iouyssent les bien-heureux là sus au ciel) s'en scandalisent, disent que telle personne est de peu de iugement, ou bien qu'elle est ambitieuse, qu'elle faict cognoistre ses secrets, & qu'elle se veut faire

faire paroistre sainte. En fin, si on peut en elle appercevoir quelque imperfection naturelle, en laquelle il n'y aura pas de péché, on en fera de grands vices, & dira, voila ceste sainte personne. Et ceey arriue non seulement par des personnes seculieres; mais des plus spirituelles: & mesme de son confesseur, qui en sera souuent en doute. Il n'y a donc calomnie, qui ne se mette contre ceste creature. Mais ces mespris luy sont vn paradis, elle court au deuant, elle embrasse ces iniures, & fait bien à toutes ces personnes, qui la calomnient en ceste sorte. Mais si quelque personne bien illuminée de Dieu, en a la cognoissance, elle ne mesprisera, ni ne reiettera les graces, que Dieu donne à sa creature, ains luy en rendra loüanges. Ceste ame sortant de ces enyuremens d'amour diuin, ayant les sens rassis, se trouue toute pleine d'une sainte honte, pour les excez d'amour diuin, qui se sont monstrez à l'exterieur, & pour ce que les hommes en ont la cognoissance. Pourquoy elle s'elcrie, *Il m'a mené au cellier à vin, & a ordonné charité en moy, sustentez moy de fleurs, & me confortez de pommes, car ie languis d'amour.* Ceste ame fidelle ayant gousté les effects de l'amour diuin, & cognu les secrets de la sainte Trinité, n'y pouuant continuer
en

en ceste vie : & se trouuant toute languissante , le corps affoibly par les excez de l'ame enyurée d'amour ; demande sa nourriture , pour se sustenter en ceste vie , quand elle dit , *confortez moy de pommes , car ie languis d'amour*. C'est de la manducation de l'Eucharistie , qu'elle entend parler. Côme il est dit au mesme chapitre. *Comme le pom-
mier est entre les arbres de la forest , ainsi est mon
amy entre les fils , sous l'ombre duquel bien de-
siré ie me suis assise , & son fruict a esté doux à
mon palais*. Or nostre Dieu aimant tant la
nature humaine , que pour icelle il auroit
 prins chair humaine & enduré la mort , a
neantmoins voulu demeurer en terre entre
les ames fideles , nous donnant son pre-
tieux corps & sang à manger , sous la figu-
re du pain & du vin au saint Sacrement de
l'Eucharistie. Ceste ame toute languissante
en desire continuellement la manducation ,
par laquelle elle & son corps sont fortifiez ,
& ses langueurs addoucis. Ce luy est vn ra-
fraischissement spirituel , en attendant les
parfaits baisers & embrassemens là sus au
ciel ; car tout ce qu'il y a en terre luy est
amer , si ce n'est son Dieu. Toutes les crea-
res tant soient elles belles , luy sont à de-
goust , & ce monde luy est vn desert ob-
scur : tellement qu'elle n'y peut trouuer
aucun

aucun contentement, ayant ainsi gousté
ce que c'est de Dieu.

Du mesme Chapitre deuxiesme des
Cantiques.

*O filles de Ierusalem, ie vous adire par les che-
ureaux & cerfs des champs; que vous n'es-
neillez & ne faictes esueiller ma bien-ay-
mée, iusques à ce qu'icelle le veuille.*

*Du repos de la contemplation, & comment no-
stre Dieu espons des ames, commande aux
puissances inferieures de l'ame, de ne la
retirer de la contemplation.*

CHAPITRE XIII.

L'ESPOUSE fidelle iouyssant du repos de
la contemplation, en est quelque fois
retirée par les puissances inferieures de l'a-
me, desquelles les operations sont actiues,
suiuant leur nature. Ce qui est cause; que
souuent se passe vn duel entre l'ame, & la
partie inferieure d'icelle contre son pur
esprit, qui de sa nature est capable de la con-
templation & Vnion diuine, suiuant la gracie
R que

que Dieu luy departit, apres la parfaite mortification. Que lors la nature & les propres operations de cest esprit, estant vnies avec la grace, il est autant & plus facile à l'ame, de demeurer en vne continuelle contemplation & iouissance de son Dieu, qu'il n'est facile au corps de manger. Je-di plus, qu'il est plus facile à l'ame en cest estat de perfection, d'estre continuellement vnies avec son Dieu par la contemplation, qu'à vne pierre iettée par violence en hault, de tomber en bas. De mesme, ceste ame se trouuant en ceste liberté, de se pouuoir ioin- dre à son Dieu par amour vnitue, & d'ail- leurs s'en voyant retirée par les puissances inferieures, comme l'entendement, la me- moire, & la partie imaginatiue: encore que la volonté soit vnies avec l'ame, & ceste su- preme partie de l'ame, si est-ce que ces au- tres puissances de l'ame donnent de grands empeschemens. Pour ce que l'entendement se plaist en ses propres operations, qui est de discourir, & vouloir comprendre choses grandes. Car encore que toutes les compre- hensions & discours, ne sont que de choses celestes & de Dieu, si est-ce que la nature sensitiue s'y delecte quelque fois proprie- tairement. Et ces puissances s'arrestant trop à ces operations, retirent l'ame de la con-
templation.

templation de son Dieu, ou pour le moins luy donnent de très grands empeschemens. Et pour ce nostre Dieu, voyant les purs desirs de sa bien aimée, qui ne veut & ne cherche autre iouissance que de son pur amour: commande aux parties inferieures, & puissances de l'ame, de ne la troubler & inquieter, tant qu'elle voudra. C'est à dire, tant que l'ame voudra estre vnüe avec son Dieu, par la contemplation & amour ardent. Que les discours de l'entendement, ni l'occupation de la memoire, & autres actions des parties inferieures, ne la retirent de la contemplation, tant que de soy-mesme elle s'en retire. Soit pour la necessité de la nature, qui ne pourroit tousiours supporter les operations secrettes de l'ame avec Dieu, en la contemplation, soit pour la charité du prochain. Car telle ame ne veut pas viure seulement pour soy-mesme, mais encore faire de soy mesme vn sacrifice, pour le secours de son prochain, iusques à y laisser la vie. Elle se retire donc souuentefois de soy mesme, de la contemplation & familiarité avec Dieu, pour faire charité au prochain, en quoy nostre Dieu se plaist merueilleusement.

Du mesme Chapitre deuxiesme des
Cantiques.

Leue toy, haste toy ma bien-aimée, ma colombe, ma belle & vien, car des-ia l'hyuer est passé.

L'Espoux des ames fidelles Iesus-Christ, inuite à la iouissance du diuin amour sa bien-aimée, luy monstrant que l'hyuer de ses passions est passé & aneanti.

CHAPITRE XIV.

DIEU le Createur inuite l'ame fidelle à s'esleuer pardessus soy, & ne plus s'arrester aux vertus morales; mais de s'esleuer aux vertus surnaturelles, qui est la disposition au troisieme estat, car Dieu a conuoité sa beauté. *Leue toy ma bien-aimée, ma belle, & viens: car voicy l'hyuer est passé, le temps de pluie est changé & s'en est allé. Les fleurs sont apparues en nostre terre, le temps de tailler est venu, & est ouye la voix de la tourterelle en nostre terre.* Quels sont ces esleuemens, esquels Dieu veut attirer l'ame? ou, quelle est ceste perfection? Ne penles pas, amy Lecteur, que ce soit

soit à des vertus, ou mortification ordinaire ou humaine. Car elle est ia paruenüe aux plus hauts degrez de mortification, & des vertus : lesquelles elle peut auer la grace atteindre par son trauail, & ses propres operations. Comme il se monstre en ce que nostre Dieu l'appelle *ma bien aimée, ma belle*. Voulant denotter qu'elle est belle : par ce qu'elle a surmonté toutes ses passions, & est embellie de vertus, esquelles elle a trauaillé iusques à présent. Puis il dit, *l'hyuer est passé, le temps de pluye est changé, & s'en est allé*. Ce qui s'entend de la parfaicte mortification. L'hyuer sont les pechez, ou l'estat imparfaict des imperfections naturelles & vitieuses, dont elle est rendüe maistresse, commandant à soy-mesme, & à toutes ses inclinations naturelles. Car il ne faut pas penser qu'en cest estat l'ame puisse iouyr des vnions & degrez du pur amour diuin, si elle n'a surmonté toutes ses passions & affections, & atteint le sublime degré des vertus. Cecy est la marque à laquelle on cognoist les vraies consolations, & le vray & pur amour, entre les petits sentimens qui procedent de nature. Et puis nostre Seigneur dit, *les fleurs sont apparües en nostre terre*. Ce sont les vertus heroïques qui apparoissent en toutes les actions de l'homme,

qui est de soy pauvre & miserable, estant
 creé du limon de la terre. Et neantmoins ce-
 ste terre produict des fleurs agreables à
 Dieu, qui sont les parfaites vertus, tant en-
 uers son Dieu, qu'enuers son prochain, &
 en soy-mesme. *Le temps du chant des oyseaux*
est venu, & est ouye la voix de la tourterelle en
nostre terre. Toutes ces paroles sont pleines
 de diuins mysteres, lesquels nostre Dieu a
 manifesté à celuy qui entre tous les hom-
 mes, s'est trouué le plus sage, & qui a esté
 doué d'une sapience diuine, qui est Salo-
 mon. Le chant des oyseaux, sont les orai-
 sons continuelles, les iubilations & loian-
 ges de Dieu, les feruentes & bruslantes as-
 pirations & esleuations d'esprit, que ceste
 ame en cest estat faict continuellement vers
 son Dieu. Le chant de la tourterelle, qui est
 vn chant plein de gémissement; sont les
 pleurs & contritions, les oraisons pleines
 de charité, esquelles s'addône l'ame en cest
 estat pour tous les pauvres pecheurs, pour
 soy-mesme, & les ames de purgatoire. O
 estat heureux de ceste ame! Elle commence
 dès lors son paradis. Mais où veut donc en-
 core nostre Dieu esleuer ceste ame d'auanta-
 ge? C'est à vn estat par dessus toutes opera-
 tions humaines, & non procedant de la crea-
 ture. Car iusques à present elle a cooperé de
 sa

sa part à la grace diuine, & y a trauaillé par le franc arbitre. Mais desormais, Dieu veut luy seul operer & agir en ceste ame, comme sera plus outre déclaré. Qu'elle s'abandonne seulement du tout, & se laisse couler entre les mains de Dieu. Et lors nostre Dieu seul operera en elle, l'aneantira non plus par voye humaine; mais par vn secret & diuin amour, qui anullera de toutes parts les plus secrettes parties d'icelle. Par lequel moyen Dieu operera en elle des vertus & perfections surnaturelles & diuines; demeurant le tout incognu aux hommes. Ce seront les œuvres de ce Dieu tout-puissant,

D'un secret aneantissement de l'ame, par un esleuement que Dieu opere. Ce qui est démontré au deuxiesme Chapitre du Cantique des Cantiques, par ces mots.

CHAPITRE XV.

LE figuier a produict ses figues, les vignes florissantes ont rendu leur odeur. Lene toy, haste toy ma bien-aimée, ma belle, & viens ma colombe, qui es es pertuis de la pierre, es cachettes de la muraille. Monstre moy ta face, que ta voix sonne en mes oreilles, car ta voix est douce, & ta face est belle.

Icy l'espoux de nos ames nostre Dieu, demontre que l'ame la bien-aimée, a ia at-
tainct le sublime degré des vertus, quant à
ses propres operations, & que l'odeur d'i-
celles est espendu, iusques à la cognoissance
des hommes. Par laquelle elle est renduë
exemplaire en toutes ses actions; par les
fruits produicts de sa bonne vie, & par les
enseignemens; non tant de paroles que de
faict, qui incitent plusieurs à quitter leur
mauuaïse vie, & conuertit à suiure vne vie
plus parfaicte. Ce qui est entendu quand
nostre Seigneur dit, *le figier a produict ses fi-
gues*. Qui est la charité enuers le prochain,
par laquelle l'ame est renduë odoriferaute
en toutes vertus; non seulement deuant
Dieu, mais encores deuant toutes creatures.
Au quel propos est dit, *les vignes florissantes
ont donné leur odeur*. Car tout est approprié à
l'ame fidelle à Dieu, qui s'achemine de ver-
tu en vertu, iusques au plus sublime degré
de la perfection. *Leue toy donc, & t'en vien
ma bien aimée*. Derechef nostre Dieu inuite
l'espouse à s'esleuer par dessus soy, qui est
de quitter ses propres actions, à fin que par
vne transformation, & par vn amour bea-
tifique, elle s'esleue à vne contemplation
vnirine des perfections secrettes & cachées
de la diuinité. Ayant iusques à present esté
aidée

aidée par le moyen de l'humanité du fils de Dieu, où elle s'est exercée en la meditation & contemplation sainte de la passion de Iesus-Christ crucifié. Quand il dit, *ma colonne qui es, es pertuis de la pierre*. Non que nostre Dieu la veuille du tout retirer de la meditation de la passion: non, car de nostre part nous ne pouuons mediter chose plus agreable à Dieu. Mais que desormais, elle vienne à s'vnir tant avec la diuinité, comme avec l'humanité du Fils de Dieu, par la contemplation d'icelle diuinité, vnie avec l'humanité. En quoy elle ne sera en rien separée de la passion de Iesus-Christ. Mais il faut entendre, que l'ame en ceste vie, ne peut continuellement demeurer, en vne mesme operation. Pour ce l'ame estant transformée du tout en Dieu, par vn aneantissement de toutes ses propres operations, tant soient elles saintes, comme est la contemplation de la passion: elle laisse la seule operation de Dieu en tout soy-mesme, iusques au plus pur de son esprit, pour estre esleuée ou abbaissee quand il plaist à Dieu: auquel cete ame s'est du tout abandonnée, receuant en soy la pure volonté de Dieu. Et tant qu'il la tient esleuée par sus toutes choses créées, en la seule iouissance des operations de Dieu, elle suit ceste diuine contempla-

tion.

tion. Mais nostre Dieu la rabbaissant à des
 œuvres plus actives, lors elle reprend ses
 errres ordinaires, soit de la meditation, soit
 de la contemplation de la passion, ou des
 mysteres de nostre foy, trauaillant ainsi tant
 que Dieu l'en retire. Et par ce moyen l'ame
 va tousiours s'aneantissant. Mais si secrette-
 ment, qu'on ne le peut cognoistre, fors que
 Dieu seul, qui cognoist fort bien les fruicts
 de cest aneantissement. Quant à ceste esle-
 uation à laquelle i'ay dit, que Dieu inuite
 l'ame par dessus ses propres operations,
 pour iouyr par la contemplation des opera-
 tions du plus pur & diuin amour, par la
 grace surnaturelle, qui s'escoule en l'ame en
 ceste vnion, & transformation de la creatu-
 re avec le Createur: il faut entendre, que ce-
 ste ame estant esleuée en la contemplation
 secrète de la diuinité (non sans contempler
 aussi l'humanité, & les mysteres de la sacrée
 passion du Fils de Dieu) cecy ne se faict plus
 par aucune operation passiuë, procedant de
 la creature. Ceste contemplation n'est plus
 douloureuse, mais toute glorieuse & diui-
 ne, en laquelle l'ame est hors de toute for-
 me & image. Icy l'ame ne se sert plus de ses
 puissances & facultez, pour se représenter en
 soy l'humanité du Fils de Dieu tout deschi-
 ré, flagellé, & tous les mysteres de la sainte
 passion.

passion. Mais par vne façon deifique, elle voit, gouste, & cognoist en la diuinité, tout ce qui s'est passé en l'humanité vnüe à la diuinité. Elle voit & contemple ces playes sacrées reluisantes plus que le soleil. Je di le soleil, pour aucunement faire entendre, au moins loing qu'il se peut. Car tout ce qui se peut trouuer de beau en ce monde, ne se peut accomparer à la moindre beauté, que l'ame voit en la gloire, de l'vne des sacrées playes de nostre Dieu. Il faut entendre, que ceste ame ne voit pas tout cela par la veüe corporelle, ni mesme veüe imaginaire, ni par quelque goust, qui se peut comprendre par les sens. Mais par vne esleuation de la plus supreme partie de l'ame, où est le vray pourtraict ou image de la sainte Trinité, sur laquelle Dieu nous a créé; & par dessus soy-mesme, à l'vnion & contemplation des perfections de la diuinité. Esquels mysteres de la sainte Trinité, ce pur esprit demeure du tout absorbé par vn amour seraphique, qui ne se peut donner à entendre, & qui ne peut estre cōprins, si ce n'est par celuy qui en fait l'espreuue. Non plus que l'aneantissement, auquel se trouue cete ame, lors que Dieu retire ses operations, & la laisse es siennes propres. Mais en Dieu toutefois. Car elle n'en est iamais separée. Neantmoins estant pour

268 DE LA RVINE DE
vn temps priuée de ce bien, elle demeure
tellement aneantie, qu'elle ne voudroit vn
seul moment, contre l'ordonnance diuine,
iouyr d'un bien tant désiré, qui est Dieu
mesme.

Du mesme Chapitre deuxiesme des
Cantiques.

*Prenez nous les petits regnards qui gastent les vignes,
car nostre vigne est florie.*

*Icy est monstré combien l'aimée en cest estat de
perfection se doit garder de la vaine gloire,
pour ce que le diable faict ses efforts
de la seduire.*

CHAPITRE XVI.

EN cest estat suréminent, où l'ame fleu-
rit en toutes perfections, & sur tout
en l'aneantissement (car tant plus nostre
Dieu l'esleue à des cognoissances secretes
de sa bonté, tant plus elle vient à s'anean-
tir, par vne abyssale humilité, au deffoubs de
toutes creatures: voire luy semble que l'en-
fer est trop bon pour sa demeure, tant la
science

science de son neant la rend abieſte en affection, & cōgnoiſſance de la verité de ſon rien) non ſans raiſon elle entre en la cōgnoiſſance de ſoy-mefme. Car ſi nous regardons dans vn clair miroir, nous y deſcouurons toutes les petites taches, qui gaſtent & ſouillent noſtre face. De meſme eſt il, que pluſ l'ame s'eſleue en la diuine contemplation, en laquelle elle enuiſage face à face la beauté & pureté de l'eſprit de Dieu, là cōme dans vn miroir, elle voit ſa reſſemblāce, & cōme il la crée pure & nette & en l'eſtat d'innocence. Mais elle y deſcouure auſſi, iuſques à la plus petite tache, de ſes pechez & imperfections naturelles. Il n'y a ſi petite macule en ſon ame, qu'elle n'aperçoive en ceſte claire lumiere, qui reuerbere iuſques au plus intime de ſon eſprit. Oultre ce elle voit le neant, & la plus vile matiere dont ſon corps a eſté formé. Ce qui la rend ſi humiliée en la preſence de Dieu; voyant ſa grande bonté, & que n'ayant eſgard à ſon neant, ni à la vileté de ſon corps, neantmoins il luy departit tant de graces, que de la rendre iouyſſante de ſon pur & diuin amour, & familiarité ſecrete. Mais lors que l'ame voit en Dieu toutes ſes deſſectuoſitez, & ſon pur neant, toute ceſte humiliation ne ſe fait point lors par art, procedant des

opera-

operations de l'ame ou de ses puissances, (en quoy elle pourroit ressentir quelque douleur ou contrition sensible) ains demeure iouyssante en Dieu, de sa gloire, & de la seule operation & ordonnance diuine, où ce pur esprit agit plus en Dieu qu'en soy mesme. Se resiouyssant & se glorifiant de la seule gloire de Dieu, & que en son neant, ce tout, qui est son Dieu, est glorifié. Et quand nostre Dieu se retire, pour la laisser en ses propres operations, elle se met en pratique des actes heroïques d'humilité, & autres vertus, procedantes de cest essentiel aneantissement, qui vient du fond de l'ame, de ceste pure verité, dont elle à iouy. Neantmoins nostre Dieu, dict au Cantiques des Cantiques, parlant à l'ame. *Prenez nous les petits regnards qui gastent les vignes, car nostre vigne est en fleurs. Mon amy est à moy, & moy à luy. Lequel repaist entre le lis, jusques à ce que le jour poinde, & que les ombres s'ensuient.* Car quoy que l'ame soit paruenüe à vn estat si releué, si est-ce qu'elle est encore assaillie de subtile tentation, qui est la vaine gloire. Car le diable superbe, ennemy & enuioux de ceste ame, vient comme vn regnard, par subtiles tentations de vaine gloire, pour la gaster, & corrompre toutes les actions vertueuses, produictes par elle en humilité, luy
iectant

iettant des faiettes de vaine complaisance.
 Pour ce qu'il ſçait bien que de la tenter de
 quelque peché, luy ſeroit peine perdue, &
 qu'elle entreroit pluſtoſt dedans vn feu ar-
 dant, que de commettre vn peché veniel
 volontairement, & deliberement. Et que
 nuls ne ſe trompent, penſant eſtre paruenus
 à ceſt eſtat de perfection, ou vnion avec
 Dieu, pour quelque petit ſentiment de dou-
 ceur. S'ils ne trouuent en eulx ceſte marque
 de la haine du peché, & profond aneantiſſe-
 ment, qu'ils croient hardiment n'eſtre là
 paruenus. Mais quoy que le diable face ſes
 efforts, pour decepuoir ces ames, par ſes ru-
 zées & ſubriles tentations, ſi eſt-ce qu'il
 crainct tant vne ame embrazée, des viues
 flammes de l'amour de Dieu, qu'il n'oſe ſ'en
 approcher que de loing. Et ſi toſt qu'icelle
 ame apperçoit la moindre ſuggeſtion du
 diable, par vne profonde humilité, le dia-
 ble ſ'enfuit, ne la pouuant ſouſtenir. Mais
 qu'elle ſoit neantmoins ſur ſes gardes, pour
 ce qu'en ceſte vie il n'y a eſtat aſſeuré. Il faut
 toujours combattre. Et tant plus que l'ame
 augmentera en vertu, tant plus elle ſera
 aſſaillie, ſoit des diables, ſoit meſme des
 creatures. Mais ce ſera en cecy, qu'elle trou-
 uera les fruicts de la vraye contemplation.
 Dieu donc commande aux Anges, de faire
 bon

bon guet, & de deffendre son espouse, des tromperies des esprits malings; qui comme regnardeaux tatchent de la seduire. A ce que comme vigne qui est en fleur, elle puisse en seureté, & à l'abry des tentations, longuement iouyr de la familiarité de son espoux. Puis qu'il se plaist tellement en la compagnie, se promenant entre les lis & roses, qui sont les vertus. Et ce autant de temps qu'il ombrege l'espouse, & que le iour de la contemplation l'esclaire. Car il a dit, que c'est tout son plaisir, que d'estre avec les fils des hommes.

Du Chapitre troisieme du Cantiques
des Cantiques.

*J'ay cherché de nuit en mon liét, celui que mon
cœur aime, Je l'ay cherché, & ne l'ay pas
trouué, &c.*

*L'espouse ayant goûté les doux embrassemens de
son espoux Iesus, ni pouuant demeurer pour estre
encore en ce corps mortel, cherche son espoux
par vne langueur qui luy cause vn martyre.*

CHAPITRE XVII.

L'AMOUR est vne action si forte, qu'à
iuste raison elle est tenuë plus forte, &
que

que la vie, & que la mort : voire, elle rem-
 porte la victoire par dessus l'enfer. Qu'elle
 soit plus forte que la vie, qui en doute ?
 Veu que celuy qui a son cœur emflammé de
 ces viues flammes d'amour diuin, n'a nulle
 crainte de perdre la vie ; comme ont fait
 tous les martyrs, pour l'amour qu'ils por-
 toient à Dieu. Qu'elle soit plus forte que la
 mort ; qui est celuy, qui aimant nostre Sei-
 gneur, ne desire la mort ; (ie-di estant at-
 tainct de ces viues flammes d'amour) pour
 aller iouir de son bien-aimé là sus au ciel ?
 Qu'elle soit aussi plus forte que l'enfer, cela
 est tres-veritable. Car combien se trouuent
 de saints personnages, contents d'endurer
 les peines d'enfer, iusques à la fin du monde,
 pour le salut de leur prochain ? Cecy ne se
 fait pour autre chose, que pour le grand
 amour qu'ils portent à Dieu. Pour ce, la na-
 ture de l'ame ainsi vnice à son Dieu, en ceste
 vie sureminente, ne pouuant supporter les
 operations de l'amour violent, Dieu s'en
 retire quelque fois, non qu'à la grace, mais
 qu'à la cōmunication secrete, & familiere
 de son diuin amour. Ce qui fait que la pau-
 ure ame, se voyant priuée de celuy, auquel
 elle est toute transformée par amour ; elle
 endure vn martyre incroyable, & autant
 grand, que son obiet est digne d'estre aimé.

Ce qui n'est pas merueille, puis que mesme entre les amours terrestres des creatures, on voit que quelquefois on expose biens, honneurs, voire la propre vie, pour iouir de l'Amour vain, qu'on porte à quelque creature; sans souuent en auoir autre recompense, que la mort & damnation eternelle. Que fera l'ame qui aime, non pas vne creature mortelle; mais vn Dieu immortel? Non pas vne iouissance qui perira, ains des biens qui dureront eternellement? Il seroit besoing de donner à entendre, quel est le bien dont ceste ame iouit en l'vniõ de son Dieu, pour pouuoir comprendre le martyre, qu'elle endure par sa priuation; mais il ne se peut expliquer par langue humaine. Je me seruiray seulement de quelque similitude. Si ceste grande masse de terre, placée au milieu du monde, estoit de crystal, enrichy de toutes les pierres precieuses, or, argent, & de toutes les fleurs odoriferantes, y ioint tous les parfums, les sons resonans de toutes sortes d'instrumens de musique; & que le soleil iettast sur toutes ces beautez ses clairs rayons: l'homme s'estimerait fort heureux, de iouyr sans empeschement, de tous ces plaisirs. Mais tout cecy ne seroit que tenebre & puanteur, & degoustement; au regard des biens dont iouit ceste ame,

seule-

seulement l'espace d'une demie heure, par l'union d'amour divin, & secrette communication qu'elle a avec son Dieu. Laquelle n'est rien toutefois, au prix des biens, & de la parfaite iouissance, à laquelle elle aspire là sus au ciel. Ce peu neantmoins dont elle iouit en ceste vie, luy cause des desirs si ardants, une langueur si poignante, procedante d'un feu interieur, qui la va consumant, que le corps en devient tout extenué. Et quelquefois ces excez, de violent amour divin, la saisissent iusques à en rendre l'esprit; si Dieu contre la foiblesse de nature ne la preseruoit. Quant à la douleur que le corps endure, ce n'est encore rien; car le martyre est interieur en l'ame, & es parties inferieures de l'ame. Mais le pur esprit, que ie nomme la superieure & supreme partie de l'ame, n'est iamais atteint de ces alterations, pour agir tousiours en Dieu seul, sans peine aucune ou langueur; ains bien l'ame & ses puissances du feu d'amour divin, qui la penetre de toutes parts. Ce qui ne se peut autrement donner à entendre, que par ceste maniere de parler. Ces alterations & desirs apres Dieu estans si violens, & la peine en l'ame si grande, que si elle n'estoit immortelle, elle ne la pourroit soustenir. Mais ne pouvant mourir, il faut qu'elle viue en mourant,

rant, c'est à dire, que ceste peine luy est plus dure que mille morts. C'est en ce diuin martyre, que la nature s'aneantit de tous poincts. C'est en ce diuin martyre, que ses pechez sont purgez, iusques à la plus petite imperfection. Car ce feu d'amour la purge en ceste vie, comme le purgatoire en l'autre. Mais bien plus parfaitement. Pour ce que celuy de purgatoire est de neccssité. Mais celuy-cy d'amour volontaire & meritoire. Se trouuant neantmoins ainsi affligée & assiegée, elle s'efforce de trouuer quelque raffraischissement, en la contemplation & vnion de son Dieu. Duquel se sentant separée, elle s'escrie avec l'Espouse aux Cantiques. *I'ay cherché de nuict en mon lit celuy que mon cœur aime, mais ie ne l'ay pas trouué. Je me leuay maintenant, & m'en iray à l'enrouer de la cité, par les rues, & places, ie cherchay celuy que mon ame aime. Je l'ay cherché, mais ie ne l'ay point trouué.* C'en est merueille, que l'ame cherchant ainsi son Dieu, ne le trouue point, pour ce qu'elle ne le cherche pas bien. Il y a icy des imperfections secretes, qui neantmoins seroient reputées grandes perfections, aux estats precedens & moins releuez. Mais au regard de ceste autre perfection, dont nous parlerons en l'autre partie, ce sont de grandes imperfections,

fections, qui seront aneanties, en l'estat de priuation, qui suit apres celuy-cy. L'ame donc cherche la iouissance de son Dieu. Mais de nuit en son liect; comme dit l'Es-
pouse. Ce qu'il faut ainsi entendre; que l'a-
me pour retrouver son Dieu, a recours à ses
propres actions, s'appuyant sur icelles, com-
me sur vn moyen tres-propre, ce qu'elle ne
doit faire. Combien que lors que Dieu se
retire quant aux sentimens, elle peut se ser-
uir de ses operations vertueuses: mais non
avec quelque appuy; ni multiplicité d'a-
ctions. Elle se trompe donc, quand avec
grande ardeur elle s'addonne à vne multi-
plicité de discours, pour s'enflamber: & aus-
si d'auoir recours aux recherches imaginati-
ues, se representant viuement quelque my-
stere, soit de l'incarnation, ou passion du
Fils de Dieu; ou autre. Pour ne trouuer là le
repos de la contemplation, pour iouir de
celuy, pour lequel elle endure ce martyre.
Elle se trompe encore, d'auoir recours à la
recherche des secrets de la sapience diuine
és œures de Dieu, si comme és creatures.
Toutes ces considerations sont tres-bon-
nes & profitables, comme nous dirons ail-
leurs. Mais icy imparfaites, par ce qu'elle
les faiet avec trop de multiplicité, & de
son propre mouuement, qui est vne nuit,

& son propre repos ; au regard des opérations, qu'elle doit produire, procedans de la pureté de son pur esprit, & de la iouissance qu'elle a eu du pur esprit diuin. Pour ce elle dit ; *ie l'ay cherché, mais ie ne l'ay pas trouué.* Car ceste multiplicité empesche, que le pur esprit de Dieu, n'opere si parfaitement en l'ame. Elle s'afflige donc & redouble son martyre ; pour ce qu'il luy semble que la separation de son Dieu, prouient de quelque peché secret qu'elle auroit commis. Ce qui l'a faict recercher sa conscience, pour y trouuer la cause de ladicte separation de son bien-aimé. Ce qui luy est de tant plus amer, qu'elle mesme en pourroit estre la cause ; combien qu'elle n'en ait donné subiect aucun. Mais nostre Dieu le permet ainsi, pour quelque peu de temps, à fin de l'aneantir du tout. Car tout cecy procede, faute de parfait aneantissement & d'experience, qui sont les imperfections de cest estat, lesquelles se consumeront & aneantiront en ceste fournaise d'amour diuin. I'ay quelque peu donné à entendre le martyre secret de l'amour diuin. Je di martyre, pour ce que suiuant sa sensualité, elle choisiroit plustost tous les martyres corporels que celuy-cy. Mais celuy-cy spirituel, estant plus grand, selon la grandeur de son amour, elle veut
aimer,

aimer. Patir, ou mourir. Ce qui est cause
que l'ame ne faiet cas de toutes les affli-
ctions corporelles, pour ce que ce n'est que
plaisir, encore que celuy-cy soit vn ioyeux
martyr.

Poursuite du Chapitre troisieme des
Cantiques.

*Les queteurs qui gardent la cité m'ont trompé.
N'avez vous point veu celui que mon ame
aime? Quand ie les eu vn petit passé,
ie trouuay celui que mon
ame aime.*

*L'espouse par l'aneantissement de soy-mesme, sur-
monte toutes choses créées, & retourne au
repos de la contemplation & union
avec son Dieu.*

CHAPITRE XVIII.

A P R E S que l'ame a recherché de tou-
tes parts, & faiet ce qu'elle a peu, pour
re tourner à la familiarité de son Dieu, par
la contemplation: ayant faiet vne diligente
recherche en sa conscience, pour veoir si

quelque petit peché secret & caché, ne seroit la cause de ceste separation: se trouuant libre, & ne pouuant recognoistre chose dont sa conscience la puisse accuser; ne pouuant aussi recouurer la iouyssance de son bien-aimé, par la consideration de ses œuvres, par les discours de l'intellect, elle à recours aux images interieures; se seruant à c'est effect de la partie imaginative; pour se représenter quelque saint mystere; si comme de l'humanité du fils de Dieu, de la Vierge Marie, ou d'autre saint, auquel elle a deuotion, pour s'enflamber par la consideration d'iceux mysteres. Et ne pouuant en ceste multiplicité d'actions trouuer le repos de la contemplation, en fin toute pleine de langueur, ne pouuant plus supporter l'absence de son Dieu, par vn ancantissement secret, elle se guinde par sus toutes choses ereées, non seulement en la terre; mais encore iusques aux cieux, soit des ames bien-heureuses, soit des Anges qui sont aussi creatures de Dieu. Et par cest ancantissement, se portant au delà de tous ces esprits, paruiuent iusques au pur esprit de Dieu. Icy se trouuent trois sortes d'ancantissement. Le premier, est de la volonté, par ce mesme subtil & violent amour, qui vient à l'ancantir, par vne abyssale humilité, iusques là
mesme;

meſme; d'aneantir, ceste affection amou-
 reuſe, procedante de la volonté. C'eſt vne
 action ſi noble que l'amour diuin, qu'il ne
 peut ni ne doit eſtre limité, attendu que
 ſon obiect, qui eſt Dieu eſt auſſi infini. S'il
 ſe pouuoit faire nous deurions aimer Dieu
 d'un amour infini, au moins quant à la vo-
 lonté. Je ne di pas quant à l'éternité, car no-
 ſtre ame eſtant en ceste ſorte infinie, nous le
 pouuons aimer à toute éternité. Mais ie di
 infini quant à la grandeur de l'amour, ce
 qui n'appartient qu'à Dieu ſeul: car il n'y a
 queluy qui eſt bon ſans fin. Ceste volonté
 neantmoins ſe vient à aneantir en ſes pro-
 pres actions, de vouloir ou non vouloir
 iouir de ſon bien-aimé: non plus & auſſi
 long-temps, que la volonté de ſon Dieu le
 permet. Quoy qu'en ce renoncement de
 ſa volonté, ou de ſoy-meſme, ſon amour
 augmente en pureté & ardeur. Mais telle
 ame eſt ſi indifferente, qu'elle ſe laiſſe plu-
 ſtoſt fondre comme la cire, que vouloir cer-
 cher allegement, par la meſme iouiſſance de
 Dieu: ſi non autant que Dieu le veut, com-
 me eſt dit, & ce par vn meſprix tresprofond
 de ſoy-meſme. L'entendement par apres
 vient auſſi à s'aneantir, és meſmes actions
 d'amour, quand l'ame vient à rechercher
 ſon Dieu en ſes ceuures, & en ſes creatures,

à fin

à fin que par le moyen d'icelles, elle puisse parvenir à la cognoissance de son Dieu : & par la cognoissance, à la iouissance d'iceluy. Or cecy se faict par vne nudité & delaissement de toutes les propres operations, & recherches trop actiues. Car iagoit qu'elles procedent d'un desir excessif d'amour diuin, si est-ce que l'entendement par l'aneantissement de la volonté, vient à la cognoissance, de son trop grand appuy aux actions vertueuses, procedantes de son mouuement. Et voyant que cecy procede à faute d'iceluy aneantissement; elle vient avec la memoire, & la partie imaginative, à s'esconler iusques au plus profond abyssme de son neant. Et lors au moment que l'ame & ses puissances sont aneanties, par ceste abyssale humilité, cest esprit, partie supreme de l'ame, vient à s'enuoler plus viste qu'un esclai, ou plus viste que le rayon du soleil, iettant sa brillante lumiere en quelque lieu, lors que les obstacles en sont ostez. Ainsi doncques cest esprit vient à s'enuoler à l'vnion de son Dieu, retournant à luy comme à son centre. Car Dieu est vrayement le centre de nostre ame, & est plus facile à l'ame de se tenir vnue à Dieu par amour, comme estant en son centre, lors que tous les empeschemens sont ostez, que non pas à icelle de demeurer
dans

dans son corps. Mais il faut entendre, que ce vol ne se fait ainsi que quand vn caillou ietté par violence en haut, vient à tomber impetueusement en bas, comme en son lieu & centre naturel : ou bien par quelque eleuation d'esprit, changeant de lieu ; comme pour s'eleuer à la gloire des bien-heureux là sus au ciel. Non, ceste transformation ne se fait pas par operation de la creature. Pour ce que quant à l'estre, & quant à l'essence, nous ne sommes iamais separés de la puissance de nostre Dieu. Comme est la pierre, qui estant violement iettée en haut ; est actuellement & formellement hors de ce qui la soustient naturellement, qui est la terre ; où elle y retourne tousiours, si elle n'est retenuë. Mais de Dieu, qui est nostre propre centre, iamais le peché ni quelque imperfection ne nous en peut retirer, ni quant à l'estre, ni quant à l'essence, ni moins quant à la puissance de celuy nostre Dieu, nostre centre & soustien. Car il est tout en nous, & nous en luy, & par sa presence nous soustient & donne vie à nostre ame & au corps. Et s'il s'en retiroit tant soit peu, en sa predomination & puissance communicative, à ce moment nous retournerions à rien, sans plus subsister en estre. Et cecy est vne des peines des damnez. D'autant qu'ils sont pri-
 uez

uez à toute eternité de la grace de Dieu: & voyent & cognoissent neantmoins, que iceluy nostre Dieu, comme leur centre, les soustient en estre. Dont ils sont contraincts, & les diables mesmes, de recognoistre nostre Dieu, & createur. Comme dict fort bien saint Paul, *tous genoux flechissent devant nostre Dieu, des cieux, de la terre & des enfers.* Et iacoit que ceste recognoissance soit contraincte & non volontaire; & qu'ils le fassent avec blasphemes, si sont ils contraincts, par la puissance immediate de nostre Dieu, de se recognoistre dependans de sa toute bonté. Mais il le font avec despit; & leur malice est si grande, qu'ils voudroient que nostre Seigneur ne les soustient. Quant aux pecheurs estans encore en ceste vie, il n'y en a si grand, qu'il ne sente au fond du cœur qu'il y a vn Dieu qui les soustient; & sans la faueur duquel ils ne pourroient marcher vn seul pas. Et iacoit que plusieurs malicieusement adorent des faux dieux, si est-ce que par ceste ignorance coupable, ils recognoissent qu'il y a vn plus puissant, qui les soustient; & de qui ils dependent totalement. Il faut donc entendre, que ceste separation de l'ame avec Dieu, ne se fait iamais, ni quant à l'estre, ni quant à la puissance, par laquelle ils nous soustiennent. Mais bien
quant

quant à la grace & charité. Or il y a deux sortes de graces: la premiere est celle que nostre Seigneur donne à tout homme, qui est vne grace suffisante pour se sauuer, & n'y a Turc, ni Payen, qui puisse dire n'auoir ceste grace, par laquelle il se peut sauuer. La seconde est ceste grace que Dieu departit autant grande, comme on vient à operer à la premiere, par le franc arbitre. Car tant plus l'ame est en grace, tant plus elle est vnée à Dieu par le tres-pur & diuin amour. Or les obstacles de la grace, par laquelle l'ame est vnée à Dieu par vn amour beatifique; sont causez par la faute de tres-parfaict aneantissement, d'où procedent toutes les autres bonnes actions. Et lors que l'ame voit en soy ce deffaut, mesmes es actions de ce bruslant amour; elle vient tout à coup purger ce deffaut & obstacle, entre son esprit & celuy de Dieu. Et à ce moment elle se trouue abyssmée en son Dieu: & ceste vnion & transformation se faict par grace & parfaicte charité; par ce diuin amour. Ce qu' auparauant elle estoit en Dieu; par sa puissance & bonté, la soustenant en estre, comme estant son propre centre. Mais la difference est auant le parfaict aneantissement, qu'elle se trouuoit en Dieu conduite & gouvernée sous sa puissance, mais
comme

comme serf & esclaue. Mais apres le parfait aneantissement, elle se iette & s'vnit du tout en Dieu par amour, comme espouse fidelle; & ce avec vne mutuelle familiarité, telle qu'il semble qu'elle soit toute déifiée. Et lors elle s'escrie avec l'Espouse aux Cantiques, *Les guetteurs qui gardent la cité m'ont trouuée. Quant ie les ay eu un petit passé, adonc ie trouuay celui que mon ame aime.* L'ame ayant par le moyen de l'aneantissement susdict, surmonté les deffauts qui se peuuent trouuer és actions les plus releuées; comme de chercher Dieu en ses œuvres, soit és hommes; soit és creatures irraisonnables ou insensibles; par la consideration frequente des merueilles de nostre Dieu: puis montant plus haut iusques aux Anges, & ames bien-heureuses, & mesme la sainte humanité de Iesus-Christ: & voyant qu'en toutes ces bonnes actions, elle n'y procedoit qu'avec les imperfections que i'ay dit estre surmontées, par le vray & parfait aneantissement: en fin ayant retrouué son Dieu, au dessus de tout en son pur esprit, elle retourne & reprend le repos de la contemplation; mais bien plus parfaitement qu'auparauant.

Dudict

Dudiët Chapitre III. des Cantiques.

Le l'ay prins, & ne le laisseray point aller.

*L'ame fidelle estant transportée parsus soy par
l'extase & ravissement, voudroit ne
retourner à son corps.*

CHAPITRE XIX.

QUI est celuy, qui à la verité ne jugeroit cest estat le plus heureux & le plus parfaict, que l'ame fidelle pourroit acquérir en ceste vallée de misere, puis que des-jà elle est parvenue au saint repos de son bien-aymé, par l'ancantissement des actions les plus sainctes, comme nous avons traicté: & par la contemplation & vnion deifique, iouit à souhait de son tout, son Dieu, luy semblant n'y auoir plus d'entredeux entre Dieu & elle? Pourquoy aussi elle s'escrie, *ie l'ay prins, & ne le laisseray point aller iusques à ce que ie le mene en la maison de ma mere, & en la chambre de celle qui m'a engendrée.* Ceste espouse toute embrazée és celestes embrassemens de son Dieu, faict vne respo-

resolution absoluë, de ne le vouloir plus offenser, mesme de quelque petit peché veniel que ce soit, tant que luy sera possible. Ni mesme d'admettre la moindre imperfection qui soit, & aimeroit mieux d'entrer dans vn feu ardent, que de commettre la moindre faute, par laquelle elle pourroit estre separée de son Dieu, par sa propre occasion. Oultre cel l'amour si violent luy cause plusieurs excez, extases ou ravissements. Quant au ravissement il procede souuent de l'admiration, lors que l'ame est profondement plongée en la contemplation. Mais l'extase est de toute autre importance, par ce qu'elle procede, oultre l'admiration, d'un excez d'amour diuin. Or il y a deux sortes d'extases, l'une est l'extase de la volonté, laquelle est meritoire & louable, & elle se faict lors, que la volonré est totalement immobile, à sa resolution pretenduë, qui est de ne laisser vn seul moyen, pour paruenir à sa fin desirée, qui est Dieu. Et lors ceste force extatique la rend si magnanime contre toutes sortes de tentations, que rien ne la peut esbranler, pour la retirer tant soit peu, du chemin royal de la vertu & perfection. L'autre extase est de l'ame & du corps. Je di l'extase qui se termine en Dieu, où l'esprit est transporté. Car il y a des extases

ses trompeuses, qui sont propres, mesmes aux payens. Comme pour exemple, vn grand esprit pourra prendre si grande delectation en la consideration des astres, & autres œuures & qualitez de la science philosophale, qu'il en tombera en pascmoison; ce que s'est veu arriuer à des grands philosophes payens. Mais la vraye extase de l'ame en Dieu, procedant d'un excez de l'amour diuin vni à la grace diuine, c'est lors que l'ame ayant long temps trauaillé à la vigne de nostre Seigneur: quant à soy mesme, par toutes sortes d'aneantissement & mortifications, dont nous auons parlé en tout ce petit traicté: & quant à son prochain, par vne parfaicte charité: où n'y ayant plus d'empeschement entre Dieu & l'ame fidelle, l'amour est si pur, bruslant & violent, qu'il cause ce transport, extase, & excez, où l'ame iouyt des biens incroyablement grands de nostre Dieu, qui la chertit tendrement, comme s'il n'auoit autre soin que de ceste seule ame: il semble à ceste ame iouissante ainsi de son Dieu, que pour la grande confiance qu'elle a en luy, & la ferme resolution qu'elle a faict de n'y plus mettre empeschement de sa part: elle ne le laissera plus aller, & ne se separera iamais plus de luy. Mais, ô ame, il y a bien encore vn au-

T

tre

tre aneantissement à affranchir, plus poignāt & penetratif. Car il vous faut estre affinée ainsi que l'or en la fournaise. Ce sera en l'estat suiuant. Encore qu'en cestuy present, il semble que ne puissiez iouyr de Dieu plus à souhait, si est ce que la parfaicte vnion, où le vray & pur esprit de Dieu, est ressenti & gousté, & du tout possédé; & l'ame transformée en l'vnité de ces deux esprits, de la creature & du Createur, du rien à celuy qui est tout, ne se fait point iusques apres vn autre aneantissement; duquel nous parlerons au chapitre suiuant.

Du mesme Chapitre III. des Cantiques.

Je vous adiuere filles de Ierusalem, que vous n'esueillés l'amie tant qu'elle le veuille.

Icy est traicté de l'union beatifique de l'ame avec son Dieu, & des grands fruicts qu'elle en rapporte.

CHAPITRE XX.

ICY nostre Dieu commande pour la seconde fois, de n'esueiller l'espouse tant qu'elle le veuille. La difference qu'il y a entre

tre la premiere & deuxiesme adiuration , quoy , que semblable en parolles & qu'en toutes les deux l'ame soit absorbée au profond sommeil de la contemplation diuine : est , qu'en la premiere vnion & contemplation , bien que tres-sublime & diuine , l'ame en estoit facilement retirée , par quelque imperfection , non encore aneantie , & ce par sa propre cause. Mais en la seconde , estant icelle mieux exercée en l'eschole du vray amour , & son bien-aimé la trouuant plus constante & affranchie de tous empeschemens , qui auparauant la retiroient du pur amour de son Dieu , & par ainsi la possédant plus pleinement , *ie vous adinne* , dit il , *filles de Ierusa'em* , *que vous n'esueillez l'amie* , *tant qu'elle le vueille*. Pour demonstrier , que ceste ame est maintenant toute sienne , & que d'elle mesme elle n'opere plus par son propre mouuement , ains que par l'aneantissement total , elle est renduë capable de l'operation diuine , & disposée à ce que Dieu l'esleue & la rabbaïsse quand il luy plaist operant seul en icelle. Que ce n'est en fin plus qu'une volonté , qu'un amour , & vne vnion deïfique ou beatifique. Or de dire les operations de Dieu en ceste vnion , tous les discours qu'on en sçauroit faire , ne feroient qu'amoindrir la grace & dignité d'icelle.

T 2

Car

Car nul ne le peut entendre, que celui qui le gouste. Nous en pourrons toutefois cognoistre quelque chose par les effects. En cest estat donc, l'ame est tellement forte, que les diables s'en espouuantent, & ont crainte de s'en approcher avec leurs tentations, pour ce qu'ils sçauent bien, qu'ils en seroient confus. Cest ennemy infernal, avec toutes ses forces & rusée malice, n'est point vne petite mouche, pour ce qu'il n'a plus à combattre contre la creature : ains contre Dieu mesme, qui la conduit en toutes ses operations. Le monde est encore moins, veu qu'elle le foule aux pieds, avec tous ses plaisirs & allechemens, ne cherchant que son Dieu. Quant à soy-mesme, elle est tellement morte, qu'elle ne sent plus tant soit peu de rebellion de nature, qui la puisse destourner de son Dieu. Et pource qu'elle a vn desir alteré de souffrir & endurer des afflictions pour son Dieu, voyant que tout ce qu'il y a au monde ne la peut affliger, ni mesme les diables, pour ce que ses passions & affections sont toutes mortes ; pourtant est il qu'elle desire, mais avec la volonté diuine, que ses passions reuiennent. Non pour offenser Dieu (car elle aimeroit mieux la mort que de l'offenser) non encore pour commettre quelques imperfections (car c'est le plus estoigné de ses desirs

desirs (mais à fin qu'elle puisse endurer quelque chose, pour son bien-aimé nostre Dieu, mort en croix pour elle. Lequel a enduré ce delaissement, où sa propre nature (comme estant homme) luy seruoit encore d'affliction. Pour ce, ceste ame du tout conforme à son Dieu, desire ceste croix. Mais ces desirs ne procedent encore de son propre mouuement, ains de la pure volonté de Dieu, par laquelle elle est conduite. Lesquels desirs ne s'effectuans iusques à son temps, ne laisse neantmoins de meriter, comme si elle enduroit actuellement & de faict. Ce sont les effects de ceste vnion beatifique.

Du dict Chapitre III. des Cantiques.

Qui est celle qui monte du desert, comme une colonne de fumée, faite de parfums, de myrrhe, & d'encens, & de toutes poudres aromatiques?

L'esponse estant par la vie presente separée de son espoux, monte neantmoins en esprit, de ce desert à son bien-aimé, par une oraison continuelle.

CHAPITRE XXI.

EN cest heureux estat, l'ame ne faict que aimer, & louer Dieu, par oraison continuelle, se seruant à cest effect des creatu-

res. *Qui est celle qui monte du desert, comme vne colomne de fumée, faicte de parfums, de myrrhe, & d'encens, & de toutes poudres d'appoticaire?* Quoy que le corps humain habite en ce desert du monde. Car à la verité celuy qui viuent est enamouré des choses celestes, n'aspire & ne tend qu'à icelles. Estant neantmoins contrainct, de demeurer en ceste vallée de miseres, son esprit monte de ce desert, comme vne colomne de fumée faicte de parfums, de myrrhe, & d'encens, qui sont les loüanges & prieres procedant de ceste pure conscience, & de la myrrhe de mortification continuelle. De toutes poudres aromatiques, c'est l'oraison procedante d'un cœur orné de vertus, qui le rend odoriferant deuant Dieu. *Qui est ceste là?* Ce sont les Anges, qui admirent, qu'une petite creature de corps infirme, habite en esprit & conuerse avec les citadins celestes, épouse du Roy de gloire, iouissant de la familiarité. Qui pourroit dire les bruslantes prieres, les loüanges penetrâtes les cieux, se seruant neantmoins de toutes choses créées, pour loüanger Dieu? C'est vne chose commune entre les hommes, que celuy qui aime un autre tendrement, aime tout ce qui viét de la main d'iceluy. Mais que fera l'ame raisonnable, qui en verité aime son Dieu,

sinon

finon aimer tout ce que Dieu a créé, comme estant l'œuvre de ses mains? Pour ce il n'y a si petite creature, en laquelle elle ne recognoisse sa grande puissance, en l'autre la bonté, en d'autres encore sa sapience, sa providence, l'amour grand qu'il porte à sa creature. Brief, il n'y a si petite creature, en laquelle elle n'y trouue des œuvres admirables de ce grand Dieu. Par où elle vient à s'esleuer, admirer, & louer sans cesse le souverain faëteur de toutes choses. Cause pourquoy se servant ainsi des creatures, pour y recognoistre son Dieu: il n'y a chose qui luy puisse donner aucune distraction, ni la separer tant soit peu de son Dieu. Il conuient sçauoir, qu'elle n'est pas tousiours occupée en ceste action; mais lors qu'elle est retirée de la contemplation. Dieu la conduisant quelquefois à vne action, quelquefois à vne autre, prenant son plaisir de la promener, comme dans vn iardin, se ioüant avec ceste ame sa bien-aimée. C'est à dire, que nostre Dieu prend tant de plaisir, avec ceste ame, qui s'est donnée du tout à luy, qu'il semble qu'il n'ait autre soing, que de l'enrichir, & luy ouurir ses thresors cachez. Qui sont les perfections diuines, que nostre Dieu communique, tant en soy, comme en ses œuvres, à ceste ame bien-aimée.

*Du repos que nostre Dieu tient au cœur de l'ame
fidelle, & du soing qu'il en a, pour la pre-
server des ses ennemis.*

CHAPITRE XXII.

VOicy le liét de Salomon, lequel soixante
forts hommes environnent, qui sont les plus
forts d'Israel. Lesquelstous manient l'espée, &
sont tres-bien apprins à la guerre. Chacun son
espée sur la cuisse, pour la craincte des nuicts.
Quel est ce liét, où repose le vray Roy Sa-
lomon nostre Dieu, comme dict l'espoux
aux Cantiques audict Chapitre troisieme ?
Ce n'est autre chose que l'ame fidelle son
espouse. Car il a luy meisme dict, que cest
tout son plaisir, que d'estre avec les fils des
hommes. C'est dans vn cœur humble, & du
tout aneanti qu'il repose, comme dans son
sanctuaire, & habitacle du S. Esprit. C'est le
liét de nostre Dieu. Quels sont ces forts
hommes, qui l'environnent ? Les citadins
celestes, qui ayants passé la milice, ou la
guerre funeste de ceste vallée de misere,
iouissent de la mercede de leur labeur. Ils
sont forts, pour ce qu'ils sont affranchis du
peché. S'esionysants, voyant le ur concita-
din

din ia escrit au liure de vie. L'esprit duquel
 est esleué iusques à l'vniõ de leur Roy no-
 stre Dieu, de la claire vision duquel ils iouis-
 sent. Et voyant qu'en ceste ame pure nostre
 Dieu y repose, par vn mutuel amour, se
 donnant à l'ame reciproquement, comme
 l'ame se donne toute à luy, accompagnent
 leur Roy nostre Dieu, par l'ordonnance di-
 uine, pour la garder par leurs prieres & vigi-
 lance, qu'elle ne vienne à tomber es mains
 de ses ennemis, qui continuellement l'assail-
 lent, estant en ceste vie : & que par quelque
 petite cheutte, le liẽt de leur Roy nostre
 Dieu, qui est le cœur pur de ceste ame ne
 soit souillé. Car elle est encore es tenebres
 de la nuit, qui est ceste vie presente. *Le Roy
 Salomon a faict pour soy vn pavillon des arbres du
 Liban. Il a faict les colonnes d'iceluy d'argent,
 son pavement d'or, son chariot de pourpre, & le
 milieu d'iceluy assorty de dilection pour les filles
 de Ierusalem. Sortez hors filles de Sion, & re-
 gardez le Roy Salomon, & la couronne de la-
 quelle sa mere le couronna au iour de ses nocces,
 & au iour de la liesse de son cœur. Le pa-
 lais, ou repositoire iournalier, que nostre
 Dieu a basti pour soy, c'est ceste ame ge-
 nereuse, & forte en toutes sortes de vertus,
 laquelle ne peut estre corrompue par cho-
 ses creées, ni tentations, ni persecutions, &
 moins*

moins encore par les delices , faueurs & honneurs de ce bas monde. Car tout cela n'a aucune puissance , pour luy faire perdre , tant soit peu de sa generosité , en la poursuite des vertus & de la perfection , iusques à la dernière periode de sa vie. Les colonnes d'iceluy d'argent , c'est la verité de la sainte Escriture , sur laquelle sont fondées & appuyées les vrayes vertus. Son pauemēt d'or , c'est la viue foy simple & nuë , que ceste ame tient engrauee en son cœur. Son chariot de pourpre , c'est la passion douloureuse du fils de Dieu , qui conduit l'ame à vne parfaite vnion de la diuinité. Le milieu d'iceluy assorty de dilection , c'est le lieu de la parfaite charité , qui conioinct , & ne fait plus qu'un de Dieu & de l'ame , par vne transformation d'amour. Regardez tous esprits celestes , & voyez le fils de Dieu au iour de ses nopces , lors qu'il a espousé la nature humaine en son incarnation , par le moyen de laquelle l'ame repose en Dieu par ce sacré sommeil , & Dieu en elle. Amy Lecteur , qui sera l'ame raisonnable tant d'espourueuē de sens & de raison , laquelle voyant tant de si grands benefices , que l'ame reçoit en soy : comme d'estre digne de servir de liēt , de palais royal , pour loger & reposer en soy Dieu mesme , communiquer bouche à bouche & fami-

familierement avec luy, iouir de sa familiarité, & cognoistre les secrets diuins: non plus ni moins qu'une espouse avec son espoux, ou vn enfant avec son pere: qui sera, di-ie, celuy là, qui pour quelque vanité perissable de ce monde; se retirera d'un si grand bien, s'en rendant indigne par sa couardise, & peu de couraige, à embrasser la mortification, & les autres vertus? O ame fidelle, n'oubliez iamais la dignité, ou la fin pour laquelle Dieu vous à créée. Qui n'est autre, que de vous donner tous ces benefices, & la iouissance de sa personne propre, à toute eternité. A quoy tiendra il, que vous ne vous en rendrez capable? Je veux qu'il y ait de la difficulté à se mortifier, & tousiours endurer; tousiours se laisser soy-mesme, à tousiours faire bien & aimer ses ennemis, leur rendât le bien, pour le mal; brief à tousiours aneantir son interieur, & toutes ses volonte, iusques à y consommer la mouelle de ses os. Mais prenez courage, & visez à la fin qui couronne l'œuvre. Et combien celuy là le merite, pour qui nous trauaillons, qui est nostre Dieu. Si serieusement nous regardons la verité, qui est Dieu mesme qui nous y conuie, rien ne nous pourra destourner, de l'entreprise d'un œuvre, qui luy est tant agreable.

Cha.

Chapitre I V. du Cantique des Cantiques.

Combien tu es belle la mienne amie ! & combien tu es belle !

Icy l'espoux depaint toute la beauté de son espouse, qui sont les vraies vertus, par lesquelles elle est rendue agreable à Dieu.

CHAPITRE XXIII.

NOSTRE Dieu voulant de plus fortifier son espouse, à continuer en ce chemin de la perfection, à fin de l'introduire en vn autre estat, qu'il luy prepare incroyablement plus difficile, mais bien plus meritoire : il luy demonstre la beauté de toutes les vertus, par lesquelles elle est vnice à son amour, au chapitre 4. des Cantiques. Où ce qui est dict du corps, des yeux, de la bouche, &c. tout doit estre entendu mystiquement de l'ame. Ce qui vient fort à propos à l'estat de l'ame, qui s'achemine à la perfection, dont nous poursuiverons de traicter. *Mamie combien tu es belle ! combien tu es belle !* Premier, quant à l'operation que
elle

elle a fait de sa part, se rendant capable de la grace, par la mortification & aneantissement. Deuxiesmement, elle est belle, pour la grace gratifiante, iustificante & surabondante. *Tes yeux sont comme ceux des colombes entre tes tresses.* Ceste ame venant à esleuer son entendement, par vne simplicité coulombine, au dessus des choses créées, pour l'eslancer en la vraye cognoissance, & contemplation de son Dieu. *Ta chevelure est comme un troupeau de cheures, qui sont montées de la montaigne de Galaad.* Ce sont les pensées de l'ame, qui continuellement sont esleuées en Dieu. Et comme troupeau, séparées de la memoire, de tout ce qui n'est pas Dieu, ce qui la rend belle, pour la pureté d'icelles pensées. *Tes dents sont cōme un troupeau de brebis d'une mesme grandeur, qui montent du lanoir, desquelles chacune fait deux petits agneaux, & n'y a aucune sterile entre elles.* Les dents qui viennent à briser la nourriture, sont les actions heroïques & vertueuses, par lesquelles elle vient à briser toutes difficultez, pour produire continuellement la charité, tant enuers Dieu, comme enuers le prochain. Au moyen dequoy, elle n'est iamais sterile des biens spirituels, quand apres la contemplation elle produict d'autres actions vertueuses. *Tes lèvres sont comme une*
bende

bende de couleur de graine, & ta parole delectable. Les loüanges, & iubilations continuelles, qui sont vermeilles par l'ardeur de la charité, qui rend l'ame belle deuant nostre Dieu. Tes ionès sont comme vne piece de pomme de grenade, sans ce qui est caché par dedans. Comme la grenade est rouge, & de plusieurs grains delectables: ainsi les actions d'amour que continuellement produict la volonté enuers son bien aimé, par vne parfaicte confiance en sa bonté; luy decourant son cœur, comme à son vniue bien. Lesquelles actiōs estant vnies ensemble, mettant l'ame tout son appuy & confiance, en la passion de Iesus-Christ; rendent vn fruiet doux & agreable à la diuinité. Ton col est comme la tour de David, laquelle est edifiée avec bastillons, mille boucliers pendent en icelle, tous boucliers des forts. C'est lors que la sapience increée estant vnie à l'ame, icelle ame vient à s'esleuer à vne cognoissance tres-subtile, de toutes ses imperfections les plus petites, par où elle se garantit, & les aneantit par la force qu'elle reçoit de la grace diuine, operant neantmoins par son franc arbitre. Tes deux mamelles sont comme deux bichelots iumeaux de la bisse, pasturans entre les lis, iusques à ce que le iour poinde, & que les ombres soient declinées. Ce sont les douceurs & nourritures que l'ame reçoit

reçoit en la doctrine de toute la sainte Es-
criture; par où elle vient à la cognoissance
de la vraye verité, où elle se repaist entre ces
odeurs, iusques à ce que le iour vienne, qui
est la vie eternelle. Où nous verrons la ve-
rité de ce que nous est enseigné, tant par les
Prophetes en l'ancien Testament: comme
par les Apostres & Docteurs au nouveau
Testament, & ce que nous a esté enseigné
par la bouche mesme de nostre Seigneur Ie-
sus-Christ. *Je m'en iray à la montagne de myr-
rhe, & à la montagnette d'encens. Ma bien-ai-
mée tu est toute belle, & en toy n'y a pas de macule.
Viens du Liban avec moy, viens, & tu seras cou-
ronnée du chef d'Amana, & du sommet de Sanir
& d'Hermon, des repaires des lions, & des mon-
tagnes des leopards. Nostre Dieu ayant par di-
uers eslancemens d'amour diuin, esleué sa
bien-aimée au sommet de toutes les vertus,
iusques au plus parfaict repos de la diuine
contemplation: comme il demonstre en la
louange qu'il faiet de toutes les vertus, pro-
cedantes de chasque operation des facul-
tez de l'ame (car nostre Dieu honore ses
saincts, & toute ame qui chemine au che-
min de la vraye perfection) montre la vou-
loir esleuer petit à petit, à vne perfection
plus sublime, qui est la montagne de myr-
rhe. Non pas toutefois, la myrrhe, ou
l'amer-*

l'amertume qu'on gouste par les pechez, procedants de nos imperfections. Mais la myrrhe & l'amertume, de la priuation du soustien, de la douceur, du repos, que l'ame pouuoit auoir en la contemplation de son Dieu. Voire mesmes de la force de laquelle elle estoit appuyée, par la grace que nostre Dieu souloit verser en son ame: quant aux sentiments, non pas sensible: mais réellement & en esprit & verité, en laquelle priuation l'ame ne perd vn seul point de son amour. Sera donc par cete myrrhe esleuée à la montaigne d'un amour diuin le plus pur, que creature puisse auoir. Car nostre Dieu la voyant toute belle & sans tache, l'inuite quant & soy à la montaigne de la croix, où il a rendu son esprit. Et ce, pour ce qu'il la voit capable de supporter l'amertume des tribulations: mais petit à petit, & non tout à coup. *Ma sœur mon épouse tu as nauré mon cœur, tu as nauré mon cœur par vn regard de tes yeux, & par l'un des cheueux de ton col. Combien sont belles tes mammelles, ma sœur, mon épouse, plus que le vin, & l'odeur de tes unguents excède toutes senteurs.* La sapience increée, qui de toute eternité a veu en son essence la beauté de l'ame raisonnable sa creature (laquelle beauté a nauré le cœur de nostre Dieu) voulant dire, que de toute eternité
nostre

nostre Dieu voyant la cheutte del'homme par le peché, & neantmoins ayant esgard à sa beauté (lors qu'il seroit retourné en grace) & la grande perfection où l'ame pourroit paruenir cooperant à la grace par son trauail : ceste beauté, di-ie, a tellement embrasé le cœur de nostre Dieu (il faut vser de ces termes de parler, par ce que les secrets diuins ne se peuuent donner à entendre que par paroles mystiques) iointe à l'amour que nostre Dieu luy portoit, que cela a causé que le fils de Dieu, la seconde personne de la S. Trinité, est sortie du sein paternel, pour descendre en terre, & prédre chair humaine. Le tout par son grand amour & pour s'vnir à sa creature, & puis l'esleuer en sa gloire, luy faisant part de la iouyssance de sa diuinité, & amour diuin. *Tes leures sont distillantes comme rays de miel, miel & laiict est dessous ta langue, & l'odeur de tes vestemens est comme l'odeur d'encens. Ma sœur mon espouse est un iardin enclos, elle est un iardin enclos & une fontaine seellée. Tes rameaux sont comme un paradis de pommes de granades avec les fruiets de pommiers. Cypres avec nard, nard & saffran, sucre & canelle y sont avec tous autres arbres du Liban. Myrrhe & aloës, avec tous les principaux oignements. La fontaine des iardins, le puy des eaux vives, & les ruisseaux du Liban. Lene toy*

Aquilon & viens Auſter. Souffle par mon iardin, à fin que ſes liqueurs odoriferantes diſtillent. Le miel qui eſt diſtillé des leures de l'eſpouſe, eſt la douceur des louanges diuines, lesquelles eſtants diſtillées au feu du diuin amour, toute diſtraction en eſt ſeparée, tellement qu'elle l'enſerre deſſous ſa langue. C'eſt au plus ſecret de ſon ame, où giſt la blancheur & pureté virginale, qui eſt entenduë par le laiët, lequel rend vne odeur trefagreable, & à Dieu & aux hōmes. L'eſpoux accompare ſon eſpouſe à vn iardin enclos. Du iardin enclos, les larrons ne peuuent approcher pour y deſrober. Auſſi l'ame tient tellement enſerrés les graces diuines, par vne profonde humilité, que ni les diables, ni les louanges humaines n'y peuuent rien deſrober. Puis noſtre Dieu l'accompare tãtoſt à vne ſource, ou vne fontaine ſeellée, tantost il-diët que ſes rameaux ſont comme vn paradis, & diuers tiltres honorables que noſtre Dieu, attribue à ſa bien-aimée. Qui ſont toutes les graces, & priuileges ſurnaturels, qui ſont enſerrez en ſon ame. En apres ceſte meſme ame prouoeque ſon eſpoux & ſon Dieu de deſcendre en ſon ame, & manger du fruiët de ſes pommiers, comme il eſt porté au commencement du chapitre cinquieſme. C'eſt à dire, qu'en ces graces celeſtes

lestes que luy mesme luy a donné, il vienne reposer, pour par l'vniõ d'icelluy iouir sans cesse de sa familiarité.

Des visions & reuelations que Dieu enuoye quelquefois aux ames paruenues à ceste pureté de vie. Et comment on peut cognoistre les vrayes visions, au regard des faulses & trompenses.

CHAPITRE XXIV.

EN T R E toutes les prerogatiues que nostre Dieu enuoye à l'ame sa bien-aimée; celle là en est l'vne, laquelle il departit non pas à tous ceux qui sont en ceste perfection: mais suiuant son ordonnance diuine, par laquelle il cognoist les ames qui en feront leur profit. Car aucuns en telles graces se perdroient. Nostre Dieu s'apparoist à l'ame en diuerses manieres, quelquefois en forme de petit enfant, entre les bras de sa mere la vierge glorieuse: quelquefois en maiesté royale, comme en sa Resurrection: quelquefois en forme qu'il estoit tout desplayé en sa passion: & autrefois comme vn pere à son enfant. Mais en quelque sorte que ce soit, il apporte du grãd profit à

fit à l'ame. Il faut entendre que ces visions ne sont pas tousiours de la veüe corporelle, qui sont les moindres, & esquelles il y a plus de peril. Mais le plus souuent ceste representation en forme humaine, se faict qu'ayant les yeux fermez on voit plus naïfvement nostre Dieu, soit en son enfance, ou autrement, soit la glorieule vierge, soit quelque sainct, que non pas de la veüe corporelle. Et nostre Dieu ne s'apparoist iamais à l'ame, sinon pour luy faire quelque grace particuliere. Quelquefois il la corrige de quelques imperfections qu'elle aura en soy, ou par ignorance, ou par quelque negligence. Ceste correction que Dieu faict, donne à l'ame vne sainte honte, d'auoir en soy ceste tache, en la presence de son Dieu. Ce qui luy cause vne grande contrition; ensemble vne force grande pour la mortifier tout à coup. Puis elle reçoit vne paix & ioye interieure, & vne grande confiance en Dieu, avec grande haine de soy mesme; qui augmente l'amour de Dieu, & du prochain. Vne autrefois Dieu luy enseignera plusieurs choses, touchant le chemin de la vertu & perfection. Et sur tout luy monstre sa sainte voloté, en ce qu'elle a à se conduire. Desquels enseignemens l'ame fera plus de profit en vne seule fois, que de tous les enseignemens

gnemens de tous les Docteurs & Predicateurs, les plus illustres qui se puissent trouver. Et lors que ceste ame se voit enseignée de la bouche de Dieu mesme ; elle conçoit en soy vne tres profonde humilité, & demeure toute blessée d'amour, pour se reconnoistre indigne de tels benefices. Car lors elle ne scauroit douter, que ce ne soit Dieu. Autrefois nostre Dieu s'apparoist, pour la deffendre de ses ennemis. Car le diable est si enuieux d'elle, qu'il s'apparoist quelquefois en forme estrange, pour la tourmenter : ou bien par vne haine & despit, pour la deuorer, s'il pouuoit. Mais ceste ame ne le craint non plus qu'une petite mouche, pour la grande assurance qu'elle trouue en la bonté de Dieu ; & ainsi cest esprit malin s'en retourne confus. Quelquefois nostre Dieu s'apparoit cōme vn espoux à son espouse, luy descouurant des grands secrets celestes, mesme des choses à aduenir, touchant son salut & predestination, & quelque fois touchant la sainte Escriture, luy donnant lumiere & intelligence sur icelle, & ainsi en diuerses autres manieres. Mais il faut noter, que l'esprit de Dieu cause tousiours ces effects de vertu que j'ay dict, & sur tout vne tres-profonde humilité & haine de soy-mesme. Et au contraire l'esprit malin voulant de-

ceuoir par quelque tromperie les ames qui s'adonnent au service de Dieu, se transfigure en Ange de lumiere. Mais la fin est fort diuerse, car il rend l'ame superbe, plaine d'orgueil, chagrine, froide en l'amour de Dieu, peu estimant son prochain, & la faict tomber en plusieurs autres pechez. S'il contrefaict le bon esprit voulant corriger & enseigner la vertu, ce sera pour l'attirer à vn desespoir, vne tristesse, & à autre infinité de maux produicts par ces faulses visions. Et iacoit qu'au cōmencement il apporte quelque delectation, si est-ce que la fin en est tousiours funeste. Or ces faulses visions peuvent arriuer pour deux causes, (demeurant neantmoins la principale au secret de Dieu) La premiere est que le diable enuieux de nostre salut, ne pouuant s'approcher des ames fidelles à Iesus-Christ à la descouuerte, pour les tenter, pour ce qu'il y perdrait sa peine, il vse de ceste finesse & ruse pour les deceuoir, encor que le plus souuent il y perd son temps. Car l'ame qui chemine en verité deuant Dieu, cognoit aussi tost la tromperie, & par vne profonde humilité elle a recours à Dieu, & le diable s'en va vaincu, mais il en deçoit plusieurs qui ne se mortifient comme il conuient. La deuxiesme cause pour laquelle les ames sont

deceues

deceus de ces illusions, est par ce que quelque presumption secrete, leur fait desirer les visions & reuelations. Cause pourquoy nostre Dieu permet iustement, pour leur orgueil qu'elles sont trompees, & le diable voyant ceste inclination en quelque ame, s'en iouë, & par ces faulces visions les faict tomber quelquefois en des grands pechez. Or qu'ainsi soit, que ces faulces visions sont fort nuisibles à l'ame, si est-ce qu'il ne faut pour ce reprouuer les vrayes visions, qui viennent de nostre Dieu aux ames pures, & desireuses de la gloire de Dieu. Car tels dons ne sont pas petits, veu le grand profit que l'ame en retire. Mais il ne les faut pas desirer, par ce que ce sont graces surnaturelles, que nostre Dieu ne donne qu'aux saincts. Nous nous deuons tenir indignes de ces visites. Et si on est assure par les effects ou autrement, qu'elles sont de Dieu, on les doit receuoir avec grande humilité. Et sur tout on les doit donner à cognoistre à son confesseur, qui soit homme de bonne vie, & illuminé en la vie spirituelle, suiure tout son conseil, & si c'est Dieu il ne se retirera pas. Mais ceste simple obedience & submission, fera que nostre Dieu redoublera ses graces. Si c'est le diable, se voyant descouuert il se retirera, par ce

que il ne sçauroit supporter l'obedience, par laquelle l'ame se submet à son confesseur, en quoy elle ne peut estre iamais trompée. Mesme s'il aduenoit que le confesseur ne fut assez experimenté & prudent, & ne luy donnast si bon conseil qu'il deburoit, pour ce la personne qui chemine en verité deuant Dieu, & en obedi-
ence aux hommes pour Dieu; nostre Seigneur ne permettra iamais qu'elle soit deceuë, mais luy enuoirà lumiere de la verité par quelque moyen que ce soit.



SECRET PURGATOIRE
DE L'AME FIDELLE,
QVI SE CONSVME AV
FEV DE L'AMOVR DIVIN,
contenant vn troisieme chemin
de sublime perfection, qui est
l'estat de subtraction.

LIVRE TROISIEME.

L'ame estant paruenüe au troisieme estat de perfection representé par l'esté, lors les tonnerres & orages suruiennent, qui sont les grandes afflictions que l'ame endure en cest estat.

CHAPITRE PREMIER.



Nous auons monsté au commencement du deuxiesme liure, que l'homme est vn petit monde; pour ce que les qualitez qui se trouuent en ce grand & vaste vniuers, se retrouuent vrayement en l'homme. Mais beaucoup plus parfaictement, si nous les prenons

prenons mystiquement. Nous auons approprié les quatre saisons de l'année, aux quatre estats de l'ame qui s'achemine à la perfection; laquelle est maintenant paruenüe au troisieme estat, qui est celuy de la priuation, c'est à dire, auquel nostre Dieu delaisé & se retire de ceste ame, luy enuoyant des grandes persecutions, soit en l'interieur, soit en l'exterieur. A l'interieur, par des grandes secheresses d'esprit, aridité, induction, delaisement de tous sentimens, de graces, ferueurs, & de toute facilité aux bonnes œures. Ne laissant neantmoins ceste pauvre ame, de poursuiure & cōtinuer en toutes ses bonnes entreprises, & d'accomplir, quoy que sans goust, toutes ses actions vertueuses; nonobstant la rebellion de nature non accoustumée, & les esleuemens des passions, qui iadis estoient toutes mortes, qui luy sont maintenant plus viues que iamais. Nous monstrerons en autre endroit, la cause de ceste prouidence, & comment Dieu enuoye toutes ces calamitez, pour le plus grand bien de sa bien-aimée. De cete ame, di-ie, qui auparauāt estoit si absorbée, si vnie, si esleuée au sommet d'une sublime contemplation, & amour avec son Dieu. Quant à l'exterieur, la persecution des creatures, mesdisances, calomnies, enuies,

uies, & toute sorte de vitupere & mespris, qu'on sçaura inuenter à sa ruine. Celle qui auparavant estoit en honneur, credit, & estimee de tous les plus parfaicts & vertueux: la voila mesprisée, vilipendée, & abandonnée de toutes creatures. Mais de tant plus qu'elle sera foulée aux pieds des creatures, ainsi que la fleur ou le lys estant foulée aux pieds, vient de tant plus à espandre son odeur: de mesme, l'odeur des vertus, la patience, l'humilité, la charité, & autres; viennent lors à monstrier leurs effects merueilleux, en toute occurrence. Or comme ce troisieme estat de perfection est representé par l'esté: comme c'est lors que la chaleur est en pleine vigueur, ainsi l'ardeur de la charité & violent amour de Dieu, que ceste ame possede en son cœur; ne sera en rien diminuée par ces orages, tempestes, de toutes sortes de persecution, soit de creatures, soit de foy-mesme; soit des esprits infernaux. Et qui plus est, il semble que les esprits celestes, & Dieu mesme, se bandent pour faire endurer ceste ame. Mais en tout cela son amour va croissant, & sa nature s'aneantit de tous poincts. Ce chapitre contient en general ce dont nous parlerons particulierement cy apres, suiuant l'ordre des matieres. Que personne ne se trompe, tout ce qui se traite en

ce

ce troisieme liure, n'est pas pout des personnes, qui ont faict peu de progres en la vie spirituelle. Et sera chose estrange au Lecteur, qui n'en aura faict l'espreuue. d'entendre qu'en vn estat si releué, il y suruient des accidens si contraires à la vertu & perfection. Pourquoy quelqu'vns se pourroient tromper, & se flattant prendroient le mensonge pour la verité, l'ombre pour la vraye effigie. C'est à dire, qu'aucuns n'ayans tra-uailié à la mortification, n'y à se surmonter soymesme, viuans avec leurs passiōs, attaints seulement de quelque petite deuotion, penseroient estre à ce troisieme estat, prenans l'hyuer pour l'esté, & l'esté pour l'hyuer. Je di à ceux-là qu'ils s'examinent premiere-ment, s'ils ont passé tous les estats precedens, mortification, &c. dont il est discours aux liures precedens; & s'ils ont cheminé en toutes ces voyes, que nous auons monstré. Et lors qu'ils esperent & croient pieusement que Dieu leur a faict ceste grace, de receuoir leur seruice en cest estat, qui est le plus agreable à Dieu. Car encore que tout ce que nous traicterons en ce liure, soit des passions & miseres, qui s'y retrouuent: semblables, comme il semble, à celles des pecheurs nouueaux conuertis: si est-ce qu'il y a autant à dire, que de l'hyuer à l'esté, du iour à la

la nuit, & de la verité au mensonge. Et ceste voye est obscure aux creatures, secrette & incognüe, si ce n'est aux ames fort illuminées de Dieu.

D'un secret ancantissement de l'ame fidelle, laquelle sans perdre un seul point de ce pur amour divin, demeure neantmoins en un délaissement & privation totale de son bien, & du secours que nostre Dieu luy souloit donner.

CHAPITRE II.

DIEU le Createur ayant iusques à present, conduict l'ame fidelle sa bien-aimée, iusques à vne perfection tres-releuée, par des operations, non plus terrestres; mais celestes & diuines : vient maintenant à la mener à un ancantissement secret, qui de tant plus est incognu, que ses operations sont differentes de l'estat precedent. Ceste ame qui iusqu'à huy a iouy des delices spirituels, par vne grande familiarité & vnion avec son Dieu: qui ne ressentoit en elle qu'amour, ne viuoit que d'amour, & ne reposoit que par amour au sein de la diuinité. Brieuf, de laquelle la contemplation des secrets celestes, estoit sa nourriture quotidienne, & les

cita-

citadins celestes, les familiers & domestiques. La voicy accablée de miseres, & afflictions tres-poignantes. Qui sera donc celuy qui ne dira, cecy estre vn secret, surpassant tout iugement humain, que d'un estat si parfait en ses operations, tomber sans la propre faute en vn estat si miserable, comme celuy que nous dirons? Car de lormais elle sera priuée, de toute familiarité, qu'elle souloit auoir, en l'oraison cōtinuelle avec son Dieu, qu'elle aimoit vniquement. Cecy luy sera vn aneantissement, le plus subtil & secret, & tel qu'elle mesme ne le pourra cognoistre, Veu qu'estant separée des operations amoureuses, elle ne sera priuée de l'amour essentiel. Sans toutefois qu'elle le sente & cognoisse en cest estat, iusques à ce que Dieu la tire en vn autre estat. Or d'autant plus que le bien dont on ioiuit est grand, d'autant plus la peine d'en estre priuée est grande. Quel bien peut arriuer à la creature raisonnable plus grand, que de iouir à son desir d'un bien infini, qui est Dieu, & de sa grace par son amour diuin? L'ame se voyant tout à coup priuée de ceste ioiissance; s'ensuit que la peine est autant penetratiue en son ame, comme l'amour diuin luy estoit engraue. Et d'autant plus augmente sa douleur, que moins elle descouure la cause de la priuation de

de ce bien. Car si elle cognoissoit, que ceste priuation se fist par ordonnance de Dieu, sans que quelque peché en seroit la cause; sa douleur ne luy en seroit si grande, par ce qu'ostant la cause, elle auroit espoir de recouurer le bien perdu. Mais sentant sa conscience nette des pechez, elle ne sçait où auoir recours, pour sçauoir si elle en est la seule cause. Nostre Dieu n'estant content de la priuer de tous biens: mais encore l'a reduit en vn abyfme de toutes sortes de tentations, de toutes sortes d'imperfections naturelles, esquelles elle se verra enueloppée, sans aucun secours de la grace diuine, pour la garantir. Celle qui iadis n'estoit qu'une avec son Dieu; la voila autant séparée ou plus de Dieu, que le ciel de la terre, quant aux sentimens & iouïssances de l'ame, mesme quant à la grace. Car il luy semble en estre du tout priuée & abandonnée. Or ceste ignorance est le nœud, & le fondement de l'aneantissement en cest estat. Car si l'ame auoit cognoissance, que ce changement, que ce rabbaïssement, que ceste priuation de tout bien: & de la iouïssance de Dieu mesme, fust vne nouvelle grace que nostre Dieu luy faict, pour l'esleuer puis apres en vn estat plus parfait; sans doute sa peine luy seroit legere.

Mais

Mais ceste ignorance, n'est pas vne ignorance coupable, ains vne sainte ignorance, laquelle doit estre tenuë (comme elle est) pour vne grace tresgrande de nostre Dieu. Par laquelle ignorance, l'ame vient de tant plus à s'aneantir & se mespriser soy-mesme, & toutes ses œuvres & bonnes operations, comme sortantes d'un rien, d'un abyssme de toute misere, comme telle elle se cognoist en effect. Car si elle fust tousiours demeurée en ceste influence de tous biens, quoy que diuins, elle n'eust si bien reconnu ce qu'elle estoit quant à soy-mesme. Cause pourquoy ce rabaissement & ignorance, luy est vne grace autant plus grande, que l'estat ou les operations de l'ame sont plus rabaissees. Et voicy comment cest aneantissement est secret & incognu. En quoy l'amour qu'elle porte à son Dieu est plus pur & parfaict, iacoit qu'elle n'en ait aucun sentiment sensible, ni mesme intellectuel. Pour ce l'espouse dict aux Cantiques des Cantiques Chapitre cinquiesme. *Je suis venu en mon iardin ma sœur, mon espouse, j'ay receuilli ma myrrhe avec mes liqueurs soües flairantes*. C'est la myrrhe de ceste priuation de la presence de Dieu, de ce rabaissement, de cest estat tant espineux. Duquel nostre Dieu vient à en cueillir les vertus plus parfaites, plus fortes

fortes & solides , sortant des operations propres de ceste ame , qui est le iardin ou le repositoire de nostre Dieu.

Que ce delaisnement de Dieu quant aux sentimens sert à l'ame de purgatoire , pour ce que le feu diuin dont elle est assiegée, la va consumant d'une façon tres-subtile.

CHAPITRE III.

IL ne se trouue liaison plus forte que l'amour , lors qu'elle vient à vnir deux choses separées l'une de l'autre. Car il les rend du tout inseparables. Je ne di pas de cest amour terrestre, que l'on porte aux richesses & honneurs de ce monde, n'y encore de celui que l'on a vers quelque creature tant soit-il sainct ; car cest amour est perissable, & suiet à alteration & changement. Je parle donc de l'amour , qui est digne d'estre appellé amour , qui est l'amour diuin, que l'ame fidelle porte à son Dieu. Or de tant plus que cest amour est engraué au cœur de l'homme, tant plus il desire sans repos, la iouissance de son bien-aimé, qui est Dieu. Mais en cest estat, la priuation de la iouis-

X

sance

sance de son Dieu, quant aux sentimens, soit de l'amour reciproque, soit de la grace, mesme de l'affection amoureuse, que l'ame portoit à son Dieu, n'ayant neantmoins, au fond de l'ame, moins d'amour que lors qu'elle le ressentoit : ceste priuation, di-je, de Dieu, luy est vn purgatoire. Par ce que ceste peine est si grande, qu'il n'y a sorte ou espee de tourmens exterieurs, ni de tous les martyrs ensemble, qui puisse estre comparée à ceste peine ou assiegement d'amour diuin, que l'ame endure en ceste priuation. Le tourment des martyrs touche seulement le corps, mais cestuy cy penetre au plus interieur de l'ame, & iusques au plus pur esprit d'icelle, où les puissans se vont consumant. Non toutesfois qu'elles se puissent consumer quant à leur estre (car l'ame viura eternellement) mais tout ce qu'il y a encore d'imparfaict en l'ame, se consume & se purge, ainsi que l'or en la fournaise, rendant l'ame pure, belle, & reluisante deuant Dieu. Lors que l'ame iouissoit de la presence de son Dieu, le corps mesme iouissoit & participoit à ceste grace, & à ces delices. Ainsi de mesme, le corps en cest estat, se va consumant iusques à la moüelle de ses os, par le vif ressentimēt des peines que l'ame endure, qui sont si sensibles

sensibles & subtiles , que & l'ame & le
 corps y-sont autant abyssés , comme ils
 estoient en l'amour en l'estat precedent.
 Celuy qui n'aura experimenté les condi-
 tions de cest estat , ne sçaura comprendre,
 ce que ie-di. Car combien que le feu de
 purgatoire , auquel sont detenues les ames
 pour purger, & payer la dette, qu'elles doib-
 uent à Dieu pour leurs pechez, soit plus actif
 & bruslant que tout le feu de ce monde : si
 est-ce que le feu spirituel de la charité pene-
 tre & purge plus ceste ame , que ne faict le
 feu materiel. Car ces ames sont en charité,
 qui les vnit à Dieu. Si donc estants ainsi
 vnies par charité à Dieu, elles se voyent to-
 talement privées de la iouissance d'iceluy,
 & de sa claire vision, il ne peut estre qu'elles
 n'en endurent des peines incroiables. Et ceste
 priuation est l'obiet du feu spirituel de l'a-
 mour, qui les consume, & purge tout à faict
 la rouille des pechez. Tant plus que l'ame
 decede en parfaicte charité , tant plus elle a
 parfaicte cognoissance de Dieu , & de la fin
 pour laquelle elle a esté créée, qui est de
 iouir de Dieu eternellemēt. Or de tant plus
 qu'elle a parfaicte cognoissance de Dieu,
 par ceste vnion de charité, iacoit qu'elle soit
 detenuë en ces tenebres infernales , ceste
 cognoissance, di-ie , augmente le desir de la

iouissance. Pour la priuation de laquelle, elle souffre des peines incroyables aux humains, plus penetratiues, subtiles & cuisantes que le feu materiel. D'où elle vient à se purger, iusques à ce que tout ce qu'il y auoit en elle d'imparfaict, qui la retardoit, de se pouuoir vnir à son Dieu, par la mesme charité, & iouissance de la vision de Dieu; soit effacé. Et à ce moment qu'elle a satisfait à sa dette, elle entre plus viste qu'un esclair, en la gloire des bien-heureux, où elle iouit de son Dieu à toute eternité, par vne vnion parfaite & d'amour & de gloire. Or à ces ames dont nous parlons, qui sont paruenues à ce troisieme estat des perfection, lesquelles estant encoire en ceste vie sont vnies à ceste mesme charité & amour diuin, priuées neantmoins de la iouissance qu'elles souloient auoir de Dieu, par l'estroite vnion d'amour; ceste priuation, comme i'ay dit, leur sert de purgatoire en ceste vie. Qui n'est pas vne petite grace que Dieu leur fait. Ouy, ie-di que la peine, qu'endure l'ame en ceste vie par la priuation de Dieu, & de sa iouissance d'amour & de grace, & de la parfaicte cognoissance qu'elle souloit auoir d'iceluy en l'estat precedent, est à mon aduis esgal aux peines de priuation, qu'endure l'ame en purgatoire. Combien qu'elles different en ce point, qu'estant

qu'estant l'ame encore en ceste vie, elle n'endure pas le feu materiel, comme celle qui est en purgatoire. Mais la peine luy est autant plus grande, par ce que son corps endure avec elle, les peines de ceste priuation. Ce qui n'arriue point à l'ame en purgatoire: par ce que seule elle endure, le corps estant en terre & sans sentiment. L'ame donc en cest estat de priuation; se purge iusques à la plus petite tache de peché, & augmente en grace & vertus, se disposant à vne perfection surnaturelle; en laquelle elle sera toute celeste. Il faut icy noter quelle grace Dieu faict à la creature, lors qu'il la conduit iusques à la fin de cest estat. Ce qu'il ne faict, s'il n'y trouue l'ame disposée & capable. Car peu perseuerent sans retourner en arriere, & quitter le chemin de la perfection. Si toutefois l'ame pouuoit cognoistre, combien cest estat est meritoire, & agreable à Dieu, outre ce qu'elle satisfait plus en vn moment, qu'en l'autre vie en beaucoup de temps, elle endureroit plustost mille morts, que de laisser le chemin encommencé. Ains courageusement perseuereroit, deust elle estre mille ans en ceste priuation de Dieu, & de l'vnion de son amour.

Des secrettes imperfections dont l'ame n'auoit cognoissance, lesquelles seront purifiées dans vn secret feu d'amour diuin.

CHAPITRE IV.

IL ne se trouue perfection si releuée, qui ne soit encore subiecte à changement, tant qu'on est en ceste vie. Mais que dirons nous, de celle de l'estat precedēt, auquel l'ame estoit plus celeste qu'humaine, & dont les passions estoient tellement mortes, qu'elle ne ressentoit plus aucune rebellion de nature, en toutes ses operations? Quant à la pratique des vertus, il luy estoit plus facile de les mettre en effect, avec les perfections requises, que de prendre la nourriture corporelle. Mais quant aux actions plus releuées, comme l'oraison continuelle, la contemplation, vnion d'amour, les louanges diuines, les excez, abstractions, absorbe-mens, & enyuremens, extases, & tout ce qui s'ensuit, estoient en l'estat precedent, la nourriture spirituelle & continuelle de l'ame, où Dieu seul operoit en elle, & par elle. Qui diroit qu'en vn tel estat & si parfait, il y auroit encore des imperfections cachées & inco-

& incognuës? Il est besoin que nostre Dieu use de ces moyens abyssaux, pour luy en donner lumiere, & les mortifier. Ces imperfections occultes sont, vn appuy trop ferme aux dons & graces de Dieu, & plus qu'en Dieu mesme. Où est caché vn appuy sur ses forces, procedant du franc arbitre, qui incline à quelque petite estime de soy-mesme. Or pour la purifier du tout, Dieu luy soubstraict pour quelque temps, toutes ces graces & dons surnaturels. Outre ce qu'en cest estat de delices, elle est priuée d'un thresor inestimable de vertu, qu'elle acquiert en cest estat de priuation; comme nous monstrerons en autre endroict. Mais à fin qu'on entende, comment sont cachées ces imperfections, souz cest appuy trop ferme aux dons de Dieu, ie diray que le ferme appuy aux graces de Dieu, n'est pas proprement imperfection. Que mesme cest vn acte de grande vertu. Car de tout ce qui vient de Dieu, nous en deuons faire grand cas, & le conseruer avec grande pureté. Mais que ceste imperfection cachée, est vne secrette reflection à soy-mesme en possédant la grace, pour laquelle l'ame sentant en soy vne si grande force, contre toutes sortes d'imperfections; il luy semble comme impossible de retomber en icelles. Comme seroit

tristesse, ou perdre tant soit peu la presence & vnion de son Dieu. Et cecy procede encore d'une autre imperfection, qui est vne ignorance & aveuglement, qui luy empesche de cognoistre la vraye perfection. Ne la cognoissant elle ne la desire, ou n'est si aneantie & humiliée pour la recevoir de la main de Dieu, avec aussi grande affection & amour vnitif, comme en l'autre estat precedent. Cause pourquoy l'ame tombe au commencement de cest estat, en quelque imperfection, par l'ignorance de l'estat où Dieu la conduict, qui luy cause des deffiances, de la toute bonté de Dieu. Elle donc si tost qu'elle sent en soy ce changement, doit prendre vne indifference totale, à recevoir toutes sortes de tribulations, tant interieures, qu'exterieures. S'offrant en sacrifice à Dieu, corps & ame, & toutes les bonnes œuvres qu'elle pourroit faire par le franc arbitre. Que desormais elle soit aneantie quant à soy-mesme; & ait seulement ses fonctions en Dieu, comme en leur centre, pour ne les produire non plus, que la volonté eternelle de Dieu le voudra. Par ceste resignation à la volonté de Dieu, elle sera preseruee de plusieurs imperfections, lesquelles elle pourroit tomber, en ce chemin tant espineux & laborieux. Où elle sera
enue-

enueuillée d'admirables tenebres interieures. Combien qu'en icelles elle ne laissera essentiellement d'aimer Dieu, son souuerain bien. Et en cest estat seront purifiées toutes ces imperfections, pour puis apres viure vne vie sureminente & toute diuine. Car en l'estat precedent, combien qu'elle ait esté du tout vnüe à Dieu; si est-ce que n'ayant encore esté esprouuée & aneantie, comme elle sera en cestuy-cy tant laborieux, delaisée de Dieu quant aux sentimens de la grace: elle ne pouuoit cognoistre les imperfections qui procedoient des vertus, non encore assez esprouuées & purifiées, comme elles seront en cest estat.

L'ame en ce delaisement demeure en ses propres operations, lesquelles Dieu auparauant operoit en elle.

CHAPITRE V.

NOus auons à traicter icy, de la perfection sureminente de l'ame fidelle, laquelle se trouue en deux manieres, ou à iouir, ou à patir. Or la perfection qui consiste à iouir parfaitement de Dieu par vnion d'amour actuel & surnaturel, recepuant
 abon-

abondamment les graces & influences de tous biens, comme il est dit en l'estat precedent; lors que l'ame apres s'estre disposée par longue mortification, a trouué le repos de la parfaite contemplation, ceste perfection, di-ie, pour les diuines operations de Dieu en l'ame, est de loy plus louable; pour ce que l'origine vient de Dieu, qui agit seulement quant au supreme degré d'icelle perfection. Mais la perfection qui seulement consiste à patir est plus meritoire, pour acquérir la gloire celeste. Attendu que la charité est aussi grande au fond de l'ame en patissant, comme elle est en la perfection, qui consiste à iouir de la diuine presence de son Dieu. Ceste perfection de iouissance en l'union de l'ame à Dieu, n'est que contentement; repos, & iubilation, où l'amour ne peut manquer. Mais d'estre priué de ceste iouissance & vnion, & endurer & supporter toutes sortes d'afflictions plus que naturelles; & en cest estat aimer autant son Dieu en patissant, comme en iouissant, ceste perfection est plus qu'angelique & celeste; veu qu'au ciel ils iouissent sans plus patir. L'ame donc estant paruenue à ceste perfection de patir sans iouir, merite merueilleusement. Mais il conuient entendre comment cecy se fait. En l'estat precedent de l'ame iouissante de

de Dieu, elle estoit tellement aneantie & hors de soy-mesme, qu'elle ne pensoit, ne faisoit, & ne produisoit vne seule action, tant fust elle sainte, si ce n'estoit en Dieu, & du tout hors de soy-mesme: elle estoit du tout absorbée en Dieu, & Dieu seul operoit en elle, & en toutes ses actions. Mais en cest estat de patir sans iouir, Dieu s'est du tout retiré de l'ame, quant à l'experience de sa presence. Elle est laissée en ses propres operations, c'est à dire, que par le secours du franc arbitre, & celuy de la grace commune seulement, & sans aide des secondes graces & faueurs de Dieu, elle travaille, combat, & supporte toutes afflictions, tentations, persecutions, tant des creatures, que de soy-mesme. Operant elle seule, par le seul mouuement de la bonne volonté, encore estant fort affoiblie, par l'abondance des afflictions, & tenebres interieures. Ces actions neantmoins, procedantes de ses propres operations, & sortants de la source de la grace, & du vray & fidele amour diuin, qui est au fond de l'ame, absconse sous ces tenebres (sous ce delaisement & abandonnement de Dieu) sont si agreables à sa diuine maiesté, qu'il n'est possible de plus. L'espouse dit aux Cantiques Chap. cinquieme, *J'ay mangé mon rais*

avec

avec mon miel, j'ay beu mon vin avec mon lait: mangez & beuvez mes amis; enyurez vous mes treschers. Icy l'ame inuite tous les fideles à s'estouir quant & elle, par vn vray & fidele amour, autant en aduersité, comme en prosperité. Et que toutes les rigueurs des afflictions, soient nourriture & contentement à l'ame, autant que les consolations dont elle iouissoit en l'estat precedent.

De la priuation de Dieu quant aux trois puissances de l'ame, & premier de l'entendement.

CHAPITRE VI.

L'ENTENDEMENT, la memoire, & la volenté sont les trois puissances de l'ame, esquelles Dieu estoit parfaictement vni en l'estat precedent, & dont à present il s'est du tout soubstraict, & a priué l'ame de ceste vnion: ie-di de la communication secrette, diuines illustrations, & familiarité qu'il souloit auoir avec icelle. Il s'est retiré de l'entendement, lequel par vne vnion deificque n'estoit occupé, qu'à la comprehension des grandeurs des perfections diuines, si comme de la bonté, sapience, puissance, de la gloire

gloire infinie, & de tous merites, loüanges, & attributs qui luy appartiennent. Toutes ces occupations secretes, estoient les liens par lesquels l'ame estoit abstraite du tout en l'amour de son Dieu. Toutes ces occupations, ne se faisoient par discours de l'entendement, mais par vne viue cognoissance, procedante immediatemēt de Dieu meisme, & de sa diuine lumiere en son intelligence. Et quant aux actions necessaires à l'entretien de la vie humaine; comme occupations, soings, & tout ce à quoy la creature est subiecte: tout cecy se passoit en l'entendement, sans s'arrester non plus qu'à chose estrangere. Mais en ce troisieme estat de priuation, tout ce que ie viens de dire est disparu. L'ame n'a en son entendement que trouble, inquietudes, tenebres, & n'a autre impression que les images des choses creées, sans auoir vne seule adhesion à son Dieu, non plus que si elle n'en auoit iamais eu la cognoissance. Et quoy que l'entendement traueille pour reietter ces immondices, & impressions tenebreuses: il ne luy est non plus possible, que de faire de la nuit le iour. Et la cause est, par ce que cecy ne procede de sa propre faute. Nostre Dieu luy enuoyāt, & luy seul estant l'auteur de ces calamitez: laissant l'entendement en ses propres operations.

tions. Et à la verité, l'ame de soy mesme, pour la cheute de nostre premier pere, ne fust la grace de Dieu, ne produiroit iamais que telles actions terrestres & tenebreuses, pleines d'espines & ronces sauvages, qui sont en effect toutes sortes d'imperfections. Vous voyez maintenant combien ceste ame endure, sentant en elle des choses si contraires à l'amour diuin, qui brusle au fond de l'ame. Celle qui auparauât estoit maistresse de toutes ses puissances, n'y admettant que Dieu seul : la voila esclauue de soy mesme, estant contraincte de soustenir en son entendement, ce que tant luy desplaist. Mais cecy luy est vn grand merite, pour ce que c'est du tout contre sa volonté. Cela luy seruant de martyre continuel, auquel elle s'aneantit & se purifie. Car la priuation de la cognoissance que souloit auoir l'entendement de son Dieu, luy est vrayement vn martyre insupportable; pour ce qu'elle n'est pas seulement contraincte d'en estre priuée; mais encore de receuoir en soy choses si contraires, & qui luy sont tant detestables, pour la grande pureté de l'amour. Ne scachant d'où procedent tous ces changements, & n'y pouuant remedier. Il n'est pas à croire en combien d'angoisses & afflictions ceste ame se trouue. Et neantmoins
en

en toutes ces calamités de l'ame, nostre Dieu se complaint, sçachant bien qu'elles luy sont profitables, pour ce nouuel aneantissement, auquel il prend plaisir. Et de veoir aussi la bien aimée en ces combats, estre genereuse à la poursuite des premiers desirs, qui sont d'estre tousiours agreable à Dieu, & qui mourroit plustost tres-volontiers que de l'abandonner.

De la priuation de Dieu quant à la memoire.

CHAPITRE VII.

LA memoire, est la seconde puissance de l'ame, à laquelle Dieu estant vni par la continuelle presence; toutes ses pensées y sont tellement fichées, que sa vie est vne oraison continuelle, & bien peu reçoit elle quelque distraction, de tout ce qu'il y a au monde. Ce que ie coule legerement, par ce qu'au liure precedent il en est donné ample cognoissance. Et ce que i'en di à present, n'est que pour donner à cognoistre la difference de l'vniion de l'estat precedent, à cest estat de priuation de laquelle nous traictons.

Autant que la presence de Dieu en la memoire

moire est necessaire, pour vnir la volonté à Dieu, & puis enflamber la partie amatiue en l'amour de Dieu; autant l'est aussi la priuation & soubstraction, pour esleuer l'ame à vn estat plus parfait. Or combien que ces trois puissances, soient distinctes en qualitez & operations; si est ce qu'elles sont tellement vnies, que les operations diuerſes qui en procedent, ſuiuant leurs fonctions naturelles, viennent à les vnir en sorte que tout en est rapporté à vne meſme fin qui est Dieu. Et bien difficilement l'vne opere ſans l'autre. Tellement que ſi l'entendement est vni à Dieu par amour, la memoire & la volonté, viennent aussi à s'y vnir. Et comme ces operations vnitiues avec Dieu, rendent l'ame parfaite quant aux actions; ainſi la priuation de Dieu és puissances de l'ame, en rend les œuvres ſeparées. En sorte que la memoire n'admet plus en ſoy que diſtraction, & penſées pleines d'inquietudes. Perdant la ſouuenance de toutes les graces naturelles & ſurnaturelles, qu'elle ſouloit recevoir de Dieu. Enſemble de la familiarité ſecrete, & de l'eſtroitte conionction de l'amour diuin, dont elle ſouloit iouïr avec Dieu. Bref tout l'estat precedent, qui abondoit en delices ſpirituelles, luy est tellement hors de la memoire, comme ſi elle n'en auoit
iamais

iamais eu cognoissance, quoy que toutes-
 fois, selon la raison elle sçait bien auoir passé
 toutes ces choses. Et cecy se passe en la me-
 moire comme vne ombre, ou songe, ou
 quelque chose imaginaire. En sorte qu'elle
 dispute quelque fois en soy mesme, si tou-
 tes ces choses se sont passées en elle. Et à la
 verité, elle ne peut qu'aduouier que tout
 cela soit passé en elle. Mais il luy semble &
 croit, auoir esté trompée du diable, se voyant
 apres tant de belles graces receües, reduitte
 en vn estat si miserable. Ou bien par ses pro-
 pres imaginations. Ou si contre toutes ces
 tenebres qui se presentent, elle s'appuye sur
 la ferme assurance, que ses confesseurs luy
 auront donné lors, elle croyra les auoir
 trompé. Non volontairement, mais qu'elle
 leur auroit faict entendre, ce que lors elle
 croioit estre verité (comme de fait il estoit)
 & dont maintenant elle doubte pour ces te-
 nebres interieures. Par ainsi ceste creature
 tombe d'un abyfme de misere en vn autre.
 Voylà ce qu'elle endure, par la priuation de
 la presence & vnion de Dieu en la memoire.

Ceste creature n'est encor assés aneantie
 & affligée, d'auoir la memoire retirée de
 Dieu, & obfusquée de tenebres. Elle est en-
 core assaillie de vaines pensées, scrupuleu-
 ses & douteuses, de deffiance de Dieu, de

X

pensées

pensées contre la Foy, & predestination, & qu'elle ne doit esperer de son salut. Brief c'est comme vne mer de toutes amertumes, qui passe par ceste memoire, & tout contre sa volonté.

Tout luy est si desplaisant, qu'elle ne le sçait supporter, pour ce qu'elle pense estre en cest estat desagreable à Dieu. Elle travaille donc, elle combat, & cherche tous les moyens pour s'en deliurer. Mais en vain. Car c'est Dieu, qui luy laisse ceste croix.

L'ame doncques croyant estre desagreable à Dieu, quand elle voit toutes ces choses estrangeres passer en sa memoire, cōmence à produire mille actes de mortification, & de vertus heroïques. Ce qu'elle ne feroit, si elle ne sentoit en elle toutes ces contradictions & rebellions. Car tout cecy ne procede pas de la nature immortifiée, ains Dieu la laisse ainsi à soy mesme, luy enuoyant ces ennemis estrangers. Ce qu'estant du tout contre ses desirs & volonté, luy sert de merite tresgrand au lieu de peché. Quoy que le plus souuent elle craint auoir du peché en ces tenebres. Ne pouuant bonnement discerner s'il y a peché ou merite, iusques à ce qu'elle soit deliurée de cest estat. Cause pour laquelle il est lors bien necessaire, d'auoir vn confesseur fort illuminé & expérimenté

L'AMOUR PROPRE. LIV. III. 339
menté en la vie spirituelle, pour durant cest
estât luy monstrier le chemin droit, en
quoy l'ame pourroit trouuer grand sup-
port, à fin de ne tomber, en ce si dange-
reux chemin.

De la subtraction de Dieu quant à la volonté.

CHAPITRE VIII.

TOUTS ces euenemens estranges, es-
quels l'ame s'aneantit, sembleront
fort admirables. Comme ils sont aussi aux
yeux des hommes. Par ce qu'ils semblent
faire approcher la vie de l'ame en cest estât,
à celle des mondains, & qui sont encore es-
claves de leurs passions. Mais il y a bien de
la difference. Car en l'estât de pecheur, ces
passions viennent de la nature corrompue,
de l'habitude au peché, de l'immortifica-
tion, continuation aux inclinations vitieu-
ses, de son amour propre, & de toutes ses
affections desordonnées, qui ont esté du de-
puis consumées par la mortification. Apres
laquelle l'ame a esté esleuée de Dieu à vn
autre chemin, où elle abondoit de toutes
graces surnaturelles. Mais nostre Dieu fait à
present esleuer toutes ces mesmes passions;

combien que ia mortes, & mesme la partie irascible; pour affliger ceste creature fidelle. Suscitant aussi les diables d'enfer, pour esproouuer sa patience & les vertus. Et quelquefois les ennemis les plus cruels, tant de sa diuine maiesté, que des hommes.

Or la volonté, qui est comme i'ay dit, la troisiéme puissance de l'ame, ne se trouue pas seulement priuée (ainsi que sont l'entendement; & la memoire) de la presence & vnion de Dieu: mais aussi agittée de toutes sortes de persecution, visibles, & inuisibles. Ainsi qu'un nauire au milieu de la mer, battu de toutes sortes de vents, & orages. Et comme en esté aux plus fortes chaleurs, viennent les tonnerres, foudres, & esclairs: ainsi ceste ame, au milieu de l'ardeur de l'amour de son Dieu, qui la va consumant, se trouue accablée de toutes ces tourmentes, & orages, qui luy font la guerre, estant mesme lors insupportable à soy-mesme.

Ceste volonté, qui auparauant estoit si forte, qu'elle commandoit à toutes ses passions, affections, & inclinations desreiglées; & qui tenoit tous les esprits infernaux dessous le pied: la voila à présent debile, subiecte à tous changemens, priuée de toutes forces. L'ame voit la partie irascible s'esleuer contre la volonté, la veut & traueille
pour

pour la suppéditer. Mais elle ne peut, Dieu ne le permettant. Elle voit toutes les facultez de l'ame s'opposer à ceste volonté. La tristesse intolérable l'affligeant iusques à la mort; & quoy qu'elle veuille n'admettre tout cela en elle. Las! elle faict ce qu'elle ne veut, & veut ce qu'elle ne peut. Et cecy est l'une des plus grandes afflictions, qui luy puisse arriuer, de ne pouuoir faire le bien qu'elle desire.

Aucuns pourroient penser, que tout cela arriueroit contre la liberté du franc arbitre; mais qu'ils se desabusent. Le franc arbitre luy demeure de pouuoir faire le bien, & laisser le mal. De sorte qu'icy, quoy qu'elle ne puisse ôster de soy tous ces esleuemens de ses passions, si est-ce qu'elle peut bien ne tomber en peché, tant soit-il petit, & y peut meriter, plus qu'en nulle autre affliction. Icy l'ame se peut escrire avec l'Es-pouse aux Cantiques, chapitre cinquiesme.

Je dors, mais mon cœur veille. C'est la voix de mon amy qui hurte, disant : ouvre moy ma sœur, m'amie, ma colombe, mon entiere : car mon chef est plein de rosée, & mes cheueux entortillez sont pleins des gouttes de la nuit. Que veut dire ceste ame fidelle, parlant de ce repos spirituel? Cela se doit entendre, qu'à present toutes les puissances & facultez de

l'ame, estants endormies & assoupies au milieu de ces tenebres interieures, & obscuritez, par toutes sortes d'afflictions, & externes, & internes; elle n'a cognoissance de la vraye lumiere, qui est son Dieu. Et neantmoins, quoy qu'absorbée en cest endormissement interieur, son cœur veille. C'est à dire, qu'au plus pur de cest esprit, ou bien, si mieux vous l'aimez, à la supreme partie de l'ame, sous ces ombrages apparoissent tousiours quelques petits rayons de la grace diuine, où l'ame n'est iamais separée du plus pur & diuin amour, qu'elle porte à son Dieu; veillant continuellement à fin de ne s'en separer tant soit peu. Ou bien c'est lors que le corps estant occupé aux necessitez corporelles; le plus intime de cest esprit veille continuellement en la contemplation des choses celestes, & loüanges de son Dieu, quoy qu'absconsé sous l'ombrage de ces tenebres. Si toutefois ceste volonté est priuée de la presence de Dieu, quant aux sentimens de la grace, elle n'est pour ce priuée de la presence d'iceluy essentiellemēt. Mais les effects en sont autres, lors que nostre Dieu frappe à la porte de nostre cœur, par des viues inspirations, à fin de le fortifier, & luy donner nouuelles forces à supporter des nouveaux assaux. Car en cest estat l'ame n'a
iamais

iamais vne seule minutte de repos ; ains toujours elle endure des afflictions , plus que naturelles. Par ce que naturellement l'ame ne pourroit supporter, sans peril d'en-courir la mort , ces terribles afflictions , si Dieu ne luy enuoyoit des forces , & au corps & en l'ame, plus que naturelles, pour endurer ceste croix. Et neantmoins la force que Dieu luy donne est si peu ressentie, qu'elle doute à tout moment y auoir suc-combé.

Ceste sapience increée l'inuite à luy ou-urir la porte de son cœur, par la memoire de la passion douloureuse de son fils Iesus-Christ, lors qu'il estoit en la nuit obscure de ceste vie mortelle, surchargé de toutes sortes d'afflictions, plus que creature hu-maine scauroit iamais supporter, ou com-prendre. A fin qu'icelle ame soit autant vnice en Dieu en la croix : comme elle l'a esté en la iouissance des graces & douceurs, quant aux sentimens. En quoy la volonté se va aneantissant, & purifiant, sans qu'elle en ait aucune cognoissance.

Que doit donc faire ceste pauvre ame en cest estat, tant delaissée à soy-mesme ? Car si elle a recours aux creatures, elle en re-tournera plus affligée. Si elle se descouure à quelque pere spirituel, bien peu l'entēdront

s'ils n'ont passé le même chemin, ou acquis vne longue experience, par le gouvernement des ames. Si l'ame cognoist que son confesseur n'a cognoissance de son estat: il vaut mieux qu'elle passe le plus doucement qu'elle peut, sans luy en donner plus d'esclaircissement. Par ce que si elle luy declare comme doutes ces esleuemens, ou rebellions, quoy que contre sa volonté, il les qualifiera telles que ses passions indomptées. Et comme s'il estoit en sa puissance de les appaiser, luy remontrant que l'on a à la main le franc arbitre; ignorant les secrets de Dieu; ceste pauvre creature laissant son iugement, contre la conscience, croit tout; & puis tombe d'un precipice en vn autre, par les desliances des graces diuines, & doutes de sa predestination. Tellement que si Dieu ne la preseruoit lors, elle tomberoit en des grands pechez, pour les erreurs, esquels il la met son directeur par son ignorance. Mais le bon Dieu scachant sa bonne conscience, la preserue tousiours. Si toutefois elle venoit actuellement à tomber en quelque petit peché, par la violence des tentations, & peu de force de la volonté à y resister; il ne faut perdre courage. Car si le soldat combattant à la guerre pour son Roy, remporte quelque blessure, la playe

le

le rend tout plein de gloire, & ne laisse de continuer ses beaux exploits. De mesme si ceste ame tombe contre sa volonte, la cheute luy doit causer vne plus grande humilite, vn courage plus genereux a soustenir vne nouvelle guerre. Les regrets luy embraser la volonte à vn nouuel amour de son Dieu; tellement que de ce petit mal elle en tire vn plus grand bien.

C'est en cecy qu'on voit la prouidence de Dieu vers ses esleus. Mais à fin que les confesseurs puissent donner secours à telles ames, ils doiuent cognoistre leur vie: & veoir si elles ont passé par l'estamine de la mortification. Et si autrefois leurs passions ont esté du tout mortifiées. Ou si elles ont passé par les estats dont nous auons discou-ru és liures precedens. Et lors voyant que cecy procede de Dieu, il la doit encourager & luy oster tous doutes de sa part. L'asseurer que ce n'est par quelque sienne faute que tout cela luy aduiant. Mais de la bonté de Dieu, pour la conduire à vn plus pur amour de Dieu. Et par ainsi la pauvre ame passera plus legerement ceste mer d'afflictions.

De la

De la subtraction & delaisement de Dieu envers l'ame raisonnable.

CHAPITRE IX.

L'AME fidelle à Dieu, est conduite par la raison, qui est vrayement la guide de toutes ses actions. Mais si ceste lumiere raisonnable s'en retire, par la subtraction de l'vnion de son Dieu, elle tombe encore en vn abyssme de toute amertume. Car la raison estant offusquée, comme elle est en cest estat, tout ce qui luy aduient luy dōne peine, à cause de la droite cōscience, qui la faict aimer mieux mourir, que commettre quelque chose, qui ne fust selon Dieu, ou en Dieu. Neantmoins la priuation de la presence de son Dieu la rend tellement auëgle, qu'elle ne peut discerner le bien d'avec le mal, quāt à ses operations. Specialement les pechez veniels, qu'elle à toutesfois autant en horreur, comme les mortels respectiuement. Et cecy luy est vn aneantissement tressubtil & secret. Car se voyant priuée de la lumiere, qui auparauāt luy faisoit descourir iusques à la plus petite imperfection, mesme naturelle, elle ne peut maintenant recognoistre ce que

ce que c'est peché, ou occasion de merite. Tant la raison est aveuglée par ces tenebres interieures.

Quel remede doit suiure l'ame en ce destroict? Car si elle veut suiure la raison, elle sera plus troublée que devant. Par ce que ceste raison n'a plus la puissance de cognoistre la pure verité, pour la subtraction de la vraye lumiere qui est Dieu. Elle doit donc suiure plustost la bonne conscience que la raison, comme recognoissant en soy mesme d'aimer mieux mourir de mille morts, que de vouloir tant soit peu offenser son Dieu, mesme en vn petit peché veniel, ne soit qu'elle y tombe par fragilité. Et qui plus est, elle aimeroit mieux entrer dans vn feu ardent, que d'admettre en soy ces troubles & se veoir retirée, & frustrée de l'vnion de son Dieu: si non, autant que la disposition diuine le veut ainsi, pour sa plus grande gloire. Lors l'ame doit faire des actes de resignation, de vouloir autant que Dieu le permettra, endurer ces afflictions, voire iusques à la fin du monde, & mesme à toute eternité; si ainsi estoit la volonté de Dieu & sa plus grande gloire. Aimant mieux la gloire de Dieu, & que sa volonté se face en elle, que son propre bien, pourueu que Dieu ne soit pas offensé par elle. Se resionif-
sant

lant de la gloire de Dieu en sa confusion.

Ce sont ces actes de vertus heroïques, que elle doit continuellement pratiquer. Vray est que cecy se doit faire sans recherche, comme procedant du fond de l'ame qui agit toujours en Dieu. S'est il bon d'en auoir parlé, pour ceux qui n'en ont la cognoissance, ou que Dieu leur auroit osté cest instinct.

Comment le pur esprit ou la supreme partie de l'ame est priuée de l'union, & contemplation de son Dieu.

CHAPITRE X.

LE plus pur de cest esprit agissant continuellemēt en Dieu, quand en l'union de la grace diuine en l'estat precedēt, il iouïssoit sans cesse des dons & fruiets de la contemplation diuine, où lors toutes les puissances inferieures estoient submises, & dependantes de ce pur esprit, & iceluy immediatement de Dieu, c'estoit vne union tresparfaicte. Mais à present il demeure suspendu, ne pouuant reposer aux puissances de l'ame, moins aux parties inferieures, par ce que Dieu s'en est aussi soubtraict, au moins actuellement en la maniere que dit est. Aussi

par

par ce que ce pur esprit ne peut parfaicte-
ment agir, ni reposer si ce n'est en Dieu
son vray obiet, duquel estant à present com-
me violement retirée par la volonté di-
vine, elle ne sçait où trouuer repos, par ce
que ceste suspension luy est vn martyre in-
explicable.

De se consoler demeurant en terre, tou-
tes choses, autres que Dieu luy déplaisent.
De s'enuoler au ciel par la contemplation,
elle y trouue des obstacles. Que fera donc
cest esprit ainsi separé de Dieu? Il demeure
dans soy mesme comme dans vne prison;
mais la suspension est quant aux opera-
tions, par ce que les operations de ceste
supreme partie, qui est ce pur esprit, ne sont
autres que la contemplation des choses ce-
lestes. Lesquelles ne pouuant produire, pour
la priuation de son obiet qui est Dieu, l'a-
me & ses puissances, & sur tout la partie
amative, demeure en vne alteration & lan-
gueur spirituelle, qui la va consumant, &
par mesme moyen aussi le corps.

Du

Des lumieres infuses que Dieu enuoie à ceste ame, mais peu, & comment elle s'y doit comporter.

CHAPITRE XI.

QUOY que ces ames soient tant abandonnées quant aux sentimens, si est-ce que quelquefois au milieu de tous ces troubles & abyssales afflictions, nostre Dieu les visite, de quelques lumieres infuses & graces surnaturelles : ou quelquefois de quelques excez d'amour diuin. Mais ces visites durent fort peu, nostre bon Dieu ne les faisant ou donnant pour iouissance de son amour ; ains à fin que par ces rayons de graces, l'ame vienne à se fortifier en la continuation de cest estat, tant penible, & aussi pour luy donner quelque espoir, qu'il la tient en sa protection, & qu'au milieu de toutes ces bourrasques, il la regarde de son amour, pour ne la iamais quitter.

Ces graces donc & lumieres durent fort peu, & le plus vn demy quart d'heure, passant ordinairement comme esclairs, & au plus intime de l'esprit, qui reçoit vne viue intelligence du subiect que nostre Dieu luy monstre. Si c'est qu'il luy enseigne la verité de

de nostre neant, ou quelque autre secret, elle ne l'entend pas, par quelque concept; mais en verité comme il est. Si, di-ie, de nostre neant, ceste veüe luy apporte plus de profit, que de mediter vn an, la vertu d'humilité. Mais par ce qu'elle ignore que ce soit lumiere venant de Dieu, & que l'obiet est vers soy-mesme, elle croit que c'est la cognoissance, que deuons auoir de nous-mesme, pour suiure l'humilité, pour laquelle acquerir nous sommes obligez de trauailler.

Quand ceste lumiere est passée, elle doit mettre en pratique les effects de la vraye humilité, qu'elle peut acquerir par ceste veüe ou lumiere infuse. Se gardant bien de la desirer ou rechercher; car elle ne la peut retenir, non plus que Dieu luy en donne la iouissance. Si elle l'ignore, elle le doit donner à cognoistre à son directeur ou pere spirituel. Lequel encore qu'il ignorast son estat Dieu permet souuent, & leur donne quelque lumiere, pour deliurer les ames de quelques doutes, & leur donner assurance en ce chemin. Si cest quelque veüe de quelque secret diuin, dont Dieu en est le seul obiet, souuent apres la reception du saint Sacrement de l'Eucharistie, elle vient à receuoir des graces grandes. Et ceste veüe est si penetratiue, au plus interieur de ce pur esprit,

ou

ou au fond de l'ame, & luy donne telle assurance, qu'elle ne peut douter que ce ne soit Dieu qui la visite. Si ce n'est qu'elle doute que sa foy ne soit si parfaicte, par ce qu'elle voit la verité en Dieu, ou ce que c'est de Dieu, ou du mystere du tressainct Sacrement (ce qu'elle croyoit seulement auparavant par la foy) par laquelle elle voit clairement la pure verité: ou en reçoit les effects par quelque deliurance de quelque peril spirituel, duquel elle ne pourroit estre si miraculeusement deliurée, si Dieu qui la conduit n'en fust l'auteur.

Ceste doute que sa foy ne soit si parfaicte pour ceste veüe, n'est pas qu'elle doute de quelque coulpe. Mais elle procede d'une profonde humilité, laquelle conserue en l'ame ces graces surnaturelles, & dont elle en tire des grands fruiets.

Quant aux excez d'amour diuin, ils ne durent iamais long temps en cest estat, & aduenient bien peu souuent. C'est pourquoy en ce delaisement, elle n'est plus en une continuelle action d'amour diuin; comme elle estoit au second degré de perfection: ains quelquefois seulement, & n'en ressentira que des eschantillons, & lera bien des ans entiers, sans en rien ressentir.

Lors que ces excez luy aduenient, elle
sçait

ſçait de tant moins comprendre ou cognoiſtre le chemin ou nôſtre Dieu la conduit, ni ce qu'il Dieu veut faire d'elle : par ce que la ſubtraction où elle eſt, luy eſt abyſme de tous malheurs. Duquel ſe ſentant tout à coup eleuée, iuſques au plus haut du ciel, par vne ſubite vnion d'amour, cognoiſſance de quelque ſecrer diuin, & familiarité de ſon Dieu ; & puis en vn meſme temps, ſi-
 nant eſte preſence de Dieu, deſcendre du plus haut du ciel, où il luy ſembloit eſtre avec ſon Dieu, iuſques au plus profond abyſme de toutes calamitez, où elle giſt continuellement : tout cecy luy rend ſon eſtat tant plus ſuſpect. Et n'en ſçachant que penſer, ſe reſigne à la volonté de Dieu, s'aneantiffant touſiours, tant que ceſte ame deuient plus claire que le ſoleil, mais inco-
 gnuë aux hommes. En ceſt eſtat l'Eſpouſe dict, au meſme chapitre cinquieſme des Cantiques, *I'ay deſpoüillé ma robbe, comment la veſtiray-ie ? I'ay lauë mes pieds, comment les ſouilleray-ie ?* Ceſte fidelle eſpouſe de Ieſus, ſe voyant transportée hors de ſoy-meſme, à l'vnion de ſon Dieu, quoy que de peu de durée, peut dire en verité, *I'ay deſpoüillé ma robbe.* Ce qui peut eſtre entendu de ſa propre nature. Tout ce qui appartient au corps accompagnant toutes ces calamitez

Z

inte.

354 DE LA RVINE DE
interieures, & exterieures. Dont estant deli-
urée par ces esleuemens & excez d'amour,
& diuine contemplation, & se voyant re-
tourner à icelles calamitez pour souffrir ce
que tant luy deplais, qui est ceste rebellion,
ou priuation de Dieu : elle dit, *comment la*
vestiray ie? Pay lané mes pieds, qui sont les af-
fections purifiées en ceste vnion diuine.
Comment les souilleray- ie? C'est la doute de
retourner à ce chemin tant espineux, par ce
qu'elle crainct tousiours de souiller son
ame, en quelque petite imperfection, ou
de succomber en ceste tant violente guerre:
ne voulant neantmoins amoindrir ses dou-
leurs tant soit peu. Car sa patience & resi-
gnation est si grande, que si c'estoit la vo-
lonté de Dieu de luy en enuoyer d'auanta-
ge, elle en est trescontente, & d'y patir ius-
ques au finement du monde.

De la tristesse intollerable que ceste creature
endure.

CHAPITRE XII.

EN T R E toutes les afflictions, qui op-
pressent & l'ame & le corps en ce che-
min, l'une des plus grandes, & qui la tour-
mente

mēte continuellement, c'est vne tristesse intolérable, à laquelle il luy est impossible de résister pour chose que l'on sçache faire. N'y ayant chose au monde, qui puisse donner ioye à l'ame. Pour estre Dieu seul tout son bien & toute sa ioye. Duquel se voyant priuée, rien ne la peut consoler. *Je me suis leuée pour ouurir à mon amy : mais mes mains distillerent myrrhe, & mes doigts sont pleins de myrrhe.*

Quoy que la tristesse la consume, elle ne laisse pourtant de s'esleuer parsus toutes contrariétés : & par actes genereux de vertus, ouurir la porte de son cœur, à ce que son Dieu y vienne. Mais toutes ses œuvres, encore que tresparfaites, distillent myrrhe, c'est à dire, que toutes ses œuvres sont confites en amertume. Ne produisant aucune action, soit interieure, soit exterieure, encore que parfaite, qui ne semble à l'exterieur imparfaite, & qui ne soit iugée telle. *J'ay ouuert le verrouil de la porte à mon amy, mais il s'en estoit allé, & auoit passé outre. Mon ame a tressailli pour son parler. Je l'ay cherché, mais ie ne l'ay pas trouué.* Ceste ame se complainct de la separation de son Dieu. Et quoy qu'elle luy ait ouuert le verrouil de la porte, qui est le seul desir ardent de son amour vers Dieu; elle ne reçoit pourtant

nulle faueur de sa presence. Car en cest estat elle n'a que le seul desir, qui opere en Dieu. D'autant que toutes ses puissances & facultez sont retenuës par la priuation de Dieu. Et mesme la volonté aussi, ne pouuant faire le bien qu'elle veut. mais les desirs ne cessent iamaïs. Et cecy la va d'autant plus aneantisissant, que moins elle peut actuellement operer ce qu'elle desire. Dõt le desir s'enflambe encore de plus, en l'amour de Dieu: & l'humilité s'augmente, recognoissant que d'elle mesme elle ne peut rien. Nostre Dieu se retire tousiours, & plus elle s'en voit esloignée, plus elle le cherche. Tantost par actes de mortification, tantost d'humilité, resignation, & sur tout, de patience à supporter la myrrhe d'une assidue mortification.

La mortification icy ne consiste pas en combatant, par ce que ceste guerre, & tout ce que luy arriue de contraire, ne procede pas de sa faute, mais de la volonté de Dieu. C'est pourquoy la mortification consiste plus, en supportant le tout avec indifferēce, sans vouloir ou non vouloir autre chose, & autant & si longtemps, que ce sera la volonté de Dieu. Soit persecutions des creatures, soit passions & rebellions venants de nous-mesmes: soit tristesse, & sur tout la subtraction de Dieu.

Iusques à ce que l'ame soit paruenue à ce penetratif & subtil aneantissement, elle traueille infiniment, y consumant chair & sang, & iusques à la moëlle de ses os. Tant que le corps en deuient si extenué, qu'il luy semble, le plus souuent y rendre la vie. Je parle en ces termes de cest aneantissement, pour ce qu'il est si secret, que tout ce qu'on en peut dire n'est rien; au regard de ce qui en est en verité.

Si la mortification auoit tant de lieu en son ame, que de la pouuoir resiouir en tout cecy, elle le passeroit plus facilement. Mais non, car la tristesse luy est changée en nature. Tellement que ceste creature peut dire à bon droit avec le Prophete Royal. *Mes larmes me deuiennent pain iour & nuict.* Les pleurs seruent de rafraichissement à ses douleurs: & luy est vn petit bien, pour soulager la nature, de pouuoir pleurer. Et icy se trouue encore vn secret aneantissement, en ce que la nature se cherche encore, pour se soulager en pleurant. Et s'y laisse quelque fois tât escouler qu'il n'y reste plus nulles larmes, sinon de sang. Et l'on doit tant qu'on peut ancantir encore en ce point cete nature, à fin qu'elle ne se cherche soy mesme, en quelque soulagement que ce soit. Il faut cesser ces pleurs, ne fut qu'on ressentist

viuement que Dieu le permet, à fin d'estre fortifié, à porter par après plus grande charge. Comme il aduient quelque fois, que Dieu le permet pour la soulager. Enuoyant & se seruant de quelque creature, pour la consoler. Mais à fin de l'aneantir d'autant plus par apres. Car c'est à quoy Dieu la meine, de la purger en sorte par afflictions, qu'il n'y ait plus rien qui viue en elle, que Dieu son espoux. Toutefois par ce que Dieu laisse ceste ame en ses propres operations, elle peut de sa part s'aider tant qu'elle peut, à chasser ceste tristesse, ou du moins s'en foubleuer.

On ne doit lors se tenir si solitaire. Combien que la tristesse face desirer la solitude, & d'estre retiré de toute conuersation; voire caché en quelques recoins de la maison sans parler à creature qui soit. Ains au contraire il faut mortifier ceste nature, ne donnant lieu à la tristesse. On doit conuerser avec la communauté, & par colloques & deuis spirituels se recreer honnestement, & rompre par ceste voye, & resoudre ceste tristesse. Et en ceste action ne faut entrer en scrupule. Veu que se recreant on se mortifie d'auantage, que demeurant renfermé en quelque endroict de la maison. L'enten parler des recreations de religion, lesquelles

lesquelles tendent toutes à l'honneur de Dieu, & sont plustost oraison que recreations, par ce qu'elles ouurent l'esprit à vne plus grande deuotion. Car le corps estant aggraué de lassitude, par les afflictions intérieures, n'est si prompt à supporter le travail de la mortification & oraison, notamment en cest estat si penible & facheux.

*Des grandes ariditez & seichereffes que l'on a
en l'oraison.*

CHAPITRE XIII.

LEs seichereffes, aridité, desolation, indeuotion sensible, voire mesme intellectuelle, que souffre ceste creature, par la subtraction de la presence de son Dieu, luy augmentent les douleurs: par ce que toute la consolation de l'ame affligée, c'est de recourir à Dieu par l'oraison. Mais icy l'ame se retrouve quelque fois, non pas tousiours, si aride, qu'il ne luy est possible de faire oraison, ni mentale ni vocale.

Si elle a recours à la lecture de quelque liure spirituel, elle est contraincte de la laisser, pour n'y pouuoir tant soit peu arrester son esprit. Elle lit, & n'entend la lecture,

tant l'esprit est occupé au ressentiment de ses afflictions. Et encore que l'esprit, & la volonté s'y arrestent quelque fois, c'est avec tant de degoustement spirituel, que ce luy est vn martyre de faire oraison, aussi bien comme de s'addonner à la lecture de liures spirituels. Et ceste affliction est quelque fois si grande, qu'elle sert comme des auersions ou contradictions, lors qu'elle veut ou lire ou faire oraison. Ce qui luy faict quelque fois perdre courage, se voyant ainsi oppressée de toutes ces miseres, parmy lesquelles elle ne se laisse toutefois de s'appuyer en Dieu, par quelque ferme esperance. Car ce decouragement ne prouient que d'vne haine de soy mesme.

Que doit donc faire l'ame en cest estat, veu que l'oraison & la lecture, sont comme la nourriture spirituelle de l'ame? Il ne se faut contrister pour ce subiect, ains se resigner à la volonté de Dieu, & avec vn vray aneantissement, luy offrir tout ce qu'elle peut. Le priant de prendre tout ce que d'elle mesme elle peut faire, qui n'est rien sans sa grace; & que si elle en pouuoit faire d'auantage, elle le feroit d'vn bon cœur.

Ceste humiliation est plus agreable à Dieu, que tout ce qu'on scauroit faire pour lors. On se doit aussi garder, de se faire trop

de

de violence à pourſuivre l'oraïſon, ou lecture, craindant de ſe bleſſer. Il ne la faut auſſi laiſſer du tout; car ce ſeroit tentation, comme il adient quelquefois. Mais il eſt bon de garder le milieu, & faire oraïſon doucement, ſans ſe forcer trop; & puis ſ'adonner aux œuvres manuelles, à fin d'occuper l'eſprit.

Les ſuperieurs de religion, doiuent de neceſſité cognoiſtre les eſprits de leurs religieux, à fin de pourueoir à leurs neceſſitez ſpirituelles. Car ils ont quelquefois beſoing d'occupations exterieures, & offices en la maiſon, pour diſtraire l'eſprit des occupations treſpenibles de l'interieur. C'eſt vn grand inconuenient, lors que les ſuperieurs ne ſont allez experimentez: ou ſont negligens, à ceſte pieuſe recherche; de cognoiſtre la neceſſité ſpirituelle de ceux, dont le ſoing & la garde leur eſt commiſe. Car il arriue ſouuent que ces ames n'ayans nulles occupations exterieures, & ne ſe pouuans tant addonner à l'oraïſon, ne ſçauent à quoy paſſer le temps. De ſorte qu'ils demeurent comme abyſmez, aux exercices interieurs. Encore ſeroit ce peu, ſi cecy ne duroit qu'vn mois ou vn an. Mais non. Ces ariditez durent pluſieurs années. Et ſemble à l'ame, qu'elle ne doit plus auoir de
ioye

ioye au monde ; d'autant que la vraye ioye, est la iouyſſance & vnion avec ſon Dieu. Se trouuant neantmoins pour l'heure, avec vne aridité & degouſtement en toutes bonnes actions ſpirituelles, à iuſte cauſe l'Eſpouſe ſe plainct au lieu allegué des Cantiques, *Je l'ay appellé, mais il ne m'a reſpondu.* C'eſt lors qu'eſtant en oraiſon, elle faiſt toute inſtance pour recouurer ſon Dieu. Et combien qu'elle demande les graces, qu'il luy ſemble eſtre neceſſaires, elle ne ſe trouue exaucée. Pourquoi il luy ſemble que Dieu ne l'eſcoute, & eſtre indigne d'eſtre exaucée. Mais ce grand Dieu qui ſçait & voit tout, ne luy donnant ce qu'elle demande, ne laiſſe pourtant de luy departir autres graces plus neceſſaires, & qu'elle ignore en ceſt eſtat, auquel ſes prieres ſont pleines d'aridité, & diſtraction (non toutefois volontaire) cauſée par ceſte priuation de Dieu. Qui ne laiſſe de l'exaucer, mais en ce qu'il voit & cognoiſt, luy eſtre neceſſaire, ne luy en donnant pour lors aucune cognoiſſance.

*Des vives passions qui seruent d'un feu pour
purifier ceste ame.*

CHAPITRE XIV.

VN e chose qui espouuante le plus ceste fidelle espouse de Iesus-Christ, est qu'en cest estat, elle sent en soy des passions si vives, s'esleuer contre la raison & la volonté, qu'il luy est impossible de les pouuoir dompter, au moins à l'interieur. Car à l'exterieur nostre Dieu ne la laisse tomber, luy donnant les forces qu'il conuient, pour se preseruer de la cheute.

Quant à la passion d'impatience ou cholere, qui le plus souuent luy faict la guerre, procedant de la partie irascible, qui s'esleue sans aucun subiet, c'est vn cas estrange & qu'on ne scauroit croire. Ceste creature est tourmētée en soy mesme de ceste rebellion, & ne s'en peut vanger que sur soy mesme. Car toutesfois & quātes que l'occasion s'offrant la nature s'esmeut; elle la tient tellement en bride, qu'il ne luy arriue pas de se couroucer contre son prochain. Ne pouuant cependant tant faire, que de pouuoir dompter en elle mesme ceste passion, qui l'afflige

l'afflige sans relasche. Mais luy sert de grand prouffit spirituel, & comme de feu pour la purifier. Ce qui se prouue par trois raisons.

La premiere, est que ceste passion s'eleuant du tout contre sa volonte, cause vne grãde peine sensible au corps, par la violence qu'elle faict d'y resister. Or est il vray que nous ne pouuons si peu endurer en ceste vie, qui ne soit ou pour diminution des peines de purgatoire, ou meritoire pour acquerir la gloire accidentele là sus au ciel. Ceste affliction doncques enuoiee de Dieu, bien supportee & avec parfaicte resignation; nous purge sans faute, & nous deliure du feu, duquel nous serions de tant plus detenus en purgatoire, pour nos demerites & pechez.

La deuxiesme, ceste passion cause des grandes alterations en l'ame, & faict endurer les puissances interieures d'icelle, qui sont d'un plus vif ressentiment des peines spirituelles que non pas le corps: & le merite en est aussi d'autant plus grand à la creature.

La troisieme, est que la peine qu'endure la volonte, & sur tout la supreme partie de l'ame, qui est l'image de la S. Trinite, faict qu'elle voit plus clairement tout ce qui arriue pour estre la plus illuminee, & non subiecte

subiecte à quelque alteration. Pourquoy voyant tout cecy arriuer, elle anime la volonté à conceuoir vne viue contrition de tous ses pechez, tant soient-ils petits. Parce que ce pur esprit voit, que s'il n'y eust eu en l'ame quelque imperfection cachée & secrete, pour laquelle purifier, nostre Dieu par son grand amour luy enuoye ces rebellions, & pour se cognoistre soy-mesme, par vn profond ancantissement: elle n'eust sceu consumer ceste roüilleure, pour estre disposée à vn estat plus parfaict. De sorte, que la contrition que ceste ame conçoit, de se voir ainsi agitée, pour si petite imperfection cachée, est si grande, qu'en vn moment elle est bastante de luy faire rendre l'esprit. Pour ce que ceste contrition ne procede pas de quelque craincte seruile, ains d'un tresparfaict amour diuin. La violence duquel faict, que la contrition en est autant plus grande, lors qu'elle voit en elle quelque chose qui la retarde, de la parfaite vnion avec Dieu. Ceste contrition donc engendrée de ce grand amour de Dieu, est plus meritoire, & purge l'ame plus, que si elle estoit long temps en purgatoire.

Que ces ames ainsi affligées ne perdent courage, & ne craignent pour ce estre séparées de la grace de Dieu. Car c'est mesme
lors,

lors, qu'il est plus avec elles, prenant tout son plaisir à veoir leurs genereux combats pour son amour; & leur belle perseuerance, supportant en elles tant de rebellions, sans succomber au faix d'icelles. Et s'il aduient, c'est peu souuent. C'est lors de ces rebellions, que reluit plus la grace diuine en l'ame. Et comme nous tenons pour miracle, d'estre preserué de brullure au milieu du feu: aussi est-ce vne grace du tout contre nature, de ne tomber durant ceste guerre. Saincte Catherine de Sienne, estant vne fois estrangement affligée par tentations immondes, veit les diables en figures fort deshonestes en sa presence. Dont elle enduroit vne si grande douleur, que nostre bon Dieu meu de compassion, s'apparut à elle. Et comme elle se plaignoit d'auoir eu en elle choses qu'il luy sembloit estre si desagrecables à Dieu, & disoit ces parolles; ô mon doux Sauueur, où estiez vous lors, que mon cœur estoit rempli de tant de tenebres, & que i'estois si troublée, par ces cogitations & representations charnelles, & deshonestes, qui m'ostoient le repos de mon ame? Et nostre Seigneur luy respondit: i'estois, ma fille, dans ton cœur. Elle repartit à cela, & dit. Mon Dieu est-il possible, que vous logiez, & faisiez vostre demeure

demeure

demeure dans vn lieu si sale & vilain. Et nostre Seigneur luy respondit à cela: di moy, ma fille, ces sales cogitations qui nichoient dans ton ame, occasionnoient elles tristesse, ou plaisir? amertume, ou delectation? Elle repliqua soudain, ce n'estoit pas sans que i'endurasse vne tres-grande douleur. Nostre Seigneur Iesus luy dict. Qui estois celuy qui cauſoit vne si grande tristesse, & mescontentement dans ton cœur, si non moy, qui demeuſois comme caché au milieu de ton ame? Pense tu ma fille, si ie ne fusse esté present, comme vn vray & luisant soleil, ces cogitations qui demeuſſoient à l'entour de ta volonté, & ne la pouuoient surprendre, sans doutel'eussent surprins, & eussent entré dedans, & eussent ſouillé & gasté ton ame. Je faisois que telles pensées te donnoient de la facherie, & occasionnoient ceste resistance à ton cœur. C'estoit moy, ma fille, qui estois au dedās de ton ame, ie cauſois tous ces effects par mes graces. Et cela m'esioüissoit infiniment, de veoir mon amour, ma craincte, & le zele de la Foy m'estre ainsi gardez. On peut veoir icy ame fidelle, que ce que Dieu a faict à ceste saincte, il le faict encore à tous ceux & celles, qui cheminent à ceste perfection, & le merite qu'acquierent ces espouses de Iesus.

Ius-Christ, en ces afflictions ou tentations, Toute ame fidelle trouuera les mesmes merites, & autres tentations ou rebellions de nature, lors que c'est Dieu qui les enuoye, & le merite sera autant grand, comme on l'endurera avec grand amour.

On peut cognoistre si c'est Dieu qui les enuoye, en ce qu'auparauant, quand mesme elle n'auoit encore pratiqué la mortification & surmonté soy-mesme, elle n'auoit iamais senti telles passions, suiuant mesme sa propre nature. Et c'est ce qui l'afflige tant, par ce qu'elle ignore que cela vient de Dieu; pourquoy elle croit aller en empirant. N'ayant auant sa conuersion iamais eu des passions si viues, & qui l'ayent si roidement combattu.

O ame fidelle, si vous sçauiez combien cest estat est agreable à Dieu, & necessaire à vostre salut & perfection, sans faute nulle vous l'embrasseriez plus genereusement, que toutes les consolations diuines. En tant que c'est ainsi la volonté de Dieu, & que ceste vie est le lieu de patir, & non de iouir.

De

*Des grandes persecutions des creatures, moyen
tres-necessaire en ce troisieme estat, pour
aneantir l'ame de toutes parts.*

CHAPITRE XV.

IL ne se trouue moyen dont Dieu ne se
serue, pour attirer sa fidelle espouse à la
perfection derniere. Et tout ainsi que tou-
tes les creatures, & mesme nostre propre
nature; brief, tout ce qui n'est pas Dieu,
nous a serui d'instrument pour nous sepa-
rer de nostre Dieu, au moins de n'y estre si
vnis par amour, comme nous eussions peu:
Tout de mesme nostre Dieu se sert de ces
instrumens, pour nous retirer de tout ce
qui n'est pas Dieu, & retourner à nostre
premiere innocēce par vne transformation
du tout diuine, de la creature au Createur.
Et comme nous auons traicté, & dict, au
premier liure, que la source de tout mal,
qui nous separe de Dieu, est l'amour pro-
pre; lequel nous faict adherer à quelque
creature, ou à chose que ce soit hors de
Dieu: Ainsi le moyen plus propre, pour
aneantir du tout vne ame, & ôster ce qu'il y
a en elle d'imparfaict, caché, & incognu,
Aa qui

qui le retarde de la parfaicte vnion, c'est le mespris des creatures, en quoy elle sera exercée, tant qu'il n'y ait plus rien qui l'empesche de s'vnir parfaictement à Dieu, ni les honneurs, faueurs des grands, loüanges des hommes, quelles qu'elles soient. C'est la coustume des creatures de se dire amis, tant qu'on est en prosperité, credit, & reputation. Mais suruenant la perte de tout cela, par quelque accident contraire, à la gloire mondaine, le credit deffaut entre les grands, dont le monde faict tant d'estime. Et les sages mondains, qui sont les personnes spirituelles, ou de religion; qui sont encore croupissans en telles vanitez. Je ne di pas seulement de quelque gloire selon le monde: mais aussi del'honneur & reputation, qui procede de la vertu. Comme lors qu'une personne est en reputation pour les graces de Dieu, qu'on voit reluire en son ame, soit par les effects des vertus, ou graces surnaturelles, soit autrement. Je di que ces ames qui ont cheminé plusieurs années; voire aucunes toute leur vie, s'adonnant à la vertu, sont tenuës en grand estime de toutes personnes. Mais à present en cest estat de subtraction, & priuation de Dieu, elles sont delaissées, mesprisées, vilipendées, & iniuriées de toutes creatures. Il n'y a
mesdi-

mesdiance, calomnie, & mensonge, qu'on ne iette contre elles, comme foulées aux pieds des hommes. Toutes leurs actions quoy que tresbonnes & parfaictes serviront de risée aux hommes. Dieu le permettant ainsi pour les esprouver, ainsi que l'or en la fournaise. Le subiect de mal mener, & calomnier ainsi vne ame, qui est en cest estat, se prend par les creatures, à cause du changemēt qui se voit en sa vie, la voyant continuellement triste iusques à la mort. Laquelle tristesse apporte quant & loy, toute autre contenance exterieure, qui denotte les afflictions secretes qui se passent en elle. Outre ce, les complainctes, que ceste ame est souuent contraincte de faire aux creatures, pour alléger tant soit peu ses douleurs. Mais quoy? Les creatures sont aueugles, & ignorātes les secrets de Dieu. Les vns diront, voila ceste ame qui estoit si enflambée de l'amour de Dieu, où est maintenant sa deuotion, & sa resignation, qu'elle ne sçait endurer sans se contrister en ses afflictions? Ne voyans pas que la tristesse luy est enuoyée de Dieu. Les autres diront, ce n'estoit que toute imagination de ses deuotions. Et non contents de tout cela, inuenteront mensonge sur mensonge, sur ceste pauvre ame. Le tout procédant de l'enuie qui estoit cachée,

372 DE LA RVINE DE
au cœur de ceux, qui auparauant estoient
marris, du bien & honneur de ceste ame: se
resioüissants d'auoir ce subiect, pour la
calomnier & blasmer. Mais ce qui plus
afflige encore l'ame en cest estat, est que
mesme ses propres amis, luy seront autant
contraires que ses ennemis, & ne trouuera
personne, de qui elle puisse tirer quelque
secours. Si d'autuere il se trouue quelqu'un,
qui par compassion soit esmeu de la secou-
rir, il aura honte de le faire, pour la veoir
si contemptible & mesprisée des créatures,
& aussi pour les reproches qui se donnent
à ceux, qui secourent ceste ame affligée amie
de Dieu.

S'il falloit dire tous les affronts qu'en-
dure ceste ame, & les calomnies dont on la
charge, il n'en faudroit pas faire vn cha-
pitre, mais vn liure tout entier.

Comment se comportera ceste amie de
Dieu? Non plus ne moins qu'un petit agneau
qu'on porte à la tuerie, ne disant mot. Mais
endurant le tout patiemment, ne se passant
iour, & à chaque mesdisance ou affront
qu'on luy aura fait, qu'elle ne rende peine
de trouuer moyen, de rendre le bien pour le
mal, soit corporel, soit spirituel, à ceux qui
luy auront fait mal. Si elle ne peut leur faire
quelque seruice & bien corporel, qu'elle le
face

face spirituellement, priant pour leurs ames. A l'exemple de nostre Sauueur estant en l'arbre de la croix, qui prioit son pere de pardonner à ceux qui le crucifioient, pour ce que, disoit-il, ils ne scauoient ce qu'ils faisoient. Ainsi ceste ame doit prier sans cesse nostre Dieu, de pardonner à ceux qui conspirent sa ruine, & les aimer autant, & si tendrement, que lors qu'ils la caressioient. Mais ceste douceur & benignité vers ses ennemis, seruira encore pour les animer d'auantage. Pour ce que ne pouuans trouuer suiet veritable, pour assouuir leur rage, & enuie, ils ne scauent à quoy s'en prendre. Et estimeroyent auoir beaucoup faict, d'auoir faict tomber ceste creature en impatience. Mais ne la pouuant en verité, reprendre & arguer de vice, ils en deuiennent bouffis & enflés de malice, & faisans venin du bien, & des actes de vertu de ceste amie de Dieu; disent que ce qu'elle faict n'est qu'hypocrisie ou vaine gloire. Comme de ce que elle rend le bien pour le mal. Et non contents encore de le dire hault & clair en la presence d'icelle, pour la confondre tout à faict, font tous leurs efforts de l'imprimer au cœur de tous les autres.

Voyez en quels termes est reduite ceste ame, ainsi traitée des creatures. Mais ce

n'est pas tout; si elle vient au recours à Dieu par l'oraison, elle s'en trouue priuée, comme si Dieu l'auoit du tout delaisée & reietée de son soing ordinaire. C'est lors que ceste ame eslance les regrets & complainctes amoureuses, sortantes d'un cœur enflambé en l'amour de son Dieu, duquel elle se voit priuée & abandonnée. Et ces soupirs & regrets penetrent iusques au cœur de nostre Dieu, auquel s'adressant, vze de tels & semblables doléances. Que suis-je deuenüe mon Dieu? A quel estat suis-je reduicte? En quoy mon Dieu vous ay-je tant offensé, que vous m'abandonnez ainsi? S'il y a en moy quelque peché incognu, donnez en moy la cognoissance, à fin que par la penitence que i'en feray, il puisse estre effacé, & que finalement ie vous puisse retrouver.

Il semble tousiours à ceste ame fidelle, que ces afflictions luy aduennent, pour quelque peché qu'elle ignore, & que pour ses demerites & ingrattitudes nostre Dieu la laisse ainsi. Et en cecy elle s'aneantit si profondement, qu'il luy semble que la terre ne la doibue soustenir, & qu'en enfer il n'y ait lieu, où elle n'ait merité d'estre releguée à tousiours: voire mesme qu'elle ait plustost merité d'estre reduicte à neant, que de subsister en son estre.

C'est

Cest estat est si profitable à l'ame, que iamais creature ne le peut comprendre. Il faut vne incroyable patience pour y perseverer (comme il arriue ou peut arriuer) dès quatre, six, dix, ou douze ans. En fin à l'aduenant du progres qu'on faiet en ce chemin, où s'iuua la volonte secrette de Dieu.

Il ne faut pas penser que tous soient capables de passer par ce chemin, que nostre Dieu n'ouure qu'à ses plus fideles amis, qu'il cognoist en pouuoir faire leur prouffit. Car s'il enuoyoit ces afflictions à gens imparfaits, & qui n'ont en l'ame les vertus engrauees, ils quitteroient là tout le seruice de Dieu, & tomberoient à toutes occasions, sans faire aucune resistance au peché. Et par ainsi ce chemin les conduiroit droict en enfer, ainsi comme il conduit en paradis, à vne gloire eternelle, les ames du tout mortifiées.

Quoy que ces amies de Dieu ne cessent de prier pour leurs persecuteurs, si est-ce que nostre Dieu, qui les tient en sa protection, ne laissera d'executer contre iceulx sa diuine iustice, quand moins ils y penseront.

Vne ame donc ainsi affligée & persecutée, se remet du tout en la prouidence diuine, quand on la charge de crime & mal-faits. Et dict, s'adressant à son espoux, Mon Dieu ie me tairay, mais parlez pour moy.

En fin ce bon Dieu, l'ayant assez esprouvé, & fait paroistre sa patience, pour demon-
 strer qu'il l'a en sa sauuegarde & protection,
 veut quelque fois à renuerser des com-
 munaultez, y enuoyant des changemens
 notables, pour iustifier vne seuleame. La-
 quelle neantmoins ouuant son cœur pi-
 toyable, & voyant par quelque lumiere
 diuine, que quelques vns sont pour souf-
 frir des grandes punitions, tant au corps,
 comme à l'ame, pour satisfaire à la iuste
 iustice de Dieu, priens sans cesse nostre Dieu
 leur pardonner. Estant mesme contente
 d'endurer la peine qu'ils auroient meritée,
 à fin de les en deliurer, & de prouocquer
 Dieu à leur faire misericorde. C'est en cecy
 que nostre Dieu se complait, & prend plai-
 sir en ces ames fidelles, qui viuent non seu-
 lement pour elles-mesmes, ains pour la gloi-
 re de Dieu, & le bien du prochain.

*Les esprits infernaux se remolent aussi contre
 ceste ame; mais par la grace de Dieu,
 elle vainquera tout.*

CHAPITRE XVI.

EN CORE que les afflictions, dont nous
 auons traicté, venants des creatures,
 sem-

semblent grandes , comme de vray elles sont ; si sont elles nulles au regard de celles, qui suruiennent des esprits malins à l'intérieur. Il semble que Dieu donne puissance à ces esprits de tenebres , de reduire l'ame en ce troisieme estat, à toute extreme calamité. Car ils s'en approchent avec tant de rage & de furie , qu'ils semblent la deuoir deuorer. Causans des tenebres infernales, avec des apprehensions si viues, & vn bruiet calligineux au plus interieur de l'ame. Se seruans à cest effect, des facultez de l'ame, pour la troubler. En sorte qu'elle ne peut veoir par aucune raison , d'où procede tout cela , ne pouuant y faire aucune resistance vaillable, pour s'en depestrer.

Ceste ame donc endure avec toutes ses facultez des tourmens si cruels , qu'il luy semble estre és peines d'enfer. Et à la verité les diables , qui sont les instrumens de l'enfer ; sont aussi les instrumens dont Dieu se sert , pour faire endurer la creature en cest estat. Or comme de la iouissance que l'ame a , de l'vnion avec son Dieu par amour , & estroite familiarité ; elle reçoit vn contentement incroyable , mesme és puissances de l'ame , & és facultez : & la ioye en est quelquefois si grande, que le corps en reçoit des consolations sensibles : ainsi à l'opposite,

l'ame

l'ame estant abyfmée en ces peines indici-
bles & intolerables ; les puissances d'icelle ;
& ses facultez , & le corps en ressentent vne
peine sensible ; & si vehemente , qu'à cha-
que moment , il luy semble expirer & ren-
dre l'esprit. On la voit tomber quelquefois
en palmoison , le corps deuient pers , reti-
ré , l'haleine deffaillant ; tout ainsi que si l'a-
me deuoit partir. Et peut on croire estre
miracle , de ne perdre la vie en ceste extre-
mité. Par ce que ces peines que le corps
endure , procedantes des peines de l'esprit ,
sont plus actiues que les naturelles. Mais
ces peines estans surnaturelles , nôtre Dieu
donne aussi des forces surnaturelles au
corps , pour les supporter.

Si le corps endure en telle sorte , on peut
penser & iuger des peines qu'endure l'ame ,
qui ne se peuvent expliquer. Car les peines
qu'elle endure , quant aux tenebres , trou-
bles , assiegemens , & oppressions , hors le
feu materiel , de la haine qu'ont les ames re-
prouuées contre Dieu , qui les bourelle sans
fin , sont semblables à celles d'enfer. Et l'on
fera quelque fois quatre à cinq heures en
ces tenebres , n'y pouuant durer long-
temps. Les actions vertueuses , de mortifi-
cation actuelle , ne peuvent aller leur train
en cest estat , c'est à dire , durant ce trouble.

Et n'y

Et n'y a qu'un petit rayon, voire encore tenebreux, qui sort du plus profond de l'ame; donnant quelque instinct à la volonté de se resigner à la volonté de Dieu. Par lequel instinct elle ne peut operer autre chose, sinon prendre quelque contentement, en ce que Dieu est glorifié en elle par sa iustice. Se resignant d'estre ainsi iusques au finement du monde, voire à toute eternité si Dieu le permettoit. En quoy elle prend quelque resiouissance. Non toutefois actuellement sensible, ou consolative (car la tristesse la tient saisie) mais en la volonté de Dieu, de veoir la iustice de Dieu en sa punition. Ayant toujours ceste opinion, que tout cela luy aduient pour quelque peché caché, qu'elle ne cognoist pas. Ce qui l'aneantit iusques à vne humilité abyssale & tresparfaicte. Et lors elle vient à s'escrier avec l'Espouse aux Cantiques, chapitre 5. *Les gardes qui alloient à l'entour de la cité m'ont trouué: ils m'ont battu, & m'ont blessé. Les gardes des murailles, m'ont osté mon manteau.* Que veut dire ceste fidelle espouse de Iesus, sinon par les gardes qui vont à l'entour de la cité, entendre les diables, qui circuient nostre ame pour la deuorer, & seduire par la souilleure du peché. *Ils m'ont trouué, & m'ont battu.* C'est lors qu'ils ont tellement saisi les puissances de

del'ame, que ne pouuant operer les actions vertueuses à son accoustumée durant ces excez d'affliction, peu s'en faut qu'elle ne tombe en peché.

Ils m'ont osté mon manteau. C'est la grace de la presence de son Dieu, dont elle se voit du tout priuée, & laissée à soy-mesme; ne sentant lors non plus de secours de Dieu, comme s'il l'auoit iettée hors de sa protection. Mais apres que ce trouble est accoisé, l'ame cognoit clairement combien nostre Dieu l'a soustenu en cest estat. Que, s'il ne l'eust aidé, il n'y eust eu peché qu'elle n'eust commis, dont neantmoins elle a esté preseruée. Il est bien vray que lors nostre Dieu, ne luy donnoit non plus de graces, qu'elle n'en auoit besoing; la laissant combattre iusques à l'extreme de ses forces. Mais ayant assez cognu la fidelité de ceste ame, ne la voulant affliger outre ses forces; il vient à la secourir. Luy enuoyant apres ce dueil, des graces tresgrandes, comme quelque lumiere infuse, dont i'ay ailleurs traité; ou quelque excez de l'amour diuin. Mais, comme i'ay donné à cognoistre, ces lumieres, ou excez d'amour, durent fort peu, & ne seruent que de preparatoire à soustenir plus grandes guerres.

Je mets icy le plus clairement que ie puis,
tout

tout ce qui se passe en ce chemin de priuation, ou delaisement de la iouissance de Dieu : à fin que les ames qui passeront par iceluy, n'ayans la cōnoissance de leur estat, se puissent aider & encourager, suiuaus la pratique enseignée en tout ce traicté. Car ces afflictions sont bien penibles, qui ne sont entendues ni comprises, ni des confesseurs, ni d'autres. Et c'est beaucoup de trouuer quelquefois vn personnage, qui en entende quelque chose.

Les vns diront que ces troubles prouient de quelque humeur melancolique, ou de quelque passion. Les autres les qualifieront grandes imperfections. En fin, chacun en iuge à sa mode, & c'est ce qui afflige de tant plus ceste creature. C'est pourquoy elle a recours aux liures, pour y apprendre ce que d'autres peuuent auoir experimenté ; & cecy luy donne quelque soulas : l'experience estant lors plus necessaire que la science.

*D'un excez de douleur que ceste épouse endure,
pour l'amour de son Dieu.*

CHAPITRE XVII.

L'AMOUR violent, que l'on porte à Dieu, peut estre appellé excez, lors qu'il afflige

afflige tellement les parties plus intimes de l'ame, voyre mesmes le corps, que quelque fois la mort s'ensuit. Et de faict plusieurs saincts personages, attaincts viuement de cest amour, en sont morts soudainement. Et l'on tient que la Vierge glorieuse mere de Dieu, n'a eu autre maladie que l'amour de Dieu, comme celle qui en auoit vne plus parfaicte cognoissance, & que sa mort n'ait procedé que d'amour.

Si ceste action d'amour peut estre appelée excez, pour leseffects qui s'en ensuiuent, à pareille ou plus forte raison ces extremes afflictions peuuent estre dictes, excez, pour la cause d'où elles procedent, qui est l'amour de Dieu, duquel la priuation luy est plus dure que la mort. Quant à la grandeur des douleurs que ceste ame endure des causes secondes, qui est de tout ce qui n'est pas Dieu, qui luy fait la guerre: cecy peut encore estre appellé excez, pour ce que ces douleurs sont au delà de la creature, & la creature y finiroit la vie, si Dieu ne luy augmentoit ses forces naturelles. De sorte qu'endurant ainsi pour celuy qu'elle aime, ce sont deux excez d'amour & de peine, à l'ame & au corps.

Cheres ames ne vous esmerueillés, si ie parle en telle sorte, & ne dictes pas que ie
descri

descri trop particulièrement ces afflictions de priuation que l'ame endure en ce chemin. Car à la verité, ce que i'en di, est peu ou rien, au prix de ce qui en est; & pour en bien parler, il en faudroit discourir par silence. C'est à dire, qu'il faudroit n'en pas parler, ne se pouuant clairement faire entendre. Mais on peut bien se seruir de termes palpables, & intelligibles, suiuant la capacité humaine, pour demonstrier de loing qu'elles sont ces douleurs & afflictions. Le plus souuent ceste creature, ainsi affligée en son ame, ne trouuant ni repos en Dieu, n'y en chose qui soit en terre, n'y en soy-mesme : cheminant par la maison, ne scachāt ce qu'elle cherche, se complainct à son Dieu. Et si en ces entrefaictes, elle rencontroit vn nombre de tyrans, les espées au poing, l'environnants pour la percer de toutes parts : ceste mort luy seroit vn doux rafraischissement, au regard des douleurs que elle endure. Et si ceste ame cognoissoit que ce fust la volonté de Dieu, qu'elle se iettast au trauers de ces espées, pour amoindrir ses douleurs; cecy luy seroit incroyablement moindre, que tout ce qui se passe en son ame & au corps. Mais elle s'aneantit si profondement, qu'elle aime mieux viure en telle sorte toute sa vie, que d'amoindrir tant soit peu

peu ses peines contre la volonté de Dieu; lequel meismes elle prie luy en enuoyer d'auantage si elle en a peu. Toutes ames venâs à cest estat, pourront suiure ceste pratique.

D'un secret moyen, dont Dieu se sert pour aneantir ceste ame. Qui est que les plus vertueux personnages sont rendus auengles pour l'affliger.

CHAPITRE XVIII.

EN TRE toutes les afflictions interieures & exterieures, celle la est vne des plus grieues, de se veoir surchargé de menfonges, & tenu pour vne personne desreglée & mal viuante; mesme de la bouche des plus vertueux, & bien viuans. Et quoy que l'innocence faict assez paroistre le contraire, les iniures neantmoins des vertueux ont telle force, & s'impriment tellement és cœurs des hommes, que l'ame iuste en est totalement confonduë deuant le monde. En sorte qu'elle ne pourra bouger vn seul doigt, ni manger vn morceau de pain (s'il faut ainsi parler) qu'on n'en face venin, & se iuge en mal. Mais cecy est vn moyen tres-propre à l'ame, pour la faire paruenir à la
fin

fin de ses desirs, qui est de se veoir tellement despoüillée de soy-mesme, qu'elle puisse retrouver du tout son Dieu, sans plus d'empeschement. Quant i'ay parlé des gens vertueux, affligeans ceste ame, il faut entendre cela des moralement vertueux, & qu'on estime tels pour l'apparence qu'ils en portent à l'exterieur. Ayans cependant dans l'ame & au cœur la superbe ambition, & estime de soy-mesme; & ne faisant cas ni estat que de ce qui vient de leur iugement; & qui pour aucunes obseruances exterieures sont estimez vertueux. Je di, que ces personnes sont aveugles spirituellement, & sont pour ce incapables de cognoistre les ames, qui vrayement sont conduictes de Dieu, notamment par des voyes surnaturelles. C'est pourquoy entendant telles gens, choses qui surpassent leur capacité; ils les tournent à mespris, & mesdisance. Mais ceux qui cheminent en verité deuant Dieu, & qui ont les vrayes vertus engraüées au cœur, & sur tout l'humilité; ceux-là sont capables de cognoistre la verité. Ce sont telles ames qui estant illuminées de Dieu, cognoissent celles que nostre Dieu tient en la protection, & les dons abondans de grace qu'il leur departit.

Entre les creatures insensibles, comme

Bb

sont

sont les arbres, celuy qui porte le plus excellent fruit, est le plus subiect à estre at-
tainct de quelque mauuaise aduenture. Et la
pomme la plus exquisite, sera la plus subiecte
à estre mangée des vers, & des oyseaux. De
mesme est-il de l'ame, qui ne cherche, & ne
vent faire que la volonté de Dieu: & qui est
estroitement vnée à Dieu, qui la conduict
en toutes ses actions. Viuant entre les hom-
mes, elle est suiecte à toutes sortes de vitupe-
res, & à estre mangée (s'il faut ainsi parler)
par l'enuie de ceux qui ne cherchent que la
gloire des creatures, & leur propre repu-
tation. Et qui ont ceste folie de penser, &
craindre, que si telle & telle personne est en
credit ou estime, pour sa vertu, ce sera au
detriment de leur propre gloire ou reputa-
tion. Pourquoy ils taschent tant qu'ils peu-
uent, d'obscureir & offusquer le lustre de
leurs vertus: & empescher que les vray-
s seruiteurs de Dieu ne soient cognus. Crain-
gnant de perdre ce que vrayement ils cer-
chent, qui est d'estre honorez des creatures,
& qu'autres ne soient par dessus eux.

Mais, ô ame fidelle à Dieu, prenez coura-
ge. Quand vous estes le plus persecutée des
creatures, & comme leur ioüet, sans trouuer
vn amy en vos afflictions: c'est lors que Dieu
vous prend de plus pres en sa protection.

Sivous vous taisez, supportant patiemment les persecutions, sans rien dire ; Dieu parlera pour vous en temps opportun, & fera cognoistre la verité de vostre innocence.

Entre les creatures raisonnables seulement, si vne turquoise, vn ruby, diamant, ou autre pierre exquise, vient à tomber entre les mains d'un rustique; il n'en fera, peut estre, non plus d'estime que d'une pierre coulourée par artifice, & de peu de prix ; & foullera autant l'une aux pieds, comme l'autre. Mais si ceste mesme pierre est trouuée par celuy qui la cognoit, il la recueille, & en faict estat, comme de quelque thresor trouué. De mesme est-il de l'ame qui chemine en verité deuant Dieu. Estant paruenüe à vn sublime degré de perfection, elle est incognüe aux creatures, viuantes comme rustiques, & ignorans ce que c'est des secrets de Dieu ; & n'en feront non plus d'estat, que le paysant de la pierre precieuse, laquelle il ne distingue en valeur d'avec la faulse, combien que la valeur en soit toute autre. Ainsi est-il de l'ame parfaicte en vertu. Encore que toutes ses actions naturelles paroissent semblables aux actions des autres en apparence : si est-ce qu'il y a grande difference, quant à l'interieur & deuant Dieu, qui la cognoist, & voit avec quel amour elle

faict toutes ses œuures. En fin, si elle vient à tomber à la cognoissance de ceux qui sont illuminez de Dieu : ils en font grand cas & estime, comme d'un thresor spirituel que c'est, & estimeront faire grand seruice à Dieu, de secourir ceste ame ainsi reiettee de tout le monde. Attribuant la gloire à Dieu, des graces qu'il faict à ses creatures. Ce qui n'est pas fait seulement par eux, ains aussi per les mesmes qui possèdent ces graces, s'en reputans indignes, & estre en verité les plus detestables creatures de tout le monde. Et c'est en ce mespris d'eux mesme qu'on cognoist la grace de Dieu. Mais ils cognoissent fort bien ces grandes graces de Dieu, lesquelles ils conseruent en leur ame comme vn grand thresor, avec grande recognoissance, craignant de les perdre, & d'en estre trouuez ingrats. Entre toutes les graces que Dieu departit à l'ame, celle là en est aussi vne grande, de faire grande estime, de se veoir aneanti, par la priuation des faueurs des creatures. Elle doit sçauoir que cecy est vne tresgrande grace, sans laquelle elle ne peut paruenir à la vraye perfection.

Que toute ame qui s'achemine à la perfection, s'exerce à desirer d'estre mesprisée & vilipendée, & dise avec saint Augustin.

*Que les plus desbordés diables d'enfer dressent
dons*

donc maintenant, & tant qu'il leur plaira, leurs filets & embusches. Qu'ils preparent leurs tentations à souhait. Voire que les ieunes mâtent mon corps tant qu'ils voudront, mes vestemens pressent ma chair, les par trop grands labeurs m'agréuent, les veilles me desseichent; bref, que toute pourriture entre dedans mes os. Tout cela m'est moins que rien; pourueu qu'au iour de la grande tribulation, ie monte au ciel avec le peuple de Dieu.

Comment l'ame se doit comporter lors que son confesseur ignore son estat où Dieu l'attire.

CHAPITRE XIX.

LA prudence est grandement necessaire à l'ame, qui chemine en vn estat si incognu. Par ce que si elle suit l'aduis de son pere spirituel, auquel elle se submet par humilité, pour luy obeyr en tout, & qu'il ignore le chemin où Dieu la conduict, il arriuera qu'il la voudra conduire par vn autre, qui la retardera beaucoup de la perfection. Disant que ce qui se passe en l'interieur de ceste ame, ne procede pas de Dieu, ains de quelque accident, qui suruiuent de la nature. Et iugeant ce prouenir de la nature, qui est

grande grace de Dieu. Par ainsi ceste ame demeure en vn abyfme d'afflictions. Pour ce que sentant aſſeurement que c'eſt Dieu qui la conduict, & n'oſant reſiſter au ſainct Eſprit: veut neantmoins ſubmettre ſon iugement par humilité à ſon confeſſeur, encore qu'elle voye qu'il ignore les ſecrets de Dieu en telle occurrence. Mais en temps opportun Dieu luy récompensera ſon humilité. Je diray toutefois, cheres ames, que vous ne deuez pas touſiours ſuiure ceste humilité, ſi ce n'eſt en cas d'ignorance, lequel des deux vous deuez ſuiure, ou le chemin auquel vous vous ſentez introduite de Dieu; ou celui que vous enſeigne voſtre confeſſeur. Mais lors que vous auez par longue experience, cognu que Dieu vous attire, par des voyes extraordinaires, & ne trouuant vn confeſſeur qui le comprenne, il eſt plus expedient le moins que vous pouuez de luy donner à cognoiſtre voſtre eſtat, iuſques à ce que Dieu vous en ſuſcite vn autre, qui ſoit plus illuminé. Car Dieu ne manque en la plus grande neceſſité de ſecourir ſes amis. Et lors donnez vous du tout à cognoiſtre, luy propoſant premierement quelque doute en ceste voſtre neceſſité. Et ſi vous voyez que Dieu luy donne lumiere pour ceste fois; comme noſtre Dieu le permet

permet à l'extreme, seruez vous de son aduis, & rendez en graces à Dieu. Mais si vous voyez qu'il vous aduise au contraire de ce que vostre conscience & interieur, ne vous dicte: ne vous en affligez pas, & ne vous en donnez des peines de conscience. Mais par l'humilité ayez recours à Dieu, luy disant du cœur que si vous cognoissiez que ce fust sa volonté; vous vous submettriez volontiers, & suiuriez l'aduis & iugement du pere confesseur, lequel vous laissez pour ne resister au saint Esprit. Par ainsi vous euiterez tout peril.

*De la griesue punition que Dieu ennoye à ceux
qui persecutent les ames, qu'il tient en
sa protection.*

CHAPITRE XX.

D'AVTANT que toutes les persecutions qui arriuent aux bons, sont permises de Dieu, pour leur plus grand bien spirituel, il ne faut pas penser que pourtant Dieu soit autheur du peché, ni qu'il face ces persecuteurs estre tels, & mauuais pour affliger les bons, voulant par ce moyen les perfectionner. Car quoy que d'un grand mal il

ſçache bien tirer vn grand bien, ſi n'eſt il pourtant autheur du peché, & n'eſt aucunement permis aux hommes de faire mal, pour en tirer du bien. Mais quoy, la malice ie conceuë en la volonté de l'homme, par quelque enuie ou paſſion, ne peut durer long temps, ſans s'eſclorre & eſtre miſe en jeu. La plus grande punition que Dieu peut enuoyer à l'homme, eſt que pour la nature de ſon peché, il le laiſſe tomber en vn autre peché, luy oſtant la grace pour ſon ingratitude. Ainſi vne ame qui eſt hors des grands pechez, ſi elle neglige la mortification de ſes imperfections, d'vne imperfection il la laiſſe tomber en vne autre. Et lors noſtre Dieu ſe ſert de ſes creatures, les laiſſant en leur franc arbitre, faire le mal qui eſt conçu en leur cœur. Et de ce mal il en tire vn grand bien, qui eſt la perfection de ſes eſleus.

Les martyrs ont enduré des grands tourmens pour Dieu, dont ils ont remporté des grandes couronnes de gloire. Si n'eſt il pourtant vray ſemblable, que les tyrans & bourreaux executeurs de leurs rages, ayent eſté exempts de punition, (s'ils n'en ont fait penitence) ſi non en ce monde, aſſeurément en l'autre. De tant plus eſt la iuſtice & ſentence rigoureuſe de leur punition, ſi elle eſt differée iuſques après la mort.

Il faut entendre & croire fermement, que Dieu aime tant les ames qui luy sont fideles, & qu'il tient en sa diuine protection, qu'il les preserve, comme la prunelle de son œil. En sorte que celuy qui blesse ces seruiteurs de Dieu, il blesse Dieu mesme. Qui leur faict mal à l'ame ou au corps, ou à la renommée: il le faict à Dieu mesme. C'est pourquoy il les punit seuerement, lors que moins on y pense. Et quelque fois la punition est si à descouuert, qu'on y voit clairement reluire la iuste iustice de Dieu. Ces persecuteurs tomberont quelque fois és abysses, esquels ils veulēt precipiter les autres. Mais que feront lors ces ames fideles? Tant s'en faut qu'elles se resioüissent des afflictions de leurs ennemis, que plustost à l'imitation de nostre Seigneur Iesus, lors qu'on le crucifioit, ils prient pour eux nostre Dieu de leur pardonner, pour ce qu'ils ne sçauent ce qu'ils font. Ouurans leur cœur pitoyable vers eux, & demandans à Dieu pardon de leurs pechez. Mesme demandent la peine estre enuoyée à eux mesmes, tant elles sont esmeües de compassion. Telles & semblables prieres ils adressent à Dieu, ne ressentant en leur ame aucune amertume, ou desir de vengeance contre eux. Mais toute pitié & amour, leur rendant à tout moment

394 DE LA RVINE DE
moment, le bien qu'ils peuuent, pour le mal
reçu.

Il arrive aussi qu'on afflige l'un l'autre
sans y penser, en quoy n'y a aucune malice:
mais par quelque mal entendue. Dieu le per-
mettant ainsi, pour donner occasion pour
endurer, & en endurant mériter les uns
avec les autres. Voila pourquoy on doit
prendre en bonne part, tout ce qui aduient
des creatures, & ne iuger iamais des inten-
tions. Mais croire que Dieu permet tout
cela, pour nous donner occasion d'exercer
la patience & autres vertus.

*De secours que ceste ame cherche aux creatures,
& comme elle s'y doit comporter.*

CHAPITRE XXI.

EN plusieurs endroicts du Cantique des
Cantiques de Salomon, l'ame fidelle,
cherche son Dieu, lors qu'il luy semble en
estre separée. Laquelle recherche encore
que procedant d'un mesme amour, si est-ce
que les operations en sont bien differentes.
Car es autres endroicts elle le cherche avec
ioye & contentement. Mais icy au Chapi-
tre cinquiésme en amertume. *le vous aduise*
filles

filles de Ierusalem, que si vous trouuez mon amy, vous luy signifiez que ie languis d'amours. Ceste espouse le trouuant du tout abandonnée de son Dieu, le recherche par l'oraison, és actes de vertu, en la mortification & haine de soy-mesme; mais elle ne l'y trouue pas. En fin estant en ce chemin de priuation fatiguée d'afflictions interieures sans repos; elle est contraincte pour sauuer sa vie, d'auoir recours aux creatures. Car l'amour tres-violét, dont son ame est assiegée, ne peut supporter la priuation de son Dieu, en vne maniere si incognüe, sans grand peril de la santé du corps. Pourquoy on ne doit trouuer estrange, si telle ames'occupe quelque fois à choses ou deuises indifferentes, Estant de necessité, qu'elle s'efforce de se recreer honestement avec ses confreres ou consœurs, si elle est en maison de religion. Et en cecy elle s'aneantira d'elle mesme, par ce que elle fera acte contraire à la nature, d'autant qu'en cest estat, elle est tousiours triste. La tristesse estant tellement engraüée en l'ame, qu'elle est comme changée en nature. Et ceste nature donnant lieu à soy-mesme, ne desire que la separation des creatures, pour donner lieu à la tristesse, & se donner carrière à l'escart des autres. Mais icy est la vertu de faire le contraire, de ce à quoy

quoy la nature nous prouoque. Comme rompre la tristesse, fuir les occasions de s'y arrester; se resioüissant tant que faire se peut, mais en temps & lieu, & que la fin soit pour Dieu, encores que les occasions soient indifferentes. Mesme les confesseurs le doiuent enseigner, à fin de par ce moyen soulager la nature, & la rendre plus forte, à supporter le faix d'une croix plus pesante. Au moyen dequoy elle ne sera en si grand peril de tomber. Et si d'auanture aucuns peu experimentez en la vie spirituelle s'en scandalisent, on ne s'en doit donner peine, attendu que c'est scandale pris & non donné, pourueu que ce soit tousiours en Dieu ou pour Dieu. Car on doit fuiure sa conscience selon Dieu, & non pas selon le iugement des creatures. Pour ce ne faut il iamais iuger d'autrui; car on ne peut vrayement cognoistre la necessité corporelle que chacun a.

Poursuite du Chapitre cinquiesme des Cantiques: *O tres-belle entre les femmes, quel est ton amy sur tous les amis, que tu nous as ainsi adinrez? Mon amy est blanc & vermeil, plus magnifique que dix mil. Son chef est comme une masse d'or precieux. Sa perruque crespée noire comme le corbeau. Ses yeux sont comme ceux des colombes sur les ruisseaux des eaux, lesquelles*
sont

sont comme laudées de laïet, & leur résidence auprès des courans d'eau tresplains. Ses ionès sont comme parquets de choses odoriferantes, qui croissent pour les apoticaïres. Ses leures sont comme roses dissillantes myrrhe, qui epard odeur. Ses mains sont comme d'or poli au tour, remplies de hyacintes, &c. Sa beauté est comme le Liban, exquise comme le Cedre. Les parolles de son palais sont douces, & tout ce qui est en luy est desirable. Cestuy cy est mon mignon, & s'y est mon amy Quoy que ceste ame tant affligée pour la separation de son Dieu, soit à l'exterieur mesprisée des hommes, si est-ce qu'aucuns en ont compassion, & voyant sa langueur, & ses desirs ardants apres son Dieu, sont esmeus à embrasser les vertus, & rechercher du moins de pouuoir ioüir, & goustier spirituellement ce que c'est de Dieu. Pourquoy ils s'enquierent ce que c'est, desirants estre enseignez comme on le peut trouuer. Lors ceste ame tant embrasée de la charité, prend plaisir de planter au cœur des hommes, ce parfaict amour de Dieu, sans plus tenir caché le talent que Dieu luy a departi. Pratiquant la vie de Magdeleine & de Marthe tout ensemble. S'exerce à la charité du prochain donnant à cognoistre, & par exemples & par enseignemens, quel est son espoux Iesus-Christ, & comme la diuinité est

est vnüe avec l'humanité. Quand elle diät,
Mon amy est blanc & vermeil, la blancheur est
 la beauté excellente de la diuinité. *Il est ver-*
meil, c'est son amour qui a conioinct sa
 diuinité avec l'humanité, le tout pour son
 espouse qui est l'ame fidelle. *Son chef est*
comme une masse d'or precieux: ce sont tou-
 tes les perfections diuines dont son hu-
 manité est embellie. *Sa perruque crespenoi-*
re comme les corbeaux, sont les actions la-
 borieuses de son humanité, laquelle dès
 son enfance a commencé à endurer pour
 nous. Noire en apparence, pour le mespris
 des creatures, qu'elles font des afflictions
 & des personnes affligées & persecutées.
 C'est pourquoy il ne se faut esmerueiller si
 en ce chemin de perfection, on est mesprisé
 & delaisé de tous. Veu que le Fils de Dieu,
 dès sa natiuité, a esté tellement abandonné,
 qu'il a esté contrainct de naistre en vne
 estable entre les bestes, & toute sa vie n'a
 monstré que semblable exemple. Cecy est
 noir, & peu estimé des mondains, qui ti-
 rent & puisent toutes les beautez des cho-
 ses vaines. Mais l'ame fidelle faict estime de
 ceste couleur noire, & des persecutions &
 afflictions, plus que de la prosperité vaine
 de ceste vie mortelle. *Ses yeux sont comme*
ceux des colombes sur les ruisseaux des eaux,
lesquelles

*lesquelles sont comme lauées de lait. Ce sont les oraisons que le Fils de Dieu en son humanité adressoit continuellement à Dieu son pere pour ses creatures. Elles estoient blanches comme lait pour leur pureté, sortants d'une ame la plus pure qui puisse estre, en tant que Dieu & homme tout ensemble. Sa residence auprès des courans d'eau tresplaines, qui est la profondeur & abondance des escritures. Ses ioues sont comme parquets de choses odoriferantes, croissant pour les apoticares. C'est la vie exemplaire, qui nous est vn odeur tresluave, tant que le monde durera. Ses leures sont comme roses distillantes la myrrhe qui espard odeur. C'est toute la doctrine qui nous a enseigné, laquelle en tous endroits, ne parle que d'amertume & de croix. Car il a dict luy-mesme, *Celuy qui m'ayme, porte sa croix & me suit*. Et en vn autre passage, *Si tu veux estre parfait, quitte tout ce que tu as, & le donne aux pauvres, & me suis*. Brief en toute la sainte escriture, il n'est parlé d'autre chose, que de croix & d'amertume, que nostre Dieu nous enseigne d'embrasser. C'est myrrhe deuant les hommes, mais drogue agreable à Dieu, & odoriferant plus que tout odeur, qui se retrouve hors de Dieu. Ses mains sont comme d'or poli au tour remplies de hyacintes. Ce sont les ceuures*

de

de charité, que nostre Dieu exerçoit vers les hommes en terre. *Sa beauté est comme le Liban, exquise comme le Cedre.* C'est celuy, qui estant Dieu & homme, surpasse toute beauté angelique & humaine, & sous la grandeur duquel, toute creature celeste & terrestre, plie les genoux. *Ses parolles douces,* sont les consolations qu'il donne à ses esleus, dès lors qu'ils sont en ceste vie, le seruants fidelement. *Celuy là est mon amy.* C'est celuy-là, que l'espouse qui est l'ame fidelle, cherche sans repos, duquel ne pouuant supporter l'absence, elle est contraincte d'auoir recours aux creatures. Non pas toutefois pour y prendre du contentement propre, ains pour appaiser vn peu sa douleur, en la consideration des œuvres admirables de Dieu en la creature, iusques à ce qu'elle l'ait parfaictement retrouvé. Declarant cependant, les beautez & perfections de son bien-aimé, & combien il est digne d'amour, à tous ceux, qui luy parlent de choses bonnes, ou qui en sont capables, pour les induire à aimer, estimer & imiter son bien-aimé.

Comment

Comment Dieu donne des forces plus que naturelles, & au corps, & à l'ame, & mesmes aux facultez de l'ame, pour supporter des peines surnaturelles.

CHAPITRE XXII.

S I l'ame n'estoit immortelle, elle ne pourroit subsister en estre, durant ces angoisses surnaturelles, qu'elle endure par la priuation de la presence de son Dieu. Et quoy que l'ame viura sans doute eternellement: si a-elle besoin que nostre Dieu luy enuoyant des afflictions surpassant sa nature, luy augmente quant & quant ses forces, aussi bien comme au corps. Vne similitude le fera entendre. Si l'on versoit de l'eauë fort chaude dans vn verre, il se briseroit soudain en pieces. De mesme l'amour diuin, qui est plus chaud & bruslant, que toute chaleur terrestre; estant bien engraue au cœur de l'homme, qui est mortel: s'il n'estoit secouru des graces surnaturelles, il se briseroit plus promptement, que non point le verre, par l'infusion en iceluy d'eauë bruslante. Car l'amour qui apporte en soy des peines sensibles & tres-violentes, pour

Cc

ne

ne pouuoir parfaictement estre vni à Dieu en ceste vie, est conjoint à vne seconde peine, non moindre, qui est la priuation de la iouissance des graces, que l'on peut auoir en ceste vie presente. Dont estant frustré, la douleur procedant de la premiere peine, qui est l'amour, en augmente merueilleusement. Mais si nous regardons toutes les graces que Dieu faict à l'ame fidelle : ceste derniere, qui est incognüe n'estant pas ressentie, pour n'estre vne grace de iouissance, est bien la plus grande & meritoire à l'ame. Laquelle reçoit toutes les graces, & notamment celle-cy ; pour estre disposée à d'autres, que nostre Dieu luy prepare au chemin ensuiuant celui-cy.

Des cheutes que ces ames font quelque fois, & comment ces cheutes leur seruent, pour de tant plus les aneantir.

CHAPITRE XXIII.

IL ne faut s'esmerveiller, si ces ames ainsi assaillies de tous costez, tombent quelque fois en des pechez. Comme en vne tristesse desordonnée, se laissant trop incliner, sans genereusement la combattre. Ou bien

en des desirs de la mort trop ardans, sans
 resignation totale à la volonté de Dieu. En
 des deffiances de la grace de Dieu, ou au-
 tres tels pechez, qui ne sont volontaires.
 Et cecy aduient peu souuent, pour ce que
 l'amour leur faiët hayr le peché. Mais la las-
 titude de la nature, qui combat continuel-
 lement, luy faiët perdre courage. Pour-
 quoy la haine qu'ils ont du peché, quand ils
 s'en sont tombez, les faiët sembler estre en vn
 estat le plus miserable du monde: du moins
 aux ames qui n'ont cognoissance du che-
 min où Dieu les conduit. Et mesme à ceux
 qui les gouernent & conduisent, pour ce
 qu'estans peu experimentez, ils ne sçauent
 comprendre, qu'apres vn estat si releué, que
 celuy que l'ame vient de passer, il soit possi-
 ble de tomber en des tels pechez, lesquels
 neantmoins leur seruent d'vn grand bien.
 Voila pourquoy on ne doit iamais iuger
 les consciences, estant impossible de co-
 gnoistre les secrets de Dieu.

L'ame donc se voyant ainsi tombée, s'a-
 baissent par vne tresprofonde humilité. Et
 ceste cheute luy cause deux sortes d'anean-
 tillemens, l'vn vers Dieu, l'autre vers les
 hommes. Enuers Dieu, se recognoissant vn
 rien, qui ne peut faire vne bonne œuvre,
 sans la grace de Dieu; se deffiant à tousiours

ne pouuoir parfaictement estre vni à Dieu en ceste vie, est conjoint à vne seconde peine, non moindre, qui est la priuation de la iouissance des graces, que l'on peut auoir en ceste vie presente. Dont estant frustré, la douleur procedant de la premiere peine, qui est l'amour, en augmente merueilleusement. Mais si nous regardons toutes les graces que Dieu faict à l'ame fidelle : ceste derniere, qui est incognüe n'estant pas ressentie, pour n'estre vne grace de iouissance, est bien la plus grande & meritoire à l'ame. Laquelle reçoit toutes les graces, & notamment celle-cy ; pour estre disposée à d'autres, que nostre Dieu luy prepare au chemin ensuiuant celui-cy.

Des cheutes que ces ames font quelque fois, & comment ces cheutes leur seruent, pour de tant plus les aneantir.

CHAPITRE XXIII.

IL ne faut s'esmerveiller, si ces ames ainsi assaillies de tous costez, tombent quelque fois en des pechiez. Comme en vne tristesse desordonnée, se laissant trop incliner, sans genereusement la combattre. Ou bien

en des desirs de la mort trop ardans, sans resignation totale à la volonté de Dieu. En des deffiances de la grace de Dieu, ou autres tels pechez, qui ne sont volontaires. Et cecy aduient peu souuent, pour ce que l'amour leur faict hayr le peché. Mais la lassitude de la nature, qui combat continuellement, luy faict perdre courage. Pourquoy la haine qu'ils ont du peché, quand ils sont tombez, les faict sembler estre en vn estat le plus miserable du monde: du moins aux ames qui n'ont cognoissance du chemin où Dieu les conduit. Et mesme à ceux qui les gouernent & conduisent, pour ce qu'estans peu experimentez, ils ne scauent comprendre, qu'apres vn estat si releué, que celuy quel'ame vient de passer, il soit possible de tomber en des tels pechez, lesquels neantmoins leur seruent d'vn grand bien. Voila pourquoy on ne doit iamais inger des consciences, estant impossible de cognoistre les secrets de Dieu.

L'ame donc se voyant ainsi tombée, s'aneantit par vne tresprofonde humilité. Et ceste cheute luy cause deux sortes d'aneantissement, l'vn vers Dieu, l'autre vers les hommes. Enuers Dieu, se recognoissant vn rien, qui ne peut faire vne bonne œuvre, sans la grace de Dieu; se deffiant à tousiours

de soy mesme, & de ses propres forces. Et par ainsi se va aneantissant tousiours au plus secret de son ame. Action par laquelle elle se rend capable de receuoir les graces surnaturelles, que Dieu luy prepare au chemin ensuiuant, qui est le dernier. Enuers les creatures, en ce que pour ces cheutes elle est mesprisée des creatures, se tenant tousiours la moindre de toutes, & s'humiliant en verité au dessoubs de toutes, avec ceste croyance d'estre indigne de seruir les autres. Cest aneantissement rend l'ame tant agreable à Dieu, que les pechez esquels elle tombe, en sont facilement effacez, pour la contrition qu'elle en recoit. Si le soldat combattant valeureusement pour son Dieu, & son Roy, remporte quelque blessure, il n'en est pourtant en rien mesprisé; ains au contraire honoré, & loué, & mesme bien recompensé. De mesme, si l'ame fidelle soldat de Iesus-Christ, estant en ceste guerre continuelle: combattant non contre les hommes, mais contre les puissances infernales: par la roideur des tentations & afflictions recoit quelque blessure; cela ne luy doit tourner à vitupere, mais plustost à gloire, pour la grande humilité, & aneantissement qu'elle en recoit, qui la rend grande deuant Dieu. De tant plus que
ceste

ceste cheute luy est aduenüe en combat-
ant, pour maintenir la gloire de Dieu, &
perseuerer en la vie spirituelle; en laquelle
seroit difficile de continuer, sans l'amour
qu'on porte à Dieu. Mais on doit plustost
goïssir de mourir, que d'abandonner le
travail: & quand il aduient de tomber on
doit incontinent releuer courageuse-
ment, sans s'en affliger. Mais avec grande
esperance en Dieu, poursuiure en la prati-
que de la vertu, tant qu'il plaira à Dieu, de
deliurer l'ame de cest estat.

*Le grand bien qu'apporte la religion aux ames
que Dieu attire à ceste voye.*

CHAPITRE XXIV.

ENTRE tous les biens qu'apporte la
religion, celuy-là en est l'un des plus
grands: sçauoir est, que les ames que no-
tre Dieu esleue par quelque voye surnatu-
elle à soy, ou bien qu'il voit estre besoing
l'exercer par tribulations, & tentations,
pour les perfectionner; perseuerent plus
facilement pour les vœux d'obeïssance, de
closture, pauvreté, & chasteté faicts en re-
ligion.

On peut en celibat garder la virginité, & sans faire les vœux de religion, practiquer les vertus; s'addonner à la mortification, oraison, & paruenir à grande perfection, & amour de Dieu: estre au monde, & ne suivre le monde: n'estre religieux ou religieuse, & practiquer la vie de religion: seruant Dieu, & l'aimant en verité. Et ceste vie est tresagreable à Dieu, & la continuation tresfacile en ceste espee de vie, tant que durera la premiere ferueur. Mais fort perilleuse, lors que ceste ferueur se perd, & que Dieu enuoye ce delaissement de deuotion, priuation de tout sentiment de Dieu, & de la grace d'iceluy: dont nous auons traicté en tout ce liure. Car lors que la personne sent ces indeuotions, & toutes les calamitez suruenans en ce troisieme estat, le courage luy manque, quitte le seruice de Dieu, & le plus souuent retourne aux vanitez du monde. Ce qui n'arriue pas estant en religion, où on est affranchy de ce danger, pour ce qu'on est retiré des occasions de pouuoir retourner au monde, pour l'obligation des vœux. Outre ce, que si on vient à tomber, par la correction des superieurs, & l'exemple des autres, on est aidé & secouru. Et lors que ce chemin d'affliction est surmonté, la religion est vn paradis, qui durant ce chemin de priua-

priuation, semble vn purgatoire; pour ce que toutes choses luy apportent amertume. L'on voit souuent au monde, & hors de religion, que ceux qui se laissent surmonter des tentations, retournēt aux vanitez apres auoir vescu deuotement bonne espace de temps. Et n'auront pas si tost choisi quelque estat seculier, que le repētir ne les bourrelle, & les regrets incroyables d'auoir quitté le seruice de Dieu; mais à tard. Et voila, combien il y a plus d'assurance en l'estat de religion.

De la grande confiance que l'ame a en son Dieu, durant toutes ces afflictions. Et du sacrifice que elle fait de tout soy-mesme à son Dieu.

CHAPITRE XXV.

CE qui confirme que c'est Dieu qui gouuerne ces ames, est la confiance qu'elles ont en Dieu, au milieu de tous ces delaissemens. Car quoy qu'elles soient abbaisées iusques au plus profond abyfme des tourmens qu'on peut imaginer, si ne perdent elles iamais essentiellement la vraye confiance, qu'elles ont en la bonté de Dieu. Ains pratiquent des actes de foy viue; avec ferme creance; que nostre Dieu ne leur enuoie tout

cela que pour leur salut, & pour en faire reussir la plus grande gloire. Et si par aduventure le diable par ses subtiles tentations, leur fait entēdre que nostre Dieu leur enuoye ces tenebres pour leurs pechez (encore qu'elles n'en sentent leur conscience chargée, faisant paroistre la iustice de Dieu plus grāde que sa misericorde : tant s'en faut que ces bonnes ames en soient esbranlées, qu'au contraire c'est lors qu'elles embrassent la croix avec contentement. Et lors qu'elles se voyent du tout rabaisées, en sorte qu'il leur semble veoir l'enfer ouuert pour les engloutir, elles s'esleuent de tapt plus en Dieu, par vne confiance parfaicte en sa bonté. Et leur assiduel exercice, est de s'offrir continuellement en sacrifice à Dieu corps & ame, s'abandonnant du tout à la volonté de Dieu, & se disposant à endurer tous les plus cruels tourmēs, que creature peut souffrir en ce monde. Ce qui est tresagreable à Dieu Et tous ceux qui se retrouuent en ce chemin, doiuent suivre & practiquer, ce que ie viens de dire. Car il n'y a rien qui n'ait esté esprooué, & que quelques ames n'ayent bien experimenté, laquelle experiēce vaut plus que toute science. C'est à vray dire, peu de la science acquise, au regard de la science cognüe par l'experience, lors que nostre Dieu en est l'auteur.

Par

Par-adventure que quelques vns, fondez sur la science humaine, plus que sur la diuine, ceste Theologie mystique leur semblera puerile & de nul faict. Mais si on regarde à la moëlle, & ce qu'elle contient, on verra qu'on apprend plus en vn moment du S. Esprit, que des estudes qu'on peut faire en beaucoup d'années. Et cecy est trefutile pour confondre les grands, qui s'apuyent du tout sur leur sçauoir. A ce propos dit fort bien S. Augustin. *Les simples raiuent les cieux, & les sçauans descendent en enfer.* Pourquoy l'on ne doit trouuer estrange, si ce traicté est parsemé, de tant de secrets incognus, pour les differentes operations, contraires les vnes aux autres, combien que tous rapportés à Dieu.

Des moyens dont Dieu se sert pour commencer à esleuer ces ames à vn estat plus parfait, & les remettre au repos de la contemplation.

CHAPITRE XXVI.

NOSTRE Dieu ayant par longue espace de tēps esprooué les ames de ses esleus plus ou moins, quelque fois par l'espace de deux quatre à six ans, quelques fois huiet & dix,

dix, les ayant purifié par ces afflictions, que nous auons monsté auenir en ce troisieme chemin de perfection, & les trouuant tellement aneanties, qu'il n'y a plus rien de nature immortifiée : ains tout tellement mort, qu'elles ne peuuent plus vouloir ou non vouloir, sinon ce que Dieu veut : vient en fin à leur faire ressentir interieurement, le repos perdu par ceste priuation de la presence de Dieu. Que personne ne se trompe, & ne pense estre paruenu à l'estat de perfection, s'il n'a en soy ces effects. Sans penser toutefois, qu'on puisse estre sans quelques petites imperfections naturelles, où il n'y a pas de peché. Car iusques à la mort nostre Dieu laisse tousiours quelques imperfections à l'exterieur, & quelques inclinations à mortifier au dedans. On a veu mesmes aux saincts ces petits ombrages. Dieu le permettant pour plusieurs causes nécessaires. Premièrement, à fin de tenir tousiours la personne en humilité. Laquelle recepuant ces grandes graces de Dieu, tomberoit en des vaines gloires, si elle n'en estoit preseruée par ces imperfections qui l'afont humilier. Car tant qu'on est en ceste vie, on est tousiours en peril de tomber, & cela l'a faict rentrer en soy mesme. Tant plus on est hault esleué, plus on est en danger de tomber.

Deuxies.

Deuxiesmement, pour ce que si on ne voyoit quelques petites imperfections, qui tiennēt cachez les thresors de la grace diuine qu'il y a au dedans, les loüanges des hommes donneroient à la personne, des peines insupportables. Car l'aneantissement & la grande haine que ces ames ont d'eux-mesmes, signamment quand elles se voyent loüées, leur est vn grand martyre. Aimant mieux se veoir méprisées à tort, que loüées à iuste cause. Car c'est tout leur contentement de conuerfer avec Dieu en leur interieur, & au desceu des creatures. C'est vne grande prudence, de tenir secretes les graces de Dieu, & mener vne vie la plus commune des autres, comme a fait nostre Seigneur Iesus-Christ.

Troisiesmement, à fin que la personne vienne à considerer par elle mesme, la fragilité du prochain, voyant que nonobstant toutes ces graces de Dieu, elle est encore sujete à des imperfections naturelles. Par ainsi, la charité & compassion des infirmitéz du prochain, croist en leurs ames continuellement, & les embrase à faire oraison pour luy.

Nostre Dieu donc voyant les espouses disposées, à receuoir des impressions de l'amour diuin, beaucoup plus releuées, commence à leur donner des lumieres interieures, comme de quelque assurance du bien futur,

412 DE LA RVINE DE
futur, & de la iouïſſance qu'elle auront de
Dieu. Avec des inspirations ſi viues, qu'elles
ne peuuent douter, que ce ne ſoit Dieu, qui
leur promet de les deliurer de ce rude che-
min. Combien que pour eſprouuer leur fer-
me foy, il ne les deliure tout à coup, apres
ces reuelations & promeſſes. Mais apres
quelque eſpreuve de peu de durée, il leur
oſte ces afflictions. Et lors l'ame demeure
aſſeurée, & voit clairement que Dieu ſeul
eſt celuy qui l'a conduite, & a permis en elle
tout ce qui luy eſt aduenü. Cognoiſſant par
vne veüe interieure, la cauſe pourquoy no-
ſtre Dieu l'a ſi longtems abandonnée. Et
voyant pluſieures choſes aduenir touchant
ſon ſalut & perfection, voit auſſi & cognoit
comme en tout elle ſe doit comporter.



LE

LE SACRE' CABINET

DV TRES-PVR AMOVR DIVIN,

où l'Espoux celeste cache le pur esprit,
ou vnitè de l'ame fidelle en sa diuine vni-
té. Où est aussi traicté de l'vnion beati-
fique de l'ame. Et de la fruicion secrette,
& transformation de ceste ame au plus
secret intime de la diuinité.

LIVRE QVATRIESME.

*De la noblesse & fin de l'homme. Et comment se
doit entendre l'estat dernier de la perfe-
ction d'iceluy en ceste vie.*

CHAPITRE PREMIER.



ELVY qui est unique-
ment parfaict en foy, &
qui seul peut faire d'une
puissance absoluë & lou-
ueraine, toutes choses en
leur nature parfaicte, est
ce grand Dieu, seul Dieu tresbon, qui par
sapience infinie a mis tel ordre en toutes les
œuvres, que nous ne pouuons faire autre-
ment, que de le recognoistre tres-bon, &
tres-

tres-puissant. La sapience duquel est incomprehensible aux hommes. Mais si nous ouvrons les yeux de nostre entendement, pour veoir qu'il a tout faict avec poids & mesure pour l'homme : que toutes creatures irraisonnables & insensibles, le temps, les saisons, sont en leur perfection pour servir à l'homme : qui pourra nier que l'homme ne soit en sa nature incroyablement plus parfait? Et d'autant plus que c'est la grace divine qui gouverne & conduict son ame? Toutes les autres creatures sont créées pour l'homme, & le service d'iceluy. Ce qui nous faict croire, la grande perfection de l'homme. Voyons maintenant à quelle fin cest homme est créé. N'est-ce pas pour Dieu? Dieu n'est-il pas sa fin, son object, & lequel il doit aimer, honorer, & servir à toute eternité? Ouy certainement, mais s'il est faict pour vne fin si noble; combien faut-il que de sa nature, il soit plus parfait, que toutes les autres creatures? Car nostre Dieu ne cesse de luy administrer tous les moyens possibles, pour l'amener à sa dernière perfection. Et ce faict-il avec tel ordre, qu'on voit clairement qu'il en est l'auteur. Or comme nous auons dit és liures precedens, que l'homme est vn petit monde: & parlant plus mystiquement, auons approprié les

quatre

quatre saisons de l'année aux quatre estats
ou chemins, par lesquels Dieu attire l'ame
à la perfection des vertus, & vnion avec
luy par vne parfaicte charité : representant
par l'hyuer l'estat des pecheurs : par le prin-
temps, l'estat de l'ame en sa premiere fer-
ueur : par l'esté, l'estat de delaissement, ou
priuation de la presence de Dieu ; auquel
arriuent grandestentations, & persecutions,
ainsi qu'au plus chaud de l'esté, les tonner-
res, orages, & autres accidens semblables ;
par l'automne, le quatriesme chemin de per-
fection, qui signifie le repos, pour ce que lors
l'homme commence à iouir du fruiet de ses
labours : comme aussi l'ame estant entrée
en ce chemin, commence à reposer en Dieu
par vne vnion tresparfaicte : quand j'ay dit,
que ce chemin de perfection est le dernier
auquel l'ame peut arriuer, estant encore
ioincte à ce corps mortel, il faut entendre
que ceste perfection, n'est pas du dernier
degré de charité & amour enuers Dieu. Car
l'ame ne paruiet à ce degré dernier qu'à
la mort ; & y estant paruenue, nostre Dieu
la vient querir de ce monde. Que ceste per-
fection est la derniere, à laquelle on peut ar-
riuer en ce monde, c'est à dire, que l'ame ayât
surmonté ses passions, & ayant esté aneantie
és chemins, par lesquels Dieu la conduict,
n'ayant

n'ayant plus nuls empeschemens, qui la destournent de s'vnir à Dieu par amour, entrée qu'elle est en cest estat, elle est forte pour supporter & endurer tout pour Dieu. N'ayant plus de besoin des varietez & changemens, dont Dieu se souloit seruir en elle, pour l'aider à arriuer à cest estat. Il faut croire, comme il est, que l'ame ne demeure en vn mesme degré de ceste perfection l'ayant acquis. Mais elle augmète tousiours en grace (par laquelle elle acquiert aussi la gloire accidentelle, si elle ne decline par la faute de cest estat) & en charité continuellement iusques à la mort. Car en la vie spirituelle on ne peut demeurer en vn estat: ou on recule, ou on aduance. Estant arriué à quelque degré de perfection, si on ne se veut laisser aller en arriere & à la renuerse, il faut necessairement tousiours profiter. Mais en ce dernier estat, c'est avec repos & force: & aux plus grandes afflictions, c'est lors que l'ame iouit de tant plus des fructs des vertus acquises, & graces diuines.

Comment

Comment nostre Dieu ayant esté séparé de l'ame, quant aux sentimens actuels de l'amour diuin, dont elle iouissoit estant unie à Dieu, commence à luy redonner ceste iouissance uniuerselle; mais tout en autre maniere.

CHAPITRE II.

PLVS vne chose absente est désirée, plus la ioye est grande lors qu'on vient à la retrouver. Mais si ce qui nous est absent est de soy tresnoble; d'autant plus aussi le desir de le r'auoir est actif, & ne donne repos iusques à ce que l'on en iouisse. Or ie di plus, que si entre la chose désirée, & celuy qui la desire, il y a de la sympathie, soit pour quelque ressemblance, soit pour quelque dependance; tant plus le desir & la volonté seront embrasés à la rechercher, & le contentement grand l'ayant trouué. Il y a trois causes qui esmeuent l'ame, à rechercher la chose désirée; la premiere est la ressemblance. Or est il que Dieu seul est celuy semblable à soy-mesme, & de qui tout estre depend. C'est luy seul qui sans commencement, & sans fin est de toute eternité. Qui est-ce donc, Dieu tresbon, qui est semblable

D d

à toy?

à toy? C'est vous-mêmes, ô mon Dieu, que nous recognoissons pour seul Dieu, seul tout puissant, seul tout bon, seul parfaitement iuste & misericordieux. C'est vous, ô mon Dieu, que nous adorons, aimons, & honorons, par dessus toutes creatures, comme estant nostre Createur. C'est vous que nous adorons, vn seul Dieu en trois personnes, le Pere, Fils, & saint Esprit: mais vne essence du tout simple & indiuisée. Le Pere de nul, le Fils du seul Pere, le saint Esprit procedant de tous les deux, sans commencement & sans fin. Qui est ce donc, Dieu ttesaint qui est à toy semblable? Vrayement nul ne peut cognoistre que vous-mesme, tel que vous estes. Mais si ainsi est, comme il est, quelle ressemblance peut-il auoir, entre vous & nous, entre le Createur & la creature, entre vous Dieu immortel, & nous creatures mortelles? Sans point de faute, il y a quelque ressemblance, attendu que nous sommes creez à son image, & n'y a chose qui puisse plus ressembler Dieu, que son image. Et comme en la Trinité il y a trois personnes, faisans vn seul Dieu: nous auons les trois puissances de l'ame, l'entendement, la memoire, & la volonté; qui trois ne font qu'une ame, & cecy represente le mystere de la sainte Trinité.

Dieu

Dieu est esprit, & nostre ame est esprit: mais ceste ressemblance est quant à l'estre naturel, que Dieu nous a donné nous créant. Or nostre Dieu requiert de nous, choses à luy semblables. Et pour autant que Dieu le Pere, est la charité, le Fils, la dilection; le saint Esprit, l'amour du Pere & du Fils: ceste charité & dilection, requierent de nous quelque chose de semblable: à sçavoir, vne charité, par laquelle comme par vn lien de consanguinité nous soyons conioincts & vnis à luy. Et ceste ressemblance est celle qui embrase nostre desir & nostre volonté, à iouir parfaictement de nostre Dieu. La cause seconde est la dependance. Il n'y a si aueugle, qui ne sçache que nous dependons du tout de Dieu, & que plus la creature est doiïée de perfections en sa nature, plus elle est dependante de Dieu. Les creatures sensitiues & vegetatiues, & ce grand vniuers sont moins dependants de nostre Dieu que l'homme, pour ce que seul entre tous les creatures il est doiïé de la raison: pourquoy ayant plus receu, il est plus dependant de son bien faiseur, qui est Dieu. Il y a plus, que pardessus l'estre naturel excellent qu'il a receu de Dieu, il a encoré la grace, par laquelle il depend immédiatement de Dieu, & sans laquelle il ne pourroit

subsister, en l'estre grauit & surnaturel. Donc il n'y a rien que nous debuons plus desirer, que celui duquel tout nostre bien procede. La troisieme cause est l'amour, qui est vn bien qui attire tousiours à soy la chose aimée. Mais quel obiect se peut il trouuer plus parfaict que Dieu mesme, duquel nous sommes l'image, & de la puissance duquel nous dependons? Vrayement l'amour diuin est vn lien tresfort, qui nous rend inseparables de Dieu, quant aux desirs. Pourquoy ce n'est de merueilles, si l'ame se trouuant priuée de Dieu, le cherche avec desirs ardens de le retrouuer. Comme nous auons dit aduenir au troisieme, liure traictant de la subtraction & separation de Dieu, quant aux sentimens actuels de l'amour diuin. Voyons maintenant, comment nostre Dieu commence à redonner à l'ame, ceste iouissance vnitiue. Combien que toutes ses operations soient autres, qu'au premier chemin, où l'ame iouissoit d'vn contentement incroyable, par l'vniõ de son Dieu. Mais la nature non assez aneantie, comme elle a esté durant l'estat de subtraction; estoit incitée par vne deuotion sensible, procedante des parties inferieures de l'ame. Comme seroit vne ioye vehemente procedante de la consideration de quel que mystere de la

vie ou passion de nostre Sauueur, ou de la
 cognoissance des perfections diuines, ou
 autres graces receuës de Dieu. Ceste ioye
 estoit en l'ame très-iustement. Mais la na-
 ture, non du tout aneantie, se mettoit avec
 l'esprit; causant des emotions au corps
 comme battemens de cœur, & autres alte-
 rations. En sorte qu'il estoit impossible,
 qu'on n'en fist remarque à l'exterieur. Mais
 quoy que cela se passast aux parties inférieu-
 res de l'ame, si est-ce que tout procedoit
 immediatement, de la parfaicte vnion de
 l'ame avec Dieu, & d'un parfaict amour di-
 uin, dont elle estoit assiegée. Et quoy que
 le corps en receust des alterations, l'vnion
 n'en estoit pourtant pas moins parfaicte.
 Mais en cest estat que la nature a esté toute
 aneantie par la subtraction de Dieu, elle ne
 ressent plus ces alterations, battemens de
 cœurs, & autres esleuemens. Tellement que
 ceste iouissance, dont à present l'ame est vnie
 à Dieu, se peut cacher, qu'elle ne soit veüe à
 l'exterieur. Si ce n'est, que quelque abstra-
 ction suruienne, laquelle il est impossible de
 cacher. Si est-ce toutefois qu'on peut bien
 dōpter & reprimer la ioye, qui esclatte trop
 fort au dehors, & la tenir renfermée dans l'a-
 me. Mais le corps quelquefois en demeure
 malade, par la violence de l'abstraction.

Comment en ce quatriesme chemin de perfection, l'ame commence a iouir du repos de ses labours.

CHAPITRE III.

MOn bien-aimé est descendu en son iardin, au parquet des choses odoriferantes, a fin qu'il repaïsse es vergers, & qu'il cueille les lys. Au Cantique des Cantiques, chapitre sixiesme. En cest estat l'ame s'escrie iustement, *mon bien-aimé est descendu en son iardin.* Le bien-aimé est nostre Dieu, qui repose en l'ame son espouse la bien-aimée; où il trouue les parfaites vertus bien purifiées. Dont ayant esté long temps absent, vient maintenant à y descendre. Mais quel contentement pourroit-on penser, que ceste espouse ressent, ayant retrouvé celui, de l'amour duquel elle est tant enflammée? Es autres passages elle inuite son espoux Iesus de venir à soy. Mais à present elle demonstre, que nostre Dieu y est du tout introduict, l'ayant trouué disposée, par sa grande pureté, acquise par le long aneantissement en l'estat de subtraçtion. *Je suis a mon amy, & mon amy à moy, lequel paist entre les lys.* De quelle assurance

assurance parle l'espouse, disant : *qu'elle est à son amy ; & son amy est à elle*, attendu qu'en ceste vie il n'y a iamais d'assurance ? Elle dit premierement, *qu'elle est à luy*, pour n'avoir plus de volonté sinon en celle de Dieu; duquel elle ne veut en aucune maniere se separer par quelque peché, ou imperfection volontaire, & moins quant à l'amour. Secondement, *que son amy est à elle*, pour la ferme confiance qu'elle a en sa bonté, pour les graces dont son ame est illuminée, le ferme espoir de sa predestination ; & encore pour la iouissance que des-là elle ressent du repos, & grande paix interieure, acquise par la mortification & aneantissement de soy-mesme. Car l'ame iusques à present a toujours travaillé à la mortification, & pratique des vertus. Estant à present en ce quatriesme chemin, reposant du tout en Dieu, avec pleine iouissance du fruit des vertus acquises.

Il ne faut pas penser, cheres ames, que le repos dont iouissent ceux qui sont parvenus à cest estat dernier de perfection, soit vn sentiment interieur de quelque douceur en l'oraison, ou autres operations esquelles la nature s'arreste & complaist, comme elle faisoit au premiere chemin. Car cela seroit encore imperfection, & tout ce que

ie traicteray en ce quatriesme liure, soit de l'estroicte & secrette familiarité de l'ame avec Dieu, soit des excez d'amour diuin, soit des abstractions, & autres graces surnaturelles, encore qu'elles soient semblables à celles du deuxiesme estat, dont est traicté au deuxiesme liure, si est-ce qu'il y a autant à dire, comme du iour à la nuict, & du ciel à la terre. Les termes de parler sont toutefois semblables, pour ce qu'il est mal possible d'en trouuer des autres significatifs de ce qui se passe en ce chemin.

Cette iouissance donc se faict en trois manieres, dont la premiere procede de la pureté de conscience, où l'ame voit par vne lumiere interieure, que nostre Dieu luy donne, que tout ce qu'elle a passé au chemin precedent, si estrange & incognu, qu'il luy sembloit estre abandonnée de Dieu, estoit pour la perfection. Elle cognoit maintenant la verité de tout, & commet nostre Dieu luy a enuoyé ces calamitez, par vn grand amour. Elle apperçoit le profit qu'elle y a faict, & combien nostre Dieu en est glorifié. Et outre plus, elle cognoit comment Dieu l'a miraculeusement preserué de peché. Car es occasions que nostre Dieu luy donnoit, voire la tentoit luy mesme, pour l'esprouuer, il falloit de l'assistance pour ne tomber.

Elle

Elle voit les causes pourquoy Dieu a permis tout cela. Elle est deliurée des doutes qu'elle auoit, que tout cela ne luy fust enuoyé pour ses fautes.

La deuxiesme, est en la force que l'ame reçoit, contre tout ce qui luy suruiuent de contraire à la nature. Mais il conuient entendre, que ce repos n'est pas en quelque reflection sur soy-mesme, n'y à la vertu. Car ce seroit encore imperfection, ains il est pur & du tout en Dieu, auquel l'ame agit continuellement, par l'vnion d'amour & de grace. Et ne se doit aussi entendre en telle sorte, que l'ame soit tellement forte à la vertu, qu'elle doibue quicter le trauail de la mortification & pratique d'autres vertus. Car encore qu'elle soit au souverain degré d'icelles, si est-ce qu'il faut trauailler iusques à la mort. Mais ce ne se fait plus par violence, la nature estant du tout morte. C'est plustost vne continuation ou augmentation de la choses acquise, de laquelle si on abandonnoit la pratique, on retourneroit en arriere, & perderoit on ce qu'on auroit ia acquis. Par laquelle continuation en la pratique des vertus, lesdictes vertus s'embellissent, & l'ame augmente tousiours en grace, par ceste disposition qu'elle se donne cooperant aux premieres graces.

D.

*Du parfait repos de l'ame avec Dieu, où elle est
secrettement abysmée dans le trespas amour.*

CHAPITRE IV.

VNs chose ne peut estre dictée parfaite,
si elle n'est ia paruenue à la fin der-
niere, pour laquelle elle est destinée. Or le
repos duquel l'ame iouit en cest estat de
perfection est du tout parfait, pour ce qu'il
est en Dieu, hors duquel n'y a rien de par-
fait. Dieu donc est nostre fin, & nous som-
mes creéz à ceste fin, pour reposer en Dieu
à toute eternité. Ne soit que volontaire-
ment nous nous en distrayons, par nostre
malice. Mais comment, & quand est-ce,
que l'ame peut iouir de ce parfait repos en
Dieu, veu que ceste vie n'est pas le lieu de
repos? Qu'ainsi soit, si est-ce qu'il y a quel-
que repos en Dieu durant ceste vie, & d'i-
celuy est parlé és huit beatitudes. Lors
que Dieu dit, *bien-heureux sont les pauvres
d'esprit, pour ce que le Royaume des cieux est à
eux.* Il demonstre par ces parolles, que les
ames du tout pauvres, non pas seulement
du corps; mais d'esprit, possèdent le roya-
me de paix & de repos spirituel. Ceux-là
sont

sont pauvres d'esprit, qui sont tellement mortifiez & aneantis, qu'en toutes leurs actions, ils ne cherchent, ni ne veulent rien plus operer qu'en Dieu & pour Dieu; tant ils sont alienez de ce qui n'est pas Dieu, & d'eux-mesmes. Tels sont ceux qui sont paruenus, à ce quatriesme chemin de perfection, & à iceux appartient le royaume des cieux. C'est à dire, que dès à present ils iouissent du repos, & des consolations de Dieu, par vn intime absorbement en Dieu, consistant en vne parfaicte vnion d'amour diuin. Car iacoit que ces ames soient pour le present priuées de la claire vision de Dieu, propre aux bien-heureux; si est-ce qu'en leur interieur ils ont vne lumiere continuelle, qui les guide en toutes leurs actions, & operations. Ioincte à ce vne cognoissance de Dieu, & familiarité si grande, que par ceste iouissance ils ont plus Dieu en eux-mesmes, qu'ils ne sont en eux-mesmes. Je di donc, que ce contentement est si grand, que si par la foy on ne croyoit qu'il y a vn lieu, qui est le royaume des cieux, où les ames bien-heureuses iouissent de Dieu après la mort, on penseroit des-ia estre en paradis. Et cecy les embrase d'autant plus, en cest amour diuin secret & caché, cognoissant que si en ceste vie mortelle, on

iouit

iouït de Dieu si parfaictement, & avec tant de contentement, le repos qu'on aura là sus au ciel, doit estre incomparablement plus parfaict: où n'y aura plus d'empeschement, peril de tomber en peché, ou d'estre à iamais separé de Dieu. *M'amie tu es belle & soüefue, delectable comme Ierusalem, terrible comme vne armée ordonnée sous les enseignes.* Aux Cantiques sixiesme. L'espoux celeste nostre Dieu, louë l'ame fidelle, pour ses grandes perfections, & luy monstre qu'il se delecte tellement en sa beauté, que comme vne armée bien ordonnée, elle a la force d'attirer à soy nostre Dieu, qui par apres dit, *desfourne tes yeux de moy, car ils me surmontent.* Ce sont les œuvres faictes en grande pureté de conscience, & sortantes de ce grand amour de Dieu, qui le contrainct de se donner du tout à l'ame, dès qu'elle est encore en ceste vie. Estant de soy si bon, qu'il ne se peut separer de ceux qui l'aiment fidèlement. Or vn tel repos de l'ame en Dieu, & de Dieu en l'ame, peut estre dit parfaict, par ce que Dieu est la fin, auquel estant paruenüe, elle en iouït parfaictement avec vn repos parfaict, quant à l'acion. Mais ceste perfection de repos, sera accomplie, lors que laissant ceste vie, l'ame entrera au royaume des cieux; où le corps

ne

ne donnera plus d'empeschement, pour iouir de la claire vision de Dieu à toute eternité.

*Que ce repos cause vne union beatifique de l'ame,
& quelle est ceste union.*

CHAPITRE V.

QUELQUES ames imparfaites, & qui n'ont cognoissance de ce chemin de perfection, pourroient penser, que ce repos seroit quelque contentement interieur, ayant toute chose à desir, & rien contrariant à la nature, ou quelque calme interieur, avec deuotion, & goust spirituel; qui seroit plustost vne certaine oisiveté en l'ame, se complaisant ainsi en soy-mesme, avec croyance d'estre ia bien vnïe à Dieu. Il se faut donner garde, de s'arrester à telles imaginations & persuasions, par ce que cela seroit de beaucoup retarder l'ame de la perfection. Car demeurant là arrestée, elle seroit sans poursuiure en auant, pour ceste croyance d'estre venuë au sommet de la perfection, par ceste paix interieure, procedant de la nature, & pour n'auoir rien contre la volonté, & par ainsi se delectant en ces
petites

petites douceurs interieures, comme ayant le don de pleurer, ou quelque ferueur bouillante, qui incite la nature, ou plustost la blesse, par vne trop grande violence faite à icelle, pour acquerir cete deuotion sensible, penseront que ces accidens soient excez d'amour & abstractions, & s'estimeront estre toutes parfaites. Mais voicy la tromperie, laquelle on pourra recognoistre, quand on voyra que la personne, s'estimera estre parfaite, fera cas de soy, desirera qu'on la trouue telle, se contristera quand on ne fera cas de ses deuotions. Et tout cecy est vne preuue suffisante, que tout ce qui se passe en elle ne sont pas abstractions, ou consolations venans de Dieu, estant bien esloignée de la perfection, dont nous traictons à present.

Les ames donc dont je parle, & qui sont en ce quatriesme chemin, quoy qu'elles cognoissent en elles des graces admirables de Dieu, lesquelles elles ne peuuent nier venir de Dieu pour les effectz, ven qu'elles ne les procurent en rien qui soit selon la nature; mais s'y disposent par la mortification, ne s'estiment iamais parfaites, ains en verité les plus miserables du monde, avec ceste creance, que si nostre Dieu departissoit telles graces aux plus grands pecheurs, ils en feroient mieux leur profit. Votre desir est
 toujours

touſiours eſtre cachées, & incognuës aux creatures, fors de leurs directeurs, auxquels elle veulent bien donner à cognoiſtre, les operations de Dieu en leurs ames, pour eſtre ce neceſſaire, à fin qu'ils les puiſſent conduire ſeulement, & que par ainſi les graces du S. Eſprit en elles ne ſoient eſtouffées. Et telles ames ont tant de peine, pour leur grande humilité, de donner à cognoiſtre ces graces: qu'il leur ſeroit plus facile de dire tous les pechez du monde, s'ils le auoient commis, que de les dire. Et s'il aduient qu'on en ait cognoiſſance, & que les gens impies s'en ſeruent de riſée & moquerie, cela leur eſt toute ioye; en tant que Dieu, & ce qui touche la gloire d'iceluy, n'en ſoit pas offenſé & meſpriſé. Attribuant à eux le meſpris & la conſuſion, & la gloire à Dieu ſeul. Mais en cecy ſe conuient encore donner garde d'une tromperie, que ſoubs ombre de la gloire de Dieu, on ne cherche la ſienne propre. Il faut donc, que le tout ſe face en verité, & que le deſir de la gloire de Dieu, ſoit avec meſpris & conſuſion de ſoy-meſme, qui ſont les vrais effets de ceſte vnion beatifique.

Mais quel eſt donc ce repos ou vnion? Il ne ſe doit entendre des ſouſcits reſſentimens que l'ame trouue en l'oraiſon ou en la vertu.

Co

Ce n'est encore l'action de contemplation. Combien que les ames cheminans en cest estat, ne soient priuez de ces ressentimens tant en l'oraison, pratique des vertus, que contemplation. Car encore que tout cela soit tres bon, si n'est-il que le milieu entre Dieu & l'ame, qui conioinēt l'vne à l'autre. Ce sont dons de Dieu, mais non pas Dieu mesme. Si quelque espoute terrestre se plaisoit plus és dons de son espoux, comme és chaisnes, bagues d'or, ou autres choses precieuses, qu'à son espoux propre; elle meriteroit qu'il la delaissast du tout, pour l'indignité commise par elle en son endroit. De mesme, les graces tant naturelles que surnaturelles, de Dieu à l'ame, comme, parfaicte contemplation, extases, exeez d'amour, abstractions, reuelations, lumieres interieures, ne sont que dons de l'espoux celeste à l'ame fidelle. Laquelle si elle s'arrestoit plustost à ces dons qu'à Dieu mesme, elle meriteroit d'estre abandonnée de Dieu. Ce repos donc est en Dieu mesme, auquel elle est vnie en cest estat, c'est à dire, qu'à present tous les empeschemens qu'elle auoit, és autres estats precedens sont dissipez. Ayant pour l'heure telle liberté de traiter & communiquer aussi familièrement avec Dieu, comme vn amy avec son amy.

Et

Et ceste vnion est beatifique, par ce qu'on ne peut estre plus voisin de Dieu, ne soit que l'ame separée du corps par la mort, vienne à iouir de la claire vision d'iceluy, par vne iouissance admirable de Dieu là sus au ciel. Mais s'il falloit dire quel est ce repos & contentement en Dieu, ou ce que c'est de Dieu, il est autant impossible, qu'aux ames bien-heureuses, de nous dire ce que c'est de leur gloire, & de Dieu; dont ils ont pleine iouissance là haut au ciel.

Si l'ame pouuoit dire de bouche, ou par escrit, ce qu'elle cognoit & goust de Dieu, en la iouissance qu'elle en a, en ce quatriesme estat, Dieu ne seroit pas Dieu. Car il est incomprehensible, bon sans fin, qui ne se peut comprendre par nos sens, & l'ame seule qui en iouit, le cognoit en soy-mesme, & en cecy est ce repos, qui se peut dire deifique. Telles ames sont contrainctes de ne parler beaucoup de Dieu, ains garder vne taciturnité, par ce que si elles en parloient comme leur cœur pense, leurs propos seroient si obscurs, qu'on ne les pourroit entendre. Je di obscurs, pour ceux qui ne scauent en verité ce que c'est de Dieu. Et ce silence qu'elles sont forcées de garder, leur est vne grande peine, pour l'amour grand de Dieu, qui les embrase à en parler,
 & dis-

& discourir à telles personnes, qui pour le plus ordinaire, ne les entendent.

L'espoux celeste considerant son espouse, tant embrazée de son amour, recommence à la louer, comme il a faict au premier estat de la contemplation. *Ta chevelure est comme un troupeau de cheures, lesquelles sont apprues de Galand. Tes dents sont comme un troupeau de brebis, qui sont montées du lauoir, chacune portant deux agneaux, & n'y a aucune sterile entre elles. Tes ioïes sont comme une piece de pommes de grenade sans tes secrets.* Combien que les loüanges que Dieu faict de son espouse, soient semblables en termes à celles qu'il faisoit, estant icelle au premier estat de perfection, si ne laissent-elles d'estre plus releuées, d'autant qu'il la loue à present, principalement pour deux causes, qui surpassent en excellence, toutes les actions procedantes des vertus. L'une est l'amour diuin, qui agit continuellement en l'ame. L'autre est l'acte de la contemplation, procedant de l'amour diuin. Or les actions semblent estre égales au premier estat de perfection, comme au deuxiesme, par ce que l'amour est aussi actif en ses operations, & la contemplation aussi extatique en l'un, comme en l'autre. Mais il y a ceste difference, qui consiste aux parties inferieures de l'ame, pour

pour les imperfections qui estoient cachées en la nature, laquelle donnoit au premier estat de perfection, empeschement aux actions d'amour & contemplation, lors qu'elle operoit en Dieu. Et ces deux actions ne pouuoient durer, pour estre imparfaites par la varieté, caulée par la nature. Laquelle estant purifiée, par la subtraction, l'ame agit continuellement où son amour l'esleue, par la contemplation de son Dieu.

il y a soixante roynes & octante concubines, & un nombre infini de ieune filles. Ma colombe est unique, & ma parfaite, elle est seule à sa mere, & esue de celle qui l'a enfantée. D'autant que nous approprions le texte des Cantiques aux ames, qui s'achement à ceste perfection, comme faisant fort à propos au subiect de nostre discours, quand l'espoux celeste dict, *il y a soixante roynes* (celle-là seule peut regner qui s'est surmonté soy-mesme : il entend par ces roynes les vertus, sourdantes immédiatement de l'ame, par le parfait aneantissement, & rendant l'ame victorieuse en tous aduenemens. Les concubines sont les actions vertueuses, qui ne se peuvent produire, sans contracter avec la nature. Côme sont tout ce qu'il faut donner au corps, pour l'entretènement d'iceluy, & sa conuersation. Ce que cōbien que faict

avec anéantissement, siest-ce que tant que l'ame est au corps, elle retient tousiours quelque imperfection naturelle, dont les saincts mesmes n'ont esté exempts. Pourquoy ces vertus là, sont comme concubines, ne pouians estre si pures, que celles qui procedent immédiatement de l'ame. *Les ieunes filles, mais vne seule à sa mere, ee sont toutes les vertus, qui sont produictes en pureté de conscience, lors que l'ame est par sa bonne vie, sans macule de peché. Mais entre toutes, la charité seule à sa mere; laquelle vertu procede seule de Dieu, & appartient à Dieu: car il est la charité mesme, & l'ame qui a charité, a Dieu en soy. Et ceste vertu est celle qui vñit l'ame à Dieu, & Dieu à l'ame. Les filles de Sion l'ont veüe, & les roynes l'ont estimée bien-heureuse, les roynes, & les concubines l'ont loüée* Que veut dire cecy? Ce sont les esprits bien-heureux, qui recognoissant la beaulté de l'ame parfaicte, la viennent à louër. Et puis encore les ames viuantes en ce corps moins parfaictes, entendues par les concubines, qui recognoissent les rares vertus, & perfections d'icelle.

Qui est celle qui apparait comme l'anbe du iour, belle comme la lune, pure comme le soleil, terrible comme une armée equippee de bannieres? Je suis descendu en mon iardin, pour veoir les pommes

*pommes des vallées, & veoir si la vigne estoit fleurie, & si les pommes de grenade estoient bouton-
nées, ien'en ay rien sçeu. Mon ame m'a troublé,
à cause des chariots d'Aminadab. Retourne toy,
retourne toy Sulamite, retourne toy retourne
toy, à fin que nous te contemplions. L'espoux
celeste accompare son espouse à l'aube du
iour, pour sa beauté. Le vray iour, la vraye lu-
miere c'est nostre Dieu, qui illumine toutes
les tenebres; & c'est luy qui donne lumiere
à l'ame. Mais par l'aube du iour, peut estre
entenduë l'ame fidelle, en ce quatriesme
estat de perfection, qui comme vne lumie-
re paroist belle, par la clarté qu'elle reçoit,
du vray iour nostre Dieu, en la contempla-
tion diuine, en ceste vnion. Puis il dit, *belle
comme la lune*. Entre tous les astres, la lune
est la plus proche de nostre terre, & sa lu-
miere paroist seulement la nuit. Et l'ame
parfaicte reluit entre toutes les autres; mais
en la nuit de ce monde. Car lors qu'elle se-
ra au ciel, en la presence du vray soleil de
iustice, sa lumiere sera absconsée en Dieu:
comme la lune en la lumiere du soleil, de
qui elle reçoit sa lumiere. Mais cōment pu-
re *comme le soleil*? Cecy appartient à la gran-
de pureté de l'ame, qu'elle acquiert par la
contemplation diuine. *Terrible comme une
armée*. Ce sont les actions de la vie actiue,*

438 DE LA RVINE DE
conioinctes à celles de la contemplatiue,
que l'ame pratique avec perfection en cest
estat. Et c'est ce qui la rend admirable en-
tre les hommes, de veoir vne ame du tout
contemplatiue, s'addoner sans peine & dif-
ficulté à la vie actiue, & charité du prochain.
*Quelles choses verrez-vous en la Sulamite, si-
non les compagnies des armées?* En ceste ame
on ne voit qu'une continuelle victoire, con-
tre tout ce qui l'attire aux choses basses de
ce monde, qu'elle surmonte virilement de-
meurant vnüe à son espoux celeste.

*De la fruition secrette & transformation de ceste
esponse, au plus secret de la diuinité.*

CHAPITRE VI.

CHERES ames, il pourra estre qu'au-
cuns s'esmerueilleront, ou croyront
que par quelque presumption, j'entreprends
monstrer, ce que c'est du vray & pur amour
diuin: me seruant pour cest effect de termes
& façon de parler trop releuez, comme de
transformation, fruition & semblables ter-
mes. Mais ceux qui en ont faict essay, &
gousté la bonté de Dieu, par vne iouïssan-
ce de sa presence & familiarité, seront res-

tesmoins de la verité que ie descri. Et ceux là seuls qui ne sortent, ou bien rarement, hors d'eux-mesmes, n'ayant cognoissance de l'esprit de Dieu, auront occasion de me condamner, au moins suivant leur sens. A quoy ie ne me veux arrester, puis que ie ne di rien contre la sainte Escriture, & qui n'ait esté experimenté, de quelques ames incognues, qui ont appris en l'eschole de Dieu, ce que c'est de ce pur esprit de Dieu. Or ceste fruition secrette, doit estre en deux manieres. L'une est vne fruition secrette, procedante des vertus acquises. Et ne faut penser, que ceste fruition ou iouissance, soit qu'on auroit tellement acquis toutes les vertus, qu'on pourroit demeurer en vne oisiveté spirituelle; pensant qu'à toutes occasions suruenantes, pour pratiquer les vertus, on les trouuera asseurées, pour l'espreuue qu'on en aura fait plusieurs fois. Que l'ame qui ia est en ce chemin de perfection, se garde bien de s'arrester à ceste oisiveté, par ce qu'en peu de temps elle perdrait, tout ce qu'elle auroit acquis, avec beaucoup de trauail. Mais pour entendre que c'est de ceste fruition secrette, qui procede des vertus acquises, ie di que c'est vne paix interieure en l'ame, & ioye au S. Esprit, procedant de la vertu. Car en toute occut-

rence qui luy suruient, contraire à la nature, & ausdictes vertus, soit par l'instigation des diables, soit par les tentations du monde, venantes des creatures, ou de nostre propre nature corrompuë; si tost que l'ame s'aperçoit de la moindre resistance à la vertu, soudain elle se rend victorieuse, par vne indifference acquise au plus secret de son interieur, dont elle accepte tout ce qui luy suruient, comme venant immédiatement de Dieu, pour son plus grand bien. Scachant bien par vne viue foy, que Dieu ne permet rien luy aduenir, si ce n'est par son amour, & pour nostre plus grande perfection. Dont l'ame en tire le fruct spirituel, & laisse la malice à la creature. Si c'est du diable, il s'en retourne & s'enfuit, avec sa courte honte, & demeure plus foible qu'une mouche. Si c'est des periecutions des hommes, ils demeurent confus en leur attente. Car ceste ame a tellement fiché l'ancre de son esperance en Dieu, que si tout le monde s'esleue à sa ruine, elle n'en reçoit aucun changemēt en foy. Demeurant tousiours asseurée, que Dieu la preseruera contre tout peril, dont elle se resioit. C'est donc ceste fruition dont l'ame iouit; mais secreta & incognuë aux hommes. D'autant que les periecutions sont quelques fois si violentes, mesmes que
elles

elles touchent tellement au corps, qu'il faudroit auoir vn corps de fer, pour ne le sentir. Or nostre Dieu ne veut pas, que ses seruiteurs soient insensibles. Que mesmes il les laisse viuement ressentir la douleur au corps, tant que souuent ils y perdent la vie, comme tant de martyrs ont fait. Mais quelque fois Dieu permet, que telle ame endure tant & de si horribles persecutions, que ce luy sera vn martyre, plus picquant que le martyre sanglant. Et quoy que le corps en soit attenué; neantmoins l'ame demeure toute ioyeuse en Dieu, benissant ceux qui les persecutent, rendant tousiours le bien pour le mal: disant à l'imitation du Fils de Dieu, *mon Pere pardonnez leur, car ils ne sçauent ce qu'ils font.* Mais voicy en quoy ie di, que ceste iouissance & fruition est secrette. D'autant que les mondains, ou mesmes les personnes spirituelles & religieuses, qui n'ont que bien peu de cognoissance de l'interieur, iugeant temerairement de telle personne, la voyant desfigurée & attenuée, diront, que ce soit par impatience, orés que la personne l'endure volontairement & ioyeulement. Ignorans le suau contentement, dont l'ame iouit en son interieur, par la conformité de sa volonté à celle de Dieu. Desirant de tout son

cœur,

442 DE LA RVINE DE
cœur, ces horribles persecutions, autant,
& si longuement que ce sera la volonté de
Dieu. Iacoit que telle ame ne peut desirer
le peché, pour le grand amour qu'elle por-
te à Dieu. Ce qui faict que voyant le pe-
ché, où tombent ceux qui la persecutent,
telle ame ne laissera d'aduifer, par toute
voye de charité, de les conuertir, & leur
impetrer de Dieu la lumiere interieure,
pour recognoître leur malice, & se retour-
ner à Dieu. Auquel elle espend abondance
de pleurs, pour la remission des fautes de
ses prochains, & saluation de leurs ames.
Mais aucunes personnes voyant l'exterieur,
diront que ces pleurs viennent d'impatien-
ce. Et par ce moyen l'ame demeure touf-
jours incognüe au monde, tenant tousiours
ses operations secrettes en soy-mesme.
Mais si telle personne est en congregation,
& qu'elle ne peut euitier qu'on n'apperçoi-
ue ses actions, le plus qu'elle peut se doit
garder, qu'on ne voye à l'exterieur, les ope-
rations interieures. Elle doit demeurer, &
faire oraison à son secret, si elle peut; n'est
que l'obedience le permet autrement, à fin
que le prochain ne prenne occasion de iu-
ger. Car il aduient quelque fois, que la con-
tention est si grande pour le prochain, & la
perte des ames (tel est l'effect de la charité)
qu'il

qu'il semble que le cœur se doit fendre de douleur Comme j'ay monsté particulièrement és autres liures, où ie traicte de la contrition. Mais là, d'autant qu'ils sont encore au chemiu d'imperfection, c'est pour leurs propres pechez. Icy la charité est si grande du prochain, que la mesme contrition, qu' auparauant ils cōceuoient pour soy, ils le ressentent à present pour le prochain. N'oublîât pour ce soy mesme. Si le prochain n'est si endurcy, il en remportera du grand fruct, encore qu'il ignore d'où luy vient ceste grace. Mais si le pecheur est endurcy, & demeure en sa mauuaise volonté, il en receura des grandes punitions, soit en ceste vie, ou en l'autre. Lors que sainct Paul auant sa conuersion, gardoit les accoustrements des meurtriers de sainct Estienne, quand on le lapidoit : lors ledit sainct Estienne priant pour ses ennemis, on peut croire que ses prieres ont de beaucoup profité à la conuersion de sainct Paul. Ainsi de mesme, aduient il souuent aux ames parfaites, qu'elles prient pour leurs ennemis. Pour ce dit l'espoux au septiesme chapitre du Cantique des Cantiques de Salomon. *O fille de Prince, combien sont beaux tes pas en chausseures.* C'est lors que l'ame estant du tout vnîe à son Dieu, descend neantmoins aux cho-

444. DE LA RVINE DE
choses les plus viles & basses, qui est par vne
compassion & charité bruslante. Regarde
les pechez de son prochain, pour luy im-
petrer pardon, & cognoissance de ses fa-
utes. Pour rendre entre les mains de Dieu,
celuy qui auparauāt estoit esclau du diable
par son peché. Et voicy ceste fruition secre-
te, procedāte des vertus, lors que l'ame a ac-
quis telle paix interieure, & telle force, que
de surmonter le diable, le monde, & en-
core soy-mesme, en telle sorte, que de bru-
fler interieurement d'amour diuin. Ce feu
rejallit tellement vers le prochain, qu'il faict
tel effect, que de le faire espandre larmes de
feu, pour ceux-là mesmes qui le crucifient,
& à toute occasion cherchent sa ruine. La
deuxiesme maniere de fruition secrette, est
la iouissance de son Dieu, son espoux. Mais
quelle est ceste iouissance, & transforma-
tion si secrette de l'ame avec son Dieu? l'ay
dit au premier liure, traictant de l'amour
propre, que tant plus l'ame est entachée de
son amour propre; tant moins elle ioiūt de
l'amour de Dieu (car ces deux amours ne
se peuuent compatir ensemble) & tant plus
elle est purifiée de son amour propre, tant
plus elle ioiūt de l'amour de son Dieu, son
diuin espoux. Or estant paruenue à ce qua-
triesme chemin de perfection, que d'auoir
surmonté

surmonté soy mesme, le diable, & le monde; l'ame ioiuit sans entredeux, d'un amour si pur & divin, que langue ne peut prononcer, ni creature humaine comprendre, ce dequoy elle ioiuit, en ceste fruition secrette, de l'vnion secrette, & de la presence continue de son Dieu, & de ceste transformation en iceluy. Il faut entendre, que nostre nature, est tellement corrompue, par le peché de nostre premier pere Adam, que nous sommes si violement attachés au peché, que comme vne pierre estant par force tirée hors de son centre, & esleuée en quelque haut lieu contre sa nature; aussi tost qu'elle peut trouuer son cours, & se detacher, descend en bas plus viste qu'un esclair: Ainsi de mesme, l'ame estant par violence tirée hors de son centre, qui est nostre Dieu, par le peché, & la nature corrompue acquise par le peché de nostre premier pere Adam: si tost que par la parfaite mortification, & aneantissement de soy-mesme (dont il est traicté en tous ces chemins de perfection) elle a acquis la victoire sur toutes ses passions, commandant à soy-mesme, & à toutes ses affections: aussi tost elle retourne en son propre centre, qui est son Dieu, son celeste espoux: plus viste que la pierre qui estant violement retenuë en haut, vient

vient à descendre en bas, rompt & foudroye tout ce qu'elle rencontre, pour retourner à son propre centre. Je di plus, que iamais oyseau ne peut voller si viftement, ni traict d'arbalestre courir si roidement à son but, que l'ame estant destachée de soy-mesme, retourne à son Dieu. En telle sorte que si on pouuoit veoir des yeux corporels ceste ame spirituelle, on diroit qu'elle est deifiée, pour estre tellemēt transformée en son Dieu, par vne naïfue ressemblance, procedante de nostre premiere innocence perdue: laquelle estant recouuerte par la pureté de vie, l'ame retourne à ceste premiere innocence, où elle auoit esté créée à la semblance de Dieu. Et voilà comment elle est transformée, sortant de les mauuaises inclinations, pour se plonger du tout à la ressemblance de son Dieu, à l'image duquel elle est créée. Fort à propos dict l'espoux au mesme chapitre 7. des Cantiques, *Tes deux mammelles, sont comme bachelors ieumiaux de la biche.* Car ces deux fruitions ou iouissances secretes, sont si vnies ensemble & comme ieumelles, que l'ame ne peut paruenir à ceste parfaite iouissance de Dieu, sans auoir acquis ces vertus, du fruidt desquelles elle iouit. *Ton col est comme vne tour d'ynoire.* Ainsi que le col est au dessus du corps,

corps , ainsi nostre esprit est pardessus les puissances de l'ame. Laquelle estant par cete transformation, au plus secret de la diuinité, il vient comme vne tour esleuée , à decouurir & cognoistre, les secrets diuins. surpassez la nature. Et de ceste cognoissance, procedel'amour , & les diuines loüanges & iubilations. C'est icy que l'ame reçoit souuent des illustrations , & reuelations des choses secretes & auenir , & que à ce dernier chemin , elle voit arriuer , tout ce que Dieu luy auoit reuelé au premier chemin de perfection , auant le delaissement sensible de la presence de Dieu, lors qu'elle estoit en sa premiere ferueur, iouissant des enyuremens spirituels. Lors nostre Dieu luy donnoit souuent des reuelations de choses futures. Mais le plus souuent obscurement, tellement qu'elle ne cognoissoit en quel temps la chose deust auenir , ni par quel moyen. Comme pour exemple , Dieu luy pourra donner reuelation, de la continuation de sa vie , pour mettre en effect quelque chose grande, à la gloire de Dieu. Or l'ame entendant ces secrets de la bouche de Dieu , elle ne sçait pour combien de temps durera sa vie ; n'est qu'il luy donne encore autre reuelation du iour de sa mort. Puis elle ignore quelle chose grande elle doit executer

cures à la gloire de Dieu. Neantmoins la personne reçoit telle impression en l'ame, qu'elle ne peut douter. (si ce n'est par humilité, pour se cognoistre indigne) que ce ne soit de Dieu. Or par l'assurance de son pere spirituel (de qui elle doit suivre les aduis, si c'est vn personnage bien spirituel & experimenté en la vie spirituelle) elle croit par les bons effects, qui ensuiuent ces reuelations, qu'elles viennent de Dieu. Mais quand elle vient à ce chemin, de delaissement de la presence de Dieu, quant au sentiment & consolation : lors ceste pauvre ame se trouue en des grands doubtes. D'autant que d'un costé elle ne peut douter que ce n'ait esté Dieu, qui luy a predit toutes ces choses. Et de l'autre voyant tout luy aduenir au contraire, par ce delaissement dont i'ay traicté au troisieme liure, ce luy est vne affliction incroyable. Mille disputes luy suruiennent en l'esprit, pensant si ç'a esté Dieu qui ait parlé en telle sorte, comment est-il possible qu'il m'abandonne ainsi ? Si c'est le diable, comment peut-il auoir telle familiarité avec mon ame, qui ne desire que de complaire à mon Dieu ?

L'ame ignore lors son estat, & le chemin où Dieu la conduit, & doit remedier à tous ces doutes, ne s'y arrestant en rien, & qu'elle

qu'elle ne dispute si ç'a esté Dieu ou le diable. Mais qu'elle se remette en Dieu, par vne totale resignation, à ce qu'il luy plaist enuoyer. Puis qu'elle n'a pas recherché ces reuelations, elle ne doit craindre, & soy troubler. Si ç'a esté Dieu, elles aduiendront en leur temps. Et quand bien seroit le diable, puis que comme ie di, l'ame ne les recherche, & s'en tient indigne, ce seroit la confusion d'iceluy. Je l'ay monstre en son lieu: mais il vient à propos de l'esclaircir icy pour le mesme subiect. Et d'autant qu'en ce dernier chemin, l'ame iouit de la presence & vnion de son Dieu, qu'il luy sembloit auoir perdu: lors elle voit aduenir, tout ce que nostre Dieu luy auoit predict. Cecy sera quelque fois dix à douze ans apres la reuection, quelque fois plus ou moins. C'est en ceste transformation, au plus secret de la diuinité, que l'ame voit clairement iusques à vne seule action, toutes les causes de ce qui luy est attriué, en ce chemin de priuation, & en ceste iouissance de Dieu, qu'elle auoit auparauant. Elle cognoit à present, toute la forme des reuelations faictes lors, & les causes pourquoy Dieu l'a conduite par ce chemin. Elle cognoit combien elle est peu de soy-mesme. Elle cognoit combien elle estoit au eugle. Si à present elle passoit dere-

chef par ce chemin de délaissement, elle scauroit comment elle s'y deuroit comporter, ce que lors elle ne pouuoit. Nostre Dieu la pouuoit autant illuminer lors, qu'à present. Mais sa bonté la laissée en cest auueuglement, pour son merite. Car ceste ignorance luy cause beaucoup à endurer. Dont de ceste croix, elle se purifie, de toutes ses imperfections.

Que ce repos n'est pas oisiveté.

CHAPITRE VII.

TES yeux, dict l'Espoux au Chapitre septiesme, sont comme les pisemes en Hesebon, aupres de la porte de la fille de la multitude. Lors que l'ame ioiuit en ceste transformation, du repos d'une diuine contemplation, là des yeux de l'esprit, elle voit clairement, par vne vision intellectuelle, les choses les plus secretes de la diuinité, en laquelle elle se repose. En vn contentement si suau, que toutes choses créées, tant soyent elles belles en leur nature, ne sont que tenebres. Mais ce repos n'est pas vne oisiveté, comme aucuns se seruent de ce mot d'oisiveté, pour monstrez le repos de l'ame. Or en cecy,

cecy il y pourroit auoir de la tromperie de la nature. En ce que lors que l'ame iouit d'un petit sentiment des choses spirituelles, dont il aduient que les sens extérieurs sont assoupis, & mesmes souuent les puissances intérieures sont appelanties (ce qui luy est vne vraye oisiveté, non toutesfois vne oisiveté vaine, quoy que en cest estat l'ame ne merite ni demerite) elle pense & se persuade, n'ayant gousté autre chose de plus releué de Dieu, que cest assoupissement soit quelque chose de diuin, & croit estre quelque chose de grand. Le diable peut causer ce petit sentiment, pour nous arrester en ceste tromperie, & n'aller non plus auant au chemin de la perfection. Mais le vray repos de l'ame en Dieu, n'est pas tel, ni oisiveté: d'autant que l'ame, ou pur esprit d'icelle agit continuellement en Dieu, en ceste diuine contemplation & vision. Outre ce l'action d'amour, qui est en nostre ame, n'est iamais oisue, ains opere continuellement en Dieu. Et mesmes les puissances inferieures sont tousiours en action en Dieu, en certaine maniere, suivant leur nature. Le-di en action en Dieu, par ce qu'elles sont transportées hors d'elles mesmes, par la transformation en Dieu. Mais ces actions & operations sont si spirituelles & releuées, que l'ame

sortant de ceste contemplation, s'admire
 soy mesme, se voyant estre si peu de soy,
 comme le neant, & neantmoins voyant des
 operations si diuines, qu'elle n'en peut don-
 ner l'intelligence aux humains. Si en ceste
 iouissance elle vient en extase, le corps de-
 meure sans sentiment, mais l'ame demeure
 iouissante des biens celestes, & ses opera-
 tions rendent vne continuelle louange à
 Dieu. Si ainsi estoit, qu'en ceste diuine
 iouissance l'ame & ses puissances demeu-
 rassent oisies: en la gloire des bienheureux
 il y auroit de l'oisuete, ce qui n'est pas. Car
 là on y loue tousiours Dieu, & les bien-heu-
 reux continuellement cognoissent ce que
 c'est de Dieu. Donc ces ames font dès ceste
 vie en cest heureux estat, ceste action de la
 continuelle louange & cognoissance de
 Dieu.

*Comment ces operations de Dieu en l'ame sont si
 secretes & incognues aux hommes, qu'on
 ne peut recognoistre ces creatures
 differentes des autres.*

CHAPITRE VIII.

D'AVANT que ce Cantique mysti-
 que de Salomon est plein de sapience
 diuine,

diuine, laquelle est entendue de peu de personnes seculieres, & du tout incognue aux mondains, pour ce n'est il permis, qu'un chacun le peut lire, à raison que ce qui est spirituel, seroit par abus changé en corporel. De mesme est il des voyes secretes, de l'ame cheminant à Dieu. Ces creatures sont si incognues aux hommes, qu'on ne les peut trouuer differentes aux autres, si ce n'est es actions vertueuses & mortifications. L'Espoux louangeant son espouse dict. *Ton nez est comme la tour du Liban, laquelle regarde vers Damas. Ton chef est comme Carmel, la chevelure de ta teste est comme la pourpre du Roy mise dans les canaux. Que tu es belle & iolie, la tres-aimée en delices.* Qui sera celuy, qui n'entende les secrets cachez en ce parler mystique, de l'espoux celeste à son espouse, lequel pour despeindre sa beauté dict. *Ton nez est comme la tour du Liban?* Certainement ce n'est pas sans grand mystere, que l'espoux parle en ceste sorte, & qu'il accompare la beauté de son espouse à chose haute & releuée, tantost à la tour du Liban, tantost à la palme, & autres termes de parler desquels il se sert. Et ce d'autant que pour l'intelligence des choses diuines, dont ceste espouse l'ame fidelle est absorbée, il est besoing que l'espoux celeste se serue de

maniere de parler fort obscure. Ce qu'il fait par la bouche de ce sage Salomon. Mais quoy qu'il semble au iugement humain, que ce pourroit estre vne chose ridicule, d'accomparer le nez d'une espouse à vne tour, c'est neantmoins pour monstter, que l'ame en toutes ses facultés, iouit surnaturellemēt, des operations secretes de son Dieu. Et qu'estant esleuée par dessus soy, & encore par dessus toutes creatures; elle cognoit & entend, en la presence de ce soleil de iustice nostre Dieu, les secrets du mystere de la sainte Trinité. Voit clairement, & goust de tous ses sentimens interieurs les mysteres les plus cachez de nostre foy, Entend l'obscurité des saintes Escritures, & selon qu'il plaist à Dieu luy communiquer. Mais tout cecy est si caché en l'ame, qu'il faut que telle personne soit tellement retenue, que ne pouuāt parler de ce qu'elle goute & cognoit en soy (d'autāt que si elle pouuoit rencontrer son semblable, ce luy seroit vn cōtētement indicible, de pouuoir dilater son cœur, pour parler de ce qu'elle iouit & cognoit) seulement elle dilate & ouure son cœur, en la presence de son Dieu, lequel reciproquement luy respond, bouche à bouche, plus familièrement que deux amis. Mais si telle personne n'estoit si retenue, les
 propos

propos qui sortiroient de sa bouche, seroient si releuez des secrets de Dieu, que on ne les pourroit entendre. L'on a acquis ceste prudence, en ce dernier estat. Car au premier, où ie traicte des enyuremens spirituels, des abstractions d'amour diuin, lors l'ame ne peut se retenir, que on ne le voye à l'exterieur, & ce d'autant que la nature n'est pas encore du tout aneantie. Cheres ames, si en ce petit traicté, auquel ie mets le plus ouuertement qu'il m'est possible, ce chemin de perfection, ou ces voyes secretes, par lesquelles Dieu attire les esleus à soy, il semble neantmoins encore obscur, à ceux qui ne l'ont experimenté, que seroit il donc, si ie traictoy du tout, quelles sont les operations secretes de ces ames? Il faut icy limiter la plume, & se seruir de termes de parler humain pour entendre ce qui ne se peut dire.

Puis l'espoux dit au mesme chapitre 7.
Ta stature est semblable à la palme, & tes mamelles aux grappes de raisin. J'ay dit ie monteray à la palme, & j'appreenderay ses fruicts, & les grappes de la vigne, & l'odeur de ta bouche comme l'odeur des pommes. Ta gorge est comme le bon vin digne pour boire à mon amy, & pour ruminer en ses lèvres, & en ses dents. Voyez icy quelle variété? L'espoux dit, Ta

statue est semblable à la palme, & ses mammelles aux grappes. Puis i'ay dit, ie monteray à la palme, & ie prendray ses fruicts, & seront tes mammelles, comme les grappes de la vigne. Ceste variété représente la contemplation, ioincte avec l'action. Car en ce dernier chemin, l'ame sans difficulté opere facilement la vie de Magdeleine, & de Marthe ensemble. Et ses fonctions sont telles, que par les visions des choses surnaturelles (comme i'ay dit du mysterode la sainte Trinité, & des mysteres de nostre foy) elle vient encore à cognoistre la naïfue beauté surnaturelle de la vertu. Et de ceste cognoissance, ainsi que les mammelles semblables aux grappes de la vigne, vient à produire l'action. Or pour donner à entendre, ce que c'est de la cognoissance surnaturelle des vertus, cheres ames, pensez vous que nostre Dieu se complairoit tant en l'ame, pour seulement voir vne personne estre chaste, estre humble, & auoir autres vertus, qui apparoissent peu de chose à l'exterieur, si elles n'auoient autre lustre en l'ame? Croyez, si ce n'est par reuelation, & illustration de la grace de Dieu; iamais personne viuante ne peut veoir, ni cognoistre la beauté de la vraye vertu. Prenons la virginité pour exemple, si on pouuoit veoir la beauté essentielle de

de ceste vertu, le monde finiroit : d'autant que nul ne voudroit perdre sa virginité. Ce que Dieu tient caché aux creatures, il le reuele, & monstre quelque fois à aucuns de ses fauoris & amis. Mais ceste veüe ne se peut donner à entendre. Et de ceste cognoissance surnaturelle, l'ame vient à produire l'action, tant à l'aduancement de sa perfection, que vers son prochain. Je di moy, que toutes les vertus faictes en charité, & pour Dieu, sont quant à l'operation exterieure naturelles. Mais quant à leur essence & beauté spirituelle, sont à nous incognuës, & sont supernaturelles. D'autant qu'humainement, sans quelque reuelation, & illustration, nous ne pouuons les cognoistre en leur propre essence & naïfue beauté. C'est pourquoy nostre Dieu se plaist tant es ames vertueuses. Mais là sus au ciel, en la gloire des bien-heureux, nous verrons ce que nous ignorons en ceste valée de misere. Si les mondains pouuoient veoir l'espace d'un clin d'œil, ce que Dieu monstre & reuele à ses amis & seruiteurs fideles, qui par leur travail se disposent à receuoir les graces diuines, ie di, que si l'espace d'un clin d'œil, ils pouuoient veoir la naïfue beauté de l'essence des vertus, que i'ay dit cy dessus; qui est surnaturelle & incognüe aux hommes:

hommes:

458 DE LA RVINE DE
hommes : & à l'opposite s'ils voyoient la
defectuosité, & laideur du peché; iamais ne
pourroient attendre vn moment, sans se
conuertir à Dieu de tout leur cœur. Il ne
faut pas penser que ces ames, que ie di estre
en ceste perfection, & qui iouissent de ce
que dit l'espoux, en ce Cantique des Can-
tiques; des secrets les plus releués de la
diuinité; que telles ames soient sans tribu-
lation, que mesmes elles sont persecutées;
soit des diables ennemis iurez de nostre
bien spirituel, soit des hommes plus que
iamais. Plus la personne s'addonne en veri-
té à la vertu, plus elle est persecutée. Iamais
la vertu ne peut estre sans persecution, ni
sans enuie des meschans. Et en telle sorte,
qu'il semble quelque fois, que tout le mon-
de s'esleue à sa ruine, & suscite vne infinité
de faulx calomnies, & detractions nota-
bles, contre ces personnes, pour faire estein-
dre le lustre de leurs vertus, & de leur re-
nommée. Telle est l'enuie des meschans. Il
adiendra quelque fois d'estre mis en pri-
son, ou en danger d'y estre comme mal-
faicteur. Or nostre Dieu permet cecy adue-
nir à ses fideles seruiteurs pour deux causes,
l'vne pour aneantir encore ces ames de
quelque imperfection, à fin de les rendre du
tout purifiées. I'ay traicté es autres liures
prece-

precedens , des grandes persecutions que ces ames endurent, & notamment au chemin de priuation. Mais iusques icy elles n'ont encores esté touchées au deshonneur de leur renommée. Ce leur estoit vn soulas quant elles pouuoient marcher la teste droicte , & que rien ne touchoit à leur renommée. Mais à present les voicy accusées de vice notable , estantes tenuës comme pecheresses ; & cependant ces ames sont innocentes. En quoy elles se resignent à la volonté de Dieu , d'estre tenuës pour pecheresses & malfaictresses. Ce qu'en nul autre chemin elles n'eussent peu endurer sans trouble. Nostre Dieu estant si bon, qu'il enuoye les tribulations aussi grandes , qu'il voit la personne disposée à les supporter, pour sa perfection. Et quoy qu'elles se voyent ainsi chargées d'opprobres, elles ont tousiours recours à Dieu, disant en sa presence, mon Dieu ie me tairay, parlez pour moy. S'il est besoyn que la verité de mon innocence soit cognüe, faictes mon Dieu cognoistre la verité. Mais s'il est besoyn pour vostre plus grande gloire, que ie supporte telle infamie; ie suis contente iusques à la fin du monde. Elles ont si viue esperance en Dieu, que rien ne les peut faire perdre, ni diminuer, tant soit peu l'esperance que
elles

elles ont fichée en luy, & du secours qu'il leur donnera lors qu'il les aura tout esprouuées.

L'autre cause est, que nostre Dieu permet cecy pour les rendre incognuës aux hommes, pour de tant plus accoistre leur merite. Si aucuns ont entendu la bonne renommée de telle & telle personne, ils viennent à douter, disant, s'il estoit vray que telle personne seroit si vertueuse & amie de Dieu, elle ne seroit pas ainsi traictée des creatures. Puis ils iugeront que toute leur deuotion est par hypocrisie, & vaine gloire, ou bien sottise. Ce nonobstant, & combien qu'on tâche quelque fois, de les faire tomber en impatience, par rude & mauuais traictement, la patience, se voit cependant reluire en leurs actions. Se tenans tousiours incognuës. Et en leur comportement, cherchent tousiours les voyes les plus communes aux autres; n'est par quelque reuelation, que lors elles obeissent à Dieu. Mais ne doiuent ce faire de leur iugement, sans le reueler à leur pere spirituel, & suivre son aduis. N'est qu'elles ne peuuent trouuer tel confesseur qu'elles desirent. Lors ayans accompli ce que Dieu leur commande; quant au surplus, il vaut mieux tousiours suivre la voye cōmune. Par ainsi elles sont tousiours inco-

incognües aux hommes. Et quant aux actions necessaires, comme manger, reposer, ce leur est vn martyre, le manger sobre, & le dormir fort court. Mais en la mortification qu'elles exercent au manger, & autres actions, se comportent en telle sorte, qu'on ne peut veoir que leur abstinence soit par mortification. Vray est que nostre vie doit plus monstrier d'edification au prochain par pratique, que par parole. Mais puis que les actions, & comportements sont vertueux, ne ressentant que la mortification, & haine de soy-mesme, il suffit, & n'est pas besoing de publier ses intentions, comme font plusieurs, sous ombre de donner bon exemple. Mais il se faut garder de la presumption & estimation de soy-mesme. Car de tant plus que la personne est aduancée à la perfection, de tant plus elle sera assaillie par Satan de la vaine gloire; d'autant qu'il ne la pourroit faire tomber en autre peché cognu. Neantmoins la personne ne doit iamais laisser quelque bien, pour craincte de la vaine gloire. Il faut dire avec saint Bernard. *Mon Dieu i'ay commencé cest œuvre pour vous, ie le finiray pour vous. Et tousiours faire ses actions pour seulement plaire à Dieu: & tousiours desirer d'estre inconnue au monde. Que le monde dise ce qu'il*

qu'il voudra. D'autant que ces ames imitent par tout la vie de Iesus-Christ, ainsi seront elles traitées du monde, comme a esté le Fils de Dieu. Lequel estant en croix, apres auoir enduré toutes sortes de tourments, opprobres & calomnies, en fin estant pendant comme malfaiçteur, ne cessoient encore les Iuifs de dire, s'il est Dieu qu'il descende de la croix. Il a sauué les autres, & ne se peut sauuer soy-mesme. Que diray-ie, de ses propres amis & Apostres? N'ont ils pas tous esté scandalizez, & ont doubté en la foy, pour veoir nostre Seigneur ainsi traité des Iuifs? De mesme aduient il des seruiteurs de Dieu, lors qu'on les voit ainsi chargez d'opprobres, & persecutions estranges, les ignorans des secrets de Dieu viennent à douter de telles personnes. Mais nostre Dieu ne laisse iamais tellement abandonner ces ames, qu'il ne laisse tousiours quelque personne illuminée. Ou plustost en suscite des autres, auxquels il donnera lumiere, de la vie & innocence de ceste personne, ainsi persecutée pour son nom. A fin que ceste lumiere ne soit du tout offusquée, & que au temps ordonné de Dieu, ceste lumiere cachée sous vn ombrage des persecutions, vienne à reluire. En quoy la providence diuine montre la puissance, au secours de

de ses amis & fideles seruiteurs. Le Fils de Dieu estant abandonné de tous ses amis, sa douce mere luy a esté tousiours fidelle, & elle a esté celle, qui a enseigné les Apostres apres la mort de son Fils, & leur a donné cognoissance des secrets les plus cachez de nostre sainte foy. Leur donnant cognoissance que ceste grande lumiere son Fils & son Dieu, qui auoit esté obscurcy & absconse, en sa mort & passion; venoit à reluire en telle sorte, que les Iuifs disoient, *vrayement cestuy-là estoit le Fils de Dieu.* Je prie qu'on ne s'esmerueille, si ie mets si particulièrement ces choses; d'autant que plusieurs ames, qui passent par ces voyes secretes, où Dieu les a attiré à la perfection, seront soulagées, trouuant par escrit ce qu'elles experimenteront. Car souuent elles endurent des grandes peines, pour ne trouuer personne expérimenté, en la vie spirituelle, qui les entendent, ou bien pour les aider. Et comme i'ay dit autre fois, que toutes les actions de Iesus-Christ, n'ont esté que pour nostre enseignement; lesquelles nous seruent comme d'un miroir au chemin de ceste perfection, c'est ce qui s'experimente en cest endroiect.

De

De l'union des operations secrettes de l'ame avec Dieu, qui consiste en vn secret aneantissement, par lequel elle reçoit en soy l'impression des graces diuines.

CHAPITRE I X.

IE suis à mon bien aimé, & vers moy est son regard. Vien mon bien-aimé, sortons aux champs, demeurons au village, lenons nous de main pour aller aux vignes, & voyons si la vigne florit, si elle a ietté son aigret, & si les pommes de grenade florissent; là te donneray-je mes amours. Ce parler mystique de l'espouse à son espoux, quant elle dit, *ie suis à mon bien-aimé, & vers moy est son regard.* Nous represente l'estroicte vnion des operations secretes de l'ame avec Dieu, qui consiste en vn secret aneantissement, par lequel elle reçoit l'impression des graces diuines.

Mais quel est ce secret aneantissement, que l'espoux celeste y prend tant de plaisir? Ceste vnion procede d'une veuë interieure, de la supreme partie de l'ame, laquelle estant vnie avec son Dieu, vient à s'aneantir iusques au centre de son neant. Mais que veut dire le centre de nostre neant; veu

que

que j'ay dit en autre endroict, que Dieu est nostre centre : & que l'ame ne peut auoir de vray repos, si elle n'est paruenue à son centre, qui est Dieu : le di centre de nostre neant, pour estre du neant que nous sommes, faicts que nous auons esté de rien. Et neantmoins Dieu nostre centre, pour estre en luy non seulement que tout ce qui a estre subsiste : & nostre ame d'autant plus, qu'elle est faicte à son image : ains aussi pour le nouuel estre, qu'elle a en luy par la grace, qui ne se perd que par le peché. Et par ainsi le neant nostre centre naturel, en Dieu centre supernaturel. Cecy est fort difficile à donner à entendre : d'autant que le neant d'où nous sommes faicts, ne se peut veoir. Car qu'est-ce que le neant ? Neantmoins en ceste veüe que ie di, l'ame vient à rentrer en ce rien, & s'y abysser dutout, quant à la nature. Et quant à la grace sortant de ce rien, qui appartient à soy-mesme : elle vient à se plonger & abysser en Dieu qui est son propre heritage ; comme estant faicte enfant de Dieu, par graces & dons diuins, dont ie traicteray plus particulièrement en vn autre chapitre.

Puis l'espouse inuite son espoux de demeurer au village, & se leuer du matin, de veoir si les vignes sont flories, & ce qui s'ensuit. Cecy nous represente, qu'en cest estat

G g

de

466 DE LA RVINE DE
de perfection, l'ame bruste d'une charité
spirituelle du salut de son prochain; dont
elle inuite son espoux de sortir, c'est à dire,
que ne se separant de ceste vnion, son es-
poux celeste l'accompagne au trauail du sa-
lut des ames. *La te donneray-ie mes amours;*
dit l'espouse. C'est en la charité de Dieu &
de son prochain, qu'elle se rendra à Dieu,
par la separation de l'ame avec le corps. *Les*
mandragores ont donné leur odeur en nos portes.
Tous fruictages nouveaux & anciens, mon amy
ie les ay caché pour toy. Ce sont les victoires
& fruicts de la saluation, & aduancement
spirituel du prochain, que l'ame garde com-
me vn thresor caché, pour le trouuer de-
uant Dieu là sus au ciel.

*Des extases & raiuissemens d'esprit, qui suruien-
nent en ce quatriesme chemin de perfection.*

CHAPITRE X.

A La mienne volonté que tu sois comme mon
frere, suçant les mammelles de ma mere,
que ie te trouue seul dehors, & que ie te baise, &
qu'alors on ne me mesprise. *Je te conduiray, &*
meneray en la maison de ma mere. Tu m'ensei-
gneras là, & ie te feray boire du vin confit, &
du moust de mes pommes de grenade. Chapitre
huietief.

huietième des Cantiques. Ce sont les grâds desirs, de lesquels l'ame en ce chemin de perfection, aspire continuellement, apres la vie eternelle des bien-heureux, où derechef elle desire les baisers de son espoux, qui est l'vñion parfaicte, où n'y aura plus d'empeschement de la nature. Là elle boira à souhait du vin confit, qui est le douaire des corps glorieux, acquis par leur trauail, qui est le vin: mais confit par la recompense de la gloire dont elle iouit.

Sa main senestre sera sous mon chef, & sa dextre m'embrassera. Je vous adiure filies de Ierusalem, que vous n'esueillez, & que ne faciez esueillir la bien-aimée, iusques à ce qu'elle la veille. Sa main senestre est l'humanité du Fils de Dieu: & la main dextre est la diuinité, où les ames reposeront. Pourquoy l'espouse dit-elle plustost, *sa main senestre sera sous mon chef, & sa dextre m'embrassera?* C'est pour ce que l'vñion de l'ame à son Dieu, ne peut estre semblable à l'humanité, comme à la diuinité. Et ce d'autant que la nature humaine, que le Fils de Dieu a prins en se faisant homme comme nous: & luy d'autant qu'homme, il ne contient pas toutes choses en soy, comme la diuinité. Mais en tant que Dieu & homme, il contient toutes choses en soy, & est par tout, & rien ne

peut estre caché de deuant sa face; iusques au plus profond des enfers Dieu y est. Et quant à nostre ame, il est plus en nous, que nous ne sommes en nous-mesmes. Il n'y a si petite creature, tant insensible que sensible, & raisonnable, que Dieu ne soit par tout; iusques à vne petite fucille d'herbe: si Dieu ne la soustenoit elle retoutneroit à neant. Pour ce donc l'espouse dit, *que sa main senestre sera seulement soubs son chef*, qui est l'humanité du Fils de Dieu. *Mais sa dextre l'embrassera*, qui est la diuinité, où elle sera du tout abysmée, non seulement par sa puissance absoluë: mais encore par sa grace & vnion diuine. Iacoit que l'humanité du Fils de Dieu est là sus au ciel en sa gloire; & ceste mesme humanité soit encore icy en la terre: où il nous a laissé son corps & sang, au saint Sacrement de l'autel: si est-ce qu'il faut que nous le receuions reellement. Et encore que nous le pourrions receuoir spirituellement à tout moment; ceste reception ne suffiroit, pour accomplir le commandement de Dieu. Voila pourquoy l'espouse conioinct ensemble son repos, tant en l'humanité du Fils de Dieu, comme en la diuinité des trois personnes, de la sainte Trinité. C'est en ceste diuine contemplation, que l'ame tombe en extase, ou raiuisse-

rauisſement d'eſprit: d'autant que, par ceſt
aneantiſſement ſecret, dont j'ay traicté au
chapitre precedent, eſtant ſortie de ſoy-
meſme, & abſorbée en Dieu, demeure en
admiration des choſes diuines, ſurpaſſantes
la nature. Lors les ſentiments corporels
viennent à ſe perdre, tant & ſi longuement
que l'ame demeure extatique. En ceſte ad-
miracion & contemplation diuine, on trou-
ue qu'aucuns ſaincts, ont eſté huict iours en
ceſte extaſe: tellement qu'on doutoit qu'ils
eſtoient du tout morts. Autres encore d'a-
uantage. Derechef l'eſpoux adiure de n'eſ-
veiller ſon eſpoſe, c'eſt à dire, qu'elle ne
ſoit retirée de ceſte contemplation, par au-
cun empeschement procedant des creatu-
res, ou de la nature.

*De l'eſtuation de l'ame fidelle par deſſus les
Angeſ, & de l'union des corps glorieux
apres la reſurreccion.*

CHAPITRE XI.

Q*ue eſt celle qui monte du deſert, abondante
en delices, appuyée ſur ſon amy. Je t'ay reſ-
veillè ſoubs un pommier, la t'a conceu ta mere,
la conceuant t'a enſanté. Mets moy comme un*

G g 1 *ſigna-*

signacle sus ton cœur, & comme un signe sus ton bras. Car l'amour est fort comme la mort, & la jalousie comme l'enfer. Du chapitre 8. du Cantique des Cantiques.

Encore que ce Cantique peut estre attribué à la Vierge Marie en son assumption, lors que les Anges & esprits bien-heureux, admiroient la beauté de ceste glorieuse Vierge & Mere: si est-ce qu'il peut estre encore entendu de l'ame fidelle. Laquelle estant encore reuestüe de ceste chair mortelle, est ainsi transportée hors de soy, par l'union d'amour & de grace, les Anges s'en admirent; d'autant qu'eux estans des esprits purs, ne pouians iamaïs tomber; neantmoins voient des créatures mortelles estant encore en ceste vallée de misere, estre esleuées quelque fois, en des plus hauts degrez de la vision diuine, que plusieurs ordres des Anges. Tel qu'un S. Iean l'Evangéliste en son Apocalypse. Les reuelations duquel, & iouissances des secrets diuins, que lors il receut en ceste diuine contemplation, ont surpassé la vision de plusieurs Anges. De mesme nostre Dieu fait secretement, vers plusieurs de ses amis fideles. Que veut dire l'espoux, quand il dit, *ie t'ay esueillé sous un pommier*, retirant son espouse de ceste extase? Ceci peut estre entendu de nostre

nostre premier pere Adam, & de toutes les ames fides. En ce qu'auant sa cheute il iouissoit de ceste continuelle presence de Dieu, par vne extatique vision, sans nul empeschement. Mais estant esueillé de ce repos, par son peché; il nous a causé la mort. Et lors nostre Dieu determina de nous enfanter, par la mort de son Fils Iesus-Christ. Lequel auoit déterminé de toute eternité, de descendre en terre, pour prendre chair humaine, & racheter l'homme perdu par son peché. Mais à present, par le merite de la mort du Fils de Dieu, les ames sont retournées à ce repos; & esueillées de la mort par vn transportement. Car la mort des iustes, n'est pas vne mort; mais vn commencement de la vie eternelle.

Puis l'espoux dit, *Mets moy comme vn signacle sus ton cœur, & comme vn signe sus ton bras, car l'amour est fort comme la mort.* Cecy n'est pas sans grand mystere. D'autant que les ames partant de ceste vie, quelque iustes que soient leurs œuures; elles doiuent passer par le iugement de Dieu, & les ennemis infernaux sont aux aguets pour les accuser. Mais la mort du Fils de Dieu, nostre redempteur, conioincte avec la foy, nous sera comme vn signacle, & signe deuant nostre Dieu. Lequel sera plus fort à

472 DE LA RVINE DE
nostre secours, que tous les diables, & la
mort mesme. Par le merite duquel ils se-
ront tous surmontez.

Ses embrasemens sont comme embrasemens
de feu, & comme flambe vehemente. Beaucoup
d'eau n'ont peu esteindre l'amour, & les fleuves
aussi ne la feront pas noyer. Si l'homme donnoit
la cheuance de sa maison pour cest amour, il la
mespriserait comme rien. L'espoux accompare
cest amour diuin au feu: d'autant que le feu
deuore tout, & change toute chose en soy.
Car quelque metal que ce soit que l'on
mette au feu, il s'embrase & brusle comme
le feu. De mesme ces ames embrasées de
de l'amour diuin, changent toutes choses
en soy. Si que mesmes les eaux & fleuves
des tribulations & persecutions, ne les peu-
uent esteindre, & retirer de cét amour diuin.

Nous auons une petite sœur, qui n'a aucunes
mammelles. Quelle chose ferons nous a nostre
sœur au iour, qu'on doit parler a elle? Si c'est un
mur, edifions sus icelle un palais d'argent. Et
si c'est une porte, fortifions la de tableaux de ce-
dre le sus le mur, & mes mammelles sont com-
me les tours. Lors ie fus en ses yeux, comme
celle qui trouue la paix.

Quoy que tout ce Cantique soit attri-
bué a l'ame fidelle, qui est créée a l'image
de Dieu: si est-ce que le corps humain est
aussi

aussi créé pour viure eternellement, & estre
compagnon à l'ame pour l'accompagner en
sa gloire: comme il a esté compagnon en les
mortifications & afflictions. Encore qu'il
faut qu'il soit reduict en cendre & poudre
par la mort *Mais ceste nostre petite sœur n'a
aucunes mammelles*, d'autant que le corps
ne reçoit encore sa recompense, & ne sera
glorifié iusques apres la resurrection des
morts. Lors il sera glorifié par le don d'a-
gilité, subtilité, & autres qualitez apparte-
nantes aux corps glorieux. *Mais il faut edi-
fier sur icelle un palais d'argent, & le fortifier
de cedre*, qui sera l'immortalité en laquelle
le corps sera incorruptible à toute eternité.

*Des reuelations que Dieu donne en ce dernier
chemin de perfection, conforme au pre-
mier état de sesle perfection.*

CHAPITRE XII.

Salomon a eu vigne en Beelamon. Il a baillé la
vigne aux gardes. Chacun hōme en apportera
pour le fruit d'icelle mil pieces d'argent. *Ma
vigne, qui est mienne, est à mon commandement.*
O Salomon a toy en appartient mil, & deux cens,
à ceux qui gardent ses fruits. Nostre vray
Salo-

Salomon c'est Iesus-Christ, lequel en sa passion a mis son corps au pressoir; ainsi que la grappe de la vigne, du fruit duquel tous en rapportent mil pieces d'argent, qui est le nombre accompli: auquel se represente la perfection, que tous les hommes peuvent acquerir par le merite d'icelle passion. Mais à nostre Seigneur qui est sa propre vigne, en appartient mil deux cens, qui est vne perfection par dessus tous les hommes. Comme le Fils de Dieu a esté le plus beau, & parfaict quant au corps par dessus tous les hommes: aussi quant à l'ame il a esté le plus parfaict entre tous les hommes; comme il appartenoit à cestuy qui estoit Dieu & homme.

Tuy qui habite es iardins, les compagnons entendent a ta voix, faisles que ie l'oye. Mon bien-aimé, fuy & sois semblable au cheureau ou au faon des cerfs, sur les montagnes des choses aromatiques. Qui sont ces iardins sinon les consciences? Mais l'espouse desire d'entendre sa voix. En apres elle dit, *Mon bien-aimé fuy & sois semblable, &c.* Le commencement de ces Cantiques de Salomon est, que l'espouse demande à son bien-aimé le baiser de sa bouche, mais pour la conclusion elle demande d'entendre sa voix. Le baiser est vn signe d'amitié, par lequel sont

mon-

monstrées les douces consolations diuines, que l'espouse reçoit de son espoux. Mais la voix & le parler de Dieu en l'ame, est de plus estroicte vnion diuine. Car le parler est si penetratif, & cause des abstractions, extases ou rauissemens avec des accez d'amour diuin plus forts que la nature, tant qu'ils sont contraincts de dire à son Dieu, cest assez Seigneur cest assez, retirez vous, car ie ne le scay plus supporter. Comme a faict le bien-heureux Pere Xavier, estant quelque fois si embrasé & enflambé de l'amour & consolation diuine, qu'il ouuroit sa poitrine, cest assez, Seigneur, cest assez.

Mais quant au parler de Dieu, & reuelation des choses secretes & futures, c'est en ce quatriesme estat de perfection, que l'ame voit aduenir, tout ce qu'au premier chemin de perfection auant l'estat de priuation nostre Dieu luy auoit reuelé. Ce qui luy donne vne grande assurance des doutes, que l'ame auoit au chemin de priuation. Et quant aux reuelations que Dieu donne en ce chemin de perfection, la personne en reçoit vne plus grande assurance par la lumiere qu'elle a acquise, & l'experience de celles qu'elle a eu au premier estat, & en ce qu'elle les voit toutes accomplies.

Et à present lors que nostre Dieu donne quelque

quelque reuelation, les operations de Dieu en l'ame sont toutes diuerses. Et le parler de Dieu laisse en l'ame d'autres impressions, lesquelles donnent à l'ame vne si viue assurance, qu'elle ne peut doubter si ce n'est pour la defiance de soy-mesme, que ce ne soit de Dieu. Au premier chemin les reuelations se faysoient le plus souuent, par quelque vision, comme quelque fois nostre Dieu se represente ainsi qu'il estoit en la flagellation, autre fois en sa resurrection, autre fois en forme de petit enfant, autre fois ainsi qu'un pere à son enfant, ainsi de diuerses manieres, comme que i'ay dict en son lieu. Mais presque tousiours ces visions sont de la veüe du corps, comme i'ay montré leur effect au premier liure. De ceste maniere de reuelation l'ame crainct quelque fois, que le diable ne prenne ceste forme, se montrant en Ange de lumiere, ou prenant la forme & representation de Iesus-Christ, comme il a faict à tant de saincts personnages. Ceste crainte n'est pas mauuaise, moyennant qu'on descouure tousiours sa conscience, à quelque bon pere spirituel, qui soit experimeté. Mais s'il n'est pas experimeté, il luy causera plus de mal que de bien. Lors il vaudroit mieux s'arrester aux bons liures, qui traitent des especes
des

des visions & reuelations, & la maniere par laquelle on peut cognoistre quand elles viennent de Dieu ou du diable. Et regarder à soy-mesme, si les effects sont tels que plusieurs sages personages nous enseignent. Et suiuant ce, se regler en cas que nous n'ayons personne qui nous enseigne. Or en ce dernier chemin les visions sont le plus souuent de la veüe de l'ame, quelque fois de la veüe du corps, mais fort peu. Et quant au parler de Dieu, il est presque tousiours intellectuel, lors que la personne est en l'oraison, ou quelque fois apres la reception du saint Sacrement de l'autel.

Ce parler de Dieu se faict à l'interieur de l'ame, duquel parler l'ame entend plus n'aïssamment prononcer les mots, que si c'estoit vne personne qui parloit. Et toutefois ce parler ne faict aucun son, & laisse telle impression en l'ame, que si cest quelque chose à aduenir que Dieu luy predict, ceste prediction demeure si imprimée en l'ame, que si tout le monde s'esleue pour mettre empeschement à la chose predite, (car le diable voit bien quand quelque chose est commencée, si c'est à la ruine, & à la gloire de Dieu, lors il y met tout empeschement par les creatures, que la chose n'aduienne) neantmoins l'ame ne perd vn seul point de
la

la confiance, & de l'assurance, que la chose ordonnée de Dieu aduendra.

Or en ces reuelations nostre Dieu vse d'une grande sapience, comme celuy qui est la mesme sapience, & qui cognoit toutes choses. C'est que nostre Dieu reuelant quelque chose à ses amis; le plus souuent il predict la chose qui doit auenir. Mais il ne dit pas tousiours par quel moyen la chose doit auenir, n'y en quel temps elle doit arriuer. Et ce pour le merite de la creature. D'autant qu'ignorant le temps, si c'est chose bonne au profit & consolation de l'ame, c'est à fin que la personne se dispose avec plus grand desir, & priere continuelle à la recevoir. Si c'est quelque chose facheuse, comme seroit l'affliction; c'est à fin que l'ame se dispose de tant plus à la mortification, pour la recevoir ioyeusement, & avec plus de perfection. Nostre Dieu ne dit pas aussi tousiours, par quel moyen la chose doit arriuer; par ce que si ce sont quelques grandes entreprises à la gloire de Dieu, où il faut que la personne y traueillie, nostre Dieu ne veut pas tousiours user des moyens surnaturels. Mais apres auoir reuelé la chose, laisse traauiller la personne par des voyes humaines, pour encore son plus grand merite. S'il aduient que la chose soit trop obscure;

obscure, nostre Seigneur reuele quelque fois, & enseigne à la personne les moyens; mais non tousiours. Il faut que telle personne meine vne vie pure. Aussi ne faut-il pas penser, lors que Dieu faict des graces surnaturelles, ou qu'il donnera lumiere de cognoistre la conscience de quelque personne, ou seulement quelque chose secreete de l'interieur; qu'ils'ensuiue que telle personne ait cognoissance de toutes les consciences, ni qu'il voye tout l'interieur de toutes les personnes. Mais seulement quand il plaist à Dieu luy monstrier, & de qu'elle personne il luy plaist. Et tousiours c'est pour la gloire de Dieu, & le salut des ames. S'il y en a eu qui ont eu cognoissance de toutes les consciences, ceste grace est tresrare. Encore que ces graces soient de grand priuilege de Dieu, qu'il communique à ses ames fidelles; si est-ce que ce ne sont pas choses à desirer. Nostre desir doit estre de faire la volunté de Dieu en toutes choses. Car sans ces graces nous ne laissons pas d'estre agreables à Dieu. Il ne faut pas pour ce mespriser ces personnes, à qui Dieu faict ces graces; car c'est vn signe de grande familiarité avec Dieu. Et si faut-il que ces ames qui ont ce grand priuilege de Dieu, ne soient pas ingrates. Car celuy qui ne reçoit qu'un talent,

talent, n'est obligé de rendre compte que d'un talent. Mais celui qui en reçoit deux, est obligé de rendre compte de deux. Donc ceux qui ont ce benefice, ne mesprisent les personnes qui ne l'ont pas: & de mesme ceux qui ne l'ont pas, ne soient ennieux sur les personnes à qui Dieu faict ces graces. Car en la maison de mon pere, il y a plusieurs demeures. Mais encore qu'il ne faut pas desirer ces graces surnaturelles; il ne faut pas laisser de s'y disposer par la vertu, & mortification, sans laquelle disposition nous nous rendons du tout indignes.

Du parfaict oubly de soy mesme en toutes necessitez corporelles, mesmes quant aux biens spirituels, & de la felicité eternelle, n'ayant memoire de soy, que pour recevoir les reproches, & la confusion.

CHAPITRE XIII.

L'ON dit communement, & la verité est telle, que là où l'amour est fiché; là est le cœur, la memoire, & tout le desir. Nous ne traicterons pas icy des mondains, qui mettent toutes leurs affections & leurs pensées aux choses perissables; d'autant qu'il

qu'il en est traicté au liure premier de l'Amour propre. Mais ie veux traicter des personnes, qui ont fiché du tout leur amour en Dieu, & qui en cest amour ont vn oubly de soy-mesme en toutes leurs actions, quant aux necessitez corporelles. Celuy-là qui a vrayement fiché son amour en Dieu, & qui ia est parueniu au degré de perfection, dont nous traictons, toutes ses actions corporelles, se font sans la reflection à soy-mesme, c'est à dire, avec vn oubly de soy-mesme. Pour quoy mieux donner à entendre, comme il faut tousiours entretenir le corps, pour seruir à l'ame, & l'ame à Dieu: ainsi la personne mange, boit, repose, & satisfait à toutes autres necessitez corporelles, sans penser à ce qu'elle fait, & le fait comme par accoustumance: c'est à dire, qu'il faut entretenir le corps, ayant tousiours l'esprit en Dieu. Et s'il aduient que la personne pour quelque peu de temps s'employe à vaquer à la necessité, ce luy est vn martyre; & voudroit si elle pouuoit, viure sans manger, sans dormir; & ne pouuant, ce luy est vne croix incroyable. Toutefois elle se resigne à la volonté de Dieu. De là vient que si on demandoit quelque fois à semblables gens, quand ils ont prins leur refection; ce qu'ils ont mangé, il ne leur en souuiendrait

Hh

pas;

pas : & s'ils cognoissent ce qu'ils mangent, ce n'est qu'en passant, sans y arrester la memoire. Mesmes quant au bien spirituel, qui consiste en deux manieres. La premiere est en vne parfaite charité en Dieu, par laquelle charité l'ame a vn si grand desir de la gloire de Dieu, qu'elle s'oublie soy-mesme. Mais bien-heureux est cest oubly, quand elle se laisse & abandonne, pour se laisser du tout en celuy, qui ne l'oubliera iamais. Mais quant à la memoire continuelle, que l'ame a de la vie eternelle, elle n'est pas pour soy propre : mais pour la gloire de Dieu, pour le glorifier, honorer, plus parfaictement, & iouir de celuy qu'elle aime sur toute chose. La deuxiesme est la charité vers le prochain, laquelle charité est si brulante, que n'ayant pas seulement memoire, d'exercer la charité corporelle, mais encore la spirituelle des ames : ces personnes prient sans cesse, la diuine misericorde, non seulement pour les pecheurs, mais aussi pour les iustes, à fin que Dieu leur donne la grace, de perseuerer au chemin de la perfection. Or ce desir est si insatiable, vers le salut de tout le monde, & des ames du purgatoire, que souuent elles s'oublient, de prier Dieu pour elles mesmes, à fin de satisfaire à la charité du prochain. Offrant à ces fins toutes leurs actions
spiri-

spirituelles & corporelles, comme acte de pénitence, mortification, & de vertu. Et ce desir du salut du prochain est si grand, qu'elles seroient contents d'endurer, toutes sortes de travaux, iusques à la fin du monde; pour seulement empêcher, la damnation d'une seule ame. Et seroient encore contents, si Dieu leur faisoit la grace, de passer ceste vie, sans auoir besoin de purgatoire, à fin de retirer les ames, qui endurent de si horribles peines, & tourmens, d'y entrer & souffrir pour elles, pour ainsi les en mettre hors. O charité heureuse! d'autant qu'en vertu de ceste charité, nostre Dieu faict souuent misericorde aux pecheurs, & diminue fort la peine, que les ames endurent au feu de purgatoire. Et quant à soy, bien que le desir de telles ames, soit de se priver pour quelque temps de la vision de Dieu, & d'endurer les peines du purgatoire, pour satisfaire à la charité du prochain: nostre Dieu augmente leur gloire, sans les faire endurer la peine, & satisfait à leur desir, au secours, tant des pecheurs, que des ames du purgatoire. Vne chose est de quoy telle personne se souuiet. C'est d'accepter la confusion & mespris des creatures. Pensant combien elle merite en toutes ces confusions. Car il n'y a si petit peché &

484 DE LA RVINE DE
imperfection, deuant la iustice de Dieu,
qui ne merite de grandes rigueurs. C'est
pourquoy faisant la reflection à soy-mesme,
l'ame accepte tout le mespris, & confusion
des creatures.

*Des exercices de ceux qui sont en ce degré, qui est
de prier pour tous pecheurs, & de la con-
trition qu'ils conçoient pour
leur amendement.*

CHAPITRE XIV.

AV chapitre precedent, nous auons
quelque peu touché de la charité du
prochain, ce que nous pouruiurons. D'au-
tant que c'est l'un des exercices des ames,
qui cheminent en ceste voye de perfection,
quand elles sont paruenues à leur fin der-
niere. Tous les exercices des vertus, sont
les moyens pour paruenir à la vraye & par-
faicte charité, de Dieu & du prochain, qui
est le lien par lequel les bien-heureux sont
conioincts en la gloire celeste. C'est pour-
quoy les personnes, qui ont acquis la vraye
vertu de charité, ne s'exercent plus en beau-
coup de multiplicité de petits exercices;
d'autant que ce ne sont que moyens pour
paruenir.

paruenir à la vraye vertu, qui est la parfaite charité, laquelle est graüée & plantée au milieu de leur cœur. Donc leur exercice est la mesme charité, qui est de prier Dieu continuellement pour le prochain. Et voyant les ames tomber en peché, ils en conçoient quelque fois de si viues contritions pour la perte des ames, comme pour la leur propre. De là vient, lors que le prochain leur faict quelque tort, ceste mesme charité leur faict grande douleur, du defaut de la charité du prochain, par lequel il est desuni de Dieu. Ne ressentant toutefois le tort faict à soy-mesme, d'autant que pour ce qu'il leur touche, ils s'en resiouissent. Mais du retardement de l'vñion que le prochain doit auoir avec Dieu; laquelle estant retirée par leur faute, cela leur est vne douleur incroyable. C'est pourquoy ces ames pleurent quelque fois, pour ceste desunion du prochain d'avec Dieu. Dequoy on iuge souuent remerciairement, disant qu'elles pleurent d'impatience. Cependant elles gardent leur secret. Car l'humilité les faict endurer toutes ces calomnies, plustost que de se donner à cognoistre. Mais qu'on se garde de se flatter sous ceste vertu; & au lieu de se ressentir de la perte du prochain, que ce ne soit pour son propre

486 DE LA RVINE DE
interest sensuel. Ce que l'on peut reco-
gnoistre, si ceste contrition est aussi gran-
de, quand la defunion est faicte entre deux
autres; & quand il ne nous touche de rien.
Or quant à l'exercice spirituel, qui est de
prier pour les ames: ces personnes n'ont
moins de charité corporelle, s'exerceant à
toute sorte de charité exterieure tant que
leur pouuoir le permet, pour la charité du
prochain, soit pour secourir le corps, soit
pour secourir l'ame. Embrassant à ces fins
toutes choses grandes, qui semblent quel-
que fois impossibles; & ce pour le salut du
prochain, tant est brullante la charité.

*Du Zele de la charité & union du prochain, &
comme on le doit mortifier, par ce qu'on
ne peut contenter le monde, puis
que le Fils de Dieu mesme
ne l'a peu faire.*

CHAPITRE XV.

IL n'y a vertu si parfaite, tant que nous
sommes en ce corps mortel, qu'il n'y ait
souuent de l'imperfection qui y suruient, si
on ne s'en garde. Le zele de la charité du
prochain est vne vertu heroïque. Or ceste
charité

charité est telle, qu'on voudroit bien contenter tout le monde, & que par soy ne manquast ceste charité & vnion du prochain. C'est pourquoy ces ames s'affligent quelque fois, quand elles voyent, que faisant de leur part tout ce qu'elles peuuent, pour garder ceste vnion, & charité à toutes, elles ne peuuent contenter les creatures; d'autant que ce qui plaist à l'une desplaist à l'autre. Par ainsi il faut que de quelque part que ce soit, il y ait de la contradiction des creatures. Et ne s'en faut esmerueiller, puis-que le mesme Fils de Dieu n'a peu contenter toutes les creatures. Voire mesmes que tous les miracles qu'il a faict, & tant de benefices, refuseitant les morts, donnant la veuë aux auengles, & vne infinité d'autres qu'il a faict à son peuple, ces mesmes benefices & bonnes œuvres ont esté la cause de l'enuie des Iuifs contre iceluy mesme nostre Sauueur, & de ceste enuie ont conspiré sa mort. Il faut donc que le seruiteur de Iesus-Christ ne se contriste, pour ne pouoir contenter les creatures. Je di contriste quant à soy-mesme, & non pas quant à la vraye contrition, comme j'ay dict au Chapitre precedent. Et pour mortifier ce zele indiscret, il faut de rechef s'vnir à la volonté de Dieu, apres auoir faict son deuoir.

Les creatures facent & disent ce qu'elles veulent, puis que Dieu est content, il fuffit pour nostre repos, car le seruiteur n'est pas plus grand que le maistre. Comme les creatures vertueuses du Fils de Dieu ont esté persecutées, ainsi le seront celles de ses seruiteurs. Iamais la vertu ne sera sans persecuteur. Que celuy-là doncques se reshoüisse, de pouoir imiter le Fils de Dieu, endurent le mescontentement des creatures, comme il a faict.

Que la plus grande croix de ces ames en ce dernier chemin de perfection est, de n'auoir pas d'affliction.

CHAPITRE XVI.

EN CORB, qu'il aduient quelque fois, que ces ames se contristent, pour le defect de charité du prochain, si est-ce qu'elles ne voudroient estre sans affliction. Que mesme elles n'ont plus grande croix, que quand elles sont sans croix. Nostre Dieu les laisse quelques fois en toute prosperité, & ce à fin qu'elles cognoissent, quel bien c'est de l'aduersité. Mais les seruiteurs de Iesus-Christ se voyans sans aduersité, il leur semble que Dieu les ait oublié. Ainsi que la terre

estant

estant long-temps, sans estre arrousee de la pluye, demeure infructueuse: ainsi l'ame sans affliction, deuiet plus seiche & aride aux bonnes ceuures. Mais lors il est bon que la personne ait deuant les yeux les pechez du monde, la perte des ames qui nuict & iour s'en vont en vn abyfme de peché, & du peché en enfer. Ou bien considere souuent les personnes affligées, qui sont au monde. Car ceste consideration, & la vraye vnion du prochain, fera que l'affliction du prochain sera sienne. Par ainsi ils satisferont à soy & au prochain. Et setont consolez en leurs amés, d'autant que la croix est leur consolation, leur appuy & leur soustien. Et de là vient que quelque fois d'allegresse d'endurer, ils nomment les tribulations, ma mere, ma sœur, mon soustien, mon appuy, & toutes mes delices.

De ce dont ces ames sont embrasées. & de sir que Dieu soit aimé & glorifié. & de la douleur qu'elles ressentent quant Dieu est offensé.

CHAPITRE XVII.

DE tant plus que le soleil vient à ietter ses clairs rayons brillans, sur quelque terre

terre crystaline, icelle receuant sur soy ses lumineux traicts, vient par mesme correspondance & sympathie, à produire de ce crystal quelque rayon, qui semble regarder & rejallir vers le soleil. Ce que neantmoins n'est autre chose, que les mesmes rayons du clair soleil; iettez sur ceste terre crystaline, qui est disposée à recevoir l'impression de ceste belle lumiere, laquelle produict cest effect. Or ces causes & exemples naturels me seruent fort à propos, pour demonster ce qui se passe pardessus la nature és ames, qui sont en cest estat suréminent. Car d'autant plus qu'elles sont purifiées de toutes imperfections (au moins tant qu'elles s'en peuuent exempter) d'autant plus aussi la terre de leur conscience est lumineuse. Voire elles sont comme vn crystal, duquel les clairs rayons brillants du soleil de iustice, dont elles sont illuminées, viennent à reuerberer vers leur principe.

Mais quels sont ces rayons, sinon la charité qui vient de Dieu en l'ame, & par vne mesme correspondance de l'ame à Dieu? Qui demanderoit ce que Dieu faict continuellement, & de toute eternité, & à toute eternité, on pourroit repartir à ceste question, que Dieu se loue soy-mesme, Dieu s'aime soy-mesme, se glorifie soy-mesme:

car nulle gloire n'est qu'à Dieu. Se complait en soy-mesme, & en ceste complaisance a produict son image, qui sont les ames. Dont en cest estat supereminent, outre ces voyes secretes, par lesquelles ces ames sont conduictes au chemin de perfection, ayant nettoyé les taches de ceste image, par la pureté de vie, & mortification, qui auparavant estoit gastée par le peché, icelle image estant toute lumineuse, reconnoit son Dieu de qui elle est l'image. Et par mesme moyen vient à produire les mesmes actions de celuy, de qui elle reçoit le pourtraict. Or comme nostre Dieu en son inaccessible charité, vient à produire ces mesmes rayons, sur son image l'ame fidelle: elle vient à rejallir par ceste mesme charité vers son principe, qui est son Dieu, par vne volonté & des desirs enflambez, que Dieu soit aimé & glorifié, tant de soy mesme, que de toutes creatures. C'est pourquoy l'ame voudroit, si elle pouuoit, que tout son corps, & toute la moindre partie d'iceluy seroient conuerties en langues, pour donner louange à son Dieu. Tant sont ces desirs insatiables produicts de la charité. Toutes ses complaisances ne sont ailleurs qu'en son Dieu. Toute sa gloire n'est en autre chose qu'en son Dieu. Tout son amour n'aspire

n'aspire à autre chose qu'à son Dieu. Brief tout son repos n'est en autre qu'en son Dieu. Et à l'opposite ce luy est vne peine incroyable, de veoir Dieu estre offensé de ses creatures. C'est pourquoy en ce dernier chemin, ces ames se retirent quelque fois de la contemplation, pour trauailler au salut du prochain, à fin de pouuoir rassasier leurs desirs, de pouuoir acquerir la loüange de Dieu en ses creatures. Et lors que par leur trauail elles peuuent acquerir, que Dieu soit vne fois loüé, ce leur est vne recompense assez grande, pour vn long trauail qu'elles ont prins.

De la charité que ces ames ont mesmes vers les damnez, conforme à la volonté de Dieu.

CHAPITRE XVIII.

QUOY que nostre Dieu par sa iustice, donne sa sentence contre les ames damnées, pour endurer les peines intolérables à toute eternité: si est ce qu'il monstre encore quelque charité en leur endroit, leur ayant créé vn lieu où elles se peuuent cacher de sa face. Et si Dieu pouuoit contre sa iustice les sauuer, son amour & misericorde

ricorde le feroit. Mais estant Dieu iuste & misericordieux ; il faut que sa iustice soit gardée comme sa miséricorde. De mesme vnion de volonté ; ces ames dont nous parlons , ont vne telle charité vers ces ames perduës & damnées , qu'elles seroient contentes d'endurer mil martyres , pour seulement en retirer vne seule de l'enfer. Mais ceste charité est conforme à la volonté de Dieu. Car quoy que ceste charité descende iusques au plus profond des enfers ; si est-ce que leur volonté est tellement conforme à la volonté de Dieu , & d'accomplir sa justice , que si son pere , mere , frere , sœur , & familier amy , estoit par sa mauuaile vie descendu aux enfers : entant que ceste rigoureuse sentence est à la gloire de Dieu , qui sont les effects de sa iustice : l'ame ne voudroit autre chose que ceste mesme volonté soit accomplie. Et n'en peut ressentir en soy aucun trouble , tant elle est resignée. Comme sont les ames glorieuses au ciel , voyant leur propre enfant en enfer ; elles n'en reçoient aucun changement ou alteration : mesmes en loüent Dieu , pour le veoir estre glorifié en sa justice.

*De l'union de leur volonté à la volonté
eternelle de Dieu.*

CHAPITRE XIX.

L'VN des plus grands empeschemens
en la vie spirituelle ; c'est le respect hu-
main. Mais icy en cest estat dernier de perfe-
ction ; tous ces respects humains sont sur-
montez , & consumez au feu de l'amour
diuin , par vne conformité de la volonté
humaine , à la volontéernelle de Dieu.
Or ceste conformité de volonté se faict par
vne veuë interieure ; par laquelle l'ame re-
cognoit la volonté de Dieu en soy , & ce que
de toute eternité Dieu a déterminé. C'est
pourquoy l'ame veut auec vn desir & vo-
lontéernelle ; tout ce que Dieu veut , c'est
à dire , que si l'ame auoit esté de toute eter-
nité , elle voudroit tout ce que Dieu veut
en toute eternité. Ceste maniere d'union
de volonté est fort meritoire ; & qui faict
surmonter tout respect humain. Car si tost
quel'ame apperceoit la volonté de Dieu en
quelque chose , il n'y a rien qui la peut em-
pescher , quoy que le monde parle & dise
ce qu'il voudra. C'est icy qu'on embrasse
chose

chose grande pour la gloire de Dieu. Il ad-
vient souvent en cest estat, que l'ame est
attirée à des voyes autres que le commun,
soit en austerité, soit en veille, ou solitude,
ou autre action, y estant appelé de Dieu.
Si l'esprit de Dieu estant reconnu est ap-
prouvé de vostre confesseur, & qu'il vous
le permette; suivez son adivs, quoy qu'on
vous y mette empeschement. Qui veut
complaire aux creatures, ne peut complai-
re à Dieu. Le plus souvent on reprouve en
communauté, de faire quelque acte ver-
tueux estant attiré de Dieu; d'autant que
l'enuie spirituelle, est autant dangereuse &
plus que l'enuie corporelle. On condem-
nera telle personne, si elle ne faict comme
les autres. Si elle s'addonne plus à l'oraison,
veille, ou discipline, on dira que c'est chose
particulière. Dites moy, tous les saints
n'ont-ils pas faict des œuvres autres que les
autres? Il est vray que nous ne devons pas
faire, tout ce que les saints ont faict; mais
bien les admirer. Mais si nous sommes at-
tirés de Dieu, & avec congé de nostre dire-
cteur, laissons les respects. Que l'on dise que
c'est pour faire de la sainte; pourveu que
nous faisons la volonté de Dieu. Il est vray
qu'en ce dernier estat, ces respects humains
sont surmontez. Mais ie parle aux personnes
qui

qui ne l'ont encore surmonté, car auant ce ils ont de la difficulté. Lors que les regles ont esté establies, elles ont esté faictes pour toutes personnes, autant pour les foibles, que pour les forts: d'autant qu'il faut faire les regles pour tous, à fin que tous s'acheminent à la perfection. Mais si Dieu en attire aucun en particulier à des actes plus releuez, soit de penitence, de solitude, veille, & discipline; pourueu qu'il ne le face de son propre iugement, & qu'il ait quelque bonne guide spirituelle, ce n'est pas contre la regle; mais accomplit la regle, qui est la perfection qu'il faut suiure, suivant que Dieu nous commande.

*Poursuite de la mesme conformité de sa volonté
à la volonté eternelle de Dieu.*

CHAPITRE XX.

D'VTANT qu'en ce petit traicté, nous auons suivant nostre petite capacité, monstre mystiquement, comment l'homme est vn petit monde: l'ayant au preallable monstre moralement par la diuersité des quatre saisons de l'année; les mesmes aussi mystiquement se retrouuent

en l'ame fidelle, & notamment en ces voyes secretes, par lesquelles Dieu attire l'ame à la perfection. Je di les voyes secretes, par ce que tous ne cheminent pas par ces voyes. Mais neantmoins sera ce traicté, pour consoler ceux que Dieu y attire. D'autant que là ils en verront comme le chemin estre frayé. Car voyât tout ce qui arriue, soit au premier, soit au deuxiesme, soit au troisieme, soit au quatriesme chemin de ceste perfection, compris en ces quatre liures; ils y trouveront comment ils s'y doiuent comporter, & les remedes contre les doutes qui arriuent en ces voyes. A faute desquels on tombe souuent, en des imperfections notables. Et l'ame demeure quelque fois en des grandes peines interieures, à faute de cognoistre le chemin où Dieu les attire. Or comme nous auons monsté que la premiere saison, qui est l'hyuer, est l'estat des pecheurs: la deuxiesme, qui est le printemps, represente l'ame conuertie & profitante, qui iouit des diuines consolations; mais encore imparfaitement: au troisieme qui est l'esté, où l'ame est en l'estat de priuation, du sentiment de la douceur & grace diuine: au quatriesme, qui est l'automne, est le dernier estat de perfection, où l'ame iouit du fruiet des vertus:

maintenant il m'est besoing de moralizer quelque peu, pour me servir d'exemple, & puis spiritualizer, & monstrier mystiquement, que tout ce qui arrive en ce grand vniuers, est compris mystiquement en l'ame fidelle, s'acheminant au sommet de la perfection. Car quoy qu'en ce grand vniuers le tout y est si bien ordonné par la sapience, & puissance, de ce grand architecte nostre Dieu: lequel par sa seule parole a ordonné, que tout ait esté fait avec tel poids & mesure, que par le cours du soleil & des astres celestes, les saisons ont leur cours & operations naturelles: comme nous auons deduit quelque peu au commencement de chaque liure: comme en hyuer le soleil retirant sa chaleur, il faut que la froidure opere ses effects: au printemps le soleil montrant sa clarté, donne plus de chaleur, l'hyuer est retiré, & fait le printemps ses operations: en esté le soleil montrant sa pleine chaleur, & ses rayons brillans dardans sur la terre, par vne grande & excessiue chaleur, cause des exhalaisons en l'air, & enuoye des orages & tonnerres: finalement en l'automne, où le soleil est montrant sa température; la saison est tempérée, & l'on vient à la iouissance des fruits de la terre, produits au long de l'esté.

Quoy,

Quoy, di-ie, que cecy soit en tel ordre: si est-ce que l'on ne voit pas moins la sapience diuine reluire, en ce qu'en vn mesme temps; en ce grand monde se retrouuent toutes les quatre saisons, operer chacunes leurs effects. Car comme lors qu'il est icy, & en ces pays nuict, il est ailleurs iour; cela estant causé par le cours du soleil, qui illumine, tantost nostre hemisphere, tantost l'autre: causant ainsi les tenebres, & la nuict en mesme temps: de sorte que quand il est icy hyuer, il est ailleurs esté, ailleurs le printemps, & ailleurs l'automne: & de mesme en nostre esté, est ailleurs l'hyuer; tellement qu'en tout temps, en ce grand vniuers, les quatre saisons de l'an, & leurs effects s'y retrouuent: de mesme est-il de nostre petit monde, qui est l'homme, & l'ame fidelle; auquel en ce dernier estat de sa perfection, se retrouuent toutes les operations des quatre saisons de l'an; cy deuant mystiquement remarquées, concourir ensemble. Le tout conformément à la volonté eternelle, de ce grand architecte nostre Dieu: lequel gouuerne aussi bien ce petit monde, qui est l'homme, comme il faiet ce grand vniuers, attendu mesme que ce grand monde, est faiet pour le petit monde. Car pour faire le premier, nostre Dieu

a seulement commandé, comme il est dit au liure de Genese, chap. 1. Dieu crea au commencement le ciel & la terre. Puis Dieu dit, qu'il y ait lumiere, & lumiere fut faicte. De rechef Dieu dit, un firmament soit faict entre les eaux, & fut ainsi faict. Ainsi de toutes les creatures, que la terre produise verdure, que les eaux produisent reptile, ayant ame viuante, que la terre produise creature viuante selon son espece, & fut faict. Mais quand il vient à l'homme, Dieu a parlé autrement : & a dit, faisons l'homme à nostre image & semblance, & qu'il ait domination sur tous les poissons de la mer, & sur tous les oyseaux du ciel, & sur les bestes, & sur toute la terre. Voyez amy Lecteur, quelle difference il y a entre la creation de toutes les creatures, & celle de l'homme. Car Dieu dit seulement, que la lumiere & toutes les creatures soient faictes, & elles ont esté faictes. Mais parlant de l'homme il dit, faisons l'homme à nostre image. En ce parler, faisons, y a grande energie. Car icy est représentée l'unité de la sainte Trinité. Car faisons est parler en pluriel, qui denotte les trois personnes de la Trinité; neantmoins vn seul Dieu. Où nostre Dieu a voulu monstrier par ceste operation diuine; combien la creation de l'homme, est plus digne, que de toutes les autres creatures. Aussi pour monstrier que
l'homme

l'homme (comme étant plus digne) doit de sa part coopérer à sa perfection : laquelle est demonstree par le franc arbitre, que Dieu luy a donné. Là où toutes les autres creatures, se gouvernent par leurs causes naturelles; étant neantmoins Dieu le principe de tout. Mais comme j'ay dit, que les diuerses saisons sont conduictes suivant le cours du soleil, & des astres celestes : ainsi ce petit monde est conduict par les operations du vray soleil de iustice nostre Dieu; & ensemble par la correspondance de la volonté de l'ame, à la volonté eternelle de Dieu. Et si nous voyons de plus pres, tout le texte du Cantique des Cantiques de Salomon : nous verrons par iceluy representée l'vnion de l'Espoux celeste, avec l'ame fidelle; laquelle est exposée mystiquement en tous ces trois liures. La sainte escripture est obscure selon la lettre. Mais comme vne noix étant rompuë, on y trouue le noyau dedans, c'est ce que l'esprit de Dieu, montre tellement en ce Cantique, que non seulement y est décrit le chemin & progres de l'ame, qui s'auance à la perfection: ains aussi l'estat d'icelle, quand elle y est paruenüe. Pour y estre tout approprié, suivant l'ordre par lequel l'ame s'achemine à ce degre parfait. Quand apres auoir dit quel est l'estat de peché;

puis discours de la pratique d'une longue mortification, les 5. & 6. chapitres sont appropriés à l'ame, ayant goûté les consolations diuines, & neantmoins ayant besoin de quelque aneantissement plus parfait, il est représenté par la myrrhe au 5. chapitre. Et les derniers chapitres est la parfaite consolation, au dernier estat de l'ame parfaite. Mais à present, l'ame estant paruenue à cest estat, elle gousté continuellement tout le sucre & la douceur, qui se retrouve en toutes les consolations des autres chemins. Et si bien icy elle gousté l'amertume de la myrrhe, qui se retrouve en tous les autres chemins: neantmoins les operations en sont tout autres. Et ne les gousté plus avec son interest, & avec imperfection; mais avec merite & perfection. Car l'hyuer, qui représente l'estat des pecheurs, se retrouve à present en l'ame, estant en cest estat de perfection. Mais non plus comme pecheresse, ou cōmettant le peché: ains en deux manieres. L'une, en ce qu'estant victorieuse, & ayant surmonté le peché, neantmoins comme enfant d'Adam, la nature corrompue demeure en elle. De sorte que l'ame ne se peut asseurer en ceste vie, de ne retourner à peché. C'est pourquoy l'ame a tousiours vne sainte crainte de retourner au peché, laquelle neant-

neantmoins luy est meritoire : d'autant que ceste sainte craincte , avecancantissement de soy-mesme, luy faict operer les vertus, & plus grand amour diuin. L'autre maniere est en ce que l'ame, quoy qu'vnie à Dieu, a tousiours vne veuë interieure ; par laquelle elle cognoit l'enormité de tous les pechez du monde, soit de soy en particulier, soit de toutes les creatures ; où l'ame produict larmes de penitence pour soy, & toutes creatures. Le deuxiesme chemin, où sont les consolations diuines, où l'espouse dit tout le premier vers du Cantique, *qu'il me baise des baisers de sa bouche*, se retrouve aussi en ce dernier estat. Car l'ame y baise à souhait son cher espoux celeste, c'est à dire, que l'ame iouit plus parfaitement des diuines consolations, que non pas au chemin mentionné au deuxiesme liure, lors l'ame produit larmes de douleur. Ainsi que la rosee celeste qui tombe au printemps, fait rauerdir les plantes, & fleurs : de mesme ces larmes produisent en l'ame, vn feruent desir de la perfection, & amour de Dieu. Se retrouve encore en ce dernier estat, la myrrhe des tribulations & persecutions, compris au cinquiesme & sixiesme des Cantiques, qui est monstré au troisieme liure de cest œure. Car soit que l'ame iouit de l'estat de Magdeleine, elle participe

aussi de l'estat de Marthe. Et tant que nous soyons en ceste vie, faut porter la croix avec Iesus-Christ, soit par la maceration du corps, soit par les occasions que Dieu enuoye. Le tout neantmoins conioinct au dernier estat, où est le dernier avec toutes ces operations du premier. Or l'ame produict larmes de charité. Mais voyez comme tout est conioinct ensemble, & qu'en ce dernier chapitre des Cantiques, l'ame iouit ensemble, de tous les fructs, de tous les autres chemins, non plus par des 2. 4. 6. années.

Mais nostre Dieu operant en l'ame, cecy se passe sans varieté, le tout operant selon la volonté de Dieu, sans estre iamais separée del'vnion du plus pur esprit avec son Dieu, & cecy se faict avec telle conformité de la volonté del'ame, à la volonté eternelle de Dieu, voyant que de toute eternité Dieu la veut auoir par ce chemin, & ceste perfection. C'est pourquoy l'ame ne peut vouloir ni choisir rien autre, sinon que ceste volonté diuine, soit accôplie en soy. Je di que l'ame ne peut vouloir, non que l'ame soit confirmée en grace (car comme i'ay dict cy dessus, elle peut encore retourner au peché) mais c'est à dire, que ce pur esprit & la supreme partie de l'ame, est si estroitement vnies au pur esprit diuin, qu'il luy semble

ble que c'est amour ne se peut iamais separer. C'est icy où l'esprit de Dieu est vraiment touché, c'est icy où le pur esprit de Dieu est vraiment gousté & reconnu, c'est icy où l'ame pleure larmes de feu, ie di de feu d'amour diuin, c'est icy vn chemin où peu paruiennent, & peu de personnes le peuvent vraiment entendre qui ne le goustent.

Quant ie di ceste vnion de la volonté de l'ame, à la volonté eternelle de Dieu, ce n'est plus par acte passif, mais par vne essentielle operation produicte en Dieu, de laquelle operation l'ame voit en Dieu l'vnion de ces deux volontez, laquelle de tout eternité a esté en Dieu. Non que l'ame ait produict l'vnion de la volonté, à la volonté de Dieu de toute eternité. Car Dieu ne l'auoit encore mise hors de soy par la creation. Mais en Dieu nous auons esté de toute eternité, d'autant que nostre Dieu de toute eternité a déterminé de produire hors de soy ceste creature, & ce par son amour. Et voilà comment ceste ame est vnüe à ceste volonté eternelle. Se voyant de toute eternité, que ceste ame ayant esté produicte hors de soy, retourne encore en soy par ceste vnion d'amour & de volonté. Car estant en la gloire des bien-heureux nous serons tous
en

506 DE LA RVINE DE
en Dieu ; où lors l'ame ne pourra plus se se-
parer de ceste vnion, ni retomber au peché.

*Quel effect produict l'vnion de ces deux volontez
de la creature au Createur.*

CHAPITRE XXI.

QUELLE est celle volonté eternelle de
Dieu, sinon Dieu mesme? Car il n'y a
rien en Dieu qui ne soit Dieu. Dieu est
amour, & l'ame estant ainsi vnice à Dieu
n'est qu'amour, ne respire qu'amour diuin.
Mais quel effect produict cest amour di-
uin? Il est dict au second liure de Moÿse,
dict Exode chapitre troisieme. *Moÿse pais-
sant les orailles de son beau pere, Dieu s'apparoit
à luy au buisson ardent, il regarda, & voicy
le buisson ardoit au feu, & le buisson ne se consu-
moit point. Lors Moÿse dit: l'iray maintenant,
& verray ceste grande vision, pourquoy le buis-
son ne bruste point. A donc le Seigneur veit
qu'il alloit pour regarder, & Dieu l'appella
du milieu du buisson, disant. Moÿse, Moÿse,
& il respondit me voicy, & dict, n'approche
point d'icy, deschausse tes souliers de tes pieds,
car ce lieu sur lequel tu es, est terre sainte.*

Or que veut dire ce feu qui bruste & ne
consume point, sinon ce feu d'amour diuin
qui

qui brusle sans cesse les ames qui luy sont vnies, & sans iamais se consumer? Ce feu diuin c'est la vie de l'ame, & encore la vie du corps. Qui est l'ame, laquelle embrasée de ces viues flammes, ne die que cest amour diuin est ce qui la ioustient en grace? C'est cest amour qui la viuifie contre le peché; car le peché donne la mort, & l'amour diuin donne la vie. Cest amour est vn feu si suaué, que l'ame qui en a vrayement gousté quelque petite estincelle, toute autre amour luy est amer. Amour qui rassasie le cœur humain. Amour qui rassasie les desirs insatiables de l'ame. Car rien ne peut donner repos, ni rassasier les bruslans desirs, que ce mesme feu d'amour. C'est ce mesme feu qui altere l'ame par des desirs insatiables, & c'est ce mesme feu qui la rassasie. C'est encore toy, ô amour diuin, qui donne la vie au corps. Car qui est celuy-là à qui ayant l'ame embrasée de ceste flamme, quelque chose puisse deffaillir au corps? Quelle abstinence? quelle penitence, quelles veilles est-ce que le corps ne souffre, quant l'ame est embrasée de ces flammes? C'est ce feu d'amour qui a faict viure la sainte Magdeleine au desert. C'est ce mesme feu qui a faict viure sainte Catherine de Sienc ne mangeant rien, & n'ayant
autre

508 DE LA RVINE DE L'AMOUR PROPRE.
autre sustentation que la reception de la
saincte Eucharistie, qui est ce mesme feu?
Car quel est ce feu diuin, sinon Dieu mesme.

Or les effects de l'vnion de ces deux vo-
lontez, de la volonté de l'ame à la volonté
eternelle de Dieu, c'est de donner la vie à
l'ame & au corps. Heureux donc celuy qui
iouit de cest amour, puis qu'il a la vie.

Mais nul n'y peut approcher, qu'il n'ait
deschauffé ses souliers. Ce sont les affections
de tout autre chose qui n'est pas Dieu ou
pour Dieu, de la mortification desquelles est
traicté en tous ces liures. Car ce feu d'amour
diuin c'est vne terre saincte, il s'y faut dispo-
ser pour s'en rendre capable. Qui penseroit
l'embrasser sans s'y auoir disposé, Dieu luy
dira comme à Moÿse, *n'approche point d'icy,
deschauffe tes souliers.* C'est à dire, mortifie
tes affections vitieuses, lequel ayant obéy
à la voix de Dieu, il meritera d'escouter la
parolle de Dieu, & iouir de ce feu diuin.
Bien-heureuse l'ame laquelle pour si peu
de travail qui finera, acquiert vn bien si
grand qui dure eternellement.

F I N.









8-4

